

**МУҲАММАД ЮСУФ**

## **САЙЛАНМА**

*Шеърлар  
Достонлар  
Шоир ҳақида хотиралар*

**«ШАРҚ» НАШРИЁТ-МАТБАА  
АКЦИЯДОРЛИК КОМПАНИЯСИ  
БОШ ТАҲРИРИЯТИ  
ТОШКЕНТ — 2007**

Сайланма: Шеърлар. Достонлар. Хотиралар. — Т.: «Шарқ»,  
2007. - 288 6.

Ўзбекистон халқ шоири мархум Мұхаммад Юсуф номини билмаган, лоақал у ёзган шеърларнинг бир сатрини хиргойи қилмаган юртдошимиз йўқ бўлса керак. «Сайланма»нинг ушбу тузатилган қайта нашрига шоирнинг китобхонлар томонидан самимий қаршиланган энг сара шеърлари, «Кўхна қудуқ» ва «Қора қуёш» достонлари, шунингдек шоир ҳақида замондошлари ёзган хотиралар киритилди.

**ISBN 978-9943-00-083-4**

© «Шарқ» нашриёт-матбаа акциядорлик компанияси Бош таҳририяти, 2007.

**БУ ХУШ ОНЛАР  
БИР ТУШДАЙИН ЎТДИЮ  
КЕТДИ...**

---

**Андижон вилояти, Марҳамат тумани,  
Умрзоқ Қорабоев ширкат хўжалиги,  
Қовунчи қишлоғи**

**Энахон ая Сотиболдиевага**

Муҳтарама Энахон ая!

Бошингизга тушган оғир мусибат — азиз фарзандингиз, халқимизнинг ардоқли шоири Муҳаммад Юсуфнинг бевакъ ўлими муносабати билан Сизга, оила аъзоларингизга, барча яқинларингизга чуқур ҳамдардлик билдираман.

Ўғлингиз Муҳаммаджон ноёб истеъдод эгаси, одамларга меҳрибон, соғдил, мард ва камтарин инсон эди. Шу боис бу мудҳиш хабар шоирнинг кўплаб дўстлари ва мухлислари каби менинг ҳам қалбимни ларзага солди. Унинг ёрқин хотираси барчамизнинг қалбимида доимо сақланади. Сизга Яратганимиздан сабр-тоқат ва бардош тилайман.

**Ислом КАРИМОВ,  
Ўзбекистон Республикаси  
Президенти.**

## СҮЗ БОШИ

Мұхаммад Юсуф деган шоир шеъриятта қандай кириб келганини адабиётимиз сезмай ҳам қолди. Аммо у тезда, ҳамманы ҳайрон колдириб, оғизга тушиб кетди. Унинг ижоди ҳақида гап кетганда, қўниңча қўшиқларини тилга оладилар. У қўшиқ ёзган ҳам, ўзини қўшиқчи шоир ҳисоблаган ҳам эмас. Унинг ёзганлари нихоятда долзарб мавзуда, ўта жиддий, аммо халқ дилига жуда яқин ва равон тилда ёзилган. Шунинг учунми, хофизлар уларни қўшиққа солиб юбордилар. Бу қўшиқлар қўшиқчилликни ҳам баланд поғоналарга олиб чиқди. Қанча-қанча ҳофизларни элга танитди.

Мұхаммад Юсуф қўшиқлари билан эмас, аввало халқ дардини баралла айтган, юрт муҳаббатини ҳеч кимга ўхшамаган мисраларда таърифлаган шеърлари билан танилди, шуҳрат қозонди.

Мұхаммаднинг шеърлари бир қараща жуда содда, жүн ёзиладиганга ўхшаб туюлади. Аммо унга ўхшатиб ёзиб кўрингчи? Кўлингиздан келмайди! Унинг осон ёзиладиганга ўхшаб кўринган мисралари мухлисларйни йиғлатди, кулдирди, ўз оғушига тортиб олди.

Одамлар унинг шеърларини ҳаяжонсиз ўқимайдиган, китобларини дўконлардан қидириб юрадиган бўлдилар.

Мұхаммад Юсуф Худо берган қобилият эгаси эканлигига ўзим гувоҳ бўлганман. Бир даврада Чўлпоннинг «Кўклам» шеъри тўғрисида гап борди. У менинг таърифимдан таъсиrlаниб кетдими, ичкари хонага кириб кетди-да, 10—15 дақиқа ўтгач чиқиб, қўлимга «Кўкламойим» шеърини тутқазди. Уни менга бағишлаганини айтди. Шеърни ўқиб, кўзимдан ёш чиқиб кетганди ўшанда.

Мұхаммаджон камдан-кам туғиладиган истеъдод эгаси бўлиш билан бирга, камдан-кам шоирда учрайдиган хислат эгаси — шуҳратдан қочадиган камсукум инсон эди. У шуҳратнинг эмас, шуҳрат унинг ортидан қувиб юрарди.

Муҳаммаджоннинг ёшлиқ, йигитлик йиллари Тошкентдай шаҳри азимда ўтди. У шу ерда омадини, баҳтини, шон-шуҳратии топди. Шошнинг болаҳоналарида «шоир» деган унвонга эришди:

*Мени шоир қилган қумсувоқ  
Болаҳоналаринг бор бўлсин.*

Ва бу юртдан бир умр бурчдор эканлигини бир умр ҳис қилиб яшади:

*Қирқ йил қуллуқ қилсан ҳам агар  
Узолмасман сендан қарзимни.*

Муҳаммад Юсуф баҳтли, омадли шоир. Унга мустақил юртини, озод халқини кўриш насиб этди. Юртининг энг улуғ байрамларида унинг қўшиқлари барадла янграйдиган бўлди. Ўзбекистон ҳақидаги шеърини ёшлар ҳатто ўз мадҳияларига айлантириб юбордилар. Шу ўринда ҳурматли юртбошимизнинг бу камсуқум шоирга шахсан эътиборини айтмай бўлмайди. Шоир Муҳаммад Юсуфга Президентимизнинг меҳрлари бобомиз Улуғбек ҳақидаги қўшиқни эшифтган пайтларидаёқ тушган эди. «Халқ шоири» унвонини ҳам мамнуният билан унга ўзлари топширган эдилар.

Муҳаммад Юсуфнинг нашр этилган барча китоблари қўлма-қўл бўлиб кетган. «Сайланма»нинг 1-китобини шоирнинг ўзи нашрга тайёрлаган эди. «Сайланма»нинг ушбу тўлдирилган, қайта ишланган нашрига эса унинг устозларининг ҳамда унинг шеърлари билан танилган машҳур ҳофизларнинг хотиралари ҳам киритилди.

**Озод Шарафуддинов,  
Ўзбекистон Қаҳрамони.**

## ЯНГИ ЙИЛ КЕЧАСИ

Күнгил маъюс тортди йилнинг сўнгида,  
Билмам, ниманг билан сеҳрладинг, қор.  
Бугун куппа-кундуз кўзим ўнгида,  
Яна бир ёшимни ўғирладинг, қор.  
Қирқинчи қасримга ўтайми энди,  
Кечаги ёшлигим эртакми энди?..

Баҳорим етгудек қўлим узатсан,  
Етолмай дилимни не деб юпатсан.  
Лайлакқор, азизим, ғалат байрам бу —  
Кулиб кузатсамми, йиғлаб кузатсан...  
Дардим жим ичимга ютайми энди,  
Кечаги ёшлигим эртакми энди?

Сўрсанг, севинчимдан ўқинчим кўпроқ,  
Сендан-да кумушроқ сочимдаги оқ.  
Йилим келмай туриб, йилим кетмоқда,  
Кўзда табассум-у киприқда титроқ.  
Мен ҳам сал шошдим-да, қайтайми энди,  
Кечаги ёшлигим эртакми энди?

Янги йил,  
Келавер қандай келсанг ҳам,  
Кимлар етди сенга, кимлар етмади.  
Сен янги йўлдошсан, сен янги ҳамдам,  
Йўқлаб келганингни ўзи бир байрам.  
Қулоғингга бир гап айтайми, энди,  
Кечаги ёшлигим эртакми, энди...

## ХАЛҚ БЎЛ, ЭЛИМ

Қадим юртга қайтсın қадим наволарим,  
Күмлар босиб қуrimасин дарёларим.  
Алпомишга алла айтган момоларим  
Рұхини шод этай десанг — халқ бўл, элим!..

Дунёга боқ, қадди сендеқ ким бор яна,  
Довруғи ҳам дарди сендеқ ким бор яна.  
Халқ бўлишга ҳадди сендеқ ким бор яна,  
Мозийни ёд этай десанг — халқ бўл, элим.

Сен тебратган бешигини Соҳибқирон,  
Сенинг боланг юлдузларга қўйган нарвон.  
Бир майизни қирққа бўлган бир тану жон —  
Кунларингга қайтай десанг — халқ бўл элим.

Дарё бўлиб жўшгин энди завқи улуғ,  
Байрамингда севинч кўз ёшингга қуллуқ  
Юртим деган жасур Юртбошингга қуллуқ,  
Унга қанот бўлай десанг — халқ бўл, элим.

Бўлар элнинг болалари бир-бирин дер,  
Бўлмас элнинг болалари бир-бирин ер.  
Бир бўл энди, қадри баланд қаддингни кер,  
Халқ бўл, элим, халқ бўл, элим, халқ бўл, элим!

## ВАТАНИМ

Мен дунёни нима қилдим,  
Ўзинг ёруғ жаҳоним,  
Ўзим хоқон,  
Ўзим султон,  
Сен тахти Сулаймоним,  
Ёлғизим,

Ягонам дейми,  
Топинган кошонам дейми,  
Үзинг менинг улұғлардан  
Улуғимсан, Ватаим...

Шодон куним гул отган сен,  
Чечак отган изимга,  
Нолон куним юпатган сен,  
Юзинг босиб юзимга.  
Синглим дейми,  
Онам дейми,  
Ҳамдарду ҳамхонам дейми,  
Офтобдан ҳам ўзинг меҳри —  
Илиғимсан, Ватаним.

Сен Машрабсан,  
Халқда тумор,  
Балхда дорга осилган,  
Навоийсан, шоҳ ёнида  
Фақирни дуо қилган.  
Яссавийсан, меники деб,  
Кўринган даъво қилган,  
Минг бир ёғи очилмаган  
Кўриғимсан, Ватаним.

Сен Хўжандсан,  
Чингизларга  
Дарбозасин очмаган,  
Темур Малик орқасидан  
Сирдарёга сакраган,  
Муқаннасан қорачиғи  
Оловларга сачраган,  
Широқларни кўрган чўпон  
Чўлиғимсан, Ватаним.

Ким Қашқарни қилди макон,  
Ким Энасой томонда,  
Жалолиддин — Курдистонда,  
Бобуринг — Хиндистонда,  
Бу қандай юз қаролиғ деб,  
Ётарлар зими斯顿да,  
Тарқаб кетган түқсон олти  
Уруғимсан, Ватаним...

Үғлим, десанг осмонларга  
Фирот бўлиб учгайман,  
Чамбил юртда Алломишга  
Навкар бўлиб тушгайман,  
Падаркушдан пана қилиб  
Улуғбегинг қучгайман,  
Фичир-фичир тишимдаги  
Сўлиғимсан, Ватаним...

Ўтган кунинг — ўтган кундир,  
Ўз бошингга етган кун,  
Қодирийни берган замин,  
Қодирийни сотган кун.  
Қўлин боғлаб,  
Дилин доғлаб,  
Етаклашиб кетган кун,  
Воҳ болам! деб айттолмаган  
Дудуғимсан, Ватаним.

Ёнингда қон йиғлаган бир  
Шоирингга қараб қўй,  
Гар Кўқонга йўлинг тушса,  
Детдомларни сўраб қўй.  
Хеч бўлмаса Усмон хокин

Келтирмоққа яраб қўй,  
Олисларда қуриб қолган  
Қудуғимсан, Ватаним...

Сен — шоҳлари осмонларга  
Тегиб турган чинорим,  
Ота десам,  
Ўғлим деб,  
Бош эгиб турган чинорим,  
Қўйнимдаги ифтихорим,  
Бўйнимдаги туморим,  
Ўзинг менинг улуғлардан  
Улуғимсан, Ватаним!

## ЖАЙРОН

Қон йиғлатди қайси бағритош,  
Жайрон, нега кўзинг тўла ёш?  
Оёғингга қўйиб ётай бош,  
Жайрон, нега кўзинг тўла ёш?..

Юрак қонинг тўкилган сўқмоқ  
Бағри алвон лолақизғалдоқ,  
Сенга тошлар отди қай гумроҳ,  
Жайрон, нега кўзинг тўла ёш?..

Зор йиғладинг бунча ҳам ҳайҳот,  
Менда ҳам бор сендаги сайёд...  
Эй беозор, эй мўмин жонзот,  
Жайрон, нега кўзинг тўла ёш?..

Бу дунёning нокаслари бор,  
Эзгуликни кўролмайдилар.

Мени ҳам қон қилдилар улар,  
Жайрон, нега күзинг тўла ёш?..

Лабим билан яранг силайман,  
Сенга дарди шифо тилайман,  
Кел, туғишиган оғанг бўлай ман,  
Жайрон, нега күзинг тўла ёш?..

## МЕХР ҚОЛУР

Ўтар қанча йиллар тўзони,  
Юлдузлар — кўзёши самони.  
Ўтар инсон яхши-ёмони,  
Мехр қолур, муҳаббат қолур.

Қорачуғда порлаган ўша,  
Иқболига чорлаган ўша.  
Дунёни тор айлаган ўша —  
Мехр қолур, муҳаббат қолур.

Анор сенинг юзларинг, сулув,  
Хумор сенинг кўзларинг, сулув,  
Ёдда қолмас сўзларинг сулув,  
Мехр қолур, муҳаббат қолур.

Оқиб кетди сувларда Тоҳир,  
Зухро йиғлаб қолди қон бағир.  
Келганда ҳам қиёмат охир,  
Мехр қолур, муҳаббат қолур.

Нима дейсан, эй, ғаюр инсон?  
Фийбатларинг қилди мени қон.  
Сен ҳам бир кун ўтурсан, ион,

Мехр қолур, муҳаббат қолур.

\* \* \*

Шеърият бу қадим буюк  
Сүқмоқ әкан,  
Кийиксүқмоқ әкан, кийик  
сүқмоқ әкан.

Шириң азоб әкан, жонни  
Ёқмоқ әкан,  
Бир қўлда гул, бир қўлингда  
чақмоқ әкан...

Юрагим-ей, бошлаб келдинг  
мени қайга?  
Бағрим ўхшар пора-пора  
Бўлган найга.

Кўнглим сезар бу сўқмоқдан  
Ўтолмайман,  
Қайтиб кетай десам қайтиб  
Кетолмайман —

Чақиртошлар товонимдан  
Тишлаб олган,  
Кўлларимдан кийикчалар  
Ушлаб олган.

## МУҲАББАТ

Мұхаббат, эй гүзал изтироб,  
Эй күхна дард, эй күхна туйғу.  
Күкрагимга қўлингни тираб,  
Юрагимни тўкиб қўйдинг-ку.

Қанча қўзлар менга зор эди,  
На ғам, на андуҳим бор эди.  
Қушдай енгил руҳим бор эди,  
Чок-чокидан сўкиб қўйдинг-ку.

Не қиласардинг менга тегиб сен,  
Енгилмаган эдим — енгиб сен,  
Бошларимни ерга эгиб сен,  
Қоматимни букиб қўйдинг-ку.

Сен мен учун бир хаёл эдинг,  
Яхши бор ё яхши қол эдинг.  
Жон керакми — мана ол энди,  
Қийнар бўлсанг қийнаб тўйдинг-ку.

Билмам, нима эди мақсадинг:  
Менга бир жуфт гулинг асрардинг,  
Бирин отин Кумуш атадинг,  
Бирин исмин Зайнаб қўйдинг-ку.

Мұхаббат, эй гүзал изтироб,  
Кўчанг кездим сарсон, довдираб,  
Юзларимга юзларинг тираб,  
Кўзларимни бойлаб қўйдинг-ку!..

## **СУВПАРИ**

Сени ҳеч ким севолмайди менингдек:

Васлингга зор бу ошиқлар, әхтимол,  
Пойингга тиз чўкиб йиғлар, әхтимол,  
Лекин содик бўлолмайди менингдек!..

Алданма ёр, алдамчилар макрига,  
Малак бўлма бевафо ишқ шаҳрига,  
Улар сени бир босса бас бағрига,  
Сени ҳеч ким севолмайди менингдек.

Йўлинг кесиб ўтсам — ўзим хижолат,  
Узокдан бир сени кўрсам кифоят,  
Бир нигоҳинг ўзи менга иноят,  
Сени ҳеч ким севолмайди менингдек.

Жонингга жон бўлмайман-у, севаман,  
Ёнингга бир келмайман-у, севаман,  
Исмингни ҳам билмайман-у, севаман,  
Сени ҳеч ким севолмайди менингдек.

Сен кўқдаги ҳарир кўйлақ, хур-пари,  
Кўк кўлдаги тиниб қолган сув pari.  
Муҳаммаднинг кўнглидаги дилбари,  
Сени ҳеч ким севолмайди менингдек.

## ТЎЙ КЕЧАСИ

Юзга упа сурмасдан,  
Тўлин бўлди Зебижон.  
Ўн саккизга кирмасдан,  
Келин бўлди Зебижон.

Мен не дердим, нима дей?  
Олов эдик, шўх эдик.

Зеби билан эринмай  
Үн йил бирга ўқидик.

Эски мактаб, алвидо,  
Хоналари тор эди.  
Үртамиизда бир Худо,  
Бир сиёҳдон бор эди.

Мен лапашанг, албатта,  
Сўрамадим кўнглини.  
Ўн йил ўқиб бир марта  
Ушломадим қўлини...

Ўлтирибман энди жим,  
Кекса онам олдида.  
Тўйга мен ҳам борардим,  
Ёмғир ёғиб қолди-да!

## КУНДОШЛИ УЙ

Муштипару мунглиғ сенсан,  
Кўзингда ёшлар шашқатор.  
На бева, на қаллиқ сенсан,  
Ойлар чиқиб, ойлар ботар.

Хоҳ Кумуш бўл, хоҳ бўл Зайнаб,  
Бахтлиман деб айттолмайсан.  
Кундошли уйда сен яйраб  
Яшолмайсан, яшолмайсан.

Бек бўлмаса чўпон — боринг,  
Бағри дилинг тўлсин экан.  
Ғариб бўлса ҳамки ёринг,

Ўзингники бўлсин экан.

Кундошли уй вайронадир,  
Ош ўрнига — айрон татир.  
Кошонанг бўлса ҳам қаср,  
Ғамхонадир, ғамхонадир.

Хоҳ Кумуш бўл, хоҳ Зайнаб,  
Бахтлиман, деб айттолмайсан.  
Кундошли уйда сен яйраб  
Яшолмайсан, яшолмайсан.

## МУДДАО

Кузда гўзал бизнинг Фарғона,  
Қиёси йўқ жаннат маскандир.  
Уйимизни соғиндим, она,  
Боғимизда беҳи пишгандир...

Елар елдек, қирда беарқон  
Түёқлари чақноқ кулунлар.  
Сойда танга сочардир ҳамон  
Ўғил сўраб сулув келинлар.

Сиз-чи, юрибсизми ғимиirlаб,  
Кўнглингизда ғаройиб ҳислар.  
Олдингиздан ўтса қиқирлаб  
Сочига қўл тегмаган қизлар.

Мен ҳам ўша-ўшаман, нодон,  
Гоҳ панд бериб, гоҳида панд еб.  
Машхур қил, деб сўраб Худодан,  
Тиламабман баҳтли бўлай деб...

Кузда гўзал бизнинг Фарғона,  
Қиёси йўқ жаннат Ватандир.  
Хатим тамом. Айтгандек, она,  
Зеби эрга тегиб кетгандир?!

### **ЗЕБИ, ЗЕБИ...**

Сузилма ой осмонда,  
Сендан тўлин юзлар бор.  
Сурхон деган томонда  
Ойдан ойдин қизлар бор.

Зеби дейман, Зебона,  
Ишқингда мен девона,  
Болаликда дўст қизлар,  
Бўйга етгач — бегона!..

Чоғим етмас чоғласам,  
Офтоб эрир тафтидан.  
Кечагина хоҳласам,  
Сув ичардим кафтидан.

Зеби дердим, Зебона,  
Ишқингда мен девона.  
Болаликда дўст қизлар,  
Бўйга етгач бегона...

На у менга эланди,  
На мен унга қайрилдим.  
Дўстим унга уйланди,  
Дўстимдан ҳам айрилдим.

Зеби дедим, Зебона,  
Севганим сен ягона.  
Болалиқда соғ қизлар  
Бўйга етгач — девона!..

## НЕТАРМАН

Ўзинг бор-а, ўзинг бор,  
Бир қуралай кўзинг бор.  
Ердан юмшоқ юзинг бор,  
Ўполмасам нетарман...

Ғамдек ширин севинчсан,  
Қирқ йигитга илинжсан.  
Қиндан чиқмас қиличсан,  
Чополмасам нетарман?..

Кўк далада ётгандим,  
Хаёлларга ботгандим.  
Оғзимдаги оқ қандим —  
Ютолмасам нетарман...

Чангимагин, тупроқ йўл,  
Бўлгин менга ўртоқ, йўл.  
Ёлғизбошман, ёлғизқўл,  
Чополмасам нетарман.

Яқинлашгач уйимга,  
Ўй қўшилар уйимга.  
Қайтай десам изимга —  
Қайтолмасам нетарман...

Хотин очар эшикни,

Тутқазади бешикни.  
Бола зўрми ё ишқми?..  
Айттолмасам нетарман.

## ОЗОДА

Озодани севаман мен, Озодани,  
Сулувларнинг сарвари — хонзодани.  
Йўлатмасман ёнига шаббодани,  
Озодани севаман мен, Озодани.

Кўрганману кўрганим эртасидан,  
Юрагим қоқ бўлингган ўртасидан.  
Ҳар куни бир ўтаман кўчасидан,  
Озодани севаман мен, Озодани.

Ўтаман-да. Ўтмасам бўлмайди ҳеч,  
Ўтмай десам, кўнгил ўлгур тўлмайди ҳеч.  
Кўзим тойиб кетаверар — қўймайди ҳеч,  
Озодани севаман мен, Озодани.

Бир эсласам зирқиллайди банди-бандим,  
Кечагина бир қизчани ўйнатгандим!  
Кучугига оққанд бериб ўргатгандим,  
Озодани севаман мен, Озодани.

Тушунмаслар кулади: эсиз-эсиз,  
Кимдир эрмак қиласди: эсиз-эсиз,  
Хотиним ҳам билади, нима дейсиз?  
Озодани севаман мен, Озодани.

Йигит қирқда қирчиллаб ғарқ пишади,  
Эрта-индин сочимга оқ тушади,

Чин ошиқлар қирқ йилда топишади!  
Озодани севаман мен, Озодани.

Севган әдим, ҳамон у суюкли ёр,  
Билагида бармоғимнинг изи бор.  
Озоданинг бир ўғил, бир қизи бор...  
Мен барибир севаман Озодани.

## БИЗ БАХТЛИ БЎЛАМИЗ

*H. ga*

Майли-да, кимгадир  
Ёқса,  
Ёқмаса,  
Уларга қўшилиб  
Йиғлашармилик.  
Биз бахтли бўламиз  
Худо хоҳласа,  
Худо хоҳламаса  
Учрашармилик...

Райҳон ҳидларингни  
Йўлларимга сеп,  
Кут мени,  
Ҳар оқшом,  
Кўкка ой чиққан.  
Фақат,  
Йиғламагин,  
Гуноҳим не деб,  
Айбинг —  
Онанг сени  
Чиройли туққан!..

Менга  
Бир табассум  
Ҳадя эт, эй ёр,  
Нур томсин  
Лабларинг  
Соҳилларидан.  
Ўзинг айт,  
Сендай қиз  
Яна қайда бор,  
Киприклари узун —  
Кокилларидан?..

Ийманиб яшама  
Хаёл пинжида,  
Ёйил,  
Яйра жоним,  
Ўртанма ғамда.  
Фийбатларга чида,  
Тухматга чида,  
Сен биттасан, ахир,  
Ёруғ оламда.

Мен эса  
Ошиғинг сенинг —  
Энг ғариб.  
Тундан сўз  
Қарз олиб,  
Тонгга тутгувчи.  
Сенинг ёнингда ҳам  
Сени ахтариб,  
Сенинг ёнингда ҳам  
Сени кутгувчи.

Иста,  
Тиз чўкаман  
Ҳозир олдингда,  
Севдим,  
Севганимдан  
Уялмоқ нечун.  
Барча фаришталар  
Сенинг қалбингда  
Ижарада турган  
Қизлар мен учун!..

Биз баҳтли бўламиз  
Худо хоҳласа,  
Худо хоҳламаса,  
Учрашармидик?!

## **МЕН БИТТАДУРМАН**

Санам, сочингдан ҳам шайдоларинг кўп,  
Хуснинг ошиқлари — адоларинг кўп.  
Ниманг кўп, кўйингда гадоларинг кўп,  
Аммо мен биттаман, мен биттадурман.

Бек йигит бир сенинг пойингда хорман,  
Гарчи дийдорингга муштоқу зорман,  
Мен беун севарман, мен жим севарман,  
Қиёматгача шул сукутдадурман.

Дейдилар: муҳаббат билмас масофа,  
Айрилиқни писанд қилмас масофа.  
Келурсан ўзинг деб бир кун инсофа —  
Гоҳи Тошкент, гоҳи Ургутдадурман.

Тилинг билмасам ҳам тушунгандайман,  
Сен билан гоҳи дўст тутингандайман.  
Гоҳи бу дўстликдан ўкингандайман,  
Минг бир хаёл ичра минг биттадурман.

Сўймоқ бу — гулханда куймоқ азали,  
Мен шаҳар эркаси, сен тоғ гўзали.  
Эслаб юр ёдингга тушган маҳали —  
Шайдоларинг кўп-у, мен биттадурман!..

## НИМА ҚИЛАЙ

*Мұхаммад Зоирга*

Озодажон, ўзинг айтгин, озодмисан,  
Дунё обод бўлмади, сен ободмисан?  
Кўксимдаги севинчмисан, фарёдмисан,  
Сенга Ойша бибиларнинг баҳтин тилай,  
Мұхаммадман — пайғамбармас, нима қилай?

Ой юзингдан тўклилади номсиз оҳлар,  
Бўйнингдаги садафми ё кўзмунчоқлар?  
Қўйнинг тўла бўлсин дейман қўзичноқлар,  
Ўтсан дейман бир тўп болангга баҳт тилай,  
Ўзим бирор боласиман, нима қилай?

Ширин-ширин қарашларинг менга жаннат,  
Менинг учун сени яратганга раҳмат.  
Юрагингни менга қаратганга раҳмат,  
Балки менинг баҳтим сенсан, қайдан билай,  
Сен арзанда, мен арзанда, нима қилай?

Онам айтар; бу дунёда бола азиз,

Болам-ку, бол, менга дарду нола азиз.  
Сочларингдан тўқилган бир тола азиз,  
Умрим ўтсин сочларингни силай-силай,  
Бир Машраби девонангман, нима қилай?

Капалақдай айлан ўзинг бошларимдан,  
Узилмасин бармоқларинг қошларимдан,  
Бино бўлдинг кўзимдаги ёшларимдан,  
Ёрижоним, қандай йиғлаб, қандай кулай,  
Жонни икки бўлиб бўлмас, нима қилай?

## ЁЛГОНЧИЛАР

Сулувлардан сулув бир қиз сочим силар,  
Менинг эса кўзларимдан ёш томчилар.  
Севаман деб алдар мени ёлғончилар,  
Юрагимни йўлбарсларга едираман.

Бағри-дилим куйдиради ёлғонлари,  
Ёнларига чорлар моҳи тобонлари.  
Бўлсам агар мен битта қурбонлари,  
Юрагимни йўлбарсларга едираман.

Кўхна дунё, бу қизларинг бунча гўзал,  
Қараб турсам, кўкларда ой-кунча гўзал.  
Қанча гўзал бўлса, алдар шунча гўзал!..  
Юрагимни йўлбарсларга едираман.

Хозир кўзим юмаману ерга ётиб,  
Юрагимни суғураман қон йиғлатиб.  
Йўлбарсчалар есин уни касирлатиб —  
Юрагимни йўлбарсларга едираман.

Кимни суйсам суйганимдан куйган дилим,  
Күз ўнгимда бўлақолсин тилим-тилим.  
Ҳаром бўлсин муҳаббатсиз қўрган куним,  
Юрагимни йўлбарсларга едираман!..

## ТУШЛАРИМГА КИР

Капалакдай келиб,  
Қошингга қўниб,  
Кўзингга термулиб умрим ўтсайди...  
Нима ҳам кўрибман мен йигит бўлиб?  
Сочингни силашга қўлим етмайди.  
Пешонам шу экан, пешонанг шудир,  
Тушимга кир энди, тушларимга кир.

Товонинг ўпади ариқдаги сув,  
Кўйлагинг этагин ўпади майса.  
Мен-чи, бир гиёҳча бўлолмадим-ку,  
Эй, кўзлари жайрон, киприги найза!  
Пешонам шу экан, пешонанг шудир,  
Тушимга кир жоним, тушларимга кир.

Кўчиб бораётир бу уmr — карвон,  
Кунларнинг бўйнида юрак қўнғироқ.  
Мен сенга армону сен менга армон,  
Кўнглимнинг тўрида тутар шамчироқ.  
Пешонам шу экан, пешонанг шудир,  
Тушимга кир жоним, тушларимга кир...

Капалакдай келиб, қошингга қўниб,  
Кўзингга термулиб умрим ўтсайди.  
Қолдингу бағримда жонимдек бўлиб,

Сочингни силашга қўлим етмайди.  
Пешонам шу экан, пешонанг шудир,  
Тушимга кир жоним, тушларимга кир...

## СЕВГИ САДОСИ

Гулим, меҳр кўзда дегани ёлғон,  
Менинг дилимда ҳеч ўчмас ёлқинсиз,  
Қанча кўришмасак шунча қадрдон,  
Қанча олис бўлсак шунча яқинсиз.

Девона ошиқман, мен бир девона,  
Айтинг, сиздан бўлак кимим бор яна?..  
Сиз йўқ чоғимдаги дунём бегона,  
Сиз йўқ боғимдаги гуллар ёқимсиз.

Сиз аччиқ қисматим, сиз изтиробим,  
Сиз ширин дардимсиз, ширин азобим,  
Сиз менинг кўклардан топган офтобим,  
Ерларда йўқотган кўзмунчоғимсиз.

Ёдимда кечаги шўхликларингиз,  
Кўксимни куйдирган киприкларингиз,  
Сиз ўша — орзуси ойдан ойдин қиз,  
Сиз ўша — кулгуси қўнғироғмисиз.

Сиз ўша кўзимнинг кифтида юрган,  
Сиз ўша кўнглимга кўнгли ин қурган,  
Тўкилай деб тилим учида турган  
Шеъримсиз, бир умр битмас оҳимсиз...

\* \* \*

Севги бамисоли лолақизғалдоқ,  
Тегинмай бўлмайди,  
Тегсанг тўкилар.  
Алвон бир гумбазнинг ўртаси оппоқ...  
Буни бир мену бир капалак билар.

Мен ўша гумбазга бошимни суқдим —  
Қизил кўйлакли бир қизгина кулар:  
Бундай боқма менга, уқдингми?  
Уқдим...  
Буни бир мену бир капалак билар.

Сўнг у оққанотим учдию кетди,  
Унинг умри бир кун — чошгоҳда ўлар.  
Момо ер айланиб манзилга етди,  
Буни бир мену бир чархпалак билар...

Севги бамисоли ғарқ пишган шотут,  
Тегинмай бўлмайди,  
Тегсанг тўкилар.  
Севдингми, юз йил кут,  
Севмасанг унут!..  
Бунисин бир мену бир малак билар.

У мени кутади юз йилдан сўнг ҳам.  
Кўр бўлиб қолгунча йўлга термулар...  
Севги — менинг барча дардимга малҳам  
Буни бир ўзиму бир юрак билар.

## МАКТУБ

Севгилим,

Севгилим,  
Оғрийди дилим.  
Жоним оғрийверар сизни ўйласам.  
Гулдай юзингизни силар энди ким,  
Мени эслармисиз — йўқми ўшал дам...

Булутлар кўк кезар қунда пиёда  
Уфққа офтоб ботар қизил гулхандай.  
Армоним экансиз ёруғ дунёда,  
Сизни ўйламасдан яшарман қандай?

Кўнглим айвонида куз ҳуштак чалар,  
Кўзимдан ёш бўлиб ёғади япроқ.  
Дўстларим — такаббур шоирваччалар  
Ўзларин севишар ёридан кўпроқ.

Кунларнинг кафтида севги ханжари,  
Бағримда бегуноҳ бир гул сўлади.  
Тойчиққа айланиб гоҳ кечалари.  
Тупроққа ағанаб ётгим келади!..

Севгилим,  
Севгилим,  
Оғрийди дилим.  
Жоним ёмон оғрир сизни ўйласам.  
Сунбул сочингизни силар энди ким,  
Мени эслайсизми-йўқми ўшал дам.

Билмайман.  
Билишни истамайман ҳам.  
Билганим — менга баҳт насиб этмади.  
Йиллар ўтаверди, кўзим ўнгидан,  
Сизнинг ойдек руҳсорингиз кетмади...

Дунё омон бўлсин,  
Сиз бўлинг омон,  
Омадли бўлинг сиз.  
Бахтли бўлинг сиз.  
Лекин,  
Билиб қўйинг,  
билиб қўйинг, ҳамон  
Сизни унутолмас Мұхаммадингиз!

## СИР

Шамолдек беқарор шоир севгиси,  
Унинг бор давлати — савлати.  
Софинчдан ёқар-у райҳонлар иси,  
Мени танлаганинг ғалати...

На бир ширин калом минг заҳматингга  
На бир саломингга алик олади.  
Мұхаббатинг нима Мұхаммадингга?..  
Қаламни қучоқлаб ухлаб қолади.

Қасри шухрат аро қон йифлар юрак,  
Кўксингда нимадир ғижжак чалади.  
Унга шеър керақдир,  
Сенга эр керак.  
Кошки тушунса у валади...

У сўз кутар, уни сен кутиб ойлаб,  
Бир умр йўл қараб қўзинг толади.  
Севгилим, фариштам... тентагим, ё раб  
Бахтингни ярмини шеърим талади!..

Гуноҳинг не эди, эй мунглиғ дилбар,

Сени танлаганим ғалати...  
Асл шоир асли уйланмай ўтар,  
Уйланса ҳам күрмай хотин олади.

\* \* \*

Тузалмайди дардим менинг,  
Ўлсам керак.  
Тупроқ билан оға-ини  
Бўлсам керак.

Ўлим нима? Бу ҳам битта  
Сайр, Она.  
Ўғлинг қаро ерга кетди,  
Хайр, Она...

Тузалмас бу дардим менинг,  
Умидим йўқ.  
Хира шамдек кўзларимда  
Сўнмоқда чўғ.

Чўғ нимадир? Чўғ ҳам тутаб,  
Кул бўлади.  
Инсон бир кун ўз майлига  
Кул бўлади...

Юрагимни тамом қилдим,  
Йиглайвериб.  
Хузуримда ажал турар,  
Қошин кериб.

Мен ҳаётда ўлимга тик  
Боқиб ўсдим...

Қани менга аталған жой,  
Кетдік, дүстим!

\* \* \*

Азизимсан,  
Бахтиёримсан.  
Ишонганим — вафодоримсан.  
Ёлғизимсан... Умринг ўлчовли,  
Қарға эса мингга киради.

Билиб юрап,  
Күриб туради.  
Күзғун — ажал топар бехато.  
Жондан ортиқ қўраман, лекин  
Сени боғлаб қўйган йўқ, ота...  
Қарға эса мингга киради.

Юрак токай уриб туради?  
Юрак тингай тўлса паймона.  
Маъюс чеҳранг кўксимни ёқиб  
Сен ҳам бир кун ўтарсан, она,  
Қарға эса мингга киради.

Йиллар бизни ўриб туради.  
Уйда, йўлда, шошиб-шошмасдан,  
Хайрлашиб-хайрлашмасдан  
Эриб, оқиб ўтаверамиз,  
Қарға эса мингга киради...

Сочгум гулдай дунёга меҳрим,  
Токи юрак уриб туради.  
Сен абадий яшайсан, шеърим —

Қарға фақат мингга киради.

\* \* \*

Мұхаббат, сен чиройли,  
Мұхаббат, сен гүзалсан.  
Тағин бир зум турайлик,  
Гапирмайман, уялсанг...

Сүнг кетармиз. Сездимки  
Мен орзуга етмадим.  
Сени шундай севдимки  
Күлингдан ҳам тутмадим.

Күлинг... сенинг қўлларинг,  
Мулойимдир эҳтимол.  
Айри тушди йўлларим,  
Севар ёрим, яхши қол.

Мұхаббат, унут мени,  
Ва мен ҳам... унутмайман.  
Тушларингда кут мени,  
Тушларингга киргайман...

Мұхаббат, сен чиройли,  
Мұхаббат, сен гүзалсан.  
Кел, кўришиб турайлик,  
Саломлашмай, уялсанг.

## ХАЁЛ

Хаёл қандай яхши,

Акангга ўшар.  
Ўйнатар елкага құтариб олиб.  
Бу парвоз сўнгида йиғлашинг мумкин,  
Софинган онангнинг олдида қолиб.

Хаёл қандай яхши,  
Хаёл қандай соз.  
Қўшиқлар сочади босган изингга.  
Бир кечада бориб айтишинг мумкин  
Изҳори дилингни суйган қизингга.

Беғубор болалик юлдуздай олис,  
Аммо хаёл учун у ҳам бир қадам.  
Тарсиллаб қовунлар ёрилган полиз,  
Сен ёлғиз ётибсан остида бодом.

Гуллари тўқилар ўша бодомнинг,  
Капалакдай келиб юзингга қўнар.  
Хаёл ҳам туғишган укаси одамнинг  
Қаёққа юборсанг ғинг демай жўнар.

Кўксида хаёлинг турса йиғилиб,  
Қуёшни уйғотиб келса бўлади.  
Шоирларнинг бари ерда туғилиб,  
Осмону фалақда ўлади.

## УЙҚУДАГИ ҚИЗ

*Нурхон хотирасига*

Қаро ерга қўйиб бош,  
Бир қизгина ухлайди.  
Кўзларига тўлиб ёш,

Хур қизгина ухлайди.

Ётар қуриб дармони,  
Мангу ухлар гул ёноқ.  
Күнгли тұла армони,  
Күйни тұла қизғалдоқ...

Бу дунёда ҳеч сендек  
Қиз йүқ эди, тур, синглим,  
Үзинг орзу қилгандек  
Түй қиласыз, юр синглим.

Ой юзингга бир нафас,  
Ҳарир рүмөл ўрарсан.  
Гул-гул ёниб муқаддас,  
Чимидиққа киарсан...

Қаро ерга қўйиб бош,  
Бир қизгина ухлайди.  
Нурхон отли қаламқош,  
Хур қизгина ухлайди.

## БИР ҚИЗ ЙИҒЛАР

Бир қиз йиғлар булоқ бошида,  
Маъюс мажнунтоллар қошида,  
Күнгил оҳи кўзин ёшида:  
Бевафо кўп экан дунёда...

Нигоҳида офтоблари бор,  
Нолишларин жавоблари бор,  
Сўнган севги азблари бор,  
Бевафо кўп экан дунёда...

Товонига тушган кокиллар,  
Қизгинага қўшилиб йиғлар,  
Бир сўз дилга санчади тиғлар —  
Бевафо кўп экан дунёда...

Дилдан кўчиб кетса хаёллар,  
Ёмонга йўқ экан жазолар,  
Ёлғон дунё экан дунёлар,  
Бевафо кўп экан дунёда...

Эрмак экан энди Лайлолар,  
Мажнун ғариб кезган сахролар,  
Эртак экан Тоҳир-Зуҳролар,  
Бевафо кўп экан дунёда.

Бир қиз йиғлар булоқ бошида,  
Маъюс мажнунтоллар қошида.  
Кўнгил зори кўзин ёшида:  
Бевафо кўп экан дунёда.

Кўй йиғлама, менинг жон синглим,  
Мен ҳам сендеқ бағри қон, синглим  
Менга ҳам йўқ меҳрибон, синглим,  
Бевафо кўп экан дунёда,  
Мұҳаббат йўқ экан дунёда!

\* \* \*

Шеърият,  
Эй бевафо санам!  
Қўлларингдан маҳкам тутарман,  
Сендан ҳар нарсани кутарман,

Сен бир малҳам,  
Сен бир шириң ғам...

Сен борсанки заҳматларим бор;  
Бу дунёда орттирган зарим —  
Ухламай қон ютган кунларим  
Учун сенга раҳматларим бор!

Остонангда итинг — хаёлим:  
Йўлинг пойлаб ўтгайман сенинг,  
Кўнглинг кимда билмайман сенинг,  
Сен кўкда қўл етмас ҳилолим.

Рухим кўкда,  
Тупроқда танам,  
Бағримни тилкалар бир оғриқ,  
Энди баҳтим ўзингга боғлиқ —  
Шеърият, эй бағритош санам!..

## ХАВОТИР

Кўрқаман, эртага мен ўлиб кетсам,  
Ётар бўлсам қумга ботиб қўзларим,  
Кўнглимни кўчкидай босади бир ғам —  
Йиғлашни ҳам билмас менинг қизларим...

Энг яқин дўстларим ғийбатим қиласар,  
Энг заиф душманим устимдан кулар.  
Улар-ку не қилса ўзлари билар,  
Йиғлашни ҳам билмас менинг қизларим.

Шоир ўлса ким ҳам куйинар дейсиз,  
Мадҳиябоз ҳозир суваракдан кўп.

Улар мисли қиңда тарновдаги муз,  
Бармоқ тегса ерга түкилар түп-түп...

Тилдан қолсам күзда қотиб ёшларим,  
Күнглимдан бошқа бор ахир, не зарим?  
Ерларга эгилган куни бошларим,  
Йиғлашни ҳам билмас менинг қизларим.

Улар ёш. Ўлимдан қүрқаман ёмон,  
Чунки, дардига ҳеч қулоқ солмадим.  
Қабримнинг устида йиғласин дебон,  
Қизларим күзёшин асрай олмадим!

## АНДИЖОН

Қани Боғишамол кезган елларинг,  
Қирларда кеккайган қирғовулларинг,  
Эслаб эзилмасму энди дилларинг,  
Нега йиғламайсан, аҳли Андижон?..

Минг йиллик чинорлар бўлди-ку ўтин,  
Қошу қабоғингга тўлди-ку тутун,  
Сойингда қолдими сувинг бир ютум,  
Нега йиғламайсан, аҳли Андижон?

Ризқу-рўзин сочиб айланар фалак,  
Сен эса далангдан тополмай ҳалак —  
Болашта бергали битта ҳандалак,  
Нега йиғламайсан, аҳли Андижон?

Наҳорингда пахта, шомингда пахта,  
Айвонингда пахта, томингда пахта.  
Оқар оғу бўлиб қонингда пахта,

Нега йиғламайсан, аҳли Андижон?

Қирқ йил чорла, гўрдан чиқмайди Бобур,  
Чиқса ҳам бағрингга сиғмайди Бобур.  
Ҳинду қучоғида ухлайди Бобур,  
Нега йиғламайсан, аҳли Андижон?

Қайнзор қаъридан узилди бир ўқ,  
Юракда доғ қолди, юракда бир чўғ,  
Чўлпонинг бор эди, Чўлпон энди йўқ.  
Нега йиғламайсан, аҳли Андижон?..

Булбулзабонларинг  
хазон ёпдими,  
Дунё уларнинг ҳеч  
тенгин топдими,  
Муҳаммад Юсуфинг  
шоир бўптими?..  
Нега йиғламайсан,  
аҳли Андижон?

## РАЙХОН

Райҳон, айланай райҳонингдан сенинг,  
Ойқабоқ гўзалим, жонингдан сенинг.  
Кулиб кўкларингдан тушмайсан, қара,  
Ой ўтса уялар ёнингдан сенинг.

Етти иқлим аро етсаки изинг,  
Тупроқقا тўкилгай тутдай ҳуш исинг.  
Гулга тегса гулхан пайдо қиласур,  
Сувга тегса сувни ёндирап юзинг.

Хурлардан хур ўзинг, хуршиди тобон,  
Ўзинг Райхонсану вужудинг райхон.  
Бу ёруғ дунёда сендан сулув йўқ,  
Мендан бечора йўқ, мендан нотавон.

Сен Арши аълода жаннатий чашма,  
Мен ерда ёнаман томчингга ташна.  
Кўкларга қўлини тутган қулингман,  
Зилолим, уволим тутгай, адашма...

Райхон, айланай райхонингдан сенинг,  
Ой ўтса уялар ёнингдан сенинг.  
Кулиб кўкларингдан тушмайсан сен-да,  
Менга-да жой йўқ осмонингдан сенинг.

\* \* \*

Ўлсаму унутсанг мендай йигитни,  
Ёғар йўлларингга афсус-андухим.  
Оқ тулпордай миниб оппоқ булатни,  
Уйингнинг устидан ўтади Руҳим...

Унга нима дейсан, бевафо ёrim?

Ўлсаму унутсанг мендай йигитни,  
Қаро тупроқ силаб ётса курагим,  
Сен ўчоқ олдида чаққан гугуртни  
Учидা ловиллаб турса юрагим...

Шунга нима дейсан, бевафо ёrim?

Сен Худо эмассан ахир, ўйланма,  
Жонимнинг риштаси қўлида унинг,

Аммо Муҳаммадсиз ўтмайди кунинг,  
Кел, майли мен ўлмай, сен ҳам қийналма

Шунга нима дейсан, бевафо ёрим?..

## **МУҲАББАТИМ**

Муҳаббатим, қайдасан қалб ардоғим,  
Жайронкўзим, қирларда қолган охум.  
Қўлим тегмай тўкилган қизғалдоғим,  
Энди сени излаб қайдан топарман...

Келар бўлсанг йўлингга гул тўшардим,  
Сен Лайлига, мен Мажнунга ўхшардим,  
Бу дунёда ҳижрон йўқ деб яшардим,  
Энди сени излаб қайдан топарман...

Тушларимда йиғларсан гоҳ бағри қон,  
Оҳларингдан дуд чиқиб осмон-осмон,  
Менга сену сенга мен бўлдик армон,  
Энди сени излаб қайдан топарман...

Муҳаббатим, қайдасан, қалб ардоғим,  
Жайронкўзим, қирларда қолган охум,  
Қўлим тегмай тўкилган қизғалдоғим,  
Энди сени излаб қайдан топарман...

## **ОНАМГА**

Оҳ, менинг ортимдан оввора онам,  
Бир парча юраги минг пора онам.  
Ҳар балони кўриб ёруғ дунёда,

Тошканни күрмаган бечора онам,  
Боланг бўлиб бир бор бошлаб келдимми,  
Энди мен ҳам сенга ўғил бўлдимми!..

Гарчи бисотингда «байрам» сўзи йўқ,  
Биламан, кутасан сандал тўла чўғ,  
Менда юрак деганларин ўзи йўқ:  
Мен совға бермаган қиз йўқ бу оқшом,  
Сенга на гул бердим, на ширин қалом,  
Энди мен ҳам сенга ўғилми, онам?..

Дейсан: олисларда омон юрсанг бас,  
Ёдингга тушсам гоҳ йўқлаб турсанг бас,  
Болам, сенга ҳамма қиласи ҳавас...  
Ахир, менинг дардим Шеър эмас фақат,  
Мен машҳур шоирмас — машҳур бешафқат,  
Энди мен ҳам сенга ўғилманми, айт?..

Шаънингга шеър битдим. У сени топсин,  
Пойингга тиз чўкиб, қўлингни ўпсин.  
Ундан ҳам улуғим борлигин кўрсин,  
Мен учун ҳам азиз ҳолингни сўрсин,  
Сенсиз ғариб кўнглим кўнгилми, онам,  
Энди мен ҳам сенга ўғилми, онам!..

## ЛАГАНБАРДОРЛАР

Каззоб Сталиндан зорланманг ҳадеб,  
У ҳам фарзандидир битта инсоннинг.  
Билмоқчи бўлсангиз, қабри қайдадеб,  
Лаганбардорлардан сўранг Чўлпонни...

Отабек Кумушин кўзларин ёпиб,

Үзи ҳам ортидан қилгач сафарлар,  
Қодирий бобонинг қўлларин ўпид,  
Чоҳга итарган ҳам — лаганбардорлар.

Улар Иблис билан тили бир ўртотқ,  
Улар Аэроилга содиқ чопарлар.  
Аввал Усмонларни сотиб, кейинроқ  
Фарёд кўтарган ҳам — лаганбардорлар.

Ёв надир? Зўр келса ўлдиради ёв,  
Булар қон сўргувчи исқабтопарлар.  
Қаҳҳорни қандкасал,  
Ойбекни соқов  
Қилиб қўйғанлар ҳам — лаганбардорлар.

Улар устозига қулдайин кимса,  
Мехрибон ҳомийси шогирдларининг.  
Ўзи ўлдириб, сўнг мозоригача  
Кўтариб боришар тобутларини...

Каззоб Сталиндан зорланманг ҳадеб,  
У ҳам боласи-да битта инсоннинг.  
Билмоқчи бўлсангиз, қабри қайдадеб,  
Лаганбардорлардан сўранг Чўлпонни!

1988

## ДУНЁ

Менга боқиб мийифида кулган дунё,  
Мени тупроқ, ўзни осмон билган дунё,  
Сени момом чўмилтирган ювиб-тараб,  
Сени бобом тетапоя қилган, дунё!..

Эй, ўтмишдан ўтган қунин сўрамаган,  
Ўзбек борса ким қўлига қарамаган?  
Ботирлари қул бўлишга ярамаган,  
Сулувлари бўйнига осилган дунё!

Мозий маним боримни ёд этиб сийлар,  
Дилин обод, руҳларин шод этиб сийлар.  
Шоҳ Фаззолий, шоҳ Табризий, шоҳ Румийлар...  
Чоригини елкасига илган дунё.

Сен сиғинган — ўша жондин ортиқ сенга  
Тожмаҳал ҳам бир бобомдан тортиқ сенга.  
Кулма менга, иддаолар қилма менга —  
Тўққиз кунда Темур босиб олган дунё!

Юзларингни ёритган шу шарқ зиёси,  
Дардларингни аритган шу шарқ зиёси.  
Синонинг этагин ўпид Оврупоси,  
Амриқоси Берунийдан қолган дунё.

Менинг қўшким қўқда — унга етмайди қўл,  
Менинг қўрким қўнгил, унга элтгай бир йўл,  
Тирикман мен, кел истасанг муридим бўл —  
Сен Исломдан иймон дарсин ўрган, дунё!..

## БИР КЕЧА

Бир кечада бехосдан уйғониб кетсан,  
Йиғлаб ўтириби юрагим юм-юм.  
Чўчиб турдим: сенга нима бўлди, эркам,  
Нимага йиғлайсан,  
Мен нима қилдим?

Ундей десам бўлмас,  
Бундай десам қўнмас,  
Чекдим. Чиқиб секин ҳовлини кездим.  
Ҳамма юлдуз сўнди. Бир юлдуз сўнмас —  
Кўзимга мўлтираб турар илк севгим.

Юлдуздан ҳам олис о, сен буюк ғам,  
Бугун ўзинг йўқсан фақат ёнимда.  
Ҳижрон куйин чалиб қон ўрнида ҳам  
Армон айланади жони танимда.

Ўйлайман, ўйлайман, ўйларим узун,  
Қўлим қисқа, севгим, бўйларим узун,  
Энди сен менинг учун энг узун эртак,  
Энди мени ёмон қийнар бу юрак!..

Чекаман. Тутунга тўлади хона,  
Илк севгим мўралар тўрт бурчагидан.  
Мен далли, юрагим мендан девона —  
Ётмайман, деб йиғлар пар тўшагингда.

\* \* \*

Мана шу — мен туғилган гўша,  
Уйга етдим — ариқ ҳатладим.  
Шу ерлик бир қизга ёқай деб,  
Узун-узун шеърлар ёдладим...

Ёдладиму айтолмай унга,  
Бағри дилим тўлди доғ билан.  
Осмонларга термулиб ётдим,  
Томда синглим қизғалдоқ билан.

Осмон деганлари кенг экан,  
Бүйи бўйим билан тенг экан.  
Бу дунёда дардингиз бўлса,  
Юлдузга баҳтлиман денг экан...

Ҳамма юлдуз менга мўлтирас,  
Ўлсам мени савол ўлдирас.  
Айвондаги қалдирғочлардек  
Улар тизилишиб ўлтирас.

Қаранг, қандай баҳтли боламан!  
Ўйларимда гуллар ухлайди.  
Кўзларимда жаранглаб кулгу  
Юрагимда... йўлбарс... йиғлайди.

\* \* \*

Ситамларинг кўпdir менга,  
Ситамларинг эй, гулгун.  
Кел, юзингдан ўптири менга,  
Ўнг юзингдан ўптиргин...

Борсам кел, деб сен турма,  
Захринг сочиб ўптиргин.  
Гапирма,  
Гапиртирма,  
Сўнг юзингдан ўптиргин.

Суймасанг суйкалиб нетай,  
Бу дунёдан нолиб кетай?  
Майли ўтай,  
Майли кетай,

Кел... күзингдан ўптиргин!

## СЕВГИ БУ...

Севмоқ, бу  
Кечирмоқ дегани асли,  
Токи бу дунёда қүёш бор, гул бор.  
Ялпизлар гуллаган шу баҳор фасли,  
Содиқ ҳамдам бўлгин сен менга, дилбар.

Ғийбатлар тингладим, айланди бошим,  
Хўл тупроқ куйдирди товонларимни.  
Ва мана мен унга кўнглимдан юлқиб  
Кўмдим беор дўстдек гумонларимни.

Ўйлар суравердим кечалар танҳо,  
Гоҳо жиққа ёшга тўлганда кўзим.  
Ва сени севмоқдан олдин бир куни  
Дилдан севиб қолдим ўзимни ўзим...

Севмоқ бу ўзингни англамоқ асли,  
Токи замин аро қүёш бор, гул бор.  
Райхонга кўмилган шу баҳор фасли,  
Садоқатли ёр бўл сен менга, дилбар.

Севгилим, мен сени севаман, тамом,  
Фамгин кўзинг, ҳадик тўла кўзингни.  
Севмоқ, бу кунда бир кўрмоқ баҳтидир  
Озғин кўлларингни, сепкил юзингни...

## САМАРҚАНД

Самарқандга борсам мен агар,  
Улуғбекни қўриб қайтаман.  
У қон йиғлаб турар ҳар сафар:  
Мен дардимни кимга айтаман?..

Бағримда бўй етган бўз болам,  
Мерган болам, лочин кўз болам,  
Бўғзимга тиғ урган ўз болам...  
Мен дардимни кимга айтаман.

Сезмай қолдим. Ўшанда чоғим,  
Юлдузларда экан нигоҳим.  
Билмадим не эди гуноҳим...  
Мен дардимни кимга айтаман.

Қанча ғамга ботмаган эдим,  
Қанча оғу ютмаган эдим...  
Ўз боламдан кутмаган эдим...  
Мен дардимни кимга айтаман.

Таним музлаб, гоҳ тош қотаман,  
Мен шоҳ эмас, ахир, отаман.  
Гўримда ҳам ўйлаб ётаман,  
Мен дардимни кимга айтаман?..

Самарқандга борсам мен агар,  
Улуғбекни қўрмай келмайман.  
У менга қон йиғлар ҳар сафар,  
Мен дардимни кимга айтаман!

## **СИНГЛИМГА МАКТУБ**

Қачон хат ёзгандим сенга, билмайман,

Қоғия билан банд бугун тош күнглим.  
Ёлғиз аканг бўлиб,  
Ёнингда юрмайман...  
Кечир мени, синглим,  
Кечир мени, синглим.

У ёқда шотутлар  
Тўкилар сувга,  
Қовунлар ёрилар,  
Сен йўл қарайсан.  
Тупроқ кўчаларда,  
Муштоқ кечаларда,  
Ёз — мени соғиниб сарғайган майса.

Умримни юлқилаб,  
Йилларим ўтар,  
Юрак йиғлайди-ю,  
Айтмас дардини.  
Мен шеърим қўлтиғлаб,  
Кун бўйи излайман,  
Адабий ходимнинг битта мардини.

Бирига қандайдир туроқлар дастак,  
Бирин ўйлантирар ҳали ёшлигим:  
Нега бу шеърингиз отлар ҳақида,  
Уларни ёқтирмас, менинг бошлиғим!..

Гоҳ тўлиб кетаман,  
Қандай гап ахир.  
Кўйгил мени дейман эй, ширин азоб.  
Күёшга термулай,  
Ерга босай бағир,  
Қўшиқлар куйлашга бошқа одам топ...

Яна қайсар руҳим  
Жонимни чўқир,  
Ёз дейди,  
Сингилжон, кўрқай нимадан?..  
Энг гўзал шеър — Сенинг ёрилган қўлинг,  
Ҳамма бошлиқларнинг  
Бошлиғи — Ватан!..

У ёқда шотут тўкилар тағин,  
Беҳилар ҳидига тўлади хонам.  
Айвонда, хирмонда, Андижон томонда  
Куз — мени соғиниб сарғайган онам —  
Йиғлайди, бу йил ҳам келмади болам...

Қачон хат ёзгандим сенга,  
Билмадим,  
Қоғия билан банд менинг тош кўнглим.  
Ёлғиз аканг бўлиб,  
Ёнингда юрмадим...  
Кечир, мени синглим,  
Кечир, мени синглим.

## ҚИЗҒАЛДОҚ

Қизғалдоғим, қирдан бўлак кошонанг йўқ,  
Кокил ёйсанг, ердан бўлак тошойнанг йўқ,  
Ўқсиб-ўқсиб турганингда ўзим бориб,  
Пешонангдан ўпай десам, пешонанг йўқ...

Солланасан келинчакдай бошинг эгиб,  
Жайрон ўтган сўқмоқларга ёшинг тўкиб,  
Қизил юзинг қон дилимга тураг тегиб,  
Менингдек сен ғарибнинг ҳам парвонанг йўқ...

Қадринг билган, дардинг билган, айт, киминг бор?.  
Келиб-кетар баҳор сенга бевафо ёр,  
Гүзалсанки, сенга бари гуллар ағёр,  
«Ох» урсанг, бир оқинг тинглар остананг йўқ...

Олдингга мен боролмасам, ўт гуноҳим,  
Бир йўқлаб қўй, мен дунёдан ўтган чоғим,  
Қабрим узра ҳилпираб тур, қизғалдоғим,  
Муҳаммаддан бўлак дўсти девонанг йўқ.

## ҚИЗИЛ ОЛМА

*C. ga*

Баланд шоҳда қизил олма  
Пишган экан.  
Узиб олиб қарасам, қурт  
Тушган экан.

Мен олмани ирғитворсам,  
У дод солди:  
Ташлаб кетар экан мени  
Нега олди?!

Қизил олма, қизил олма,  
Мен енгилдим.  
Дунёй-дун деганларин  
Энди билдим...

Юрагим-ей, сени не ўй  
Ўртамоқда?  
Севигига йўл бўлсин бизга

Бу чорбоғда.

Баланд шоҳда қызил олма  
Пишган экан...  
Бизнинг бошга шундай савдо  
Тушган экан.

## ЎТИНЧ

Фарғонамнинг паривашлари,  
Эй, жонимнинг қариндошлари,  
Бўйнингизга марварид бўлсин,  
Маржон-маржон қўзим ёшлари!..

Муҳаббатдан айтишиб ўлан,  
Қувалашиб ўсдик сиз билан.  
Кетдим кейин булутдай қўчиб,  
Қайтай энди кайси юз билан?..

Ёдимда соф туйғуларингиз,  
Жаранглаган кулгуларингиз.  
Ҳаётимда бўлмасангиз ҳам,  
Ҳаёлимда юрдиларингиз.

Сиз мен учун ўша-ўша шўх,  
Ўша-ўша эрка бўлдингиз.  
Кўрғонимга келмасангиз ҳам,  
Армонимга бека бўлдингиз.

Ўйин дедик бу ёруғ олам,  
Ўйин қилдик муҳаббатни ҳам.  
Қизлар, ўлан айтиб гоҳида,  
Эслаб қўйинг Муҳаммадни ҳам.

## МУҲАББАТ

Қалбга зардоб бўлиб тўлганинг алам,  
Гоҳи очилмасдан сўлганинг алам.  
Муҳаббат, муҳаббат, ҳаммасидан ҳам  
Сочга оқ тушганда келганинг алам!..

Келсанг, кетгил дебон ҳайдолмаганинг,  
Ортга қайтай десанг, қайтолмаганинг,  
Армонинг ҳеч кимга айттолмаганинг —  
Буни битта ўзинг билганинг алам.

Гоҳ хотир, гоҳида хаёлни ёллаб,  
Гоҳ юлдуз, гоҳида ой каби порлаб,  
Ширин жилмайиш-ла ёнига чорлаб,  
Олисдан ғамзалар қилганинг алам.

Кўнглингга етти ёт уйда ёйиб сеп,  
Кечагина ўзинг мени унут деб,  
Энди баҳтлимисан, шоир йигит деб,  
Кунда бир устимдан кулганинг алам...

Қалбга зардоб бўлиб тўлганинг алам,  
Гоҳи очилмасдан сўлганинг алам.  
Муҳаббат, муҳаббат, ҳаммасидан ҳам  
Сочга оқ тушганда келганинг алам.

## КАПАЛАКЛАР

Туғилгандан мен шўрликнинг бағрим қон,  
Бир жисмимда талашади икки жон

Жон талашсам, тепада чарх урган ул,  
Капалаклар одамлардан меҳрибон...

Оққушларим, оқ ёмғирда учарлар,  
Сахарлардан шудринг-шароб ичарлар,  
Танламайин қабрларни қучарлар,  
Капалаклар одамлардан меҳрибон...

Гулга қўнса, қанотлари ботмайди,  
Ожизларим бирровга тош отмайди,  
Бир кун яшар, бир-бирларин сотмайди,  
Капалаклар одамлардан меҳрибон...

Бир қарасанг, на қулбаси, уйи йўқ,  
На товуши, на қўшиғи, куйи йўқ,  
Капалакнинг камбағали, бийи йўқ,  
Капалаклар одамлардан меҳрибон...

Капалакнинг Каъбасидир ҳур дала,  
Даласида меҳр тўла, нур тўла,  
Бахтсиз бўлса, бари баҳтсиз бир йўла,  
Капалаклар одамлардан меҳрибон...

Ойдин оқшом ёдга тушдинг, о малак,  
Сени ўйлаб бўлди яна қон юрак,  
Севаман деб алдамайди капалак!..  
Капалаклар одамлардан меҳрибон!..

Мұхаммадга ишонган эй, мўминлар,  
Ўлсам сўзим эслаб, ўйга чўминглар,  
Капалакнинг қанотига кўминглар,  
Капалаклар одамлардан меҳрибон...

## УНИ ТАНИЙСИЗ

Сиз уни танийсиз,  
Танимай кўринг,  
Тўхтатади ўзи ёқадан ушлаб,  
Шеърлар ўқиб ташлар узундан-узун.  
Мен шоирман дейди  
Кўксига муштлаб...  
Танимай кўринг-чи.

Курсига ўлтирас чойхонада ҳам,  
Латифалар айтиб ҳиринглар,  
Ошни бузисан-у, акаси, майли,  
Мен шоирман, дейди,  
Қошиқ беринглар...

Сиқилиб кетади ҳар йил баҳорда,  
Сайрга боради Шоҳимардонга.  
Сигарет ҳидини таратиб бадбўй,  
Ҳамзанинг кўзига босиб bemalol,  
Мен шоирман дейди,  
Келдим, кўриб қўй!..

Менинг қоним бунча қайнот бўлмаса?  
Иzzatni билмадим алп давраларда.  
Хафа қилиб қўйдим шундай «шоир»ни  
Бир қуни руҳимни сийлаб серзарда.

Тамом!  
Энди шеърим чиқмайди, она,  
Кўз-кўз қилолмайсан елиб-югуриб.  
Суюнчи сўрмайсан чўлоқ отамдан  
Юпқа жилд китобим кўзингга суреб.

Аммо — осмон бунча чиройли бу тун!  
Қарайман, қарайман, кўзим тўймайди.  
Жимир-жимир қилган юлдузнинг бари —  
Ҳаммаси синглимга ўхшайди!

## ҚУШЛАР ҲАМ ЙИГЛАР

Терлар оқди сув бўлиб биздан  
Ва гурсиллаб йиқилди терак...  
Ака, бизнинг қилмишимиздан  
Тунда қушлар йиғласа керак.

Она чумчуқ айланиб кетмас,  
Кўнглига қил сиғмаса керак.  
Эски индан ташиб бориб хас,  
Янги инда йиғласа керак.

Баланд бўлар уйимиз тоғдек,  
Айвонида устун ул терак.  
Биз яшармиз, кўнглимиш чоғдек,  
Шунда қушлар йиғласа керак...

## КЕЛИНЧАК

Келинчагим, кулиб-кулиб кетдингизми,  
Юрагимни тилиб-тилиб, кетдингизми?  
Ёлғизликда нелар бўлсам бўлдим-ку мен,  
Сиз муродга етдингизми, етдингизми...

Қачон мендан тонган қиздан тонар дилим,  
Йўллар қараб қонар дилим, қонар дилим,  
Пойингизга интиқ бўлиб ёнар дилим,

Ёт күчадан ўтдингизми, ўтдингизми?

Кўнглингизни олдими шум янголари,  
Алдаб йўлга солдими ё ҳийлолари,  
Кўзингизни олдими ё тиллолари —  
Севгимизни зарларига сотдингизми?

Мулкингизга не парилар ҳавас этмас,  
Ёрим айтинг, сизга яна нима етмас,  
Нечун ойдек юзингиздан қайғу кетмас,  
Ҳажр азобин сиз ҳам энди тотдингизми?

Кун ботмайин эшигингиз ёпилади,  
Кўк зулфига пўлат занжир осилади.  
Йиғи билан хуморингиз босилади,  
Излаб-излаб шу зиндонни топдингизми...  
Ҳилолим-а, ёт гўшага ботдингизми?

## ГЎЗАЛЛАР

Гўзалларим, гўзал алдайсиз,  
Гўзал ҳатто — ёлғонингиз ҳам...  
Гўзал — кўнгил қолдирмоғингиз,  
Гўзал — кўнгил олганингиз ҳам.

Оlamда йўқ Сиздек оввора,  
Бечоралар ичра бечора.  
Гўзал, йўлдан уриб минг бора,  
Гўзал, йўлга соганингиз ҳам.

Гўзал, бошда суйиб-сийпалаб,  
Кўнгилнинг бор мулкини талаб,  
Аввал жонни қийма-қиймалаб,

Гүзал, сўнг уёлганингиз ҳам.

Бир боқсам хуш — мажнунтолдайсиз,  
Заифу бечораҳолдайсиз.  
Жоду билан пайт пойлайсиз —  
Гўзалларим, гўзал алдайсиз!..

## ЁЛФОНЧИ ЁР

Ёлғончи ёр, ёлғонларинг тугар қачон,  
Ёлғон йиглаб, куйганларинг тугар қачон,  
Қачон менга бир илтифот айлагайсан,  
Қачон тугар ситамларинг карвон-карвон,  
Ёлғончи ёр, ёлғонларинг тугар қачон?..

Мажнун бўлдим саҳроларда бир соя йўқ,  
Менга офтоб — қароқчидан ҳимоя йўқ.  
Ўнгимда чўғ, сўлимда чўғ, кўнглимда чўғ.  
Жоним сайёд қўлидаги жайрон-жайрон,  
Ёлғончи ёр, ёлғонларинг тугар қачон?..

Узун тунлар бекорга мен тўлғонмасман,  
Паризодим, сени севдим, ҳеч тонмасман,  
Минг бир кеча эртагинг айт — ишонмасман,  
Ишонмай ҳам кўзимда ёш марジョン-марジョン,  
Ёлғончи ёр, ёлғонларинг тугар қачон?

Жаннат ишвасига учеб ким чопмаган,  
Тақдир менинг пешонамга қил ёпмаган,  
Ношуд қулман чаман кезиб гул топмаган,  
Ўз ҳолимга энди ўзим ҳайрон-ҳайрон,  
Ёлғончи ёр, ёлғонларинг тугар қачон?..

Тушунмадим муҳаббатнинг шевасига,  
Кўнгил бердим сендай қизнинг нимасига,  
Нега миндим омонат ишқ кемасига,  
Ўз умримни ўзим қилдим вайрон-вайрон,  
Ёлғончи ёр, ёлғонларинг тугар қачон!..

## ТУРҒУНЛИК

Ҳатто кеч қузда ҳам тугади кўсак,  
Серҳосил Ўзбекистон далалари.  
Далага чиқишар кўтариб этак,  
Биринчи синф болалари...

Зўр келса гўдак ҳам бирлашур,  
Катталар билан тенг беллашур,  
Бўйи ғўздан паст, чиллашир  
Биринчи синф болалари.

Совуқ дейсизми?  
Ха, қаҳратон!  
Кўлчалар қўйинда қотган нон,  
Аммо нима қилсин, пахта шон,  
Биринчи синф болалари.

Бари жимжималар — қоғозда,  
«Зангори кема»лар — қоғозда,  
Пахта теришади аёзда,  
Биринчи синф болалари.

Пахта терар йиғлаб баҳти қулганлар,  
Омади қулганлар, аҳди қулганлар,  
Пуфак боболарин Қаҳрамон қилганлар  
Биринчи синф болалари.

Фақат бир илтимос, муаллимлари,  
Бурнин артиб турса бўлгани.  
Иштонин кўтариб қўйишса бас, шу —  
Пахтани плани тўлгани!

## РУҲ ТЎТИСИ

Бош бир кун тош ёстиққа етар,  
Руҳ тўтиси танни тарқ этар.  
Дейдилар ёш танламас ажал,  
Худо билар, ким олдин кетар...

Офтоб елиб толса кўк узра,  
Унга осмон сандиги ҳужра.  
Ҳақдан ҳукм, бандадан ижро,  
Худо билар, ким олдин кетар?!

Пок дилингни кемирди ҳасад,  
Қадамингда топдинг азият,  
Дўстим, менга қилма васият,  
Худо билар, ким олдин кетар.

Асо тутмиш қанча қадди дол,  
Мен бир кучга тўлган навниҳол,  
Отам мени қўмар эҳтимол...  
Худо билар, ким олдин кетар.

Кўзим кўкда, сизда хаёлим,  
Жўжуқларим — менинг камолим!.  
Ганиматмиз, жуфти ҳалолим,  
Худо билар, ким олдин кетар!..

\* \* \*

Кузда кетган турна қайтгандек баҳор,  
Бир күн хузулингга қайтишларим бор,  
Узримни ўзингга айтишларим бор,  
Эй, менинг юрагим йўқлаган диёр!..

Қайтарман, аммо қай аҳволда билмам,  
Балки, унда мени буккан бўлар ғам.  
Балки, қайтмоқ насиб этмас менга ҳам,  
Чўлпони ёдидан чиқмаган диёр.

Гарчи бўлмасам ҳам ёнингда йўлдош,  
Дардингга дилдошман, жонингга жондош,  
Ҳаттоқи, қаландар Машраби талош,  
Бобури бағрига сиғмаган диёр.

Оллоҳ-ку Анжонда қормиш лойини,  
Нодиранг на қилсин хон саройини?..  
Қўқонга узатиб Моҳларойини,  
Боғишамол бўлиб йиғлаган диёр.

Жаннатлардан гўзал, қўҳлигим менинг,  
Бағринг қон қилдими шўхлигим менинг,  
Балки, билинмас ҳам йўқлигим менинг,  
Балки, мени ҳам гоҳ йўқлаган диёр...

Кузда кетган турна қайтгандек баҳор,  
Бир күн хузулингга қайтмоқларим бор,  
Узримни ўзишта айтмоқларим бор,  
Эй, ёмон кўзлардан асраган диёр.

\* \* \*

Эсламасанг ҳам мени  
Қандай қилиб тонаман.  
Йиллар ўтару сени  
Унугомай ёнаман.  
Майли, мен-ку, қон дилим,  
Бахтлимисан, севгилим?..

Баҳор келса боғларга,  
Севишиганлар сиғмайды.  
Менинг куйган кўксимда,  
Қизғалдоқлар йиғлади.  
Майли, мен-ку, қон дилим,  
Бахтлимисан, севгилим?..

Мендан кечиб кетганинг,  
Майли, жонинг соғ бўлсин.  
Менинг кўнглим чўкса ҳам,  
Сенинг кўнглинг чоғ бўлсин.  
Майли, мен-ку, қон дилим,  
Бахтлимисан, севгилим?

Қайда бўлма, омон бўл,  
Омон бўлу билиб ол —  
Сенинг умринг узун йўл,  
Менинг умрим бир савол:  
Майли, мен-ку, қон дилим,  
Бахтлимисан, севгилим?!

## ЁР-ЁР

Осмон олис, осмон жим,

Марҳаматда қор ёғар.  
Сени қандай севардим,  
Күролмади қарғалар.

Ҳай-ҳай ўлан, жон ўлан,  
Жоним қақшар, ёр-ёр.  
Қайда бўлсанг сен билан  
Севгим яшар, ёр-ёр...

Осмон олис, осмон жим,  
Осмон қулоқ солади:  
Юрагимни соғинчим  
Фижжак қилиб чалади.

Ҳай-ҳай ўлан, жон ўлан,  
Жоним қақшар ёр-ёр.  
Қайда бўлсанг сен билан  
Севгим яшар, ёр-ёр...

Осмон олис, осмон жим,  
Осмон юлдуз тўшайди.  
Билагингда бармоғим  
Изи борга ўхшайди.

Ҳай-ҳай ўлан, жон ўлан,  
Жоним кақшар, ёр-ёр.  
Қайда бўлсанг сен билан  
Севгим яшар, ёр-ёр...

\* \* \*

Бекатларда мен қоларман-да,  
Айтар сўзим қолиб кетади.

Трамвайлар сени ҳар куни  
Бодомзорга олиб кетади.

Термуламан, изларидан жим,  
Боқиб күзим толиб кетади.  
Бодомзорга сени ҳар куни  
Трамвайлар олиб кетади.

Темир йўлга бошларин уриб  
Филдираклар нолиб кетади.  
Бодомзорга сени ҳар куни  
Трамвайлар олиб кетади.

Юр, деб ўзим кетар йўлларга,  
Буролмайман трамвайларни.  
Сўколмайман трамвайларни,  
Уролмайман трамвайларни.  
Кўролмайман трамвайларни!..

## ЯХШИ

*Хуршид ДАВРОНга*

Эй дўстларим, дунёда  
Ортда қолган из яхши,  
Булбули йўқ баҳордан  
Кумри тўла куз яхши.

Миннат тўла ҳалводан  
Айвондаги муз яхши,  
Ўпич кўрган паридан  
Сепкил тошган юз яхши.

Ичмасанг ҳам қимиз зўр,  
Қучмасанг ҳам қиз яхши.  
Эй дўстларим, дунёда  
Ортда қолган ёд яхши.

Тўқлигингда йўқлаган  
Қариндошдан ёт яхши,  
Ўнта номард дўстингдан  
Битта чўлоқ от яхши.

Олисдаги олтиндан  
Қучоқдаги гард яхши,  
Вафоси йўқ хотиндан  
Давоси йўқ дард яхши.

Ғаламис берган ғазнадан  
Бурда арпа нон яхши,  
Қирқта чала мулладан  
Битта мусулмон яхши.

## ЧИМИЛДИҚ

Гарчи ипак деворинг,  
Ҳеч ким сени қурган йўқ.  
Аммо икки дунёда  
Сендан баланд қўрғон йўқ.

Қўш юраклар ёғдуси  
Ўзинг бешак чимилдиқ.  
Бўй қизларнинг орзуси  
Шоҳи тўшак чимилдиқ.

Куёв кутган орзиқиб

Ҳаёт сендан бошланар.

Келаётган аллаю

Баёт сендан бошланар.

Тилагим шу бойлансин

Жон риштаси жонингга.

Йўламасин ҳеч бир қиз

Рози бўлмай ёнингга.

## УНУТИШ

Отам ўгитларин унутмоқдаман,

Унутяпман секин, ўзимни оқлаб.

Сен кимнинг ўғлисан? Кимнинг ўғлисан?

Ортимда имоним юрар сўроқлаб...

Мен кимни алдадим. Илк ёлғонларим,

Сохта табассумим кимга аталди?

Менга шухрат тутган хушомадларим

Отамнинг қабрига тиғдай қадалди.

Отам ўгитларин унутмоқдаман,

Унутяпман озғин юз, қўлларини.

Тер ҳиди анқиган беқасам чопон,

Кетмони, якtagи ямоқларини.

Толеидан мамнун жуфти ҳалолим,

Тилла тишларини кўрсатиб кулар.

Менинг кўнглим билан иши йўқ сира,

Суратимни излаб китоб титкилар.

Мен эса отамни унутмоқдаман...

\* \* \*

Осмон чўкиб қолди бу оқшом,  
Юлдуз бўлиб ёғилди бир сас.  
Бир маҳалла нигоҳни кўрдим:  
Яшаш керак, севиш шарт эмас.

Садоқатми?  
Кимга керак у?..  
Бехудадир кўз ёшинг сели.  
Юлдуз бўлиб ёғилди бир сас:  
У бегона. У энди келин...

Тўй — бу асли баджаҳл ота,  
Бахтли бўлсин қизим дегани.  
Уни сенга бермасман, бўтам,  
Тирик экан кўзим, дегани.

Осмон чўкиб қолди бу оқшом,  
Қонимда бир ғашлик ўрмалар.  
Мен оловга отарман энди,  
Юрагимни қийма-қиймалаб...

Ёқа ушлаб қолсин кўрганлар,  
Оловларга отгум уни, бас.  
Ёниб кетсин чирсиллаб қалбим,  
Севиш керак... яшаш шарт эмас!

## КЕТАР БЎЛДИМ

Ёр, эшигинг очилмади мен учун,  
Тилингдан бол сочилмади мен учун.

Уйингдан жой топилмади мен учун —  
Кетар бўлдим юзингни бир кўролмай...

Келдим десам, жойинг йўлак дедилар,  
Севдим десам, тенгинг бўлак дедилар.  
Сенинг севгинг кимга керак дедилар...  
Кетар бўлдим юзингни бир кўролмай...

Куйма, ёrim, куидирмагин, куйма, ёр,  
Бир яхшига бир ёмон ҳар жойда бор.  
Икки яхши яшнаган жой қайда бор?..  
Кетар бўлдим юзингни бир кўролмай...

Дерлар: жон соғ бўлса жаҳон топилгай,  
Бир парча ер, парча осмон топилгай,  
Лекин қайда сендеқ жонон топилгай,  
Кетар бўлдим ўзингдан бир сўролмай...

Ёр, эшигинг очилмади мен учун,  
Тилингдан бол сочилимади мен учун,  
Уйингдан жой топилмади мен учун,  
Ўтар бўлдим юзингни бир кўролмай.

## СОФИНДИМ

Тошканда... тоғларни соғиндим,  
Яшил ўтлоқларни соғиндим.  
Сув бўйига чордона қурган  
Момоқаймоқларни соғиндим.

Кечагина ёмғирда ивиб,  
Юрар эдим капалак қувиб,  
Шудрингларга юзимни ювиб...

Болалик чоғларни соғиндим.

Тошканда тонг шундай бошланар:  
Қулоқ йирттар баланд пошналар,  
Үзим ташна, менга ташналар —  
Ялангоёқларни соғиндим.

Яшириб не қилдим сизлардан,  
Лола ёноқ, ҳилол юзлардан,  
Түйдим тиллобармоқ қизлардан,  
Құли қадокқларни соғиндим.

Билганимни билганча билдим,  
Йүқдан борин бинолар қилдим,  
Шаҳар кенг деб, зинолар қилдим,  
Узок-узокларни соғиндим.

Алдовларга қолдим ўрганиб,  
Қўрқиб қолдим кўнгил бергани,  
Келганим йўқ Сени кўргани —  
Зилол булоқларни соғиндим!..

## ЎҒЛОНЛАР

*Афғонистонда ҳалок бўлган ўзбек ўғлонлари хотирасига*

Ҳиндиқушдан таралади бир нола,  
Юракларни титратиб зир-зир нола.  
Қаранг, қонга ботиб ётар бир дала,  
Мангу армон бўлиб кетган ўғлонлар...

Алпомищдай келбатидан гапирмай,  
Ўн саккиз ёшга ҳам кириб ё кирмай.

Үн гулидан бир гули ҳам очилмай,  
Умри хазон бўлиб кетган ўғлонлар.

Меҳнатдан бош кўтартмаган дехқон эл,  
Урушдан ҳеч кўкармаган дехқон эл.  
Йўқлар Сизни кўздан ёшин тўкиб сел,  
Ўққа қалқон бўлиб кетган ўғлонлар.

Бир дарёга уланмаган ирмоқлар,  
Бир қиз сочин силамаган бармоқлар,  
Бир тупроққа тўкилган қизғалдоқлар,  
Бевақт қурбон бўлиб кетган ўғлонлар.

Аслида-ку, барингиз бир ўзбексиз,  
Бир юрт ўғли, бир узукка кўздексиз.  
Бўғзимда тош қотиб қолган сўздексиз,  
Марди майдон бўлиб кетган ўғлонлар.

Бу дунёда балки, бир онанинг сиз —  
Тилаб олган ёлғиз ўғли эдингиз,  
Қайтмас бўлиб қаро ерга кетдингиз,  
Мулки афғон бўлиб кетган ўғлонлар.

Ботирмиди, Қодирмиди отингиз,  
Қолди дилда муҳрланиб ёдингиз.  
Жалолиддин, ахир, Сизнинг зотингиз,  
Ўзбекистон бўлиб кетган ўғлонлар.

\* \* \*

Ёлғон ёмон дерлар,  
Хушомад ёмон.

Ёмонликнинг бари ёмондир, бироқ  
Менимча дунёда энг катта гуноҳ —  
Софинмай яшамоқ...

Тилга келганини айтаверамиз,  
Суриштирмай ростдир-ёлғондир, бироқ,  
Менимча дунёда энг катта гуноҳ —  
Қарі қызы ҳақида ғийбат түқимоқ.

Ким бу шеърим ўқиб ошкора қулса,  
Бечоралар ичра бечора билса...  
Менимча дунёда энг оғир гуноҳ —  
Ҳиринглаб шеър ўқимоқ!

## ҲАҚИҚАТ

Юрагинг сиқилиб бориб шаҳардан,  
Секин гапга солсанг мўмин деҳқонни,  
Қодирийни эслар ёзувчилардан,  
Артистлардан эса — Шукур Бурҳонни...

Сенинг тилла гардиш қўзойнагинг бор,  
Лекин беркитолмас у ҳам гинангни.  
Нафис жилд китоблар йиғмассан бекор,  
Бекор олмагаисан пианинангни.

Мана қўриб қўйинг — Одалиска бу,  
Рангларга эътибор беринг, рангларга.  
Беҳзод чизгилари эмас сизга бу.  
Санъатда етмоқ йўл бўлсин бизга бу  
Нозикфаҳм рум — фарангларга.

Мана бу — Отелло. Ўша хабаш шоҳ.

Саҳна — Овруподир (яна ўша ёқ).  
Дунёда ҳеч кимда йўқ бундай овоз,  
Дунёда ҳеч кимда йўқдир бу нигоҳ!..

Дейсан: бу китобим ичи тўла дур,  
Дейсан: бу китобим битта нусхадир,  
Тасвир ўзи ҳаёт, жумла қисқадир,  
Лекин барибир...

Лекин барибир,  
Юрагинг сиқилиб бориб шаҳардан,  
Секин гапга солсанг отанг — дехқонни,  
Қаҳҳорни эслайди ёзувчилардан,  
Артистлардан эса Ҳалимахонни.

## КЎКЛАМОЙИМ

*Озод ШАРАФУДДИНОВга*

Сочимда оқ, мен баҳордан ўтингдим:  
Кўкламойим, кўкингдан бер бир чимдим.  
Қор қўйнида сени қўмсаб ўкиндим,  
Кўкламойим, кўкингдан бер бир чимдим.

Кўнглимга кўк бинафшалар сочилсин,  
Кокилига толпопукдан соч илсин,  
Бойчечакка борар йўллар очилсин —  
Кўкламойим, кўкингдан бер бир чимдим.

Фасл боши, ҳам охири ўзингсан,  
Мажнуналарнинг йўлдоши ҳам ўзингсан.  
Лайлиларнинг сирдоши ҳам ўзингсан,  
Кўкламойим, кўкингдан бер бир чимдим.

Кел-да энди соғинтирмай одамни,  
Сен йүғингда бир ғам босди елкамни,  
Қорлар кураб күмиб келдим отамни...  
Кўкламойим, кўкингдан бер бир чимдим.

Кўкинг билан кийинтирай даламни,  
Оёғяланг суюнтирай боламни,  
Ўзинг олгин кўксимдаги аламни,  
Кўкламойим, кўкингдан бер бир чимдим.

Гинам йўқдир кузда кетган оққушдан,  
Ийманмасин қайта эшик қоқишдан.  
Қумри билан бирга чиқдик биз қишдан,  
Кўкламойим, кўкингдан бер бир чимдим.

Жон устида асраб юрай кўкни мен,  
Тўйиб-тўйиб кўзга сурай кўкни мен.  
Яна сенга етаманми-йўқми мен,  
Кўкламойим, кўкингдан бер бир чимдим.

Дил яйрасин дала-даштинг ясаниб,  
Ялпизларинг сув бўйига ястаниб.  
Икки мисра байт битай бир мақтаниб,  
Кўкламойим, кўкингдан бер бир чимдим!..

## ОНАМГА ХАТ

Мен сизни ўйлайман шому саҳарда,  
Она, соғинсан ҳам бора олмайман,  
Тунлари чароғон шундай шаҳарда,  
Ҳеч кимга кўнглимни ёра олмайман.

Мен сиз айтгандайин ҳаммани севдим,  
Ҳаммага ишондим, мана оқибат:  
Үз дүстим уйига күмилди севгим,  
Кун бўлиб кўксимни куйдирди нафрат.

Бошимдан ўтгани кўкка ҳам аён,  
Юлдузлар қиқирлаб қулар оқбадан:  
Мен — зангор яйловда олис, бепоён,  
Уюридан ажраб қолган қулунман...

Мана, кетаяпман тош йўлда кўзим,  
Қадамим мошинлар йўрғасига мос.  
Йиғласам юпатиб ўзимни ўзим,  
Пишқириб қўяман тойчоқларга хос.

Ва сизни ўйлайман шому сахарда,  
Она, соғинсам ҳам бора олмасман.  
Тунлари чароғон шундай шаҳарда  
Ҳеч кимга кўнглимни ёра олмасман...

Ҳа, севги ҳақида. У дилга не зеб,  
Куйинманг, не илож қилмаса насиб.  
Бахтимга ҳамиша Сиз соғ бўлинг деб,  
Соғинган ўғлингиз — Мұхаммад Юсуф.

## АНОР

Ўзинг Аномидинг ёrim, юзинг анор,  
Ҳамон сени унутолмай бағрим ёнар.  
Ўттизда ҳам ўзгармадинг, оловдайсан,  
Ўнг бетингдан ўпганимга ким ишонар...

Эй, кўнглимга кўрк бўлмайин кетган ғунча,

Жон узилса бўлмасмиди сен кетгунча.  
Қиз боланинг ваъдалари бўй етгунча —  
Бўйга етгач бари қиз сўздан тонар.

Сен келмасанг бу тўйга мен келмас эдим,  
Кўрмас эдим, кўриб қон ҳам бўлмас эдим.  
Мен-ку, сени ҳеч кимсага бермас эдим,  
Мен ғарибга қизин бериб ким қувонар.

Ўйлар суриб хўрсинганинг ўхтин-ўхтин,  
Ёрингга айт, тинсиз толиққанга йўйсин.  
Сочларингга оқ мунчоқлар тақиб қўйсин,  
Гулшанингга бўйламасин бегоналар.

Ёринг билан биз ёшлиқдан жўра эдик,  
Қирқ йигитга сардор эдик, тўра эдик.  
Икки дўстнинг ахволидан сўра энди —  
Бу дунёда йўқдир биздек девоналар...

Ўзинг Аномидинг ёrim, юзинг анор,  
Ҳамон сени унутолмай бағрим ёнар.  
Ўттизда ҳам ўзгармадинг, оловдайсан  
Ўнг бетингдан ўпганимга ким ишонар...

## ҲАЗИЛ

Менинг ҳақимдаги ғийбатлар ёлғон,  
Ихтиёр ўзимда бўлса қанийди.  
Шароб ичиш менга Хайёмдан қолган,  
Ичмасам ул зотнинг кўнгли ранжийди.

Ўзим бошладимми, ўзим қилгум бас,  
Дўстларим беҳуда заволим излар.

Агар қирққа кирмай ўлсам, май әмас,  
Мени хароб этгай бевафо қизлар!..

## ОТАУЙ

Уч қутбга уч гулни  
Кузатиши бир кунда.  
Учта опа-сингилни  
Узатиши бир кунда.

Уч маҳлиқо, уч тобон,  
Юришарди ярқираб.  
Учаласи уч томон  
Учиб кетди чирқираб.

Сурнай йиғлар, күнгиллар  
Найдек нимта-нимтадир.  
Энди опа-сингиллар  
Күришади йилда бир.

Бири Шошда,  
Бири Ўш,  
Бири энди Бойсунда.  
Хол сўрайди қизлардан  
Она бўлиб ой тунда.

Хуш қол энди, болалик,  
Кўхна чорбоғ, хуш қолгин.  
Уч қизингни ўрнига  
Бозордан уч қуш олгин...

Хуш қол энди, Ота уй,  
Хушларингдан айрилма.

Қизларингдан айрилдинг,  
Күшларингдан айрилма.

Кенг қасрға келин бўл,  
Ўз ошёнинг бўлакча.  
Ота уйин олдида  
Бу дунё бир қўлмакча...

Уч қутбга уч гулни  
Кузатиши бир кунда.  
Учта опа-сингилни  
Узатиши бир кунда.

Қиз болага қисмат шу —  
Буни бошқа аташ йўқ.  
Бир ҳовлида туғилиб,  
Бир ҳовлида яшаш йўқ...

## БАҒИШЛОВ

Бу шундай бевафо дунё, бу ҳаёт,  
Тунда туғишганинг тонгда етти ёт.  
Балки тақдир шудир, балки шу қисмат,  
Биздан рози бўлинг руҳи нотинч зот.

Борингизда бизга бўлдингиз Ота,  
Йўғингизда йўқдан қидирдик хато.  
Беайб Парвардигор, дейдилар ҳатто,  
Биздан рози бўлинг руҳи нотинч зот.

Ҳали тупроғингиз совимай туриб  
Руҳингиз қақшатдик қабрингиз суриб.  
Чиғатой томонга кетдингиз юриб,

Биздан рози бўлинг руҳи нотинч зот.

Қабр учун дилдан жой топғанлар бошқа  
Қул бўлиб шоҳ қўлин ўпғанлар бошқа,  
Ўлғаннинг устидан тепғанлар бошқа,  
Биздан рози бўлинг руҳи нотинч зот.

Сизни алқаганлар бир халқ, бир денгиз  
Сизни қарғаганлар жўраларингиз.  
Сизни адо қилди тўраларингиз,  
Биздан рози бўлинг руҳи нотинч зот.

Сизни золим десак ранжирadolat, Fariшta десак ҳам кўнгил хижолат.  
Инсонсиз — омадли, гоҳи беомад,  
Биздан рози бўлинг руҳи нотинч зот.

Ким бўлманг сиздан шу юрт бизга мерос,  
Йўқчилик, тўқчилик, не бўлса рўй-рост.  
Энди тупроқ сизни айласин эъзоз,  
Биздан рози бўлинг руҳи нотинч зот...

Шоҳларга ҳамиша хушомад зомин,  
Кўзин ёғин ялаб, сотарлар номин.  
Шеърим ҳам тугади, ўзбекча омин,  
Биздан рози бўлинг, руҳи нотинч зот!

## ЭРКА КИЙИК

Эрка кийик, майлими бир эркаласам,  
Мажнун бўлиб, саҳроларга еталасам,  
Бу дунёда бирдай ғариб мен ҳам, сен ҳам,  
Эрка кийик, майлими бир эркаласам?..

Сенинг кўзинг қора, менинг кўзим қора,  
Сенинг бағринг яра, менинг бағрим яра,  
Бу дунёда сен бечора, мен бечора!..  
Эрка кийик, майлими бир эркаласам?..

Шамол эмас, изинг қувиб юрди камон,  
Сайёд менинг кулбамни ҳам қилди вайрон,  
Сенинг жонинг, менинг жоним — омонат жон,  
Эрка кийик, майлими бир эркаласам?..

Кел, йиғлаймиз биргалашиб янтоқларга,  
Саҳроларда қуrimаган булоқларга,  
Иккаlamиз яралибмиз қийноқларга,  
Эрка кийик, майлими бир эркаласам?..

Умримизнинг барча йўли, сўқмоғи чўғ,  
Чўғдан қўрқма, беюз қўйган қопқондан кўрқ,  
Бу дунёда сенга дўст йўқ, менга дўст йўқ,  
Эрка кийик, майлими бир эркаласам?..

Соч оқарди, дилдош кутиб кўзим толди,  
Юрагимдан тўқилмай не сўзим қолди,  
Йўл сўнгида, ҳеч бўлмаса ўлимолди  
Эрка кийик, майлими бир эркаласам?..

## ҚЎЯВЕРИНГ...

Шамол сабаб, эҳтимол,  
Тунда эшик ғичирлар.  
Бошланади, қишлоқда  
Шунда пичир-пичирлар.

Сизга нима?  
Сиз ухланг,  
Хеч ишингиз бўлмасин.  
Кимда кимнинг кўнгли бор,  
Кўяверинг, ўйнасин...

Ошиқларим — ошиқдек  
Майли, кўнгил хушлашсин,  
Икки ошиқ истаса,  
Шамол билан муштлашсин.

Ўксимасин қиз қалби,  
Йигит райи ўлмасин,  
Кимда кимнинг кўнгли бор,  
Кўяверинг, ўйнасин...

Фийбат қилманг йигитни,  
Уялтиранг қизни ҳам.  
Шундай ўтли муҳаббат  
Сийлар бўлсин сизни ҳам.

Бир совуқ сўз туфайли,  
Севги боғи сўлмасин.  
Кимда кимнинг кўнгли бор,  
Кўяверинг, ўйнасин...

Илк севгидан ийманиб,  
Сўнг пушаймон ёнса ҳам,  
Сепли қизга суйканиб,  
Эпли қиздан тонса ҳам.

Насиб этмай ёр васли,  
Энди ҳажри қийнасин!..  
Кимда кимнинг кўнгли бор,

Күяверинг, ўйнасин...

Икки ёрти бош узра  
Порласин ишқ қуёши.  
Қизга ҳаё, йигитнинг  
Фурур бўлсин йўлдоши.

Дийдорига бир-бирин  
Термулишиб тўймасин.  
Кимда кимнинг кўнгли бор,  
Кўяверинг, ўйнасин.

\* \* \*

Қизғалдоқлар қўйнида  
Ухлаб ётар бир сулув.  
Қайданам кўриб қолдим,  
Кўнглимга тушди ғулув.

Ухлаб ётар гулдайин,  
Ҳеч кимса йўқ олдида.  
Мен-ку, тегмай ўтардим,  
Отим тўхтаб қолди-да...

\* \* \*

Хали билмай сонсиз гуноҳларимни  
Кечирмаган-кечирганингни,  
Кўриб қолдим бир оқшом тағин  
Деразадан ечинганингни.

Ғаним экан менга саёқ нигоҳим,

Юрагимни қитиқлар, қилмас писанд.  
Күрганларим туш деб ўзни чалғитсан,  
Күзларимга ботиб қолди сийнабанд.

Дилдор, кечир кўриб қолганим учун,  
Кўрмаганим учун кечир гоҳида.  
Мен шу ерда, ёнингдаман бу кеч ҳам,  
Ўлтирибман... қантак ўрик шоҳида...

\* \* \*

Юртим, адо бўлмас армонларинг бор,  
Тошларни йиғлатган достонларинг бор,  
Ўтмишингни ўйлаб оғрийди жоним,  
Кўксинг тўла шаҳид ўғлонларинг бор.

Бағрим ўртар бир ўй баҳор айёмлар,  
Ой борган ёқларга термулиб шомлар.  
Айбин билмай кетган Акмал Икромлар,  
Файзуллодек марди-майдонларинг бор...

Юртим, кўнглингдек кенг осмонларинг бор,  
Юлдузни йиғлатган достонларинг бор.  
Осмонларингдан ҳам дийдорингга зор,  
Жайрондек термулган Чўлпонларинг бор.

Кўлинг қадоғига босай юзимни,  
Онамсан-ку, оғир олма сўзимни,  
Қайинбарглар ёпиб қаро кўзини  
Олисларда қолган Усмонларинг бор.

Алҳазар, алҳазар, минг бор алҳазар,  
Ана, юришибди кийганлари зар,

Қодирийни сотиб шоир бўлганлар —  
Мехробингдан чиққан чаёнларинг бор..

Қурбонинг бўлайин, эй онажоним,  
Сенинг фарёдларинг, менинг фифоним,  
Ўтмишингни ўйлаб ўртанар жоним,  
Айтсам адо бўлмас достонларинг бор.

## ОҚИБАТ

Мехр юракларда қотса ичикиб,  
Оқибат ҳам бўлгай анқо уруғи.  
Элнинг кичигини ғажир кичиги,  
Улуғини эса улуғи...

Полвони полвонин чалмоққа маҳтал,  
Дорбози дорбозин кўролмай яшар.  
Хофизлари қўшиқ айтишдан аввал,  
Бир-бирларин қарғаб овоз созлашар.

Зиёлиларига керакмас майдон:  
Тинчтар бир-бирин сал ғойибона,  
Олимси олиммин олимлик билан,  
Шоири шоирин ҳам шоирона!...

Мехр юракларда қотса ичикиб,  
Оқибат ҳам бўлғай анқо уруғи,  
Элнинг кичигини ғажир кичиги,  
Улуғини эса чайнар улуғи.

Андиша деган бир боғ бўлар вайрон,  
Гўё бу чамандан ялмоғиз ўтган.  
Оналар қизларин танимай ҳайрон,

Қизлар оналарин исмин унугтган.

Бир умр елкада күтариб ўзи,  
Ўзи боласининг раҳмига муштоқ.  
Ўғиллар муштидан кўкариб юзи,  
Оталар йиғлагай соchlари оппоқ...

Бўлди. Шеърим тамом. Ахир сиз чидаб  
Юрибсиз-ку, нима қипти мен юрсам.  
Томоғимда жоним турибди йиғлаб,  
Жондан айриламан энди гапирсам!..

### СЕВАР ЭКАН...

Билардим деб айтди у,  
Билар экан қизлар ҳам.  
Кулардим деб айтди у,  
Кулар экан қизлар ҳам.

Синардим деб айтди у,  
Синар экан қизлар ҳам.  
Сезардим деб айтди у,  
Сезар экан қизлар ҳам.

Кутардим деб айтди у,  
Кутар экан қизлар ҳам.  
Куяр экан, тунлар қон  
Ютар экан қизлар ҳам.

Мен эса... мен билмасдим,  
Билганимда кулмасдим,  
Сира парво қилмасдим:  
Севар экан қизлар ҳам!..

\* \* \*

Тунда шеър айтишдик капалак билан,  
Ялпизни алқадим,  
Гулни алқадим.  
Ёнимга судралиб келиб бир илон  
Күзойнак остидан боқди.  
Пайқадим.

Қувди ёлғиз ўшал ҳамхонамни у,  
Қувди париларни қувган каби дев.  
Хуркитиб юбориб парвонамни у  
Бўйнимга ўралиб олди:  
Мени сев!..

Чимзор.  
Чимилдиқда совуқ ёр қучдим.  
Пўстин гилам қилиб меҳробга қоқди.  
Кўзимни чирт юмиб  
Кечалари жим,  
Мен уни ўпганда —  
У мени чақди.

Чақди.  
Чақаверди заҳри сўнгунча.  
Чақди гоҳ билагим,  
Гоҳ юрагимни.  
У қанча чақса, мен тирилдим шунча,  
Шунча эслайвердим капалагимни!..

УЗР

### *Нозимага*

Шұхратга ўч бўлсам керак мен гумроҳ,  
Ёлғон бўлса керак дилда нолам ҳам.  
Тўпори байтларим битар пайтим goҳ  
Кўзимга кўринмай қолар болам ҳам.

Оlamни эркалаb эрка сўз излаб,  
Боламни эркалаb бир сўз айтмайман.  
Мушукдай суйкалиб келса ҳам музлаб,  
Бетидан бир ўпмай уйдан ҳайдайман.

Қалам ушладимми, демак — ўйин бас,  
Яйраб очолмайди гул дудоғини.  
Бундоқ юрак ютиб сўраша олмас,  
Хонамда қолдирган қўғирчогини.

Бурчак-бурчақда жим тортишар бурун,  
Билмам қандай ўй-у хаёл ичида.  
Тузсиз шеърларим деб шириндан-ширин  
Болаларим юрар оёқ учида...

Улар шеър ёзмасин ҳеч менга ўхшаб  
Мендан нафи кўпроқ тегар элимга.  
Шоҳ асар бўлса ҳам тупурдим ўша —  
Боламни йиғлатиб ёзган шеъримга!

### **ОТА**

#### *Юсуф отага*

Армоним бор, бу дунёда армоним бор,

Қоқ далада ўтлар босган ўрмоним бор.  
Қизғалдоқдай бошим эгик бу маконда,  
Ёшин яшаб ўтмаган отажоним бор.

Ота десам, бағри-дилим ёнаверар,  
Куним ёнар, ойу йилим ёнаверар,  
Мозорига қўйган гулим ёнаверар,  
Тутунларга тўлиб кетган осмоним бор.

Эсаверсин жаннатлардан келган насим,  
Момо еrim, ўзингсан энг муқаддасим,  
Бағрингда жим тинглаб бу тун жон нафасим,  
Рұҳимни аллалаб ётган жаҳоним бор.

Одам бўлиб бир одамни тушунмаслар,  
Кўзингда ёш кўриб ҳам goҳ ўқинмаслар,  
Босган изим пойлаб юрган эй, нокаслар,  
Қабрдан қўл чўзиб турган қалқоним бор...

Мен отамдан қолган эркин садо-сасман,  
Қонимга ёт наволарга қайрилмасман,  
Ўлгунимча энди ундан айрилмасман —  
Ўз отамдек бўлиб қолган имоним бор.

Армоним бор, бу дунёда армоним бор,  
Кенг далада гуллар босган ўрмоним бор,  
Қизғалдоқлар бош эгиб қон йиғлаб турган  
Бу маконда менинг ҳам нуржаҳоним бор.

\* \* \*

Байрамдир ҳар кунинг, нобакор,  
Давлатинг бор — сенга зулм йўқ.

Бу дунёда сендей бахтиёр,  
Ва мендайин бағри тилим йўқ.

Менга азиз жаннатлардан ҳам —  
Киндиқ қоним тўкилган далам,  
Лойсувоқ том ва қари онам...  
Бўлак борар бир манзилим йўқ...

Ер сеники, сеники само,  
Сенинг учун йўқ ҳеч муаммо.  
Нима қилсанг қиласан, аммо  
Сенга жазо, сенга ўлим йўқ.

Фариштамас ўзим ҳам албат,  
Мен ҳам бир уммати Мұхаммад.  
Гуноҳим кўп, биларман, фақат  
Хажга борай десам — пулим йўқ!..

## БОЛАЛИҚ

Қиқирлашиб қирларда  
Қизлар ўйнаб юради.  
Рўмолларин йўқотиб  
Мендан сўраб турарди.

Мен билсам ҳам барини —  
Рўмоли ўз қўйнида,  
Индамасдим, бу ҳам бўй  
Қизларнинг бир ўйни-да...

\* \* \*

Ғирот минган Гүрӯғли  
Бобом қани, айтинглар,  
Құнғиротлик Алпомиш  
Оғам қани, айтинглар?..

Тустовуқдай товланган  
Оlam қани, айтинглар,  
Күлда кийик овланган  
Далам қани, айтинглар?..

Кокиллари ер ўпган  
Санам қани, айтинглар.  
Күйіб кетгап жонимга,  
Малҳам қани, айтинглар?..

Дардим айтсам тушунган  
Одам қани, айтинглар?..

Күнглим гулдай эзилиб,  
Күзимга ёш тұляпти.  
Эх, қуёшга осилиб,  
Ботиб кетгим келяпти!

## НАВОЙ

Хитобларга қўмилиб, хотам,  
Буюк шоир, дейиш-ку осон.  
Ҳеч кими йўқ Навоийни ҳам,  
У ҳам мендек бир ғариб инсон.

Минорадек мармар ҳайкали  
Кўринса ҳам ҳатто Ҳиротга,  
Қавмин уйи турса чайқалиб,

Түйи татирмикан у зотга?..

Кечиргайми ҳазрат ўз қавмин,  
Бир-бирига бўлмаса паноҳ;  
Подшосининг билмаса қадрин,  
Гадосини сийламаса гоҳ?..

Юрагини чаққандек ари  
Пир енгидан кириб яширин,  
Азобмасми, набиралари  
Кўзин ўйиб юрса бир-бирин?..

Юм-юм йиғлаб ётмасми устоз,  
Қабрида ҳам юрак-бағри қон -  
Шоирлари сўйламаса рост,  
Олимлари талашса унвон?..

Мангу назм гулшани сўлмас,  
Навоий-ку яшар то абад.  
Оқибатсиз элда эрк бўлмас,  
Мурувватсиз юртда саодат...

Буюк шоир дейиш-ку осон,  
Хитобларга қўшилиб. Лекин  
Навоийнинг тўйи,  
Биз қачон —  
Арвоҳини шод этолган кун!

\* \* \*

Онажон,  
Онажон,  
Юрагим оғрир.

Билмадим нимага қийнайди мани.  
Мен дәхқон боласи әдим-ку ахир,  
Наҳот шунча нозик бўлса бу жоним?.

Энди-ку ухламай ўйлар сурмайман,  
Софинсам, дунёда соғинганим сиз.  
Оғрир,  
Оғрийверар юрак, билмайман,  
Нега оғришини айтмас ҳам иблис.

Ё севиб қолдимми,  
Бу мумкин эмас.  
У мендан безор,  
Мен ундан безорман.  
Мұхабbat деганин қилмасман ҳавас,  
Шундай ҳам бу узун йўл тўла армон...

Онажон,  
Онажон,  
Юрагим оғрир,  
Гўё кимдир уни тиф билан тилар.  
Кечалар елқамга темирдек оғир  
Қўлларин қўяр, қўзимга тикилар.

Ким у?  
Мен танимайман.  
Отамнинг арвоҳи ўша зот балки:  
Уйимнинг чироғин ёқмай болам, сен  
Қаерда,  
Қаерда юрарсан санқиб?!

Қишлоққа кетаман,  
Тонг отса бўлди.  
Қуёш, уйғотиб қўй мени эрталаб...

Юрагим,  
Юрагим оғримай қўйди,  
Эй, қалбни бир ўпид бўлмас эркалаб?

\* \* \*

Қуёшга қараб оққан сув,  
Дардимни айтган эдим-ку,  
Додимга етмайсан нега,  
Қуёшга қараб оққан сув?..

Қандай юзсиз дўстимсан,  
Оҳлар тўла кўксимдан  
Оҳ уриб кетмайсан нега,  
Қуёшга қараб оққан сув?

Сувингга қўшиб ёшимни,  
Қиблага қаратиб бошимни  
Ётқизиб кетмайсан нега,  
Қуёшга қараб оққан сув?..

Мен кимман? Бир ёлғизман,  
Сув бўйида бир ялпизман.  
Оқизиб кетмайсан нега,  
Қуёшга қараб оққан сув?

Қуёшга қараб оққан сув,  
Онамдек мени боққан сув...

## ТУРКМАН ҚИЗ

Айланаман, Шарқни кезиб айланаман,

Иболи бир ёр тополмай ўйланаман.  
Ўз юртимнинг сулувлари тил уқмаса,  
Узун кўйлак туркман қизга уйланаман...

Кўзим тушса юзлари лов-лов ёнади,  
Елкасида қирқта чаман товланади,  
Кесилмаган кокиллари тўлғонади,  
Узун кўйлак туркман қизга уйланаман.

У элининг урфларини қилмайди хор,  
Бешиги ҳеч алласига бўлмайди зор,  
Қошида момоси қўйган ўсмаси бор,  
Узун кўйлак туркман қизга уйланаман.

У ажралиб тураг турфа гул ичида,  
Офтоб чиқиб, офтоб ботар кулгичида,  
Ўз тилида гапирмайди тил учида,  
Узун кўйлак туркман қизга уйланаман...

Бир хил либос киймиш, кўрдим, нечалари,  
Ойбалдоғи ёниб тураг кечалари.  
Яшнаб кетар юрса Тошкент кўчалари,  
Узун кўйлак туркман қизга уйланаман.

Гўшангага кирганимда ёрга етиб,  
Менга ўлан сўйлаб берар ёдлар этиб.  
Боболарим руҳларини шодлар этиб,  
Узун кўйлак туркман қизга уйланаман.

## СОДДА МУҲАММАДМАН...

Ўзбек қизларига

Содда Мұхаммадман,  
Содда Мұхаммад —  
Туркман қызни мақтаб балога қолдим,  
Күйлагига ҳавас қылгандим фақат,  
Тоабад туганмас ғавғога қолдим...

Недан ранжидингиз жон сингилларим,  
Қабоқлар уюлди, чимрилди қошлар.  
Туркман тушунмай тош отса, чидадим,  
Аммо ёмон ботди сиз отган тошлар.

Ёруғ дунёда-ку бари қиз гүзәл,  
Миллат танламас-ку хусн дегани,  
Нигоҳим Жайхундан сакраб ўтса сал,  
Қайдан билай сизга малол келганин.

Юртим сулувлари, сизга йўқ тараф,  
Қошингизда ўсма юрса сирғалиб,  
Узун сочингизни ўрсангиз тараб,  
Боқса деган эдим ой ҳам суқланиб.

Асли туркман қиз бир баҳона холос,  
Излаганим эди сизлар кабилар,  
Қўмсаганим — ҳаё, момоларга хос,  
Софинганим эди Кумушби билар...

Ёнсам ҳажрингизда менинг ёнишим,  
Куйсам сиз туфайли қўнглимдаги чўғ,  
Туркман қизлардан йўқ менинг танишим,  
Қалинга туям ҳам тушиб қолган йўқ!

\* \* \*

Мендей ғарифни ҳам күролмаслар бор,  
Нураб борарману ўзим шундай ҳам,  
Тугаб борарману ўзим шундай ҳам,  
Кўксимга тош отмай юролмаслар бор...

Товушим чиқмас бир капалакча ҳам,  
Садосиз кузатгим келар дунёни.  
Кўтаролмас ҳатто темир токча ҳам  
Улар қанотимга ортган риёни.

Дўстлар, дегим келар,  
Бўлманг хавотир,  
Узоқ яшамайман шундай ҳам ўзим,  
Умрим бир боғ кезиб ўтгай наводир,  
Сўнар у бир очиб юмгунча кўзим.

Кўйишмас,  
Кўлимдан тортади бири,  
Бири оёғимдан,  
Бири сочимдан.  
Бири қўйним, бири кўнглимга кириб,  
Ҳаётдан бездирап ўттиз ёшимдан.

Ўтмас пичноқ билан мени сўйишиб,  
Томоша айларлар туриб сал нари.  
Худонинг қўлидан нон еб тўйишиб,  
Шайтоннинг хизматин қилишар бари!..  
Мендей ғарифни ҳам күролмаслар бор.

\* \* \*

Бу бешафқат,  
Бу беозор дунёда,

Бу шундай кенг,  
Бу шундай тор дунёда,  
Кимлар келиб,  
Кимлар кетар дунёда,  
Құнғизнинг ҳам Ватани бор дунёда,  
Нега йиғлар қримтатар дунёда?..

Ҳар йил баҳор уч кун яшар бойчечак,  
Ариқларнинг бўйидаги мойчечак,  
Ялпизнинг ҳам Ватани бор дунёда,  
Нега йиғлар қримтатар дунёда?..

Толкосадай макони бор айронни,  
Янтоқ асрар сайёдлардан жайронни,  
Қамишзорда яйраб юрган қобонни —  
Тўнғизни ҳам Ватани бор дунёда,  
Нега йиғлар қримтатар дунёда?..

Тулкидайин тутқич бермас туллакни,  
Тулки қувиб тутолмаган ўрдакни,  
Ўрдак қўнган сахродаги кўлмакни —  
Ховузни ҳам Ватани бор дунёда,  
Нега йиғлар қримтатар дунёда?..

Ким ёлғиздир?  
Маскани йўқ эл ёлғиз.  
Ўзга юртда ўсгани йўқ эл ёлғиз.  
Эртакдаги ўттиз бошли Ялмоғиз  
Ёвузни ҳам ватани бор дунёда,  
Нега йиғлар қримтатар дунёда?..

Бу шундай кенг,  
Бу шундай тор дунёда,  
Бу бешафқат,

Бу беозор дунёда,  
Дарвозаси йўқ бир бозор дунёда,  
Кимлар келиб, кимлар кетар дунёда,  
Нега йиғлар кримтатар дунёда?!

## ҚАЛДИРФОЧ

Осмон бўлмас, кўшкимда  
Сен яйрасанг, Қалдирфоч,  
Яйрармидим ўзим ҳам...

Уммон бўлмас, тўшимда  
Сузиб юрсанг ёйиб соч,  
Пойлармидим ўзим ҳам...

Қара қандай хотамман —  
Сени ўзим беармон  
Кузатдим баҳт йўлига.

Ахир, нетай, одамман,  
Одамзотни ҳеч қачон  
Қуш қўнмайди қўлига!..

## ПАЛАХМОН

Осмон ерга энгашиб,  
Булут соғди кун бўйи,  
Ёлғончи ёр тўйида  
Ёмғир ёғди кун бўйи.

Ёмғир эмас, бу ҳалқоб  
Келинчак кўз ёшидир.

Йиғлама ёр, қиз бола  
Палахмоннинг тошидир.

Қайғурмагил қўй, чорбоқ  
Айланамиз, юр, дўстим,  
Пешонанг шу экан, бу —  
Тақдир, деди бир дўстим...

Тақдир эмас, айрган,  
Ёрнинг қалам қошидир.  
Қолаверса, қиз бола  
Палахмоннинг тошидир.

Эгилмаган ерларга  
Эгиб йигит бошимни,  
Палахмон-ей қайларга  
Отдинг ёқут тошимни!

\* \* \*

*Рўмолим бор — бўяма,  
Бўямани ювдирма...  
Кўшиқдан*

Рўмолингни бўяма,  
Билмайгина ювдирдим,  
Отанг сени бермай, мен  
Оламан деб куйдирдим...

Мени суйсанг бўлгани,  
Сен сўзингда тур, жоним.  
Отангни ўзим йўлга  
Соламан, деб куйдирдим.

Маломатлар ёғилсін,  
Тошлар ёғсін бошимга,  
Мен аҳдимга вафодор  
Қоламан, деб күйдирдім.

Отанг сени бермади,  
Тақдир дедім. Күниқдім.  
Мен бечора... бир шоир  
Боламан, деб күйдирдім...

\* \* \*

Бир йил бўлди,  
Сендан келган хат —  
Қалин китоб ичидаги диққат.  
Мен эса банд,  
Мен овораман,  
Марҳаматга қачон бораман?..

Бугун дўстим туғилган куни,  
Табриклайман гул билан уни.  
Торт кесаман,  
Тарвуз ёраман...  
Марҳаматга қачон бораман?

Диёримнинг байрамлари шўх,  
Байрамларда эса билет йўқ.  
Бир кассирга минг ёлвораман,  
Марҳаматга қачон бораман?

Чимилдиққа кирмоқда бир қиз,  
Эсиз, увол кетди севгимиз.

Ноиложман,  
Йўқ, бечораман,  
Марҳаматга қачон бораман...

Менга минг жуфт нигоҳ қадалар,  
Бошланади мушоҳадалар.  
Ўзи ёмон,  
Юзи қораман,  
Марҳаматга қачон бораман...

Мен эса банд,  
Мен овораман.  
Торт кесаман,  
Тарвуз ёраман.  
Бир кассирга минг ёлвораман,  
Марҳаматга қачон бораман!..

## КИНОГА КИРМАЙМАН

Билет топилмайди «Ўтган кунлар»га,  
Қизлар қайтиб келар кўзёш қилишиб.  
Хайр, уйқу, дейману менда йўқ ором,  
Муқовасиз китобимга мук тушиб.

Ногоҳ мусиқалар тинган ётоқда  
Китоб кирмаган хона қолмаган.  
Ҳеч ким уни мендек ўқимаган, лекин  
Ҳеч ким уни мендек ўқий олмаган.

Кўзимни юмаман, кулгичлари яйраб,  
Кумуш боласига рўмолча тўқир.  
Кейин ичкаридан — минг йил наридан  
Зайнабнинг нигоҳи жонимни чўқир.

Шундай оқшом ботар, шундай тонг отар,  
Китобим ўқийман — сатри муқаддас.  
Менга ёқмас экрандаги Отабек,  
У бошқа. У бошқа, мен билган эмас!..

Билет топилмайды «Ўтган кунлар»га,  
Мен эса кирмайман бекорга ҳам ҳатто.  
Майли, қарсак чалай истеъдод учун  
Лекин санъат —санъат, ҳаёт —ҳаёт-да.

Кўзимни юмаман, кулгичлари яйраб,  
Кумуш боласига рўмолча тўқир.  
Кейин ичкаридан — минг йил наридан  
Зайнабнинг нигоҳи жонимни чўқир.

## ИҚРОР

Шоирлик мен учун асло орзумас,  
Шу ҳам иш бўлдими йигит бошимга.  
Ҳамма шоир зотин йиғса — арзимас  
Онамни соғиниб тўқкан ёшимга.

Ана, улар қиласар булбулларга дўқ:  
«Эй қуш, бу боғларнинг мен булбулиман!»...  
Шоирлар билан ҳеч ошнолигим йўқ,  
Мен ёруғ дунёда кўнглим қулиман.

Аммо юрагимни қийнар бир азоб,  
Қўй десам қўймайди, тутқазар қалам,  
Мен кетмон сўрасам — тутади рубоб,  
Куйлайман жонимдан ўтганда алам.

Осмонга қарасам күринар тупрок,  
Майсага термулиб ойни күраман.  
Бу қандай күргилик, билмайман, ўртоқ,  
Мен қачон далада буғдой ўраман!..

Шоирлик мен учун асло орзумас,  
Шу ҳам иш бўлдими эркак бошимга.  
Ҳамма шоир зотин йифса — арзимас  
Уйимни соғиниб тўккан ёшимга.

Ана улар салқин хиёбонларда  
Энтикиб ёзишар келажакка хат.  
Оқибат ҳақида ҳайқиришар ва  
Абдулла Орифни қилишар ғийбат...

Бўлди.  
Шеър ёзмайман.  
Мен энди одам,  
Оддий одам бўлиб яшай бошлайман.  
Кўнглимга ачиниб агар ёзсан ҳам,  
Тунда ёзиб, тонгда ўтга ташлайман!

## СУМАЛАК

Баҳор сўраб келса жамолингизни,  
Шудринг йўқлаб райҳон шохида сизни,  
Бир ўй қийнамасми гоҳида сизни —  
Наврўзфурушлар?

Тўп отиб бойчечак бечораларга,  
У кун қаҳрингизга дучораларга,  
Пешонангиз тегиб сайёralарга,  
Қани юришлар?..

Бизга мотам бўлса, сизга нима ғам,  
Жабрлар қилдингиз жабр устида ҳам.  
Дуога чўзилса қабр устида ҳам —  
Кўллар чопдингиз.

Гувалагимиздан гоҳо ўёлиб,  
Ҳар ис чиққан жойдан хабарлар олиб,  
Сумалагимизга заҳарлар солиб,  
Нима топдингиз?..

Ёритди-ку ислом нури уйимни,  
Инъом айлаб қайта тилим, куйимни.  
Енг шимариб, юрак ютиб сиз кимни  
Талайсиз энди?...

Эй сиз, сохта шухрат-шон адолари,  
Эй сиз, эл хатоси, юрт хатолари,  
Мансаб гадолари, пул гадолари,  
Қалайсиз энди?..

Биз билан сумалак ялайсиз энди!

\* \* \*

Атиргулдан юмалади капалак,  
Бир силкиниб қўймади ҳам гул шохи.  
Жон талашиб, қум ялади капалак,  
Кўчди менинг кўксимга-да титроғи.

Дунё кезиб, топгани шу гул эди,  
Япроқлари беланчаги зангори.  
Тонгда унинг ифорига қул эди,

Шомда эртак бўлиб қолди дийдори...

Атиргулдан юмалади капалак,  
Кўнгилни бир бузди. Бўлди хаёлни.  
Уволингни ким олади, капалак,  
Қай қўл билан тутай қотил шамолни?

Оқшом боғда унга боқиб қолдим лол,  
Тушимда ҳам кўрмагандим, бу не ҳол —  
Бир қаноти ётар эди ерда лой,  
Бир қаноти кўқда эди — ярим ой...

Атиргулдан юмалади капалак,  
Оқ упаси Сомон йўли бутоқда.  
Сен ҳам кетсанг ким қолади, капалак,  
Мен ёлғизман, тўти тўла бу боғда.

## ЗЕБИЖОН

Яланг оёқ ёшлигимни эсласам жим,  
Кўзларимга сургим келар бурда нонни.  
Қорним нонга тўймаса ҳам пошшо кўнглим:  
Зебижонни суяр эдим, Зебижонни...

Капалак ҳам сийлар гулнинг суйганини,  
Шабнамларнинг кўрдим тонгга ийганини,  
Ким биларди камбағалнинг куйганини,  
Зебижонни суяр эдим, Зебижонни...

Суйганимни бир бойвачча тортиб олди.  
Тилло берди, тиллога от сотиб олдим,  
Тулпоримнинг туёғига ётиб олдим,  
Зебижонни суяр эдим, Зебижонни...

Отим билан гаплашардим одамдайин,  
Мен бир қашшоқ ўғилман, у — отамдайин,  
Йиғлар эдим ёлларини силаб майин,  
Зебижонни суяр эдим, Зебижонни...

Кимга айтиб яна кимга йиғлай бориб,  
Умрим ўтди ёлғиз унга күнглим ёриб,  
Отим мендан ғарибу — мен ундан ғариб.  
Зебижонни суяр эдим, Зебижонни...

Ой юзли ёр ойдек ўғил туққан оқшом  
Мадаминбек тортиб олди отимни ҳам,  
Дардимга дард қўшилди воҳ, ғамимга ғам  
Зебижонни суяр эдим, Зебижонни...

Камбағалнинг куни курсин экан, кўрдик,  
Мискин эдик, яна икков мискин бўлдик,  
Отим бекка, ўзим эркка тутқин бўлдик,  
Зебижонни суяр эдим, Зебижонни...

Тунда бориб олиб қочдим, келиб орим,  
Елдек учеб кетаверди жониворим.  
Мадаминбек бия минсин, чу, тулпорим,  
Зебижонни суяр эдим, Зебижонни!..

## АЙТ

Гулдай умринг кулдай тўзиб кетмоқда,  
Кимни кутиб ёшинг қирқдан ўтмоқда,  
Ёлғизмисан энди сен бу чорбоқда,  
Энди йўқлаб келмасму у алдаган?..

Үт ҳам үсар бир-бирига суйкалиб,  
Сен на ёрсан, сен на тулсан, эй ғариб,  
Хеч бўлмаса кўнгил учун ахтариб,  
Бир бор келса бўлмасму у алдаган?..

Очил гулим, айт ўзимга дардингни,  
Гулфурушлар қайдан билсин қадрингни.  
Ёмғирман деб юзинг силаб, баргингни  
Тўкиб кетган дўлмасму у алдаган?..

Не мунчоқ, у тенги йўқдир, тизимсиз,  
Не олчоқ, у, руҳи жонсиз — жисмсиз,  
Йиллар билан ич-ичингга исмсиз  
Чўкиб кетган кўлмасму у алдаган...

Гулдай умринг кулдай тўзиб кетмоқда,  
Кимни кутиб ёшинг қирқдан ўтмоқда.  
Елкангдаги етти қатор сиртмоқда  
Осилибина ўлмасму у алдаган...

Юзларингни кўргандайман қайдадир,  
Кўл ушлашиб юргандайман қайдадир,  
Неки қилсанг, ахир бир кун қайтадир,  
Айт, мабрдо менмасму у алдаган?!

\* \* \*

Жонимда жон қолмас югуриб-елиб,  
Кўнгил айтганимга кўнади бир кун.  
Туғишган синглимдек соғиниб келиб  
Капалак кафтимга кўнади бир кун...

Майсалар кун билан кўришгандек юз,

Туармиз жилмайиб бесүз, беармон.  
Мен унинг қанотин силарман маъюс,  
У менинг кафтимни силар меҳрибон.

Капалак кўлимга қўнади бир кун...

\* \* \*

Ўксимагин о, юрак,  
Бўлма хомуш, бўлма лол:  
Менинг отам оқтерақ,  
Менинг онам — мажнунтол.

Осмонда ой ёлғиздир,  
Ёлғизман мен ҳам, ахир.  
Менинг опам ялпиздир,  
Синглим лола қон бағир.

Тўшагим шу шўр тупроқ,  
Кўрпам кўкда булатдир.  
Менинг акам Улуғ тоғ,  
Менинг укам — бургутдир.

Табассумим чақмоқлар,  
Ёмғирлар — кўз ёшимдир.  
Арслон мени ардоқлар...  
Қоплон қариндошимдир...

Ёв ҳисобин қилмайман,  
Мард бўлса жон фидодир.  
Дўстларим ким билмайман,  
Менинг ёrim — Худодир!

## БУЛБУЛ

Қайинлар юртида булбулни күрдим,  
У гул бутоғида қиласын хониш.  
Қовоғимни солиб ҳол-ақвол сүрдим,  
Озроқ гина билан, озроқ қизғаниш...

Яхшиям күрганим, күрмасам албат,  
Тентакнинг туши, деб ўйлар эканман.  
Туғишигандек күриб, мен уни фақат  
Ўзбекнинг қуши деб, ўйлар эканман.

Ўша тинчимас жон, ўша бедаво,  
Ўша дарди ёлғон, ўша хуркак қиз.  
Қалин барглар аро қиласын наво,  
Ўша нағмасини қолдирмай бир сўз.

Мени мафтун қилди-қўйди баччағар,  
Ўтмас пичоқ билан сўйди, баччағар.  
Негадир уйимни соғиниб кетдим,  
Булбулга эргашиб юриб жарма-жар.

Кушим ушлатмади опкетай десам,  
Кўйнимга авайлаб сопкетай десам.  
У ёқда кутарлар юраклари қон,  
Ўрмонда у билан қопкетай десам...

Мени-ку зарурат судради бу ён —  
Масковда нима бор сенга, булбулжон?!

## АЖАБ ДУНЁ

Икки буюк шоир, икки мусоғир —  
Навоий Ҳиротда, Қобулда Бобур.  
Сизни ўйлатмасми бу жумбоқ, бу сир,  
Навоий Ҳиротда, Қобулда Бобур...

Буни тасодифми атайнин, айтинг,  
Қитмир қисмат ўйни дейинми ё бир?  
Кўриб қўй, Туркистон, икки шоҳ байтинг —  
Навоий Ҳиротда, Қобулда Бобур.

Жафо этганга ҳам жабр этмадик,  
Гадони сийладик гоҳо, Худо бир.  
Даҳоларимиз қадрига етмадик —  
Навоий Ҳиротда, Қобулда Бобур.

Ер ёнар жаҳаннам афғонда ял-ял,  
Кулранг кўрпа янглиғ булат ёнодур.  
Ёнар не тиклаган бўлса бир маҳал —  
Навоий Ҳиротда, Қобулда Бобур.

Икки буюк ҳикмат, икки хуш забон,  
Икки буюк дилдан йўқдир садо бир.  
Биз ғанимга бежанг топширган қўрғон —  
Навоий Ҳиротда, Қобулда Бобур.

Убрашишмаганди улар ҳаётда,  
Ётурлар ёнма-ён икки лаҳатда.  
Нима дейсиз энди, ҳаёт —ҳаёт-да —  
Навоий Ҳиротда, Қобулда Бобур!

## ОТА

Ота, ғўзангизни сув босиб кетди,

Чумчуқ вайрон қилди жүхорингизни.  
Менинг китобларим бир жамбильбаргча  
Ёзолмади лекин хуморингизни...

Телевизорлардан жилмаймоқ нима,  
Мен шеърлар ўқидим, кўнглингиз тўлмади.  
Оқшом оқ даладан бир боғлам сомон  
Келтирган болача нафим бўлмади.

Қирқ йиллик осколка қийнади бир кун,  
Сиз ётиб қолдингиз, бўлди керагим.  
Учиб боролмадим самолёт бўлиб  
Ота, деб осмонга тегиб курагим.

Кейин сиз кетдингиз. Бу ёруғ дунё —  
Тўполнон дарёни менга қолдириб.  
Сўнгги ўтинчингиз айладим бажо  
Кўзларимни тўсган сочимни олдириб!..

Мехримни бошимга урайми энди,  
Шеъримни бошимга урайми.  
Менинг соғинчимни ютиб оғринмай,  
Ёрилмай яшаган юрак-юракми?..

Ота, юзларимни сув босиб кетди,  
Кўзёш пайҳон қилди кўнглим гулзорин.  
Менинг китобларим,  
Менинг шеърларим —  
Қадрингиз билмаган йилларим зори...

\* \* \*

Сочим оқарса ҳам чақалоқдайман.

Энди туғилдиму  
Наздимда гүё —  
Хозиргина биров қўлига томди  
Киндигимдан оққан қизил сув...

Доя кампир қани?  
Қайда қолди у?!.  
Уни қўмсаб келиб,  
Бу кун бир тобут  
Кўрдим... Э воҳ, борар йўлига томди  
Кипригимдан оққан қизил сув.

Қизил сув, қизил сув, қип-қизил сув.  
Улғайиб қолдим-қу,  
Опа, қачон тўй?..  
Ўғил кўрмоқчиман. Баҳодиримга  
Менинг сумагимни асраб қўй.

\* \* \*

Карнай йиғлар,  
Сурнай йиғлар.  
Қиз йиғлар,  
Тўлиб кетар қишлоқ қий-чувга,  
Тўй бошланар...

Сойга тушиб кетаман  
Мен тушимни айтгани сувга.  
Онам чиқар йўлимдан:  
— Бир девор қўшнимиз-а, болам?

Васиятин унутдингми отангнинг?  
Синглим тутар қўлимдан:

— Ака, сизда гапи бор экан  
Ҳамида опамнинг,  
Хе, ўша опангни...

Девордан бир сакраб,  
Сойга тушиб кетаман,  
Ҳеч ким билмас,  
Ҳеч ким кўрмас  
Жойга тушиб кетаман.

Ё-о-о-таман...  
Карнай йиғлар,  
Сурнай йиғлар.  
Қиз йиғлар.  
Мен чекаман,  
Юрагим... унсиз... йиғлар.

## ЁГОЧ БЕШИК

Елкадан сирғалиб кундузги ташвиш,  
Елкадан сирғалиб кўрпалари-да,  
Супачада ухлар эркак ва аёл  
Ёғоч бешик ўрталарида.

Хўроллар баётин авжи — тонготар,  
Суюмли нигоҳи эркаларида,  
Нонушта қиласи эркак ва аёл,  
Ёғоч бешик ўрталарида.

Қайдадир трактор гувиллар. Энди  
Топган-тутганлари ўрталарида.  
Далага жўнайди эркак ва аёл,  
Ёғоч бешик ўрталарида...

## ҚИЗЛАР ҚҮШИФИ

Қиз йўқ уйда сарин сабо эсмайди,  
Қиз йўқ уйда жамбил-райҳон ўсмайди.  
Ўғилларнинг ота билан иши йўқ,  
Қиз отасин ҳар қадамда эслайди.  
Қўзларига сургай юрган изингиз,  
Қай ўғилдан камдир, айтинг қизингиз...

Қиз йўқ уйда тонглар эрта отмайди,  
Томда офтоб, айвонда ой ётмайди.  
Ўғил қандай дўст бўлади, билмадим,  
Қиз дўст бўлса — сирингизни сотмайди.  
Оғир кунда жавдиратмас кўзингиз,  
Қай ўғилдан камдир, айтинг қизингиз...

Умр дарё, толега ким кафилдир,  
Қизнинг борар жойи бўлак соҳилдир.  
Қиз дардига етмаганлар ғофилдир,  
Қиз бор уйда ёруғ бўлар юзингиз,  
Қай ўғилдан камдир, айтинг қизингиз...

Дунё кўрки — шу қўзлари шаҳлолар,  
Қизлар билан чаманзордир саҳролар.  
Бир қайрилиб Қайсни Мажнун айлаган,  
Тоҳирларни Тоҳир қилган — Зухролар.  
Қиз туфайли бутдир ризку рўзингиз,  
Қай ўғилдан камдир, айтинг қизингиз...

Айтинг кимнинг паймонаси тўлмаган,  
Қиз бор — ота ёт бағирда ўлмаган.  
Ўғлим йўқ деб ўқинганлар — жоҳиллар,

Ҳатто, Пайғамбарнинг ўғли бўлмаган!..  
Билиб айтинг айтганда ҳар сўзингиз,  
Қай ўғилдан камдир, айтинг, қизингиз?!..

## ДАЛАДА

Қовушмаган иккита тақдир  
(Балки у ҳам ўзича ҳақдир),  
Орасига икки эгатни  
Атай ташлаб ўтди бригадир...

Қовушмаган иккита нигоҳ  
(Балки савоб бу, балки гуноҳ),  
Орасига икки эгатни  
Атай ташлаб ўтди бригадир...

Ҳамма қизнинг кўзи уларда,  
Ҳаммаси бир бўлиб ўйларди —  
Орасига икки эгатни  
Атай ташлаб кетди бригадир.

Икки эгат ораларида,  
Кўкка ўрлаб кетгунча хирмон.  
Икки эгат ораларида  
Беш миллионга етгунча хирмон.

Зорланади ялинчоқ нигоҳ  
— Кел ёнимга, бирга терамиз.  
Унамайди тортинчоқ нигоҳ:  
— Одамларга кулги бўламиз...

## «БОСМАЧИЛАР»

Олмослардан кескир эди шамширингиз,  
Тутун бўлиб тўзиб кетди тақдирингиз,  
Минг йигитга арзирдингиз ҳар бирингиз.  
От ўйнатиб юрмадингиз, «босмачилар!..»

Тупроқ тўшак бўлди, болиш эгар бошда,  
Жалолиддин каби мудом жаҳонгашта,  
Умрингизнинг ярми ўтди тоғу тошда,  
Не кунларни кўрмадингиз, «босмачилар».

Кўрғошинга қалқон бўлди ўт кўкраклар,  
Қафан бўлди қонга ботган оқ яктаклар,  
Сўнгги макон бўлди баъзан чакалаклар,  
Одамдай ҳам ўлмадингиз, «босмачилар...»

Тушунмайин ким қарғади, кимлар сотди,  
Кўнглингизда алам, кўзда ёшлар қотди,  
Ортингиздан гоҳ болангиз тошлар отди,  
Ёш деб, гина қилмадингиз, «босмачилар».

Уйингизда сизни кутди, кел, деб тўрам,  
Келинчаклар кокиллари тарам-тарам,  
Кўнгилга ёр сиғармиди юртда қарам?..  
Жангоҳлардан жилмадингиз, «босмачилар».

Кенгашсангиз тор дунёлар кенг бўларди,  
Эргаш ёқа бўлса, Шермат енг бўларди,  
Бирлашсангиз ким ҳам сизга тенг бўларди,  
Нечун аҳил бўлмадингиз, «босмачилар?..»

Босмачимиш... Бундай демиши қай бемаъни,  
Тутмайдими бир кун уни беклар қони...  
Ҳамма сиздек ўз юртини суйса қани!

Беҳуда қон тўқмадингиз, «босмачилар!»

Сиз йўқ, бунда кўтарилди дарпардалар:  
Отдан тушди сариқ мўйлов саркардалар,  
Бухорони тўпга тутган шармандалар...  
Афсус, афсус, кўрмадингиз, «босмачилар».

Эркли элда сизни эслаш нақадар ҳуш,  
Сизга ҳайкал қўйса арзир майдонлар бўш,  
Оқ яктақда, арғумоқлар миниб оқтўш  
Мундоқ кўқрак кермадингиз, «босмачилар!»

Субҳидамда шеърим битди, кўзим тиниб,  
Пойингизга бордим кўнглим бир ўксиниб,  
Туринг энди бобо десам, сиз хўрсиниб  
Жилмайдингиз, турмадингиз, «босмачилар».

Қайга тарқаб кетган бўлманг, қай замонда,  
Сизнинг асов қонингиз бор бизнинг қонда.  
Унутмаган сизни ҳеч ким Туркистонда,  
Хонларга тенг ҳурматингиз, «босмачилар!..»

Олмослардан кескир эди шамширингиз,  
Тутун каби тўзиб кетди тақдирингиз.  
Минг йигитга арзирдингиз ҳар бирингиз,  
От ўйнатиб юрмадингиз, «босмачилар».

## КЕЧИКИШ

Кўқрак тўла орзу о ташвиш  
Пайкалда ҳам ҳосилимиз мўл.  
Яшаяпмиз бизлар ёзу қиши  
Юмушлардан бўшамайди қўл.

Ношукрман нолисам, бирок,  
Хеч кимсадан камим йўқ ахир,  
Фақат сени соғиниб гоҳ-гоҳ  
Йиғлаб мени қон қилар кампир.

Тушунолмай қолдим қандайдир  
Тошмехроқ чиқдинг ўзинг ҳам.  
Бизни эслаб ҳар замонда бир  
Хат ёзиб ҳам қўймайсан, бўтам...

Шаҳар ёқдан ким келса, бари  
Тўтидек бир сўзни қайтарар:  
Кўришмадик, ўғлингиз балки  
Келиб қолар, дейди занғарлар.

Яхши бўлди келганинг аммо  
Зап вақтида келдинг бу сафар,  
Маҳаллада ялла авжида,  
Айни тўйлар бошланган маҳал.

Мана кеча, оти нимайди  
Салтанатнинг кенжा қизини.  
Эсим қурсин, ёдда турмайди,  
Бор эдию сочи узуни —  
Биз куёвга узатдик шуни...

Тўйи тўкин ўтдию, лекин  
Куёвига қизгина тушкур  
Кўнгилсизроқ эканми, қайдам,  
Кўп йиғлади, деб келди кампир.

Ким билади, балки шундайдир,  
Янглишгандир балки кампирам,

Бари келин йиғлайди, ахир,  
Йиғламасдан эрга теккан ким?

Бу гапларни қўя турай, кел,  
Бўталоғим, ўзингдан гапир.  
Зилзилалар унут бўлиб, эл,  
Шаҳар энди тинчиб қолгандир?

...Меҳр тўла нигоҳи билан,  
Бобом мендан жим кутар жавоб.  
Билса экан, тушунса экан,  
Невараси не кўйда шу тоб!

Билмайди, эҳ бобом билмайди,  
Мен, мен, ахир севардим уни!  
Салтанатнинг оти нимайди,  
Ўша сочи узун қизини...

## КЕТИБ ҚОЛДИМ...

Кетдим уйдан, кўнмай қийнов-қистовга,  
Дедим: — Она, айтиб қўйинг ановга.  
Момосини кўрсатаман агар у  
Мен йўғимда тегиб кетса бировга...

Нима қилсам шеър ишқида қилдим мен,  
Шеъримни деб йиғладим мен, кулдим мен.  
Орзуларим осмон қадар бўлса ҳам,  
Мендан шоир чиқмас экан, билдим мен.

Билдим, илҳом излаб шому сахардан,  
Шеър азоби ёмон экан заҳардан.  
Юрагингда бўлмаса гар шоирлик,

Наф йўқ экан ҳар қанақа шаҳардан.

Аммо уйга қайтай десам, биз қолиб  
Гулдай қизин қучоғига муз солиб,  
Тишларини қайраб бугун қишлоқда —  
Қўшни турар қўштиғига туз солиб...  
Момосини кўрсатаман келса деб.

\* \* \*

Баҳорда кўп оғир,  
Қиқирлаб турса  
Тиззангга суйкалиб лолақизғалдоқ,  
Беғубор ёшлигинг ўтган жойларда  
Кўлтиқтаёқ билан ҳаккалаб юрмоқ.

Яланғоч новдалар пичирлаб турса  
Кузда, сукунатга чўкканда чорбоқ.  
Кўп оғир, индамай кетиб борётган  
Мўмин турналарга боқиб ўй сурмоқ.

Кўп оғир беғубор қорлар ёққанда  
Қишида, дала-даштга қўнганда туман,  
Сотқинга тегмаган ўқни сийпалаб  
Урушни эсламоқ сандалдан чиқмай  
Хунук ва вафодор хотининг билан...

\* \* \*

Ҳайрон бўлмам турна кишинаса,  
Қаҳратонда олма гулласа,  
Аммо сенинг севиб қолишинг...  
Алдаб нима қиласан?

Осмонни сув босса, ҳайратим ёлғон,  
Қүёшни ўт босса, юлдузлар тулласа,  
Аммо сенинг севиб қолишинг...  
Алдаб нима қиласан?..

Тошлар тилга кирса, ишонгум,  
Трамвайлар юм-юм йиғласа,  
Аммо сенинг севиб қолишинг...  
Алдаб нима қиласан?

Сенга қараб күзим пишмоқда,  
Сени ўйлаб күнгил увишмоқда.  
Келин орзу қилиб, бағримни тилиб  
Түшак қавир қари онам қишлоқда...  
Алдаб нима қиласан?

\* \* \*

Сен хат ёзма.  
Уйга ҳам ёзма.  
Ва ҳовлиқиб ёнингга шунда  
Ўзи келар дәхқон отангнинг.

Керишиб ёт түшакдан турмай,  
Аёзли тун уйқунгни бузса,  
Овози меҳрибон отангнинг.

Ўргансин. Кут. Пешонасида  
Тұгмача бор (күзми бу — нима?)  
Боссин — қўнғироқча жириңглар.

Эшикни оч эриниб шунда,  
Музлаб қолган отанг қошига

Чиқ сўнг соғлом, омон... ҳиринглаб!

## ШИФОХОНАДА

Шундай bemорлар борки,  
Тўшакда михланиб ётар бенажот,  
Уялиб кетасан тузалганингдан.  
Шундай шифокорлар борки,  
Туғишган акангдай қарайди сенга,  
Тузалиб кетасан уялганингдан...

## ИСТАК

Шотут соясида бешик бозори,  
Саҳарларданрайхон ҳиди анқийди.  
Бешиклар тебратиб боғча хотин йиғлар:  
Биттагина ўғлим бўлса, майлийди.

Сарин сабо эса қўшиқлар айтар,  
Майсага ёнбошлиб тинглар шудринглар.  
Оқ шийпон ортидан мўралар офтоб,  
Ҳей, қизлар, туринглар!

Чумоли ёпишар ялпиз баргига,  
Ирмоқ унга сувлар сочиб ҳиринглар.  
Бригадир планни ўйлади хуноб:  
Ҳей, қизлар, туринглар!

Эй, менинг хаёлим, сулув, моҳитоб,  
Ўзимга саволим, ўзимга жавоб.  
Босган қадамлари кўзимга тавоб:  
Ҳей қизлар, туринглар!

Хей, қызлар, туриңглар,  
Түлдириб юринглар Ўзбекистонни.  
Истайманки, доим порохлар эмас,  
Сизларнинг аллангиз тутсин жаҳонни!

## ТАРАҚҚИЁТ

Аёллар, пайкалдан кўтарманг бошни,  
Фақат меҳнат қилинг, йиллар кутмайди.  
Шийпонларда кутиб — кузатинг қўёшни,  
Келажак авлодлар бизни унутмайди!..

Биз шундай бутифослар топамиз ҳали,  
Пахтамизни йиллаб терсак битмайди.  
Хирмонлар осмонга тегар юксалиб,  
Келажак авлодлар бизни унутмайди.

Эркаклар, китоблар ўқинг, ов қилинг,  
Сўқмоқларда сўнгги жайронлар титрайди  
Сўнгги йўлбарсларнинг терисини шилинг,  
Келажак авлодлар бизни унутмайди.

Оғулар топамиз —чувалчанглар илиб,  
Хеч ким қармоқларда балиқ тутмайди.  
Дельфинлар соҳилда ётади чўзилиб,  
Келажак авлодлар бизни унутмайди...

Шоирлар дунёга танитиб элин,  
Мукофотлар билан бир-бирин қутлайди.  
Навоий бобосин тушунмай тилин,  
Келажак авлодлар бизни унутмайди!..

Буни тараққиёт дерлар. Биз ўсдик,  
Ўсавердік, ҳеч ким инкор этмайди.  
Тоғларни қўпориб, дарёларни тўсдик,  
Келажак авлодлар бизни унутмайди.

Шеърим — қароғимдан оққан ёшларим,  
Англармисиз уни, ҳеч кўзим етмайди...  
Баракалла сизга, замондошларим,  
Келажак авлодлар бизни унутмайди!

## НИЯТ

Айланар чархпалак кунларим гали,  
Умрим тоғдан тушган сойдек елади.  
Эртакка айланиб қолмасдан ҳали,  
Бир қари дояни кўргим келади...

Кўргим келар тошни саҳрода куйган,  
Ва букри туяни — янтоқقا тўйган,  
Жайроннинг олдига қаландар қўйган —  
Бир боғлам пояни кўргим келади...

Карвонларни кўргим келади саф-саф,  
Ва карвонбошилар қиличин — садаф,  
Мажнунлар капаси олдида бир кафт  
Жаннатий сояни кўргим келади...

Кўнглим яхшиликни йўқлаб толмади,  
Жонни тутдим на дўст, на ёт қолмади,  
Унга чанг солмаган бир зот қолмади,  
Энди ҳимояни кўргим келади...

Орзум бир узунки, етмайди нафас,

Бир ғарип күнглимда минг олий ҳавас.  
Ойнаи жаҳонда гул қизларнимас —  
Лутфихон аяни кўргим келади!

## ҚИЗИЛГУЛ

Қизилгул, қўйнимда ухлаб ётган гул,  
Қўллари бўйнимда, ухлаб ётган гул.  
Киприги қўксимга тиғдек ботган гул,  
Сенга нима керак яна, эй, кўнгил...

Ёнимда солланар қирқ тилло кокил,  
Тўлғонар, товланар қирқ тилло кокил.  
Жонимдан айланар қирқ тилло кокил,  
Сенга нима керак яна, эй, кўнгил...

Бешикни титратиб чинқирап оҳим,  
Юзлари оппоғим, кўзи мунчоғим.  
Бу ёруғ дунёда ўчмас чироғим,  
Сенга нима керак яна, эй, кўнгил...

Жонимни чўқийди бир қуш келиб жим,  
Мен сени билмайман, эй қушча, сен ким?..  
Сен менга ҳеч киммас, мен сенга ҳеч ким,  
Сенга нима керак яна, эй, кўнгил...

Қизил гул, қўйнимда ухлаб ётган гул,  
Қўллари бўйнимда, ухлаб ётган гул...  
О, менинг қўксимда йиғлаб ётган гул,  
Кўнгил, сенга яна не керак, кўнгил?..

\* \* \*

Умримда жуда күп ёлғон гапирдим,  
Ваъдалар айладим чўкка тушиб тиз.  
Йўлимга интизор бўлди қанча қиз,  
Мен эса севмасдан ўттизга кирдим...

Ортга боқишига ҳам қўрқаман энди,  
Қайрилсам, ширин жон қийналаверар.  
Туйғулар туғилди, туйғулар сўнди,  
Мен кезган боғлардан бир видо келар.

Ёдимда қолгани бир хира юлдуз,  
Тунлари кўзимга термулади жим.  
Кўнглим чаманига баргин тўкар куз,  
Мен сени излайман исмсиз севгим...

Илк севги — энг баланд шоҳдаги олма,  
Мен унга интилдим, етмади қўлим.  
Сенга бахт тилайман, майли, ким бўлма,  
Кунларинг хайрли бўлсин, севгилим.

## МАНЗАРА

Бедапоя тўридаги жуфтин қидириб,  
Сайрай-сайрай жимиб қолди бедана дилгир.  
Сувсумбулни ваъдасига кўмиб, кўндириб,  
Ўйнатгани олиб кетди ирмоқ қайгадир.

Қир томондан пода қайтиб келаркан қатор  
Кумуш соҳил бўйларига чанглар ястаниб,  
Қишлоқнинг энг чеккасидан баҳайбат чинор  
Уфқ тарафга қараб қўйди хавотирланиб.

Қуёш осмон этагига осилиб мана,  
Бир хўрсиниб, қўздан ғойиб бўлдию кейин  
Қўшни қизнинг ҳавасини келтириб яна  
Толкўчага сув сепишни бошлади келин...

## «ЎЗБЕКФИЛЬМ»

Архивларда қолди Тоҳиру Зухро,  
Бўлак ниманг ҳам бор десам: кўрларинг.  
Соқол бўяш билан бандми энди ё  
Ўртоқ «Ўзбекфильм», режиссёrlаринг?..

Боғларга бурканди янтоқзор ерлар,  
Тошлар-да, гуллади, сен ўртамадинг.  
Юртимнинг юзидан ёғилган терлар  
Денгизга айланди, сен ўзгармадинг.

Темирлар йиғлади, симлар йиғлади,  
Кесаклар куйлади — бир ўйланмадинг.  
Тугади сабрнинг барча муҳлати,  
Бардошлар тугади — сен ўзгармадинг.

Унвонлар жаранглаб унвонга тегди,  
Димоқлар юксалиб осмонга тегди.  
«Ўзбекфильм», чўпчагинг жонга тегди,  
«Ўзбекфильм», чўпчагинг жонга тегди...

Ўзбек диёри бу — бепоён дала,  
Дала тўла шийпон. Шийпон тўла бола.  
Кўнглига боқмадинг унинг бир бора-а,  
Энди бор, бор ўзинг кўзига қара.

Кўрдингми?

Уялиб бошини эгди.  
Кетмонга суяниб, бошини эгди.  
«Ўзбекфильм», чўпчагинг жонга тегди,  
«Ўзбекфильм», чўпчагинг жонга тегди...

Йиллар кутмайди.  
Йиллар — учган ўқ.  
Наби Раҳим кетди,  
Шуқур Бурҳон йўқ...  
Қўйнинг тўла ҳикмат, қўйнингга қўл чўз,  
Ўртоқ «Ўзбекфильм», халқинг кутар сўз!

## ШОИР СЕВГИСИ

Танимайман дейсиз.  
Билмайман дейсиз.  
Ёрижон, нозми бу,  
Шўхликларингиз?..  
Мени танир ҳатто,  
Киприкларингиз,  
Сиз эса шоирни  
Севмайман дейсиз.

Кўриб-кўрмасликка  
Олмоқлар осон.  
Сиз-ку кўрсангиз ҳам  
Олмайсизу тан,  
Мени таниб, ҳатто  
Ҳар кун кўчамдан,  
Сочингиз қўл силкиб  
Ўтар, ёрижон.

Биламан тахминан

Шундай үйлайсиз:  
Шоирлар — девона,  
Тузалмайдилар.  
Шоирнинг севгиси  
Ўткинчи дейсиз,  
Шоирлар одамдек  
Севолмайдилар.

Ёна-ёна бир кун  
Кўйингизда мен,  
Адо бўладирғон  
Қулга ўхшайман.  
Энг гўзал шеъримни  
Тўйингизда мен,  
Пойингизга гулхан  
Қилиб тўшайман.

Қўрқманг. Янграр қўшиқ.  
Тугамас ўйин.  
Кўрганлар сиздан кўз  
Узолмайдилар.  
Шоирлар бузолмас  
Бироннинг тўйин,  
Бироннинг уйини  
Бузолмайдилар.

## ТИЛАК ЖЎРА

У хўп дейди, демас: «Менга ҳам керак»,  
Ишонмасанг, бориб ўзидан сўра.  
Жонингни прокатга бер десанг, Тилак  
Икки қўллаб тутар: Марҳамат, жўра.

Мен уни туғилмай туриб билардим,  
Мурғак чоғ жаннатда юзин күрганман.  
Тегирмончиликни орзу қиласадим,  
Унга ҳавас қилиб шоир бўлганман.

## РОЗИДИЛ

Икки жаҳонгашта,  
Иккита қўшни,  
Ётибсизми бериб зах ерга тўшни?  
Эртага мен борсам койимасмисиз,  
Эртага мен борсам орангиз бўшми?

Ҳамон қуритамиз зўрнинг шўрини,  
Бўлиниб оқ пушта, кўк пушталарга.  
Аммо кўнгил сезар: шеърнинг зўрини  
Шавкат Раҳмон ўқир фаришталарга.

Бу ёқда уволу у ёқда ҳалол —  
Чинордай юракни букар қилдай ғам.  
Яхши одамларни кўриб, эҳтимол,  
Сайраб юборгандир Асқад Мухтор ҳам.

Майли-да. Дардини айтсин-да одам,  
Айтолмай йиғлаганларни кўрганмиз.  
Асли биз сизгамас, сиз бизга мотам  
Тутсангиз арзийди — бизлар ўлганмиз.

Йўқса етмасмидик Сўзнинг қадрига,  
Пойига минг садқа этмасмидик жон.  
Ватаннинг қадрига, дўстнинг қадрига,  
Кунларнинг қадрига энг дориломон.

Икки жағонгашта,  
Иккита қүшни,  
Ётибсизми бериб зах ерга түшни?  
Эртага мен борсам койимасмисиз,  
Эртага мен борсам орангиз бўшми?

## **БИР ЙИГИТЛАР ТУҒИЛСИНКИ...**

### **ОСМОННИНГ ОХИРИ**

Осмоннинг охири қаерда, дедим бир донишга. У миқ этмади.  
Менга жуда ёқди бу жавоб.

Осмоннинг охири йўқ, ахир!

Ирмоқнинг охири дарё. Дарёнинг охири денгиз.

Осмоннинг эса охири йўқ.

Йўл четида юмалаб ётган тошни тепдим.

Тошдан садо чиқмади.

Худога солдим, дегани бу.

Олма шохига осилиб деворга чиқдим. Тўкилган мева  
қумурсқаларга эрмак бўлди. Тўкилган девор тупроғи эса  
гуноҳимга гуноҳ бўлиб қўшилди. Тунда пахсакаш чол тушимга  
кирди. Менинг ширин уйқум бузилди.

Худди эски девор бузилганидай...

Уйқунинг охири — ўлим. Ўлимнинг охири эса йўқ.

Бўлса ҳам, ҳеч ким унга етган эмас.

Ахир, ўлим бу ҳамма нарсанинг охири-да.

Одамнинг умри гоҳо ерда ётган қофозча ҳам эмас.

Эрталаб ишга кетаётib кўрган қофозингни кечда қайтишда ҳам  
кўришинг мумкин. Эрталаб кўрган одамни эса ҳамиша кечқурун  
кўравермайсан.

Чумоли чумолини ўлигини ташийди.

Бия қулунидан кўз узмай ўтлайди.

Оқибат фақат одамларда етишмайди.

Ер одамни боқади. Кийинтиради.

Одам эса бир кун уни сахрога айлантиради.

Сув одамнинг мардикори: ҳосил беради, тегирмон юргизади.

Одам уни ўйламайди.

Дунёдаги ҳамма нарса одамга яқинлашиши билан ўзлигини  
йўқотади.

Одам одамга яқинлашганда ҳам топганидан йўқотгани  
кўпроқдир...

Офтоб қаерга ботади, дейман бобомга. Осмоннинг охирига, дейди  
у. Офтоб осмоннинг охирига бориб ботмайди, балки йиғлайди.

Дунёдаги барча йўлларнинг охири — йифи.

Дунёнинг охири — қиёмат ҳам йифи.

Одам йифи нималигини англаб етгунича яқинлари оламдан ўтган  
бўлади.

\* \* \*

Кўрпангга қараб оёқ узат, дедим ўзимга ўзим бир куни.

Кейин ўйланиб қолдим. Ким айтган экан бу гапни биринчи марта.  
Эҳтимол, Одам Ато Момо Ҳавога айтгандин. Йўқ, бу яқин кишилар  
бир-бирига айтадиган гап эмас. Бу гап кўрпаси бир одамларнинг  
гапи эмас.

Бинобарин, Одам Ато билан Момо Ҳавода кўрпа нима қилсин?..

Ибтидоий одамлар тери ёпиниб ётишган.

Кулларнинг кўрпаси тупроқ бўлган.

Феодаллар кўрпа талашишмаган.

Демак, бу ҳам капитализм иллати!

Чақалоқ учун ҳамма нарсанинг боши-охири Она кўкраги.

Офтобни чақалоққа ўхшатиш мумкин бўлса, унинг боши  
осмоннинг кўксида. Хўш, Осмоннинг боши кимнинг кўксида?

Тоғларнинг боши Ернинг кўксида.

Ернинг боши-чи?.. Билмайман. Билмаганимдан хижолат ҳам  
эмасман. Бу ёруғ дунё аслида «билмайман» деган сўздан иборат.  
Мен қачон туғилганимни айтиб беришган.

Мен қачон юришни ўрганганимни ёлғиз онам билади.

Қачон тилим чиққанини ҳам.

Мен биринчи шеъримни қачон ёзганимни ўзим билмайман.

Хўш, қани ким айтади, охиргисини қачон ёзаман?..

Билиб туриб бирорвга озор беришдан ёмони йўқ. Ўзинг ҳам

билмасдан бирөвгә яхшилик қилишдан ортиқ яхшилик йўқ.  
Шеър ёзиш ҳам ўзинг билмай бирөвгә яхшилик қилишдай гап.  
Ҳақиқий шеърият ҳамиша оёқ остида. Мисралар қулунлар каби  
тупроққа ағанаб ётишибди. Тур, тойчоқ, чопамиз, десанг бас. Биз  
ҳар замон бир оёқ остига боқиб шеър топамиз. Кейин унинг  
чангини қоқамиз ва қанча кўп қоқсак — шунча кўп шеър  
йўқотамиз...

Барча буюк зотларнинг буюклиги ҳам хокисорлигидир!

\* \* \*

Мен ҳозир Ерни ушлаб тўхтатаман. Нега тинмай айланаверади у.  
Наҳот зерикмаган бўлса?

Ернинг охири қайдা? Тасаввурни-чи?..

Аниқ рақамларни жиним сўймайди. Учбурчаклар — тасаввур  
қафаслариридир.

Хаёл чўқмоғи қисқа зотларнинг умри ҳам қисқадир.

Машаққатнинг охири роҳат. Роҳатнинг охири яна машаққат.

Куннинг охири тун. Туннинг эса охири йўқ.

Бир оғиз совуқ сўз билан дилинг яна зими斯顿.

Лоақал, бир кунгина кечгача баҳтли бўлиб юрган одамни топиб  
беринг менга!

Сиз минг машаққат билан чиққан чўққида капалак ҳам бор.

Кумурсқа ҳам яшайди. Сизнинг бу ютуғингиз улар учун оддий  
бир турмуш ташвиши. Улар кунда-шунда.

Мен ҳидлаб тўймаган бедани бия қарсилатиб чайнайди.

Ялпизни сув оқизиб кетади. Мен қўзимга суртган сувда қурбақа  
чўмилади.

Момақалдироқ дунёни бошига кўтариб ҳайқиради.

Юлдузлар кўрқиб қочиб қолишади. Булатлар йиғлашга тушади.

Ер юзида қўзиқоринлар туғилади. Ҳар қандай ҳайқириқ сўнггида  
нимадир дунёга келади.

Нимадир дунёдан кетади.

Кулиб гул очилади — йиғлаб шабнам тўкилади.

Дарё тошади — тоғ нурайди. Келин хўрсинади — янга эрмак қилади...

\* \* \*

Одам дунёга бир марта келади. Шу бир калима сўз билан қанча савоб ишлар қилиш мумкин. Шу бир калима сўз пинжида қанча гуноҳга ботиш мумкин.

Бу гапни агар қариқиз айтса, йиғлагинг келади.

Сатанглар айтса, энсаси қотади одамнинг.

Қўй ўша севги-певгингни, ажрашинглар, дейди бойвучча она қизига. Одам дунёга бир марта келади!

Сени бир ҳафтада онаси ўпмаганига уйлантириб қўяман-е, дейди такаббур ота ўғлига: Ажраш.

Одам дунёга бир марта келади!

...Олисга қатновчи автобус ҳайдовчиси йўл бўйи хаёл суриб келаётганимни кўриб, мени гапга солади.

Ҳа, йигит. Бунча ўйчансиз, севиб қолдингизми?

Мен индамайман.

Севги йўқ, дейди у жаҳлим чиққанидан ҳузур қилиб.

Севги сувга чўкиб кетган. Тоҳирнинг сандигида...

«Қалай, бопладимми?» Бу — унинг қовоқ юзидағи ним табассум.

Мен ундан қутулиш учун жилмайган бўламан. У буни ўзича тушунади.

Энди насиҳатга ўтади: Хафа бўлмагин-у, бўшанг йигит экансан, оғайни.

Шунаقا хаёл суриб юраверсанг, хотинсиз қоласан.

Севги ҳаракатнинг асири, дейди.

— Ўзингиз севиб уйланганмисиз? Саволим унга ёқмайди.

Шубҳаланиб бир қараб олади. Ва иддао билан: Бўлмасам-чи!

Севган қизимга уйланганман, дейди.

— Ахир, севги сувга чўкиб кетган-ку, дейман.

Тоҳирнинг сандигида.

У энди әшитмаганга олади. Мен ҳозир чамбаракни шеригимга бердим, дам олмоқчиман, дейди. Кейин яна қулоғимга шивирлайди: хафа бўлма, устидент, ҳазиллашдим.

Осмоннинг охири қаерда, дейман унга жиддий. У, ҳеч нарсани тушунмадим, дегандек елка қисади.

Мана, у шундай юрагимнинг ёнбошида хуррак отмоқда.

Мен унинг уйғониб қолишидан қўрқаман!

Мудроқ босган дилим,  
Айтаман бир сир,  
Тангри уйқуни-да  
Паллада тортар.  
Уйқу — ҳам  
Насияга берилган умр,  
Уйқунг ортган сайин  
Қарзинг ҳам ортар...

\* \* \*

Менинг истеъоддли шоир дўстим ниҳоят бир қизни севиб қолди.  
Биз бугун бирга кинога борамиз. Мен бўлажак келиннинг дугонасини зерикирмаслигим керак.

Саломлашамиз. Яъни, мана бундай: улар менинг ҳали қуриб улгурмаган ялтироқ бўйинбоғимга қараб жилмайиб қўйишиади.  
Бу — қалайсиз, дегани.

Мен уларнинг белидан юқориси нафис кўйлакларига қарай олмай хўрсинаман. Қизлар шоир оғайнимнинг озғин бўйнига имо қилишиб қиқирлашади.

Уларни бир амаллаб Эскижўвага топшириб, тангаларимизни жаранглатиб метротга чопамиз. Дўстим менинг ёқамга ёпишади:  
қалай бизнинг қаллиқча?

Бўлмайди, дейман. У сени истаган куни ташлаб кетиши мумкин!  
Қишлоғингга кет, дейман.

У кетади. Уйига эмас — Узоқ Шарқقا. Кейин уёқдан менга хатлар

кела бошлайди. Аё дўстим, осмоннинг охирини топдим.  
Осмоннинг охири Узоқ Шарқда — денгизнинг ёқасида экан!..

Шоир ярим йилдан сўнг, ярим кечада устимга бостириб келади.  
Кайфи тароқ — эгнида чарм куртка. Чўнтақ тўла пул. Уйни балиқ  
ҳиди тутиб кетади.

— Биласанми, Нилу—(Нилуфар) эрга тегаётганмиш.

Тўйига таклифнома юборибди...

Тўйга бормасликка кўндираман. У туни билан ухламай ёзган  
шеърини конвертга жойлаб бевафо қаллиқчасига жўнатамиш.

Шоир Узоқ Шарқдан фақат балиқ ҳиди эмас, янги мақол ҳам олиб  
келган эди. У деярли ҳар куни мендан сўрайди: Нега мен сени  
ўзимга дўст тутдим, биласанми?

Ким учундир жонимни беришим мумкин бўлиши учун!..

Одам дунёга бир марта келади, дўстим.

\* \* \*

Кенг бир ўтлоқ бўлса. Атрофинг кўм-кўк майса. Осмон тип-тиник,  
Майсага ястаниб ётсанг-у... ўлиб қолсанг!

Бедазорда ана шундай хаёл суриб ётсам, қанотлари оппоқ бир  
капалак келиб, елкамга чордона қуриб ўтириб олди. Салом,  
оғайни. Нега кайфиятинг ёмон?

Чарчадим, дедим унга. Яашадан чарчадим.

Капалак бир хўрсиниб жўнаворди.

Қизиқ, унда ҳам бола-чақа бормикин?

Капалакнинг капаси қаерда?

Нега шундай ожиз ва нафис жонзот ҳам одамдан юқорида учиб  
юради.

Бақувват ва вазмин нарсалар ҳамиша оёқ остида бўлишадими?

Демак, одам оғир-босиқлиги учун хорми?

Енгилтак ва хушомадгўй кимсаларни шунинг учун ошиғи олчи  
экан-да...

«Фикрларингизни жиловлаб олинг, улар ҳамма нарсанинг

бошланишидир».

Ҳалиги капалакнинг қанотидаги ёзув бу.

Танишганимдан хурсанд әдим. Тонғда мен уни боғда кўрдим.

Атиргулнинг шохида. Кечаги тушкун ҳолатим учун уялдим. Узр сўрамоқчи бўлдим.

Аммо кечикдим.

Атиргулдан юмалади капалак,  
Бир силкиниб қўймади ҳам гул шохи.  
Жон талашиб, қум ялади капалак,  
Кўчди менинг кўксимга ҳам титроғи.

Мен ундан Осмоннинг охири қаерда деб сўрамоқчидим.  
Ахир, буни фақат ўша қаноти ожиз қуш билиши мумкин эди-да...

\* \* \*

Осмон ҳеч кимга қарамайди.

Булутларнинг ҳам эгаси йўқ.

Ҳеч ким қуёшни ҳам меники, деб айттолмайди. Агар шундай даъвогар топилса, уни девонага чиқаришади.

Хўш, нега одамлар ерга эгалик қилишади. Атрофини ўраб олишади-да, бу ер меники, дейишади. Ер талашиб бир-бирини ўлдиришади.

Менга айтинг-чи, баҳорнинг эгаси ким?..

Бойичекакнинг бошлиғи, бинафшанинг хўжайини-чи?..

Экканингни ўрасан. Экмаганингни эса, кўрасан, холос.

Мен болалигим ўтган жойларни ўзгариб кетишини истамайман. Мен кимдир ўтинга мўлжаллаб қўйган қадрдон шотутни отамни соғингандек соғинаман. Толлар билан қучоқлашиб сўрашгим келади. Худди, қизларни қучоқлаган сингари.

Агар шу гапларни беда қоровули эшитса, ҳиринглаб кулади. Кел, дейди, ана дала тўла қоратол, хоҳлаганингни қучоқла, истаганингча ўп:

горько!

Осмоннинг охири эса, ялпизнинг елкасида. Бир елкасида. Унинг бошқа елкаси тўла соғинч, муруват, муҳаббат.

Агар шу гапларни беда қоровули эшитса...

\* \* \*

Осмоннинг охири қаерда, дедим мен суйган қизимга. У менинг пешонамни ушлаб кўрди: иссиғинг йўқми, ишқилиб...

Саволимни такрорладим.

«Осмоннинг охири қайдалигини билмадим-у, лекин дўконга сариёғ келганмиш. Агар мумкин бўлса, бир ғайрат қилсалар...»  
Ҳеч иложи йўқ, дедим. Улуғ ишлар билан бандман.

Ҳали уйланмасимдан иш буюради. Аёл зоти, агар унга ишқинг тушганини сезиб қолса, бурнингни ерга ишқайди. Қайси доно бобокалоним айтган эди бу гапни?

Аммо кимнидир севмасдан ҳам яшаб бўлмайди.

Осмоннинг охири эса йўқ. Бўлса ҳам менга нима?

«Нега аллақандай така туркманларни мақтайсан?

Менинг қаерим кам улардан?...»

Кўйлаклари билан кўчаларни супириб юришлари учун яхши кўраман, билдингми?

Осмоннинг охири туркман қизларнинг узун енгларида.

Улар қўлларини кўтарган жойда кўк тугайди.

Кўллари қуёшни тўсиб қўяди...

Қизиқ, ўзи умримда биронта туркман қиз билан кўришмаганман.

Тилига ҳам тушунмайман.

Лекин яхши кўраман.

Ахир, Худони ҳам юзини бир кўрмай туриб яхши кўради-ку, бандалари.

Мұхаммад ҳам унинг бандаси.

Унинг ва муҳаббатнинг бандаси.

\* \* \*

Бозор қаердан бошланади?..  
Вокзал — чиптахонадан.  
Тайёрагоҳ — паспортни излашдан.  
Хўш, бозор-чи, бозор қаердан бошланади?  
Ҳазилкашроқ киши чўнтақни кавлашдан, дейиши мумкин.  
Жиддийроғи хомчўтдан, дейди.  
Ҳаммаси тўғри. Чунки, бозорга ҳамма ҳар хил хаёлда боради-да.  
Кимдир шунчаки зерикиб.  
Кимдир дам олиш учун.  
Бирор тўй тарааддути ила.  
Хуллас, бозорга ҳамманинг ўз сўқмоғи бор.  
Менимча, бозор дарвозадан бошланади.  
Ўз дарвозангдан чиқиб, харид қилишни қўзлаганинг бозор  
дарвозасидан хатлашинг ҳамон ўзгаради-қолади.  
Бозорда, айниқса, шарқ бозорида, ўзингга қўшилиб яна бир жуфт  
қўл чўнтағингга кириб чиқаётгандек гўё.  
Бир зумда нон ушоқларига қўлинг тегиб қолади.  
Корейс кампирининг хушбўй карамларидан тотиб кўриш ҳисси  
пайдо бўлади.  
Араб қизларининг юzlаридек лўппи хурмолар ёнидан кўз юмиб  
ўтолмайди одам.  
Тарвузлар ўzlари юмалаб оёғинг остида ўйинга тушади.  
Навбатда туриб ғирт суяқ гўшт оласан. Ичингда эса «мени  
таниди, суяқ қўшмади», деган ёлғон тасалли.  
Инқиллаб автобус бекатига келасан. Шундагина уйдан олиб  
чиққан маошинг ёдга тушади. Ёпирай, наҳотки барини  
ишлатдим?..  
Хурмони нега олдим?  
Тарвуз уйда бор эди-ку!  
Ана шунақа гаплар.  
Хўш, бозор қаердан бошланар экан? Билмадим, билмадим.  
Билганим — бозор нима билан тугаши.  
Хотин ила жанжал билан тугайди.

...Олтиариқлик турпфуруш чолдан сўрадим.  
Отахон, билмайсизми, осмоннинг охири қаерда?  
Чол мени имлаб ёнига чақириб олиб, қулоғимга  
шивирлади:  
Торозихонада, болам!..

### КЎҲНА ҚУДУҚ (Достон)

Мени тонгда ширин уйқудан уйғотишиди.  
Қарасам — уйқудан ҳам ширин одамлар.  
Боролмайман, дедим ғудраниб.  
Үзларинг кетаверинглар энди...  
Мени уйғотган одам буюк ҳофиз эди.  
Менинг борар жойим эса Буюк Бухоро эди.  
Бухоро мендан хафа эди...  
Ҳофиз шундай шаҳарга бир марта бормаган киши одам эмас, деб  
айтганди.  
Одам бўлса бордир, аммо шоир эмас, деганди...  
Тушимда йиғлаган эди Бухоро.  
Улуғ шаҳарни фақат улуғ зотлар овутиши мумкин.  
Менинг борганимдан эса фойда йўқ.  
Аммо қани ўша улуғлар энди?..  
Биз ҳаммамиз уйқу билан овора,  
Бухоро бўлса чўкиб, нураб, тугаб борарди.  
Кун сайин камайиб борарди унинг дунёга машҳур обидалари...

\* \* \*

Қандай гўзал эдинг, Бухоро,  
Осмонўпар гумбазлар аро.  
Мен зиёрат килиб оввора,  
Тополмадим бир соғ минора.

Сен чўкибсан, ким ўсди, азиз,  
Томирингни ким кесди, азиз?..  
Қайдан топай қабрингиз энди,  
Буюк боболарим, қайдасиз?

Сиз қайдасиз, улуғ меъморлар,  
Бухорои шариф bemорлар.  
Бугун унинг куйган кўксига  
Қулар мингга кирган деворлар.

Қулар не-не муқаддас жойлар,  
Жаннатларда топилмас жойлар...  
Қулар, бир пайт кирса гадойлар  
Кучоқ очган карvonсаройлар...

Бухоро лол, Бухоро ҳайрон,  
Арки вайрон, меҳроби вайрон,  
Лаби Ҳовуз қирғоги вайрон,  
Ибн Сино арвоҳи сарсон.

Бу қандай қайғудир, ё раб,  
Қайга боқма — турибди нураб.  
Шаҳар ўлса дунёдек қадим,  
Кўмгайлар не кафанга ўраб?..

Азал азиз, эй шаҳри Шариф,  
Дарвозанг ким кетди ўмарид?  
Тилла тожинг айтмайин, аммо,  
Минорасиз экансан ғариб!

\* \* \*

Бухорода қанча хужра бор? Буни ҳеч ким билмайди.

Сабаби бу ҳужраларда илм даъво қилған барча муллаваччалар  
энди мулла бўлишиб ўз юртларига тарқаб кетишган. Мулла  
бўлолмаганлари эса ҳужралардан хафа. Гўё гап фақат ҳужрададек.  
Бухорода қанча ҳужра бор? Буни ҳеч ким билмайди.

Билганларнинг бари ўтиб кетган. Яна бир сабаби шулки, бу  
ҳужралар ҳеч қайси... ЖЭҚка қарамайди..

Бухорода қанча ҳужра бор? Ер юзида қанча ўқимишли одам бўлса,  
шунча.

Демак, барча ўқимишли одамларда оқибат йўқ экан.

Улар ҳужраларини ўз ҳолига ташлаб қўйган. Зах босиб ётибди бу  
қадимий ҳужралар.

Балки худди шу сабаб ҳам нураб ётгандир Бухоро?

Қадрига йиғлаб тўқилиб, чўкиб бораётгандир?..

\*\*\*

Бухоро, сен шамга ўхшайсан,  
Менинг кўнгил ҳужрамга кирган.  
Тутаб, ўчиб қолай деб турган,  
Сўнар сўнгги шамга ўхшайсан.

Ўзин дарди ўзига аён,  
Бир мен десам, сен ҳам нотавон  
Тома-тома тўлган Зарафшон,  
Сен ҳам кўзи намга ўхшайсан.

Ўзингдан ол, ўзингга узат,  
Сен ҳам ўзинг-ўзингни юпат.  
Оқибат кўрсатиб, оқибат  
Кўрмаган одамга ўхшайсан...

Минорларинг бўйлари узун,  
Ўзидан-да ўйлари узун,  
Эртакдайин сўйлари узун,

Сен ҳам узун ғамга ўхшайсан.

Тоқатга ўхшайсан, сабрга,  
Қадри бор-у лек беқадрға,  
Ёмғирлар ёғмаган адирға,  
Оролсиз кўкламга ўхшайсан.

Аслида-ку, сендан-да ҳур кам,  
Сендан азиз, сендайин пир кам,  
Бу дунёи у дунё бир кам,  
Сен ҳам бири камга ўхшайсан...

Бухоро, Ҳотамга ўхшайсан,  
Ёв келса ҳам тўшак тўшайсан,  
Қўлинг очик, кўзларинг юмуқ —  
Сен менинг Отамга ўхшайсан.

\* \* \*

Файзуллохон отасидан қолган тиллоларни ҳукуматга топширди.  
Бир куни «халқлар отаси» ундан сўради: хўш, отангизнинг  
тиллолари билан-ку, сафимизга қўшилдингиз. Аммо айтинг-чи,  
ўзингиз нима каромат кўрсатдингиз Инқилобга?..

Уни ўлдиришди. Қандай ўлдиришганини ҳам ҳеч ким билмади.  
Унинг авлоди қолмади. Унинг авлодидан фақат... Бухоро қолди.  
Энди Бухоро ҳам кексайди.

Файзуллохон Инқилобга бошини тикиди.

Шопмўйлов Сталин эса қилич билан чопиб ташлади бу бошни!..

Узилган бошдан сачраган қон Бухоро минораларига тегди.

Балки, шунинг учун ҳам битта-битта қулаётгандир Бухоро  
миноралари?

Балки, шунинг учун ҳам шўрдир бу қадим кент тупроғи?

Балки шунинг учун ҳам сувлари тахирдир Бухоронинг?..

\* \* \*

Поезд тунда келди Когонга,  
Тиллоларни ортдик вагонга.  
Янгради паровоз наъраси:  
Йўлдан қоч-а, сартнинг боласи!..

Поезд елиб борар Шимолга,  
Етмоққа йўл бўлсин шамолга,  
Атроф бийдек туркнинг даласи,  
Йўлдан қоч-а, сартнинг боласи.

Осмон тўлиб борар тутунга,  
Ортда бағри тўлиб қуқунга.  
Бухоронинг ўчди қораси,  
Йўлдан қоч-а, сартнинг боласи.

Поезд кириб келди Тошкентга,  
Холи қуриб келди Тошкентга.  
Тамбур тўла соқчи сараси,  
Йўлдан қоч-а, сартнинг боласи.

Қозоқнинг дашти ҳам кенг экан,  
Бепоён бир юртга teng экан.  
Уч кунлик йўл экан ораси,  
Йўлдан қоч-а, сартнинг боласи.

Соқчибоши энди хотиржам,  
Қўйлар қолди ортда, отлар ҳам.  
Аммо ҳамон ўша ялласи:  
Йўлдан қоч-а, сартнинг боласи...

Инқилоб деб, чекдингиз заҳмат,  
Файзулло, отангизга раҳмат.

Ҳали мукофот ҳам оласиз...  
Йўлдан қоч-а, сартнинг боласи!

\* \* \*

Асли инсон хоки қўйилган ҳамма жой азиз ва муқаддасдир. Бас, шундай экан, одамлар истаган қабр тупроғини кўзларига суртсин. Бундан кимга жабр бўлибди. Эътиқоди ўлик кишиларгина ҳеч кимга ва ҳеч нимага сифинмайдилар. Кимнинг кимга сифиниши эса ўз майлида.  
Мен барча қабристонга сифинаман, деди ҳофиз. Барча мусулмону куфр қабрига. Зеро, куфр ер юзида эмас, кўнгилда. Мен барча тоза дилга сифинаман. Илло, тоза дилда куфрга жой йўқ...  
Одамлар бир-бирларининг дилига сифинсин, деганлар мавлоно Румий.  
Чунки инсон кўнглидан муқаддасроқ Каъба ҳам йўқ!

\* \* \*

Отдим вақт юкини елкадан оша,  
Йўлдан сурдим темир панжарасини,  
Кўзимга ёш олиб қилдим томоша,  
Ҳазрат Баҳовиддин мақбарасини.

Бухорои шариф, муқаддас бешик,  
Не-не алломалар дунёга келган.  
Бунга шоҳлар кирган кавушин ечиб,  
Бу жойга амирлар пиёда келган.

Мен бир ғариб шоир, мен шоҳ эмасман,  
Айбим ҳам эмасдир бўлолмаганим.  
Факир бўлиб ҳам бегуноҳ эмасман,  
Гуноҳим — ўттиз йил келолмаганим!..

\* \* \*

Асли дунё надир — Саҳрои кабир,  
Агар азиз эрса одам-да, азиз.  
Дунёга келдингми, дардингдан гапир,  
Умринг ўлчаб қўймиш саробни хасис.

Мен бобом руҳини зиёрат айлаб  
Карвонидан ажраб келган бўтаман.  
Карвон Вақт турибди йўлимни пойлаб,  
Изимни совутмай изимга қайтаман.

Лекин руҳим қолар шу харобада,  
Руҳимнинг руҳларга йўл — йўлаги бор.  
Аждодим кўмилган ҳар сардобада,  
Менинг жонимнинг ҳам бир бўлаги бор...

Отдим Вақт тош юкин бошимдан оша,  
Йўлдан сурдим темир панжарасини,  
Кўзимга ёш тўлиб қилдим томоша,  
Ҳазрат Баҳовиддин мақбарасини.

\* \* \*

Хофизларнинг билмагани йўқ. Айниқса, мен билган ҳофизнинг.  
Чунки у жаҳонгашта. У айтдики, Бухорода бир мақбара бор.  
Кимки қандай ният қилиб, ихлос билан атрофидан етти бор  
айланса тилаги бажо бўлгай!..  
Мақбарада тумонат одам. Бироқ, ҳатто бухороликлар ҳам бу  
ҳикматни билишмас экан. Ҳофизга қараб ғалати жилмайдим. У  
астойдил ҳафа бўлди. Шу асно бир автобус ажнабийлар келиб  
қолди. Фаранглар экан.  
Ҳайратимни ошириб улар мақбарани етти мартадан айлана  
бошлиди-ку.

Ёш-яланглари хиёл қулимсираб, ҳазил аралаш, аммо ёши  
улуғлари жиддий ва ихлос ила айланышди.  
Фарантлар кетишиди. Ҳофиз ҳикмати яна ҳикматта айланди.  
Мақбара эса нураб бораётир.  
Бухоро, сен буюк ҳикматсан. Ўз боланг ҳам қадрига етмаган  
ҳикмат.  
Сени тўкилаётганинг шундан эмасми?

\* \* \*

Биз сув ичган қудук ёдингиздами,  
Баланд меҳробдаги муқаддас калом?  
Лабимда минг йиллик ҳарорат таъми,  
Мен бошқа одамман,  
Мен бошқа одам.

Қаърига қарадим — кўзларим тинди.  
Йўқ, кўзим очилди — қўйдиму қадам.  
Ҳайратим қудуққа тўкилди, энди  
Мен бошқа одамман,  
Мен бошқа одам.

Мен сени ахтариб йиғлаб юрувдим,  
Имоним, сен менинг топилган болам.  
Чашмаи зилолда юзимни ювдим,  
Мен бошқа одамман,  
Мен бошқа одам...

Олисда солланар қуш босган боғлар,  
Бунда хўрсинар бир қуриган бодом.  
Беэга масканлар бағримни доғлар,  
Мен бошқа одамман,  
Мен бошқа одам.

Қанча қүш күрмадим кириб шу ёшга,  
Хаммаси сайроқи, хаммаси ҳотам.  
Улар ҳам булбулу қудуғи бошқа,  
Сиз бошқа оламсиз,  
Сиз бошқа одам...

Ҳеч ким ёполмас бу күхна қудуқни,  
Бу қудук ёнидан ўтгай бор олам.  
Юракка жойладик илоҳий ишқни,  
Биз бошқа одаммиз,  
Биз бошқа одам.

\* \* \*

Куйган жойдан куй чиқади, дейдилар. Бухоронинг эса куймаган жойи йўқ. Бунда нимаики қуламасин куй билан қулайди. Девор қуласа — куй, мақбара нураса — куй, ҳовуз қуриса — куй. Бухоро йиғлаб қўшиқ айтаётган улуғ Ҳофиз. Унинг қўшиғини барча тинглайди, унинг товуши етмаган ер йўқ, аммо одамлар бу қўшиққа маҳлиё бўлиб, тилдан қолишган. Ҳеч ким унга ёрдам берай демайди.  
Бухоронинг куйи — ажralиш куйи.  
Видолашиб куйи!..

\* \* \*

Ҳофиз мени уйқудан уйғотди. Ҳофизнинг уйқудан ҳам ширин овози мени уйқудан уйғотиб, туйғу водийсига бошлади. Бу водийнинг номи Бухоро эди... Салом, боболаримнинг бобокалони, дедим мен. Менга ҳам туйғуларингиздан беринг, дедим унга. У ҳорғин жилмайди. Тупроғим тўла туйғу, деди у жилмайиб. Лекин сен англармикансан, болам?  
Боболаримнинг бобокалони хаста. Уни меъморлар парвариш қилмоқда. Йўқ, улар фақат атрофида парвона. Нима қилиш

кераклигини эса унинг ўзи айтиб турибди. Унга обидаларнинг, бетакрор қасрларнинг буюк меъмори — Синоси етишмай турибди. Улуғбек Мирзонинг назари етишмай турибди. Балки шунинг учун ҳам чўкиб бораётгандир у. Наҳот, наққош меъморлар авлоди карвони узилиб қолган бўлса. Наҳот энди Бухородан, ўша буюк ва кадимий Бухородан нишона қолмаса?.. Бухорони вақт шамоли вайрон этдими?  
Балки уни туйғусиз дилларимиз пайҳон этаётгандир?..

\* \* \*

Маъюс куним кўзим тушса,  
Куяр осмон, тушунмайсан.  
Мени само тушунгайдир,  
Сен эй инсон, тушунмайсан...

Куийиб кўксим ўтар бўлсам,  
Оқар бўлсам, кетар бўлсам,  
Мени дарё тушунгайдир,  
Сен эй уммон, тушунмайсан.

Мен ҳам шайдо, мен ҳам мафтун,  
Мен ҳам ҳеч кими йўқ Мажнун,  
Мени Лайло тушунгайдир,  
Сен эй жонон, тушунмайсан.

Менинг йўлим узун армон,  
Ўзим довон, ўзим карвон,  
Мени саҳро тушунгайдир,  
Сен эй сарбон, тушунмайсан.

Менинг борим эрур кўнглим,  
Менинг ёrim эрур кўнглим,  
Маъюс танҳо тушунгайдир,

Сен эй хандон, тушунмайсан....

Маңыс куним күзим тушса,  
Куяр осмон, тушунмайсан.  
Мени Оллоқ тушунгайдир,  
Сен эй хоқон, тушунмайсан.

Кўнглим гул, кўзларим гулдир,  
Юзим гул, кўлларим гулдир.  
Мени сабо тушунгайдир,  
Сен эй тўзон, тушунмайсан...

Губоримдир бўйи райҳон,  
Миноримдир тилим бийрон.  
Мени дунё тушунгайдир,  
Сен эй нодон, тушунмайсан.

\* \* \*

Бухорода бир пайт оҳулар бўлган — Хонгули деган.  
Холдор оҳулар... Улар мени тушларимда йўқлайди.  
Шундоқ тепамга келиб, жилмайиб, юзларимни исқайди.  
Оtingдан айланай, Мұхаммад, бунча кўп ухлайсан, дейишади.  
Мен ҳар тонг қайдасиз, оҳуларим, деб уйғонаман. Ҳали кўзимни  
очмай дунёга савол бераман. Қадим Бухоронинг оҳулари қайга  
кетиб қолди, дейман.  
Дарёлар қурийди. Тоғлар чўкади. Китоблар ёнади.  
Дунёда фақат бир нарса — саволларгина абадий.  
Саволлар кийик сўқмоққа элтувчи йўлакдир. Кўксингда саволинг  
бўймаса дунёга нега келдинг, отингдан айланай, Инсон!

\* \* \*

Тош шаҳрида уйим —

Болохона эди,  
Бир бурчаги ўрин,  
Бири китоб бари...  
Менга тинчлик  
Бермай қийнар  
Мана энди,  
Тушларимда,  
Бухоронинг оҳулари.  
Айтматовга  
Хатлар ёздим,  
Жавоби йўқ.  
Шеърлар ёздим,  
Босишмади,  
Ҳисоби йўқ.  
Муҳаррирлар  
Борсам қоши  
Уюлади,  
Кўрамиз дер,  
Кўрмас,  
Ташлаб қўйилади,  
Менга —  
Ҳасад  
Қилишгандек туюлади..  
«Ўғлим шоир!..»  
Онам еру кўкка  
Сифмас,  
Тонгда ишга,  
Оқшом чопар  
Фолбин сари.  
Бирор билар,  
Бирор кулар,  
Бирор уқмас —  
Тушларимда  
Бухоронинг оҳулари.

Бир кун ахир,  
Рост сўзини  
Айтди бирор,  
Бир бўғиндан  
Оз сўзини,  
Айтди бирор.  
Айтмай қилган  
Ноз сўзини  
Айтди бирор...  
Тупроқ йўлдан  
Чўғлар босиб  
Қайтди бирор.

Бу дунёning  
Ширин дарди  
Шеърлар экан,  
Менга забон —  
Берган манов —  
Ерлар экан.  
Қоним унинг  
Ҳаяжони,  
Туйғулари,  
Кулгилари,  
Қайғулари,  
Йигилари,  
Тушларимда  
Бухоронинг оҳулари...

Айтматовга  
Хатлар ёздим,  
Жавоб келди.  
Шеърлар ёздим  
Ҳисоби йўқ —

Китоб бўлди.  
Муҳаррирлар  
Борсам қучоқ  
Очишади,  
Ўқиймиз дер,  
Ўқимасдан  
Босишади.  
Менга —  
ҳавас  
Қилишгандек боқишиади.

Фолбин кампир  
Айтганлари  
Ёлғон бўлди  
Ёмон бўлди,  
Бир қишлоқقا  
Достон бўлди.  
Хузурига  
Ўша оқшом  
Онам шошиб,  
Қўли қуруқ  
Борган экан,  
Армон бўлди...

Армоним кўп  
Бу дунёда  
Ўзимнинг ҳам,  
Давоми кўп,  
Сизга айтар,  
Сўзимнинг ҳам.  
Дилни ёқиб,  
Тилга чиқмай,  
Қолганларин,  
Қўшиғимга

Бу кун сиғмай  
Қолғанларин,  
Айтсам барин,  
Айтсам барин,  
Айтсам барин —  
Тушингизда  
Бухоронинг охулари!..

\* \* \*

Қара, райхон, деди у бир мақбара олдида менга, — кимдир экиб кетибди. Ташландиқ ҳужра ҳовлисига бу жаннат гулини эккан одамни топдим. У ҳамон ҳарбий хизматдан қайтган кийимида юрган, бир оз ақли заифроқ йигитчага экан. Ҳофиз йигитчага яп янги костюмини ечиб берди. Йўқ, олдин костюмнинг чўнтағига билдирамай пул солиб, кейин ечиб берди. Нима қиласман буни, дейди у бизга! Шу жойга қараб юрар экан, зиёратчилар онда-сонда бериб кетадиган нон, қанд-қурсни кўрсатиб, мақтанди. Биз у билан бирга чой ичдик. «Шу бир меров болангча сенга парвона бўлолмаймиз, Бухоро». Бу — ҳофизнинг гапи.

Кетар пайтимиз у бирдан шундай деб сўраб қолди:  
— Ҳофиз ака, Шукур Бурҳон ўлдими?..

Ўшанда ҳофиз менга шеър ёзасан, деган эди. Райхон ва Шукур Бурҳон ҳақида. У ҳам Бухородайин қадр топмади, деган эди. Райхонни Шукур Бурҳон қабрига қўйдим. Шукур ота ҳақида эса ёздим шеър.

Бу шеъримни ўша ғариб укам учун ёздим.

\* \* \*

Шукур Бурҳонни ҳам қузатиб қўйдик,  
Кетди қон юраги устида қўли.  
Ортидан эргашиб бориб биз қўйдек,  
Ерга бериб келдик ўпкамиз тўлиб.

Бордик дўстлари ҳам, душманлари ҳам,  
Қабрин устида ҳам сўйладик ёлғон:  
Санъат фидолари,  
Мен сизга айтсам,  
Ундан Шукур Бурҳон,  
Бундан Шукур Бурҳон!..

Тиригид ҳеч ким айтмаган гаплар,  
Ҳали совумаган тупроғига ёғди.  
Йиғлади умрида йиғламаган арбоблар,  
Кўзидан ёшлари сел бўлиб оқди...

Ялангтўш бобо жим кулиб ётарди,  
Шунча дўсти бор экан, у билмаганди.  
Ёпирай, тасавур ҳам қилмаганди,  
Чунки уч кун олдин почтадан олғон  
Меҳнат дафтарчасин қучоқлаб ҳайрон  
Хотини олдида шундай йиғлаганди...

Украб йиғлаганди,  
Хўнграб йиғлаганди.  
Кўзига тор бўлиб ёруғ жаҳони.  
Эркак боши бундай эгилмаганди,  
Балки... узилгандир ўшандада жони!  
У балки мендан ҳам яшарди кўпроқ,  
У балки сендан ҳам яшарди кўпроқ.  
Эй, қўнғир тупроқ,  
Эй, муқаддас тупроқ,  
Сен Шукур бобога болиш бўл, юмшоқ.

\* \* \*

Мен ҳам Оролман. Бухоро ҳам — Орол.

Мен Орол ҳақида янги қўшиқ қилдим. Уни Бухорога бағишлийман, деди ҳофиз.

Агар Оролни қўшиқ билан тирилтириб бўлсайди.

Агар Бухорони қўшиқ билан асраб қолиш мумкин бўлсайди.

Ҳофиз жони чиққунча қўшиқ айтган бўларди!

Бухоронинг кўҳна қудуғидан сув ичган ҳофиз...

Биз баримиз Орол ва оролчалармиз. Токи бир-биrimizни асрашни билмас эканмиз, битта-битта қурийверамиз.

Оролнинг жони оролчалар қўлида.

Оролчалар эса одамларнинг кўксига.

Одамларнинг кўкси эса бир-биридан сув ичади...

\* \* \*

Орол денгиз, Орол бечора денгиз,  
Зилол денгиз увол-оввора денгиз,  
Бахти қора, манглайи қора денгиз,  
Кўз ўнгимда, кўз ўнгимда берар жон...

Қани қадим қирғоғида боғлари,  
Тупроғи юзида ажал доғлари,  
Сомондай сарғайиб қизғалдоқлари,  
Кўз ўнгимда, кўз ўнгимда берар жон.

Жовдир-жовдир жайронларин кўзлари,  
Қирғоғида қотиб қолган бўзлари.  
Қовжираган ерга босиб юзларин,  
Кўз ўнгимда, кўз ўнгимда берар жон.

Кирғоғидан қирғоғимга қум кўчди,  
Момо юртга сиғмай тағин ким кўчди?  
Тағин қайси уйим чироғи ўчди,  
Кўз ўнгимда, кўз ўнгимда берар жон...

Мен ўйладим — бу дунё жанг майдони,  
Орол уммон эмас — тўлиб паймони,  
Алпомишдай юртимнинг бир ўғлони  
Кўз ўнгимда, кўз ўнгимда берар жон.

Руҳи жонинг чўкмасин, эй қадрдон,  
Кўйлаги қон, кўкраги қон паҳлавон.  
Сенсиз менга тор кулбадек бор жаҳон,  
Кўз ўнгимда, кўз ўнгимда берар жон...

Осмонларга қўли етган давроним,  
Топ бир чора, бўлмагил безабоним.  
Пешонамга битган ёлғиз уммоним  
Кўз ўнгимда, кўз ўнгимда берар жон!

## ХОТИМА

...Тонгда ширин уйқумдан уйғотишганди.  
Уйқудан ҳам ширин одамлар. Мен бормайман, дегандим.  
Мени кечир, Бухоро. Бормайман деган тилларим кесилсин яна  
айтсам. Ушбу ғариб мисралар учун ҳам кечиргил мени. Мен  
дилимдагини ёздим. Дилимда эса сен эдинг. Қандай бўлсанг —  
шундайлигича. Сенинг хаста жонинг ором топишига ишонаман.  
Аммо бардам бўл, отингдан айланай, ота маконим.  
Шеърларимни эса ҳув ўша, хужраларингни супуриб-сидириб  
юрган ақли ожизроқ ўғлингдек, унинг райҳонлариdek пойингга  
сочаман. Жонингга малҳам бўлсин бу нақли ожиз мисраларим...  
*1987*

## ҚАРИ ҚИЗ

Қариқиз,  
Қариқиз, сенга бир савол,

Елкангни түлдириб сочинг йиғларми?  
Үттиздан кейинги тонглари малол,  
Кунлар күкрагингга ботган ханжарми?..

Қариқиз,  
Қариқиз, сенга бир савол,  
Неларни ўйлайсан кечаларда сен?  
Нималар ҳақида сурасан хаёл,  
Келинчаклар ўтган күчаларда сен?..

Сен саратонда ҳам яшнаган баҳор,  
Сен зими斯顿да ҳам чақнаган наҳор.  
Юзларинг ғазалу кўзларинг ғазал,  
Сенинг куйган кўнглинг гулдан-да гўзал!

Шундай гўзалсанки, ёруғ дунёда  
Сени бир қўриб севмаган қолмаган.  
Аммо биронтаси ботиниб келиб,  
Юрак изҳорини айта олмаган...

Гўзал қиз,  
Асал қиз,  
Сенга йўқ савол,  
Сен — тенги топилмай ўтаётган ҳилол!

\* \* \*

Қайлардасан ўзинг, қанисан элим,  
Сен кимнинг бир парча жонисан элим?  
Боболаринг кимдир, момоларинг ким,  
Сен қачон ўзингни танийсан, элим?..

Осмон тўла юлдуз армонларингми,

Сенинг бор бисотинг достонларингми?  
Алпомиш аталмиш ботиринг қани,  
Улуғбекинг қани, Бобуринг қани?

Қани буюк Аҳмад Яссавийларинг,  
Румийлардан қолган маснавийларинг?  
Улар кечиргайми гуноҳларингни,  
Унутмагил улуғ Синоларингни...

Кулиб кун чиқадур, йиғлаб кун ботар,  
Навоий Ҳиротда беэга ётар.  
Юзларин ёритар тунда ой балқиб,  
Машраб Балх дорида турибди қалқиб.

Ким эдингу энди ким бўлдинг бу дам,  
Сени таниёлмай аждодинг мулзам,  
Сен на йиғлагайсан, сен на кулгайсан,  
Фарзандларинг қабри қайда билмайсан

Қайлардасан ўзинг, қанисан элим,  
Сен қачон ўзингни танийсан, элим?..  
Чўғ остида қолган қулдайгинасан,  
Оting бору ўзинг йўқдайгинасан!

## ЖИЙДА ТАГИДА

Сой бўйи. Тун. Куз.  
Бир йигит, бир қиз.  
Шивир-шивирлар  
Жийда тагида.

Таҳораткаш чол,  
Уйга қайтди лол.

Дилда санчиқлар —  
Жийда тагида...

— Қайдасан, кампир?  
Адо бўлдинг, тур!..  
Номусинг йиғлар  
Жийда тагида.

Кўр, ўзинг ҳам юр,  
Ўпишаётир,  
Уйинг куйгурлар  
Жийда тагида...

Кейин не бўлди?  
Кейин ўй бўлди.  
Кейин тўй бўлди,  
Қолмади сирлар  
Жийда тагида.

## КЎК ДАРВОЗА

Кўк дарвоза, ортингда бир қиз кўрдим,  
Ғазнангдаги гавҳарингни хуш кўрдим,  
Остонангда олти мингта из кўрдим,  
Ойбекангни авайлагин, хушёр бўл.

Кўк дарвоза, сўрамагин отимни,  
Сен кўзимга боқиб билгин зотимни,  
Бу дунёда меҳр софми — олтинми?..  
Ойбекангни авайлагин, хушёр бўл.

Кўк дарвоза, кўк харсангдек қулфинг бор,  
Маликангнинг кун кўрмаган зулфи бор,

Саройингда Муҳаммаднинг мулки бор,  
Ойбекангни авайлагин, хушёр бўл.

Кўк дарвоза, яна не деб мақтайнин?  
Меҳр изҳор этмоқ учун нетайнин,  
Беканг учун айт, боримни сотайнин,  
Ойбекангни авайлагин, хушёр бўл.

Кўк дарвоза, пойингга тиз чўкарман,  
Қиз ўпгандек бўсағангни ўпарман,  
Остонангга топганимни тўкарман,  
Ойбекангни авайлагин, хушёр бўл.

... Кўк дарвоза, орtingда қиз кўргандим,  
Ғазнангдаги дурингни хуш кўргандим,  
Сен совуқдан бир кун мухлат сўргандим,  
Бор, деворга қўшил, сен ҳам девор бўл!

## НИДО

*Шу чоқдаги юрагимни тинглангиз, ҳой ху.*  
Усмон Носир

Тонг тортиғи саҳифа ва саҳифа номлар,  
Бир кунгина қўшиқ туғмай ботмайди шомлар.  
Ҳақ деганинг йўлларига сочай илҳомлар,  
Шу чоқдаги юрагимни тинглангиз, ҳой ху...

Ким қиз суйиб қон йиғласа, адоси ўзим,  
Ким юрт суйиб улуғласа, фидоси ўзим.  
Тошга тегиб қайтиб борган садоси ўзим,  
Шу чоқдаги юрагимни тинглангиз, ҳой ху.

Жигарларим, йўлингизга гуллар тўшай ман,  
Чўғдек ёниб, ботмай турган кунга ўхшайман,  
Хаёлингиз уфқида мен шундай яшайман,  
Шу чоқдаги юрагимни тинглангиз, ҳой ҳу.

Аммо айтинг, ановларга, жонга тегмасин,  
Шеър ёздим, деб минг йиллик достонга тегмасин.  
Усмон тутта илиб кетган нонга тегмасин...  
Шу чоқдаги юрагимни тинглангиз, ҳой ҳу.

Дилда байрам, олдиндадир кунлар гавҳари,  
Ўзбек юртда туғилажак бир сўз сарвари.  
Тошкентдан то Лондонгача, Лондондан нари,  
Шу чоқдаги юрагимни тинглангиз, ҳой ҳу.

«Шу чоқдаги юрагимни тинглангиз, ҳой ҳу...»  
Акс-садоси гумбирлайди гўё замбарак.  
Сезгиларнинг беозори менимча — туйғу,  
Менга шодлик ва гулларнинг лаблари керак.

## ЙИГИРМАНЧИ АСР

Фарҳодлар видеога мўлтираб ўсар,  
Шириналар бир-бирин сочини кесар.  
Шудгорни ким кечар,  
Дарёни ким тўсар...  
Йигирманчи аср, бу қандай гап ахир?

Фасллар айланар, битта фасл йўқ,  
Қаҳратон кечиккан кузга урад дўқ.  
Аъзои баданинг снаряду ўқ,  
Йигирманчи аср, бу қандай гап ахир?

Нима дейсан яна газеталарга,  
Қанотли, қанотсиз ракеталарга,  
Күзингә термулган планеталарга...  
Йигирманчи аср, бу қандай гап ахир?

Йўлдошни қучоқлаб йиғлади осмон,  
Кемалар пойида титрайди уммон.  
Эрта ер юзида ким қолгай омон,  
Йигирманчи аср, бу қандай гап ахир?..

Юлдузлар ёнидан ҳайда зоғларни,  
Кундузлар ёнидан ҳайда доғларни,  
Ер ютса бўлмасми урушқоқларни,  
Йигирманчи аср, бу қандай гап ахир?

ТИНЧЛИК — шудир менинг энг тансиқ сўзим,  
Овутиб яшайман ўзимни-ку, ўзим,  
Кўзимга жавдирар бир яшар қизим...  
Йигирманчи аср, бу қандай гап ахир?!

## СУРАТ

Менинг кимлигимни,  
Билмайди ҳеч ким.  
Мен бир ғалатиман,  
Мен алоҳида.

Кўзимнинг ёшини  
Келади ичгим,  
Тилимни чайнагим,  
Келар гоҳида.

Ой менинг елкамга

Үтириб олган,  
Офтоб ғавғо солар  
Юрган йўлимга.

Хаёл тушовидан  
Чиқолмай қолган  
Умримни топшириб  
Кўйдим кўнглимга.

Энди тошни тепсам,  
Ўпар изимни,  
Ерга ағанасам —  
Ер ҳам девона.

Бармоғин ўпгандим  
Суйган қизимни,  
Қўли ёниб кетди  
Гуриллаб, мана.

Ёнди,  
Ёнаверди  
Кокиллари, сўнг,  
Чарсиллаб юраги  
Ёнди беармон.

Ярми ёниб бўлган  
Кўйлаги бир енг  
Ишқнинг байроғига  
Айланди алвон!..

Ва ўпдим байроқни  
Мен ўша алвон,  
Олов тан,  
Олов жон,

Олов ҳис-ҳавас.

Қизил чүф түшалган  
Чимилдиқ томон  
Отдим мен ўзимни  
Мисли ўтпарат.

Үйғонсам — күрпам кул,  
Йиғлар севгилим.  
Мен сени йиғла деб  
Күчган эдимми?

Айик босган гулдай  
Эзилди қўнглим,  
Ёввойи ўрдакка  
Бердим севгимни!..

Ўрдак учди-кетди,  
Мунғайиб қолдим.  
Хайратим обкетди  
Қанотида у.

Ким мени алдаса —  
Худога солдим,  
Майли, алданмасин,  
Ҳаётида у.

Қолдим кулкўрпамда  
Тўшагим — тупроқ.  
Юмалаб ётаман  
Илонлар билан.

Уларга ишондим  
Бир ёрдан кўпроқ,

Илон чақар,  
Аммо  
Гапирмас ёлғон!..

Менинг кимлигимни  
Билмайди ҳеч ким.  
Мен бир ғалатиман,  
Мен — алоҳида.

Кийиклар қонини  
Келади ичгим,  
Чаённи чайнагим  
келар гоҳида.

## АСАКАЛИК ҚИЗГА

Бураматол боғда сизни күрдим қайданам,  
Бир боқдиму билмам недир узилди жондан,  
Бургут эдим бир кечада тушдим осмондан,  
Бураматол боғда сизни күрдим қайданам.

Қиқирлашиб қизлар ўтар, сиздан дарак йўқ,  
Қирқ қиз ичра биз соғинган қиздан дарак йўқ.  
Қайлардасиз, бир кўрмоқдан ўзга тилақ йўқ,  
Бураматол боғда сизни кўрдим қайданам.

Аҳволимни йўйинг ана, нега йўйсангиз,  
Айб мендами, бир қайрилиб кўнглим олсангиз,  
Асакангиз кетмас-ку, бир кулиб қўйсангиз...  
Бураматол боғда сизни кўрдим қайданам.

Бу қандай боғ, толлари ҳам ўсар буралиб,  
Бутоқ-бутоқ кокилларга қолдим ўралиб,

Бағрим ёниб яшар бўлдим, бағрим тўғралиб,  
Бураматол боғда сизни кўрдим қайданам.

Куя-куя кетар бўлдим, сизни тополмай,  
Кулбамда бир елкангизга рўмол ёполмай,  
Кумушдайин холингиздан битта ўполмай,  
Бураматол боғда сизни кўрдим қайданам.

Энди фақат эслаш бору индаш йўқ сизга,  
Энди мен ҳам ўхшаб қолдим бир акангизга,  
Эрка келин бўлинг энди Асакангизга,  
Бураматол боғда сизни кўрдим қайданам.

## САНАМ

Бир қараб қўйсанг надир  
Бизга ҳам гоҳо санам.  
Менга сенсиз беқадр  
Дунё, санам, дунё, санам.

Сен ўзинг шамсу ҳилол,  
Куйдирги ёр, соҳибжамол.  
Сенсиз ул осмонда йўқ  
Маъно, санам, маъно, санам.

Кўзлари жайрон ўзинг,  
Ўз хуснига ҳайрон ўзинг.  
Тенги йўқ, тимсоли йўқ  
Зебо санам, зебо санам.

Боқ, ажаб ғавғодамиз,  
Севги деган сахродамиз.  
Қайс ўзиму сен экан

Лайло санам, Лайло санам...

Бир қараб қўйсанг надир  
Бизга ҳам гоҳо санам.  
Менга сенсиз бекадр  
Дунё, санам, дунё, санам.

## ШУКР ДЕЙСАН СЕН ҚАЧОН?

Таъмагирни тортқилаб,  
Нафси қўймас дейдилар.  
Нокас ўзи тўйса ҳам,  
Кўзи тўймас дейдилар.

Боқ бир ёруғ оламга —  
Кимлар зўрға кун кўрар.  
Одамлар бор, боғдаги  
Булбулдан ҳам пул сўрар.

Ёлғон дунё — бу дунё,  
Арzon дунё — бу дунё.  
Не-не ҳоким, беклардан  
Қолган дунё — бу дунё.

Киприқдан ҳам қисқадир  
Молу дунё йўллари.  
Ибрат бўлсин, Искандар  
Очиқ кетган қўллари!..

Узат дейсан, бер дейсан,  
Ҳеч қўймадинг, одамзод.  
Туя тўйди, фил тўйди,  
Сен тўймадинг, одамзод.

Шукр қилар ҳаттоқи  
Құмурсқа-паррандалар.  
Шукр дейсан сен қачон,  
Хом сут әмған бандалар?..

Бу уч кунлик дунёда  
Савлатингта керилма.  
Қаср қурма, боғ қолдир,  
Давлатингга керилма.

Үз элингни қақшатсанг,  
Хор бўласан ўзинг ҳам.  
Бир кун шу эл меҳрига  
Зор бўласан ўзинг ҳам!..

## МАСЛАҲАТ

Бир йигитлар туғилсинки,  
Бир йигитлар.  
Елкалари Асқартоғдай,  
Ақли расо,  
Ориятли,  
Ҳамиятли,  
Насли расо —  
Бир йигитлар туғилсинки,  
Бир йигитлар...

Бир йигитлар туғилсинки,  
Бир йигитлар,  
Элим деган,  
Юртим деган,  
Эр йигитлар,

Йўлбарсюрак,  
Сиртлонпанжа,  
Шер йигитлар,  
Бир йигитлар туғилсинки,  
Бир йигитлар.

Бир йигитлар туғилсинки,  
Бир йигитлар.  
Токи армон бўлсин гўзал  
Барча қизга,  
Мўраласа тўлсин эшик —  
Дарча қизга,  
Бир йигитлар туғилсинки,  
Бир йигитлар.

Бир йигитлар туғилсинки,  
Бир йигитлар.  
Кўзи тўла,  
Юзи тўла,  
Нур йигитлар.  
Эрки улуғ,  
Пойи қутлуғ,  
Бахти бутун,  
Олмос йигит,  
Олтин йигит,  
Дур йигитлар!..

Бунинг учун бир нарсага  
Чек қўйинг Сиз,  
Хотинингиз уйда туғсин —  
Тек қўйинг сиз.

\* \* \*

Таниш терак. Ариқ ёқаси.  
Бұтана сув, ширин лойқа сув.  
Тол күчада отлар тақаси...  
Қанча бўлди кўрмаганимга...

Ялпиз ҳиди тутган далалар,  
Гапга чечан боқчахолалар,  
Беланчақда ётган болалар...  
Қанча бўлди кўрмаганимга.

Тоғ ортидан мўралаган кун,  
Шийпонлардан ўрлаган тутун,  
Тут шохига осилган тугун...  
Қанча бўлди кўрмаганимга.

Ўқариқдан ёлғизоёқ йўл,  
Менга илҳақ, менга муштоқ йўл,  
О, қадрдон бир жуфт қадоққўл...  
Қанча бўлди кўрмаганимга.

Ёғоч эшик очилар секин...  
Тошмехрман мен жуда, лекин  
Хозир йиғлаворишим мумкин —  
Қанча бўлди кўрмаганимга...

\* \* \*

Зўрлаб қиз узатмоқ-ку, аслида  
Мансаб илинжида ё орзу-ҳавас.  
Ялпизни юлқилаб ариқ бўйидан  
Тошлоқ ерга ўтказмоқдан  
бўлак нарсамас...

Аммо қайси ота тан олгай буни,  
Тан олганида ҳам нима бу гуноҳ?..  
Ўзбекларда айб саналар фақат  
Келин йиғламаса тўй куни.

Қадаҳлар жаранглар, қаҳқаҳа янграр,  
(Тилни тиёлмаслик бундай пайт ёмон).  
Парво қилмай ичаверасан шароб,  
Кўксинг инграб турса ҳамки  
ёлғон деб, ёлғон!..

Кеча раисининг эса жағи тинмайди,  
Ҳамду сано айтиб тўймайди.  
Севги, вафо дейди... Садоқат дейди,  
Чиранади. Микрофонни  
кўлдан қўймайди...

Зўрлаб қиз узатмоқ бу аслида  
Мансаб илинжида иззатталаб.  
Ариқ бўйидаги ялпизни юлиб,  
Телеминорага ўтқазмоқдай гап...

## ОЛИСДАГИ ҚАДРДОН

Ўрмонлар лоласисан,  
Қайинларнинг қирмизи.  
Урушнинг боласисан —  
Отамнинг ўрис қизи...

Биз эҳтимол бир умр  
Кўришмасмиз, олис — нур.  
Отам билан кетган сир —

Отамнинг ўрис қизи.

Отасизлик енгилми?  
Сен ҳам ярим күнгилми?  
Опамидинг, сингилми...  
Отамнинг ўрис қизи.

Жон чиқар чоғ музлаб у,  
Кимларнидир излаб у,  
«Киз-и-м», деди йиғлаб у...  
Отамнинг ўрис қизи.

Сўз отилган ўқ экан,  
Бағир ёқар чўғ экан.  
Суратинг ҳам йўқ экан...  
Отамнинг ўрис қизи.

Онам сирин сотмайди,  
Билади-ю, айтмайди.  
Отам энди қайтмайди,  
Отамнинг ўрис қизи.

Томирингда бизнинг қон,  
Қайда юрсанг бўл омон.  
Олисдаги қадрдон —  
Отамнинг ўрис қизи!..

## ОҚ РЎМОЛ ҚИЗЛАР

Ўтиб туринг қўчамдан гоҳ-гоҳ,  
Кўнгил яйрап кўрганим сари.  
Эй гулбадан, эй кийикнигоҳ,  
Ўзбекойим набиралари —

Ойдин қизлар, ойжамол қизлар,  
Ойдан тушган оқ рўмол қизлар!..

Ерданми ё кўқдан сўрайми,  
Пойингизда жоним берайми?  
Сизни шундай кўриб қувончдан  
Ёрилмаган юрак — юракми?..  
Ойдин қизлар, ойжамол қизлар,  
Ойдан тушган оқ рўмол қизлар.

Қонимда-ку абад-азалсиз,  
Аммо ёддан чиққан ғазал —сиз.  
Дарёларнинг ортида қолган  
Афсонавий Тожимаҳалсиз.  
Ойдин қизлар, ойжамол қизлар,  
Ойдан тушган оқ рўмол қизлар.

Юрса йўлга ёғдулар изи,  
Париларга орзулар изи.  
Сиз — онамнинг ёришган юзи,  
Сиз — отамнинг йўқотган қизи...  
Ойдин қизлар, ойжамол қизлар,  
Ойдан тушган оқ рўмол қизлар.

Ўсма ўпган қошми бу зулук,  
Бунча поксиз, бунчалар суюк?  
Сиз борсизки, муҳаббат ҳам бор,  
Сиз борсизки, Мұхаммад буюк.  
Ойдин қизлар, ойжамол қизлар,  
Ойдан тушган оқ рўмол қизлар.

## КРИСТИНА

Кристина!  
Жонажон қўшним.  
Баланд пошна,  
Малласоч,  
Кўркам.  
Ён қўшниму, аммо мендан ҳам  
Мушугига меҳрибон қўшним...

Кристина!  
Қўшним бир девор.  
Кўзи мовий,  
Бурни сурнайча.  
Битта бола,  
Иккита лайча —  
Ташлаб кетган эридан ёдгор.

Бу қисмат,  
Бу тақдири азал —  
Бева борки, ҳаммаси гўзал.  
Кристина!  
Боғбонсиз боғча,  
Чангда қолган момақаймоқча.

Эри билан эдим қалин дўст,  
Эри минар эди паровоз.  
Қўллари мой ишдан қайтарди,  
Ичса бизникида ётарди...

Кристина!  
Малласоч дилдор.  
Виқор билан боқишилар, ҳай-ҳай...  
Менинг уйим тўла болакай,  
Унинг уйи тўла жонивор.

Бизнинг кулба — бешинчи қават,  
Меҳмонга-ку, очиқ, марҳамат:  
Одам сал хижолат бўлади —  
Лифтдан кучук ҳиди келади...

## ХАЛҚОНА

Қиз деганнинг қўкси тўла ўй бўлади,  
Йигит бир кун етилиб бўй бўлади.  
Бир тандир нон ўртада, бир коса сув,  
Ўнта ўзбек йиғилса — тўй бўлади...

Рўёбларга чиқади ширин тушлар,  
Келинчакнинг енгидан куёв ушлар...  
Бешикларни бўшатиб бир-бирига,  
Туғилади Тўмарис, Алпомишлар.

Суюнгандан оналар кўзида ёш,  
Оталар юзида порлар қуёш.  
Набиралар тўлади ҳовлиларга,  
Бари бир хил — қорасочу қорақош.

Бола гапин ёқтирмас қайтганини,  
Бизда бола қилдирап айтганини.  
Майли, содиқ ўсса бас, юртига у  
Бошлирга кўтариб Ватанини...

Дабдабасиз даврада нур бўлади,  
Куёв — тўра, келинчак — хур бўлади.  
Қайда ялла янграса келаверинг,  
Ўзбегимнинг тўйлари зўр бўлади.

## ТҮЙ

*Сирожга*

Бунда бир қиз бор эди,  
Бағоят дилдор эди.  
Мен исмини билмасдим,  
Мен исмини билмасдим...

Унинг тўйи бўляпти.

Ўзи менга ёқмасди,  
Бир қайрилиб боқмасди.  
Мен ҳам парво қилмасдим,  
Сира парво қилмасдим...

Унинг тўйи бўляпти.

Кетдик жўра. Нима бор  
Бирорларнинг тўйида?  
Бугун сайл бўлади,  
Ширмонбулоқ бўйида.

Шундай кунда ноз қилиб,  
Қарамаса бизларга.  
Атиргулга мурч сепиб  
Улашамиз қизларга...

## САВОЛ

Ҳамма гапинг тўғри, Афлотун,  
Ерни чопиш керак, бўяш керак ромни.  
Токни кўмиш керак кечикмай, лекин

Нима қилсак экан атомни?..

Китоб ёзиш керак. Түй қилиш керак.  
Суваш керак келин тушадиган томни.  
Муолажа истаб саншиб қўяр юрак,  
Нима қилсак экан атомни?

Дехқон болалари — ўйнар хирмонда,  
Симга боғлаб олиб бир тешик жомни.  
Учувчи кулади кўриб осмонда,  
Нима қилсак экан атомни?..

Кулол минг асрлик гумбазни тиклар,  
Жарроҳ тирилтирар ўлган одамни.  
Ўртоқ математиклар,  
Ўртоқ физиклар,  
Нима қилсак экан атомни?

Ҳатто, энг севимли аёл қучоғида,  
Унутолмайман мен гуноҳ —хатомни.  
Бир савол — хол бўлиб ёнар унинг дудоғида:  
Нима қилсак экан атомни?..

Бешикларни қучиб айланади Ер,  
Оқар юзларидан маржон-маржон тер.  
Нима қилсак экан атомни,  
Нима қилсак экан атомни?..

## АМИР ТЕМУР

*Қирқ биринчи йил, саратоннинг ўн саккизида Буюк Жаҳонгирни  
қабридан қўзғатишган. Хўш, оқибати не бўлди...*

Жаҳонгирнинг қабрин очган кazzоблар,  
Бири олим, яна бири арбоблар,  
Хондек яшаб ўтдилару оламдан,  
Амир Темур руҳи мени азоблар.

Ўшал кун сен қайда эдинг, болам, дер,  
Қулоғингга етмадиму нолам, дер.  
Мени қўзғаб нима топди олам, дер?..  
Амир Темур руҳи мени азоблар.

Тирик эрсам тинмасди-ку яроғим,  
Ўлик жондин на истарлар, қароғим.  
Қўлим қайда дер, қайда бош чаноғим,  
Амир Темур руҳи мени азоблар.

Бу қандайин қўргулиқ, ё раббаноҳ,  
Ёвуз ётдан ер остида йўқ паноҳ,  
Бобур қайда дер, қайда дер Мироншоҳ,  
Амир Темур руҳи мени азоблар.

Дунё топдим дейди, дунё йиғмадим,  
Мен эл учун от устида ухладим,  
Наҳот энди ўз гўримга сифмадим,  
Амир Темур руҳи мени азоблар...

Мен не қилай,  
Мен бир ожиз бандаман.  
Руҳлар билан бир жону бир тандаман,  
Узр сўраб ҳар кун Самарқанддаман,  
Амир Темур руҳи мени азоблар...

## ХИРМОНДАГИ БОЛА

Бундай қарамагин, чақалоқ.  
Мен ҳалол одамман ҳар ҳолда.  
Чайқаларди ҳар йил кузда менинг ҳам  
Беланчагим шу букри толда.

Ёрилган қўлларга термулиб юриб,  
Шу ялпиз далада мен ҳам бўй етдим.  
Кейин шеър йўқлади тушимга кириб,  
Кейин ўзим йўқлаб Тошкентга кетдим.

На Ойбек бор эди,  
На Faфур Fулом.  
Миртемир йўқ эди,  
Усмон Носир ҳам...

Навоий сатрига термулиб юриб,  
Тайдим жамолини бу қўхна элим,  
Кейин сен изладинг тушимга кириб,  
Кейин ўзим излаб ёнингга келдим...

Бундай қарамагин. Бундай қарамагин.  
Сен худди ўзимсан, хирмондаги бола.  
Менинг майли шодон, менинг майли ғамгин  
Энг гўзал сўзимсан, хирмондаги бола!

Мен келдим шул шаффоф сўзимни топиб.  
Мен билдим, юракдан Ватанни севмоқ —  
Беланчак осилган толларни ўпиб,  
Чақалоқ кўзига ҳалол термулмоқ...

\* \* \*

«Оlamda nima gap» бўляпти.

Хира ёғду сочар телевизор.  
Айвонда шолчада бир бола  
Үлтирад чүнқайиб... күйлаклари кир.

Ховлида ҳар кунги юмушлар.  
Ховлида ёмғир ер муштлар.  
Момоси дарғазаб, беарқон  
Бузоқчани тутолмай бу он.

Бузоқни қарғайди ҳарсиллаб,  
Қозиқни ўқталар: «Бўйнинг узилгур!»  
Айвончада эса бир бола  
Үлтирад чүнқайиб, иштони ҳам кир.  
Оlamда нима гап бўляпти?..

## ИЛЁС

*Илёс исмли икки яшар жияним сариқ касал туфайли вафот этди.  
Шифохонада керакли дори керак пайтида топилмаган эмиш...*

Малҳам кутиб менга жовдирағ қолган  
Илёс, кўзларингдан айланай сенинг.  
Шифокор опанинг сўзлари ёлғон,  
Илёс, кўзларингдан айланай сенинг!..

Улар ичинда ҳам бордир тулкилар,  
Улар шамолни ҳам тутиб пул қилар,  
Ҳатто ўз боласини ўйламас улар.  
Илёс, кўзларингдан айланай сенинг.

Устингдан оғулар сепишди қанча,  
Мурғак юрагингга нишларин санча.  
Эндинана тили чиққан одамча —

Илёс, кўзларингдан айланай сенинг.

Нажоткор эмишлар! Кўрдим барисин,  
Имони йўқ булар ёшу қарисин.  
Бошимга урайми энди дорисин?  
Илёс, кўзларингдан айланай сенинг.

Сувларнинг юзида турмасдир хаслар,  
Сени ҳалок этди бир тўп нокаслар.  
Тушимда кўлларинг бўйним пайпаслар,  
Илёс, кўзларингдан айланай сенинг!

Яхшиям дунёда қуёш бор, гул бор,  
Қайдадир мени ҳам тушунган дил бор,  
Одамлар бор ҳали мўмин, беозор,  
Илёс, кўзларингдан айланай сенинг!

Йиғлаб-йиғлаб юмилдими қароғинг,  
Кафтилни куйдирап қолган мунчоғинг,  
Кўксингда кетдими ёлғиз сўроғинг,  
Илёс, кўзларингдан айланай сенинг!..

1988

## ОҚ ТУЛПОР

Оқ тулпорим бор эди,  
Беклар унга зор эди.  
Оғайнилар, от менга  
Ҳам дўсту ҳам ёр эди.

Ёлин ўпсам тиз чўкиб,  
Кафтидан сув ичарди.  
Чух, десам ер чангитиб,

Осмонларга учарди.

Үйимизга бир оқшом,  
Қариндошлар түлишди.  
Түй баҳона отимдан  
Айирмоқчи бўлишди.

Отам, йигитсан, ўғлим,  
Уйланмасанг, ор, деди.  
Қиз ярашар қучоқقا,  
Отга нима бор, деди...

От олдиdan бошланди  
Чимилдиққа йўлакча.  
Кечир, ёrim, на қилай,  
Отга меҳрим бўлакча...

Қолдим икки ўт аро,  
Гўшангода — дилдорим.  
Келин келган кечадан  
Аразлади тулпорим.

Борми биздек ошиқлар,  
Баҳоримда куз йиғлар.  
Қизни ўпсам, от йиғлар,  
Отни ўпсам, қиз йиғлар.

Бир бор ўпсам хотинни,  
Уч бор ўпдим отимни...  
Жонни қийнаб яшадим,  
Кимга айтай додимни.

Ёрдан кечдим отни деб,  
Элга бўлдим эрмаклар.

Қайдан билсин от қадрин,  
От минмаган эркаклар!?

## ҮП МЕНИ...

Менинг ғанимларим булутдан ҳам күп,  
Ортимдан соядек юришар түп-түп.  
Саломат эканим ҳам бир ғанимат,  
Үп мени, севгилим, үп, сўнгги бор үп.

Кўнгил йиғлар, қара, кўзлар тонмоқда,  
Кўкрагимга кўксинг қўйгин — ёнмоқда,  
Чайқалиб турибди руҳим тамоқда,  
Үп мени, севгилим, үп, севгилим үп.

Эй менинг жаллодим, эй меҳрибоним,  
Кўким тупроқ менинг, тупроқ — осмоним,  
Тилимнинг учida турибди жоним,  
Үп мени, севгилим, үп, сўнгги бор үп.

Тун деганлари бу — тилсиз бир тилсим,  
Туши тўлиқ чўғми, ўқми, ким билсин?  
Тонгда турарманми-йўқми, ким билсин?..  
Үп мени, севгилим, үп, сўнгги бор үп.

Жон шундай узилса, бу — осон ўлмоқ,  
Севсанг, ситамингдан ўлдир мени, моҳ,  
Қошларинг дор бўлсин, соchlаринг — сиртмоқ  
Үп мени, севгилим, үп, сўнгги бор үп.

Бизлар — ожиз банда, ажалдир — ҳакам,  
Ошиқма, деб мени бўғмагин, эркам.  
Бўсангдан бўғилиб ўлай ўлсам ҳам —

Ўп мени, севгилим, ўп, сўнгги бор ўп!..

## «БОЛА»

*Муҳиддинга*

Кўнглим ийиб кетиб, билмадим нечун,  
«Бола» деб қўйибман кучугим отин.  
Бобом боплаб сўқди,  
Ғудранди хотин,  
Менга бошқача от ёқмасди лекин...

Кўзи мунчоқ эди кучукваччамнинг,  
Ўзи эса сиртлонпанжа,  
Кенг кўкрак.  
Сал ширин гапирсам, ғажиб пойчамни,  
Суйкалаверарди худди боламдек.

Жуда чайир эди,  
Жуда шўх эди.  
Суярдим ўзим ҳам шертироғимни.  
Хотин бор эди-ю,  
Болам йўқ эди,  
Тўлдириб юарди у қучоғимни.

Кейин калхўз бўлди,  
Вакиллар келди.  
Ориқ отимни ҳам кетишиди ёзиб.  
Тут пишиб,  
Бир ёшга тўлганда энди  
«Болам»ни ўлдириди трактор босиб...

Ўғлимни кўмгандек кўмдим «Бола»ни,

Мунчоқ күзларига тупроқлар түкдим.  
Бобом билан хотин қилди нолани,  
Мен эса бўралаб калхўзни сўкдим...

Ҳар баҳор бораман у ётган жарга,  
Ўзи тилсим эди,  
Ўлими тилсим.  
Кучук кўнгли ийиб, ғилдиракларга  
Суйкалгиси келганмиди, ким билсин.

## ИНШООЛЛОХ

Ўзбекистон, бўйи-бастинг кўрсат энди,  
Паҳлавоним, етди сенга навбат энди,  
Оlam узра ҳилпирасин абад энди  
Соҳибқирон Темур туғи — яшил байроқ,  
Иншооллоҳ!

Эрк дегани ўзи келиб эшик қоқмас,  
Жон чекмасанг осмонлардан омад ёғмас,  
Қаторингда ботирларинг бўлсин оғмас,  
Гуркирасин Алпомишлар ўтган тупроқ,  
Иншооллоҳ!

Қадим Олтин бешик авлоднинг масканисан  
Алишерлар, Улуғбеклар Ватанисан,  
Яшнагани — ўз аслига қайтганисан,  
Турон юртда ёнсин қайта сўнган чироқ,  
Иншооллоҳ!

Алла айтсанг айвонингда ухлар қуёш,  
Сенга мудом иймон йўлдош, ислом йўлдош  
Бор бўлсин шу қирқ ўрим соч, ўсмали қош

Оқ яктагу бекасам түн, шоҳи белбоғ,  
Иншооллох!

Тотув юртда янтоқ ўзин тоғ айлагай,  
Бир-бираини қўллаган эл кам бўлмагай,  
Болалари Туркистонни боғ айлагай,  
Абад яшнар, хазон билмас энди бу боғ,  
Иншооллох!

## ЎЗБЕКМОМО

Фаришталар файзи ёғар юзларингдан  
Аrimасин қувонч энди, Ўзбекмомо.  
Юрсанг офтоб эргашади изларингдан,  
Офтоб бўлиб нур соч энди, Ўзбекмомо.

Келди қайтиб ёт юртлардан карвонларинг,  
Қўнғироғи кўксингдаги армонларинг.  
Ўзингники ўзинг ёпган ширмонларинг —  
Сенга тегмас қирмоч энди, Ўзбекмомо.

Саробларга сажда қилдик етмиш йил биз,  
Йўқ Ватанинни Ватан билдик етмиш йил биз.  
Чин Ватаннинг пойларига чўкайлик тиз,  
Сен йўл бошла, йўл оч энди, Ўзбекмомо.

Эй сен ҳикмат диёри, эй сирли бағир,  
Не даҳога йўл кўрсатдинг ўзинг, ахир,  
Темурга ҳам алла айтган ўзинг, ахир,  
Қайтар қалбга ишонч энди, Ўзбекмомо.

Озод юртда, обод юртда бор келажак,  
Хур ўлкага мудом йўлдош, ёр келажак.

Ҳали не-не Алпомишлар туғилажак,  
Бахтинг бошга гултож энди, Ўзбекмомо.

Тўкилмасин сочингдаги битта толанг,  
Омон бўл сен, омон бўлсин дашту даланг.  
Чўпон боланг, дехқон боланг, сulton боланг  
Кел, дуога қўл оч энди, Ўзбекмомо!..

## ҲАЁТ БУ

Бир кун хурсанд яшаш  
Қанчалар қийин,  
Бир кунгина —  
Тонгдан шомгача.  
Ҳаёт ҳар лаҳзаси,  
Ҳар они ўйин,  
Бошқача,  
Бошқача,  
Бошқача...

Қара,  
Тонгда ўпган эдим юзингдан,  
Энди қўл силтадим,  
Бегона мисол.  
Ёруғ дунёда-ку,  
Кўрким ўзингсан,  
Бир кунда энг баҳтли,  
Энг баҳтсиз Аёл!..

Асли  
Менга сенинг қулгунг азиздир.  
Жилмайсанг —  
Жаҳоним жилмайгани шу.

Тонгинг баҳор эди,  
Оқшоминг куздир,  
Сени севаману  
Аммо, ҳаёт — бу.

Эй менинг севгилим,  
Осмонингдан туш,  
Севги — ёмғир босган  
Китобдаги байт.  
Сен — менинг  
Қўйнимда тўлғонган оққуш,  
Мен — сенинг дардингга  
Етмаган сайёд!..

## ЗАЙНАБ ҚЎШИФИ

Тенгим бошқа, деди ёр,  
Топдим десам тенгимни.  
Марғилонлик бир дилдор  
Тортиб олди бегимни.

Кулгу кетмай кўзимдан  
Ёғар бўлди кўзёшим.  
Кўз-кўз қилиб бахтини  
Ёқар бўлди кундошим.

Нима бўлди, бек йигит,  
Бекангизга қараш йўқ?  
Кумушдан минг ўргилиб,  
Зайнабдан ҳол сўраш йўқ.

Тақдир дердим, шум тақдир,  
Кўнглим кўнса — куймасдим.

Бегим, Сизни мен ахир,  
Кумушдан кам суймасдим...

Қолсам — дардим бир дунё,  
Кетсам — бир уй қўчим бор.  
Кумушойни келтирган  
Аравада ўчим бор!

## ҚИШЛОҚДА

Ҳайрон менинг собиқ синфдошларим,  
Сенга не етишмас, дейди, кулишар.  
Ўзларича тушунгандай бўлишар,  
Уйларига таклиф қилишар.

Уйларига таклиф қилишар,  
Меҳмони бўламан бир-бир барини.  
Чекамиз. Мақташга тушишар кейин  
Кўрмай олган хотинларини...

## МАЪРУФ ЖАЛИЛ

Хокисорлигим ҳам қўролмаслар бор,  
Гоҳо раҳмим келар душманларимга.  
Узун умрим узун ғам бўлди, яна  
Не азоб бор мендек кўнгли яримга?..

Гоҳо ўз-ўзимни койийман: Маъруф,  
Тағин айбларингдан айт бирон нарса...  
Ўзим рақибимнинг уйига бориб  
Кечирим сўрагим келар, қийналса!

## ҚАЛДИРФОЧ

Ғуссанг менинг ғуссамдир,  
Айвонимда яшайсан.  
Қараб турсам, сен ҳам бир  
Дардли қүшга ўхтайсан.  
Күнглингда не саволинг,  
Нега айтмай йиғлайсан?..

Сўра, сўра, қалдирғоч,  
Кўзи қора қалдирғоч.

Сўйла қушим нолангни,  
Уйингда дон-дун йўқми?  
Уйинг тўла болангни  
Ризқин териб тин йўқми?  
Ё сенда ҳам тил йўқми,  
Ё сенга ҳам кун йўқми?..

Сўра, сўра, қалдирғоч,  
Кўзи қора қалдирғоч.

Бу дунёда бир одам  
Тушунмасму дил оҳинг?  
Мўминлигинг сенинг ҳам  
Бўлдими ё гуноҳинг?  
Ожиз қушим, сенинг ҳам  
Очилсин бир дудоғинг...

Сўра, сўра, қалдирғоч,  
Кўзи қора қалдирғоч.

\* \* \*

Не қиларди, ойдеккина синглим бўлса,  
Шарқираган сойдеккина синглим бўлса.  
Тўққиз ўғил туғса, кўриб кўнглим тўлса,  
Жияним-ов...

Не қиларди, Алпомишдек акам бўлса,  
Яхши-ёмон кунларимда ҳамдам бўлса,  
Жонимга жон, юрагимга малҳам бўлса,  
Жигарим-ов...

Не қиларди онам бўлса, отам бўлса,  
Суяб турса, уйимда тўй-мотам бўлса,  
Дардим айтсам, тушунган бир одам бўлса,  
Дардларим-ов!..

## УРУШ ЙИЛЛАРИНИНГ ЖОНОН ҚИЗЛАРИ

Қаҳрамон йигитлар урушга кетди,  
Чўғ бўлиб ёндириб қолди излари.  
Оловлар ичидা бўйингиз етди,  
Уруш йилларининг жонон қизлари.

Муҳаббат, муҳаббат, илоҳий маъво,  
Сизга ёр васлини кўрмади раво.  
Хатларга термулиб умрингиз ўтди,  
Уруш йилларининг жонон қизлари.

Қадоққўл юртимнинг Зулайҳолари,  
Дилбарлари, Дилдор, Дилраболари.  
Йифидан қизарган шаҳло кўзлари —  
Уруш йилларининг жонон қизлари.

Қорлар кечиб юриб құсаклар терган,  
Сепини түп қилиб фронтта берган.  
Йигит күрган ҳамма балони құрган,  
Уруш йилларининг жонон қизлари...

Замин минг айланса, айланса Замон,  
Яхшини яхши деган, ёмонни ёмон.  
Мұхаммад Юсуф энг тансиқ сўзлари —  
Уруш йилларининг жонон қизлари.

\* \* \*

Яна қуёш чиқди,  
Яна қуёш ботди.  
Умримнинг бир кунин  
Пойига отдим.  
Яна ачинмадим,  
Тирикчилик дедим,  
Тинмадим...

Энди қандай ухладим?

Фонтанлар кулади,  
Мен қўшилмадим.  
Ёвшанлар йиғлади,  
Мен ўкинмадим.  
Дўстим аччиғлади,  
Мен тушунмадим...

Энди қандай ухладим?

Тепамда мўлтирас

Ой соҳибжамол,  
Юлдузлар бошимга  
Ёғилган савол.  
Олис қишлоқ. Почта.  
Қари онам лол...  
Юзта қўшиқ ёздим,  
Бир хат ёзолмадим.

Энди қандай ухладим?

Кўлтиқтаёғига  
Суяниб бир чол,  
Келаверди шошмай,  
Юзида малол.  
Йўлим кесиб ўтди,  
Кўнглим эзиб ўтди,  
Мехрим қўзиб кетди  
Бир сўз демадим.

Энди қандай ухладим?

Даврим қулган даврон  
Шул саодатим.  
Ушалди ниятим,  
Кулди омадим.  
Лекин одатим —  
Эртанги кунимдан  
Йўқ хижолатим...

Энди қандай ухладим?

## ЭГАСИЗ УЙ

Бу эшик жимгина очилавермас,  
Бармоғинг узатсанг йиғлар бу эшик.  
Занг илгак суриса чўғдек бир савол  
Юракка санчилар кўқракни тешиб:  
Қаерда юрибсан, Эгамнинг ўғли?..

Отангнинг томида лолақизғалдоқ,  
Отангнинг уйида кўринмас бир жон.  
Ана, кўмилмаган анор шоҳлари  
Синар ва хўрсинар: умр — ўқилон,  
Қаерда юрибсан, эгамнинг ўғли?..

Ким у, воҳ, энганиб лойқа сув ичди  
Ва увватга чўқди кўксини ушлаб,  
Кетмони чинқирав кесакни муштлаб:  
Қаерда юрибсан, эгамнинг ўғли?

Ким у, воҳ, қўлида тешиккулчалар:  
«Набираларимга, уйим Ватандир.  
Ховлимни тўлдириб юришгай улар...»  
Йўқлади, бехуда йўқлади сени  
Онаизорингдан ёдгор бир тандир —  
Қаерда юрибсан, эгамнинг ўғли?..

Бу ҳовли жимгина нурайверади,  
Ҳар ғишти кўчганда йиғлар бу ҳовли  
Қаерда юрибсан, эгамнинг ўғли,  
Қаерда юрибсан, эгамнинг ўғли?..

## СОФИНЧ САТРЛАРИ

Синглим менинг,  
Рангпаргина синглим менинг,

Сени кутар тор уйингда түққиз бола,  
Кенг уйингда поёни йўқ дашту дала,  
Сен кўниқдинг,  
Кўниқмас ҳеч кўнглим менинг...

О, ёнимда бир нозанин шод кулади,  
Унга ҳамма ёзганларим ёд, кулади.  
Парвонадек жонимдан минг ўргулади,  
Сени ўйлаб бағрим тилим-тилим менинг.

Шодон шахар сахаргача ялла айтар...  
Олисларда қирда тўзон — пода қайтар.  
Елинлари сутга тўлган бизнинг жайдар  
Сигиришимиз чиқмас кесиб йўлим менинг.

Бу ерларда билишмайди бия нима,  
Адир нима, анғиз нима, қия нима.  
Акам шоир бўлиб мендан кечди дема,  
Қўшиқ айтсам бир елкангда қўлим менинг.

Қуёш чиқар, қуёш ботар, соғинаман,  
Кўкрагимда бир тош ётар, соғинаман.  
Токай чидай бу жудолик доғина ман,  
Қани ўша қозиқдаги тўним менинг!..

Синглим менинг,  
Хушрўйгина синглим менинг.  
Сени кутар тор уйингда түққиз бола,  
Кенг уйингда поёни йўқ дашту дала,  
Сен кўниқдинг,  
Кўниқмади кўнглим менинг.

\* \* \*

Гоҳо мен ҳам ўйга толсам,  
Варақлаб суратларимни.  
Болалигим қўмсаб, сени,  
Қўмсаб бола пайтларимни...

Эслаб бир-бир ҳеч ким билмас,  
Гуноҳларим, айбларимни.  
Теракларни танасида  
Қолиб кетган байтларимни.

Айттолмасдан бир кимсага,  
Юракдаги дардларимни.  
Ялинганим сенга, дўстим,  
Жон дўстим, сен айт...ларимни...

Жим қоламан эгиб бошим,  
Эгиб мағрур қадларимни.  
Кейин бир қиз ўқимасдан  
Йиртиб ташлар хатларимни...

## **БРИГАДИР**

*A. Аҳмедов ҳаётидан лавҳа*

Уни танишади қишлоқда,  
Ҳатто тилга олмай туриб отини.  
Лўндагина қилиб айтсам агар мен:  
Кунда кир ювади хотини...

Кўхликкина хотини,  
Шўрликкина хотини.  
Кунда кир ювар-да, тушунолмас,

Эри бригадирми,  
тракторчими?..

Лекин гап бундамас.  
Гап шундаки,  
Кимки астойдил  
Ерга меҳр қўйса,  
Қайтади бир кун.

Қора терни сидириб туриб,  
Чўлпиллатиб ўпиб пешонасидан,  
Эли унга раҳмат айтади бир кун.  
Мана, қуллуқ қиласар  
Бу кун эл,  
Марҳаматдан тортиб Асака.

Оёққа қалқийди каттаю кичик,  
Уни кўриб: — Бригадир ака!..  
Эҳе, бу кунларга етгунча  
Озмунча мاشаққат чекмади.

Юрагини анов инжиқ ерларга,  
Тилагини анов инжиқ ерларга  
Неча қайта экмади.  
Гап шунда ҳам эмас,  
Гап шундаки,  
Кимки астойдил  
Ерга меҳр қўйса,  
Қайтади бир кун.  
Қора терни сидириб туриб,  
Чўлпиллатиб ўпиб пешонасидан,  
Эли унга раҳмат айтади бир кун.

Аммо,

Қаердасиз, ўртоқ мухбирлар,  
Нималарни күзлаб юрибсиз?  
Яна қаерларда,  
Яна қайси бир  
Пуфак қаҳрамонни  
Излаб юрибсиз?!.

Истардимки, бу кун  
Бор ишни ташлаб  
Бир кишини йўқлаб келсаларингиз.  
Десаларингиз:  
Абдиҳошим Аҳмедов,  
Мунча озгинсиз,  
Мунча бўлиқ ғўзаларингиз...

\* \* \*

Бир куни  
Ёнингга келаман,  
Дейман: мен сен кутган боламан.  
Тинглайсан очилиб сен чаман,  
Мен сени севаман, севаман!..

Кел, дейсан. Кун совуқ, ўтиргил.  
Кафтимда лайлакқор — атиргул.  
Хонангда югуриб-еламан,  
Мен сени севаман, севаман.

Ким у жим қулади, қулади,  
Билдирмай эрмаклар қиласы?  
Майли мен ғалати, телбаман,  
Мен сени севаман, севаман.

Кел, дейсан. О, мунча кечикдинг,  
Йўқ энди у ғунча, кечикдинг.  
Боқ йигит, атрофинг қаҳратон...  
Мен сени севаман, севаман.

Сен турган жой энди бий дала,  
Қўлингда қоракўз бир бола.  
Мен энди қўшиқмас — ноламан,  
Мен сени севаман, севаман.

Айт, мендан не истар бу одам,  
Тикилар, синарми иродам?..  
Тикилар бир ёмон, бир ёмон,  
Мен сени севаман, севаман!..

Мени ёв этмиш бор мардум-ла,  
Лабимдан учмаган бир жумла.  
Энди кеч, энди не қиласман,  
Мен сени севаман, севаман!..

## БИР ҚИЗ БОР

Бу баҳайбат ҳовлида  
Нозиккина қиз яшар.  
Бир кун кўзим тушган, у  
Бизлар тенги, биз яшар.

Ойдек десам — тўлин ой,  
Гулдек десам — гулдек бор,  
Лекин жуда эркатой,  
Лекин жуда димоғдор.

Бу эркатой қизгина,

Мени писанд қилмайди.  
Бу дунёда биргина  
Мен гапирсам кулмайди...

Ҳашаматли бу уйга,  
Қайдан тушди нигоҳим?  
Үша менинг азобим,  
Үша менинг гуноҳим.

Үша-үша мен юрган  
Йўлимга ўй тўшайман.  
Қари опам кўзига  
Қаролмасдан яшайман...

## МЕНГА БЕРИНГ

Олам яралгандан бери,  
Одам яралгандан бери,  
Аждодларим имдодини  
Менга беринг, менга беринг.

Ўғлим, деб ишонган элим,  
Киндик қоним томган элим,  
Туйғуларим озодини  
Менга беринг, менга беринг.

Не баҳт, беш юз йилдан бери,  
Боқийдир бир бобом шеъри.  
Беҳзод чизган сувратини  
Менга беринг, менга беринг.

Қаранг, Абу Райҳон келур,  
Хаста кўнгли вайрон келур,

Синонинг тиббиётини  
Менга беринг, менга беринг.

Темурнимас, Чингизнимас,  
Осмон тўла юлдузнимас,  
Улуғбекнинг ниятини  
Менга беринг, менга беринг.

Ҳиндуга мусоғир ўша,  
Ҳиротдаги Бобур ўша,  
Ғурбатдаги Фурқатини  
Менга беринг, менга беринг.

Лайлиларни вафосини,  
Мажнунларин ниносини,  
Алпомишин келбатини  
Менга беринг, менга беринг.

Осмонларга учгим келур,  
Шоҳ Машрабни қучгим келур.  
Гўрўғлининг Ғиротини  
Менга беринг, менга беринг.

Ўтган қуним, кетган қуним,  
Ўз бошимга етган қуним.  
Қодирийнинг пок ёдини  
Менга беринг, менга беринг.

Қайда бу кун Усмон Носир,  
Бағри қуқун Усмон Носир.  
Шоирларнинг шерзодини  
Менга беринг, менга беринг.

Ерни ушлаб тўхтатаман,

Яссавий ким, кўрсатаман.  
Ватан адабиётини  
Менга беринг, менга беринг.

Яшайлик бир ўзбек бўлиб,  
Бир узукка кўздек бўлиб —  
Деган дилнинг муродини  
Менга беринг, менга беринг.

Замин ерин зўрин олинг,  
Жаннатининг тўрин олинг.  
Ўзбекистон ободини  
Менга беринг, менга беринг.

У ҳам мени кўргай ҳали,  
Кўзи ёниб сўргай ҳали:  
Шу ўғлимнинг баётини  
Менга беринг, менга беринг.

\* \* \*

— Она, мени нега туғдинг?  
— Юртинг учун.

— Она, мени нега туғдинг?  
— Бахтинг учун...

— Она, мени нега туғдинг?  
— Зориққандан.

— Она, мени нега туғдинг?  
— Зериккандан...

## ИЗҲОРИ ДИЛ

Кўҳна толбешикдан  
Бошланган олам.  
Сенга иddaолар  
Қилмай севаман.  
Бир куни синглим, деб,  
Бир куни онам —  
Ватан,  
Кимлигингни  
Билмай севаман!..

Тўзғийди тўнингдан  
Тортган тўралар.  
Кеча тузингни еб  
Сотган тўралар.  
Энди пушаймонда,  
Туйник мўралар —  
Мен сенинг  
Ёнингдан  
Жилмай севаман.

Менга еринг суюк,  
Осмонинг суюк.  
Боқсам, тенг  
Тўрттала  
Томонинг суюк.  
Товонимга кирган  
Тиконинг суюк —  
Кафтдан  
Зирачанг ҳам  
Юлмай севаман.

Чўксанг,  
Тур, синглим деб,  
Сочинг силайман.  
Сўксанг,  
Опам дейман,  
Умринг тилайман.  
Сендан ранжимайман,  
Гина қилмайман —  
Хоҳ хўмрай,  
Хоҳ жилмай,  
Бирдай севаман.

Ватан —  
Юрагимнинг  
Олампаноҳи,  
Бу дунё  
Букри бир  
Жийдангнинг шохи!.  
Кўзим ёши билан  
Суғориб гоҳи  
Кўксимда ўстирган  
Гулдай севаман.

Бу ёруғ жаҳонда  
Йўғу боримсан,  
Тилимнинг остида  
Новвот-заримсан.  
Сен менинг ягона  
Пайғамбаримсан,  
Мен Билол,  
Мен Ҳабаш —  
Қулдай севаман!..

\* \* \*

Манга таниш юзинг, таниш күзинг, кимсан,  
Бағри жонимни ўртайди сўзинг, кимсан?  
Қайдин бунча меҳрибонлиғ, қараб турсам,  
Турқинг одамга ўхшайди, ўзинг кимсан?..

## ҚАРҒА

Баланд шохга осилиб қолди,  
Бир оёғи кириб айри новдага.  
Кун бўйи силтаниб тойди ҳолидан,  
Қийин, қийин бўлди ушоқ гавдага...

Бизлар томошабин,  
Қарға азобда,  
Тўлғанар тўкилиб кўзларидан чўғ.  
Ундей қил, бундай қил, деб ўргатамиз,  
Дарахтга чиққани бир ёш бола йўқ.

Менинг ёнимда бир таниқли олим,  
Шериги раҳбарим, фақат ураг дўқ.  
Мен шоир. Ўзимча шеър ёзсан дейман  
Дарахтга чиққани бир ёш бола йўқ.

Бир бобой ғайрати қўзиб кетдими,  
Ё ўзи ёшлиқдан бўлганмикан шўх,  
Чинорни силкитди, сезди... Фойдасиз...  
Дарахтга чиққани бир ёш бола йўқ.

Қарға эса баланд бутоқда энди  
Тақдирга тан бериб ётарди беун.  
Тепада айланиб фарёд соларди —

Бир дунё қузғун.

Қүш қолди оёғи осмондан бўлиб,  
Биз ҳам битта-битта тарқалиб кетдик.  
Оламни унутдик эринибгина,  
Парқу болишларда уйқу элитди...

Тонгда чопиб чиқдим.  
Дараҳт жойида.  
Шоҳ бор,  
Шоҳда қарға йўқ эди аммо.  
Бошга кулфат тушган кунда шеригин  
Ташлаб кетмас экан қузғунлар ҳатто!

## ГУРУР

Ҳозир менга қулиб қарайсан,  
Бегамгина бош ирғайсан жим.  
Ва йўлингга кетаверасан,  
Худди сенга йўқдек керагим.

Малол ўйнар, йўқ, савол ўйнар  
Дугонангни кўзларида: ким?  
Бир силкиниб кўяди кафting,  
Худди сенга йўқдек керагим.

Қарамайман ортингдан мен ҳам,  
Тезроқ бундан кетмоқ тилагим.  
Ва шўнгийман троллейбусга,  
Худди менга йўқдек керагинг...

Сени гоҳи йиғлагинг келар,  
Мени эса гоҳида ичгим.

Шундай, шундай катта шаҳарда  
Бизга ёрдам беролмас ҳеч ким.

## ҚОРА ҚУМФОН

Момом сенга олов ёққан,  
Қора қумғон, қора қумғон.  
Бобомни ҳам ўзинг боққан,  
Қора қумғон, қора қумғон.

Онам қошида тиз чўккан,  
Қора қумғон, қора қумғон.  
Отамнинг қўллари теккан,  
Қора қумғон, қора қумғон.

Куним сенсиз ўтар, аммо,  
Қўлим кўкка етар, аммо,  
Қора қумғон, чойингдан бер,  
Қора қумғон, қора қумғон...

Улар паймонаси тўлгач,  
Удумлари унут бўлгач,  
Үйимда мунғайиб қолган,  
Қора қумғон, қора қумғон...

Келар даврон, кетар даврон,  
Ўзингдан ўзга йўқ армон.  
Ўзингдан ўзгаси ёлғон,  
Қора қумғон, қора қумғон.

Куним сенсиз ўтар, аммо,  
Қўлим кўкка етар, аммо,  
Қора қумғон, чойингдан бер,

Қора қумғон, қора қумғон...

## ЁҚУБ МЕРГАН

Ёқуб чолга «Запорожец» беришмади,  
Аризалар ёзиб борса күришмади.  
Кўргач эса кўрмагандек елка қисиб,  
Кўнишмади...

Ёқуб чолнинг кўкси тўла орден эди,  
Қайга борса ўрни тайин тўрдан эди.  
Нима дейиз — икки уруш кўрган эди  
Берлинда суратга тушган мерган эди.

Биттагина оёғи ҳам толдан эди,  
Биттасини дўхтири кесиб олган эди.  
Урушдан сўнг шундай бўлиб қолган эди,  
Гурс-гурс қилиб юришлари ёлғон эди!

Бошлиқ чолга «Запорожец» бермади,  
Аризалар ёзиб борса кўрмади.  
Кўргач эса кўрмагандек елка қисиб,  
Кўнмади...

Ёқуб чолнинг райсабесдан кўнгли қолди,  
Ёқуб чолнинг бошлиқ-бездан кўнгли қолди.  
Мендан, сиздан — ҳаммамиздан кўнгли қолди,  
Машинасин бошқа олғир кимса олди.

Энди ул зот ялло қилиб юраверар,  
Инвалиднинг машинасин сураверар.  
Уни кўрсан чол эсимга келаверар,  
Фидираги юрагимни эзаверар...

Ёқуб чолга беришмаган «Запорож»нинг!

## АНЖЕЛИКА

Эвакуация қилингандың оила бизницида яшаган. Она, бола.  
Белорусиядан. Онасининг оти ҳозир ёдимда йүқ. Қизнинг исми  
Анжелика эди...

Поезддаги сухбатдан

Қирғын жанглар борар эди Мағрибда,  
Қачон тугашини билмаймиз.  
Синфимизга бир қызы келиб қўшилди —  
Сочи сунбул, кўзлари ялпиз.

Анжелика!  
Отасини отишган.  
Анжелика!  
Уйига бомба тушган.  
Шундай озғин,  
Шундай озғинки,  
Баргизубга ўхшатиш мумкин...

Менга қизлар ялинади ҳар оқшом,  
Юр, фашистни қўрганмикин, сўрайлик.  
Кетдик, дейман. Аммо билиб қўйинглар,  
Анжелика ҳаммангиздан чиройлик!

Қалампирни ҳам мева деб ўйлайди,  
Узиб бер, деб кунда мени қўймайди.  
Кунботарга қараб юм-юм йиғлади,  
Анжелика ҳаммангиздан чиройлик!

Кунботарда ўқлар чақнар юлдуздек,

Жасадлар дор узра бўғотда муздек.  
У ёқда укаси қолган тўрт ойлик,  
Анжелика ҳаммангиздан чиройлик!

Туршакларга тўлиб кетар қўйинлар,  
Қизлар тўхтаб қолар: ўйлаб кўрайлик...  
Ўйлайверинг, аммо билиб қўйинглар —  
Анжелика ҳаммангиздан чиройлик!..

Тунлар кўчиб, зафар тонг отар бўлди,  
Чехрасига термуламиз — тўймаймиз.  
Синфимиздан бир сулув кетар бўлди,  
Сочи сунбул, кўзлари ялпиз.

Кунботарга елиб борар паровоз,  
Бир қиз йиғлар: хат ёзишиб турайлик.  
Бир қишлоқ қиз йиғлар ундан узмай кўз:  
Анжелика... ҳаммангиздан чиройлик!

## ТУРНАЛАР

Иссиқ-иссиқ юртлар излаб,  
Ўтаётир турналар,  
Ҳамдаму ҳамюртлар излаб,  
Кетаётир турналар...

Ҳолидан бўлмай огоҳ,  
Қилдик гуноҳ, қилдик гуноҳ  
Қалбию қаноти музлаб,  
Кетаётир турналар.

Хўшлишиб қуёш билан,  
Қароғи тўла ёш билан,

Йиғлатиб, ўзлари йиғлаб,  
Кетаётир турналар.

Мехр-оқибат сўраб,  
Ширин калом, сухбат сўраб,  
Кўзга кўринмай олислаб,  
Кетаётир турналар.

Руҳи кўкларни қучиб,  
Қўнмоққа жой танлаб учиб,  
Битта-битта ер бағирлаб,  
Кетаётир турналар.

Қуш эмас, хуллас калом,  
Бири бобом, бири момом.  
Жонлари жаннатни кўзлаб,  
Кетаётир турналар!..  
Иссиқ-иссиқ юртлар излаб,  
Кетаётир турналар.

## ТАЛАБАЛАР МАДҲИЯСИ

Алп ўғлонлар ўлкаси бу кўҳна Турон  
Қалқонлари, қанотлари, илм истанг.  
Яirim жаҳон бунёд этган Соҳибқирон,  
Алишернинг авлодлари, илм истанг!

Тахтдан тушганда ҳам отдан тушмай юрган,  
Аждодингиз уй қурмаган — Давлат қурган.  
Юрти учун елкасида тоғлар сурган,  
Рустамлари, Фарҳодлари, илм истанг.

Кўз очгандан кезиб етти баҳри уммон,

Етти тилда сўйлашган биз тили бийрон.  
Ватанида Тожмаҳаллар тиклар султон —  
Бобурлари, Беҳзодлари, илм истанг.

Ҳақ йўлида сиз илмнинг умматлари,  
Халқ йўлида ҳидояти, ҳимматлари.  
Мадад бўлсин Яссавийнинг ҳикматлари,  
Бобо Машраб баётлари, илм истанг.

Илм истанг, изингиздан ибрат ёғсин,  
Ихлосингиз, шаҳдингиздан шиддат ёғсин.  
Ортингиздан мағрур-мағрур миллат ёғсин  
Мулки Турон нажотлари, илм истанг!..

Алп ўғлонлар ўлкасиdir Ўзбекистон,  
Эркли элнинг қанотлари, илм истанг.  
Яrim жаҳон бунёд этган Соҳибқирон,  
Алишернинг авлодлари, илм истанг.

## ҚИРУВЧИ САМОЛЁТЛАР

Ариқда бўтана сув,  
Бўйида қўйлар ўтлар.  
Кўқдаги калхатлар у —  
Қиравчи самолётлар.

Олмалар тўкилар дув,  
Олмалар — ҳиссиётлар.  
Бетуйғу ниятлар у —  
Қиравчи самолётлар.

Босма, бу майса — қулгу.  
Майсалар — қувнок ўтлар.

Күзёшу кулфатлар у —  
Қирувчи самолётлар...

Сарғайған расми қўлда,  
Бир момо ўғлин ёдлар.  
Янги қорахатлар у —  
Қирувчи самолётлар.

Отангдан мерос шу уй,  
Онангдан қолган тандир.  
Кутмоқда сендан нажот,  
Мұхаммад Юсуф, гапир!..

Олимларга не бўлган,  
Битмоқда энди сабр.  
Физика, сен топдингми,  
Сен топдингми, Ал-Жабр?..

## ҚАЙДА БОР

Ёмғир ёғар шитирлаб,  
Нурми, ипак толалар.  
Баҳор келса қиқирлаб,  
Қирга чиқар лолалар.  
Лолалар ҳар жойда бор,  
Бизда бори қайда бор?..

Кўкни булат ўрайди,  
Ерни ёмғир аллалар.  
Райхон ҳидин тараиди,  
Донга интиқ далалар.  
Далалар ҳар жойда бор,  
Бизда бори қайда бор?..

Саман йўрға ер чизиб,  
Тошда омоч сирғалар.  
Оқар ойни оқизиб,  
Жилдир-жилдир жилғалар.  
Жилғалар ҳар жойда бор,  
Бизда бори қайда бор?..

Қалбга таскин изласанг —  
Турғун чолни сўрагин.  
«Тановар»ни тингласанг  
Сел бўлади юрагинг.  
Наволар ҳар жойда бор,  
Бизда бори қайда бор?..

Кўринганни дуолар,  
Қилар бизда момолар.  
Ғанимга ҳам омонлик,  
Тилар бизда момолар.  
Момолар ҳар жойда бор,  
Бизда бори қайда бор?..

Бизнинг бўстон қайда бор,  
Шоҳимардон қайда бор,  
Сўлим Сурхон қайда бор?  
Самарқанднон қайда бор-а,  
Ўзбекистон қайда бор?!.

## ТУФРУҚХОНАДА

Мана қандай экан оталик баҳти,  
Турибман гулларим билан панада.  
Бир маҳалла бўлғуси файласуфлар,

Олимлар чинқирада туғруқхонада...

Апрель, айланайин ялпизларингдан,  
Айланайин осмон күзлари зангор.  
Дунё бугун менга туюлди бирдан,  
Чақалоқлардан ҳам мүмин, беозор.

Ҳамшира имлайди: келинг яқинроқ,  
Ана у, ўғилми-қизми билмайман...  
Ойнадан термулиб сочингни силайман,  
Юзингдан ўпаман докадек оппоқ.

Кейин жим кетаман исмлар излаб,  
Тақдириңгни ўйлаб йўқдир оромим.  
Майли ўғилмисан-қизми бари бир,  
Юлдузинг ёруғми менинг давомим?..

Тонгим кулгу эди,  
Шомим хавотир.  
Дунёда нима гап дея бўйлайман.  
Атомлар асрида кун бўйи шод юрмоқ —  
Жуда катта бир баҳтлигин ўйлайман...

Яна сен ёдимнинг ойинасида,  
Қўлингда боламиз — Мўмин Чакалоқ.  
Олам тинч. Хўрсиниб сочингни силайман,  
Юзингдан ўпаман пахтадек оппоқ.

## ҚИЁМАТ

Қиёматда қораяр қуёш,  
Осмон қора дудга тўлади.  
Мунофиқлар мушукдай ювош,

Фоҳишалар отин бўлади.

Қиёматда қурбақа булбул,  
Қамишзорлар айланар тоққа.  
Қўнғизчалар бўлади дулдул,  
Ўғрилар қоровул чорбоққа...

Қиёматда қуллар қорни тўқ,  
Хожалари бўлар нонга зор.  
Шоир билан шоҳнинг иши йўқ,  
Зинданбонлар қўшиқлар ёзар.

Қиёматда бўлмайди ҳийла,  
Ёмғир — шароб, газаги — илон.  
Ҳеч ким қусмас дўстлари ила  
Бир қадаҳ май ичиб, бир жом қон.

Тўрт фаслнинг бўлмайди қиши,  
Қиёматда афсона бўлмас:  
Юсуфини қудуққа пишиб,  
Акалари тортиб олади...  
Қиёматда ҳамма чўк тушиб,  
Мухаммадни эслаб қолади!

## НИМА ДЕВДИМ

Севгим менинг,  
Кечикиб келган севгим,  
Мана энди бир умр ўртанамиз.  
Саҳаргача ухламай ўйланамиз,  
Қийналамиз...  
Мен сенга нима девдим?

Дүсту ғаним бир эрмак тополмайди,  
Бир кун бизни гапирмай яшолмайди.  
Кечикиб келган севгим,  
Мен сенга нима девдим,  
Олти қитъа энди бизни пойлайди...

Севгимсану, ёнингга боролмайман,  
Кўзларингга соғиниб қаролмайман.  
Кечикиб келган севгим,  
Кечикиб келган севгим,  
Ҳеч кимга бу кўнглимни ёролмайман.

Сени унсиз эркалайди нигоҳим,  
Сочинг силаб чарчамайди нигоҳим,  
Кечикиб келган севгим,  
Кечикиб келган севгим,  
Бу дунёда менинг бор-йўқ гуноҳим!..

Юрак йиғлар, айтишга ийманамиз,  
Биз энди бир умр қийналамиз,  
Кечалари ухламай ўйланамиз.  
Кечикиб келган севгим,  
Бу дунёда менинг бор-йўқ гуноҳим!..

Юрак йиғлар, айтишга ийманамиз,  
Биз энди бир умр қийналамиз,  
Кечалари ухламай ўйланамиз.  
Кечикиб келган севгим,  
Мен сенга нима девдим?..

## ОРЗУ

Туғилмасдан олдин мен

Чиқиб арши аълога.  
Ойни ўпиб, қолдим мен  
Юлдузлардан балога.

Түғилгандан то шу дам,  
Құмсаң кечә-кундузлар.  
Ой қани, деб йиғласам,  
Ғийбат қиласар юлдузлар...

Хиқиллама, ҳей юрак,  
Дунё билан ишим йўқ.  
Бўлса менга Ой керак,  
Юлдузларга ҳушим йўқ!

## МАТЕМАТИКАНИ ЁМОН КЎРАМАН

Баҳор адирларда лола тераман,  
Одамлар ҳақида ўйлар сурман.  
Ҳарбийда кўрганим зирҳли машиналар,  
Снарядлардан ғишт ясаб,  
Осмонўпар уйлар қураман,  
Математикани ёмон кўраман.

Орзуларим — қайсар қанотларим,  
Осмонларда учеб юраман.  
Синглим ойни ўпиб, укаларим —  
Юлдузларни қучиб юраман,  
Математикани ёмон кўраман.

Атомлар — математика.  
Водородлар — математика.  
Қирувчи самолётлар,  
Крематориялар — математика!

Математикани ёмон кўраман.

Сен эса ширин бир дардсан.

Сен яхши ниятсан.

Шеъриятсан...

## ДўППИ

Дўппи киймай қўйди одамлар,  
Бир шоир, бир носирдан бошқа.  
Сочлар силлиқ,  
Силлиқ қадамлар,  
У оғирлик қиляпти бошга...

Рост дўппилар,  
Ёлғон дўппилар,  
Киноларда қолғон дўппилар.  
Чуст дўппилар,  
Анжон дўппилар,  
Мунчоқдек Марғилон дўппилар...

Дўппи киймай қўйди одамлар,  
Бир шоир, бир носирдан ўзга,  
Мен ҳам сизга бердим саволлар,  
Шляпамни бостириб кўзга.

Дўппи киймай қўйди одамлар,  
Кўнгил эса кўрмоқ тусайди.  
Маданият гуллаган дамлар,  
Каллага эътибор сусайди.

Дўппи киймай қўйди одамлар,  
На уйда ва на кўчада.

Миртемирлар, Ғафур Ғуломлар  
Ечган дўпли қолди токчада...

Бу қандайин қўргулик савдо,  
Дўппи киймай қўйди халойик.  
Бошга лойиқ дўппи йўқдир ё —  
Бош қолмади дўпига лойиқ.

## ЙИГЛАБ ТУРИНГ

Эгар бўлдик эгилмаган бошимизни,  
Тандан бу жон кетмасми сиз кетгунча.  
Алдамчи деб атамасман асло Сизни —  
Қиз боланинг ваъдалари бўй етгунча,  
Кўнгил учун йиғлаб туринг тўй ўтгунча!

Бўй етган қиз учирма қуш, учар-кетар,  
Бир кун суйиб бегонани, қочар-кетар,  
Эрта исмим ёдингиздан ўчар-кетар —  
Қиз боланинг ваъдалари бўй етгунча,  
Кўнгил учун йиғлаб туринг тўй ўтгунча.

Қизлар кўнгли баҳор билан ёз ўртаси,  
Гоҳи алам, гоҳи араз — ноз ўртаси.  
Қумқўрғондек омонат бу ишқ ўрдаси,  
Қиз боланинг ваъдалари бўй етгунча,  
Кўнгил учун йиғлаб туринг тўй ўтгунча!

Айтинг-айting, тўраларим қулмасинлар,  
Тили узун шум янгалар билмасинлар.  
Кўча-кўйда мени эрмак қилмасинлар —  
Қиз боланинг ваъдалари бўй етгунча,  
Кўнгил учун йиғлаб туринг тўй ўтгунча!

\* \* \*

Бисотимни боғда бир ҳалол  
Капалакка алмашаман мен.  
Ҳәётимни күқдаги зилол  
Камалакка алмашаман мен.

Ёғдуларга чўмилган шаҳар  
Бетонлари биқинни чақар.  
Уйим қаср бўлса ҳам агар,  
Гувалакка алмашаман мен.

Шоирликни сўймайди жиним,  
Менга ҳавас қилмагин, иним.  
Шуҳратимни тотли бир тилим  
Ҳандалакка алмашаман мен.

Қўшиқларим бўлиб овоза,  
Юртда машҳур эмишман тоза!..  
Барча ёзган шеърим бир коса  
Сумалакка алмашаман мен.

## БИБИ

Марғилон ҳавоси элитди андак,  
Маъюс кўчаларда юрдим довдираб.  
Ҳозир Кумуш чиқиб қоладигандек  
Ҳар эшикка боқдим кўзим жовдираб.

Чиқса, Биби дердим,  
Шеърга ёр бўлдим,

У бир юҳо янглиғ домига тортар.  
Шұхрат йўлиққанда дўстга зор бўлдим,  
Қалбимни ёлғизлик азоби ўртар.

Асли-ку, шаҳарга йўлим чап эди,  
Нетай, пойтахтдаман, насибам экан.  
Сенинг-ку, душманинг бир Зайнаб эди,  
Менинг кундошим кўп, ёвларим улкан!..

Булардан қўрққулик. Булар доғули,  
Зайнаб нима? Зайнаб бир рашқ бандаси.  
Булар душманларнинг энг номард хили,  
Булар кундошларнинг энг шармандаси.

Қон тўла кўзида ялтирап ҳасад,  
Булар на шоир, на омадсиз одам.  
Улар оёқ қўйган ҳар зина жасад,  
Шулар гумдон қилган Қодирийни ҳам...

Марғилон ҳавоси элитди андак,  
Маъюс кўчаларда юрдим довдираб.  
Ҳозир Кумуш чиқиб қоладигандек,  
Ҳар эшикка боқдим кўзим жовдираб.

Чиқса, Биби дердим,  
Мен ёзмай қўйдим,  
Ўрнингга борай, сен Марғилонга қайт.  
Туғилдим. Яшадим. Зериқдим. Тўйдим.  
Заҳаридан берсин, кундошингга айт!..

## ЎЛАН

Тўйларни ҳаммадан ҳам

Бүй қизлар хуш күрармиш.  
Битта қиз әрга тегса,  
Қирқтаси туш күрармиш.

Түйхонада күй тиниб,  
Тинганида оловлар.  
Қирқ сулувни йиғлатиб  
Кетар экан куёвлар...

Сингилларим, йиғламанг,  
Йиғласангиз хафаман.  
Юртни кезиб, сизларга  
Үзим күёв топаман.

Оқ тилаклар бор бўлса,  
Омон бўлса умидлар,  
Изингизга зор бўлар  
Муҳаммадек йигитлар!..

## **МАТЕМАТИКА ДАРСИ**

Математика қўйни тўла сир бўлади,  
Бирга бирни қўпайтиrsa — бир бўлади.  
Деразадан мўралайди олма шохи,  
Уфқда булут — эртага ёмғир бўлади...

Математика, ёмғирларда чопгум келур,  
Жумбоғингга мен ҳам жавоб топгум келур.  
Деразадан мўралайди бодом шохи,  
Боққа чиқиб қўнғизларни ўпгум келур.

Математика, мен ҳам ўйга ботгум келур,  
Ўйлаб-ўйлаб... ўзингга тош отгум келур.

Сен самолёт кашф этасан, менинг эса  
Ялпиз билан ачомлашиб ётгим келур.

Математика — ой бўлади, йил бўлади,  
Танкни танкка кўпайтирса — кул бўлади...  
Дунё қачон бўстон бўлар, гул бўлади?  
Адабиёт ўйлайвериб сил бўлади!

Математика — лов-лов ёниб турган чўғсан,  
Сендан нима ясашларин билган йўқсан.  
Деразадан мўралайди гилос шохи,  
У қўндоғинг, ўзинг милтиқ, ўзинг ўқсан...

Математика, қўйнинг тўла сир бўлади.  
Бирга бирни кўпайтирса — бир бўлади.  
Қовурғамнинг тагида бир қумри йиғлар,  
Доскадан мени айирсанг — ШЕЪР бўлади!

## ТОПВОЛДИ

Ўзим ёзган шеър ҳам ўзимникимас —  
Минг бир муҳаррир бор уйимда.  
Сизга қўрсатолмам ўз боламни ҳам,  
Ўзим кийинтирган кийимда.

Хотиним қизларни ёзмайсан, дейди,  
Отам подшоларни. Мени авайлар.  
Илҳом йиллаб эшик қоқмайди гоҳи,  
Юрак войвойлар...

Гулхан бўлиб кетди қанча шеърларим,  
Муҳаббат ҳақида эди ҳаммаси.  
Азиз мухлисларим, билиб қўйинглар,

Шоирга хұжайин ҳатто амаси!

Мен ҳам дуруст шоир бўлармидим, балки,  
Энг гўзал байтларим йиртилмаганда.  
Ушбу шеъримни ҳам тамаки излаб,  
Токчадан топволдим кутилмаганда.

Топдиму отини топволди қўйдим,  
Юзларидан ўпдим ярим кечада.  
Қулоғига шивирлаб: мен уйдан тўйдим,  
Сен бор, ўйнаб келгин, дедим, кўчада!..

## АЖАБ...

Чўпон бир қўзини қўйса йўқотиб,  
Лол бўлманг, ўзини қўйса йўқотиб.  
Хотинин уйғотиб, ўғлин уйғотиб,  
Жониворин излаб қилар тонготар...

Деҳқон сигир сотиб қўйса — йиғлади,  
Уялиб, ҳафталаб уйдан чиқмайди.  
Тўпори кўнглига қил ҳам сиғмайди,  
Гавҳар йўқотгандек қайғуга ботар.

Дунёнинг ишларин ўйлаб бош қотар:  
Мудом тушунганлар кўкка тош отар.  
Сотмайди юртини бирор отбоқар,  
Сотса, зериккандан зиёли сотар!..

## ОЙМОМА

Оқшомлари қовундай

Юмалайди ой ерда.  
Менга айтинг, қуёшнинг  
Остонаси қаерда?

Тилинг борми, бўлса бир  
Хайқириб бер, Оймома.  
Шу кўчада бир қиз бор,  
Чақириб бер, Оймома!..

Ўрмалаб бор, мен учун  
Эшигига бошинг ур.  
Юзларига юзинг бос,  
Қошларига қошинг сур.

Узрим айтгин юракдан,  
Уни тавоғ этарман.  
Келаман деб ҳар кеча,  
Келолмасам нетарман.

Қай кун йўқлаб боргандим,  
Кўрмайин ҳол сўргандим.  
Мен севишни тундаги  
Сукунатдан ўргандим...

Мен учун ҳам ўзинг бир  
Хайқириб бер, Оймома.  
Сендан ойдин бир қиз бор,  
Чақириб бер, Оймома.

## МИРТЕМИР ВА МЕНИНГ АММАМ

Пайкалдан бош қўтартмайди Халча хола,  
Халча хола тандир-тандир нон ёпади.

Бир шеър ёзсанг — қулиб турса түққиз бола,  
Ана энди, Миртемирни ким топади?..

Хадичадир асли оти, билмасман ҳам,  
Халчага мос лекин келбат, салобати,  
Билганим шу — бундайларсиз дунё бир кам,  
Мана энди, Миртемирни ким топади?

Түққиз ўғли түққиз юртга кетди түзиб,  
Халча ўзи қорт боқади, ер чопади,  
Бир қүшиқ бор йиғидек унинг бўзи,  
Ана, энди Миртемирни ким топади?

У отамнинг ёлғиз сингли, диidi нозик,  
Бир кун борсам олдига зўр шеърим ёзиб,  
Тузук деди. Лекин, дерди, буюк ҳамма,  
Аммо... энди Миртемирни ким топади?

\* \* \*

Кўнгил шодлигига йўқдир ниҳоя,  
Жонимни аллалар туғилган еrim.  
Салом, ота макон ва бедапоя —  
Олифта қизларга ёқмаган шеърим!..

Сен ўша-ўшасан, дилкашу мўмин,  
Дунёни ўйлайсан шудгорни кеча.  
Юзингдан сув оқиб тинмайди бир кун,  
Кўзингдан аrimас ташвиш бир кеча.

Мен эса яшадим олисда бебош,  
Тилла сирғаларнинг жаранги аро.  
Ўсди, ўсаверди юрак — харсангтош,

Болангга ўхшамай турибман, қара.

Келаман битталаб териб лой йўлдан  
Олтин ёшлигимнинг суратларини...  
Ўрдаклар учади оғриниб кўлдан,  
Офтобга тутгали ҳўл патларини.

Кўнгил шодлигига йўқдир ниҳоя,  
Энди қадринг билдим туғилган еrim.  
Салом, яйдоқ дала ва ғўзапоя —  
Олифта қизларга ёқмаган шеърим!..

## УЧ ЎҒИЛ ВА БИР ҚИЗ ҚИССАСИ

Мўмин чолнинг уч ўғил,  
Ёлғиз қизи бор эди.  
Тухфа эди тақдирдан,  
Кампирдан ёдгор эди.

Қиз эртага эгаси  
Олиб кетар кўчдай гап.  
Юрт кезарди чол бу кун  
Кенжага келин излаб.

Қариганда тўрт томон  
Зир чопиш қийин экан.  
Ўғлинг қайсар бўлса, гоҳ  
Қиз топиш қийин экан.

Кампир тирик бўлганда  
Камаярди заҳмати.  
Тили ширин, гапга хўб  
Чечан эди, раҳматли...

Тўй — бир кунлик. Пул нима,  
Азизиди жонидан?  
Мўмин озроқ қарз олди  
Эски қадрдонидан.

Бека бўлди товусдай  
Кенжа ўғил қаллиғи.  
Келин эмас, Худонинг  
Берган олтин балиғи.

Бир кечанинг изоҳи —  
Ярми қувонч, ярми ғам.  
Эҳ, қанийди шу кунни  
Кўрганида кампир ҳам!..

Ҳаёт ҳар ўйинига  
Ўзи топар таърифин:  
Оғзи ошга етганда  
Бурни қонар ғарибнинг.

Тўй ўтдию тўшакка  
Ётиб қолди Мўмин чол,  
Жуда оғир ҳасратга  
Ботиб қолди Мўмин чол.

Ажал остона узра  
Тураг экан сузилиб,  
Ёлғиз қизи қисматин  
Ўйларди у эзилиб...

Жон дегани омонат  
Одам Ато ўғлига.  
Мўмин ўлди. Тумонат

Эл йиғилди ҳовлига.

Марҳум қандай зот эди?..  
Удумда бор бу савол.  
Ҳалол эди, дедилар,  
Ҳалол эди Мўмин чол.

Эл чайқалиб елкага  
Тобутни ортган они,  
Озроққина қарзини  
Эслатди... қадрдони!

Муслимга омонатдан  
Улуғ фарзи адо йўқ.  
Халойиқ лол. Бу не ҳол,  
Уч ўғилдан садо йўқ?!

Уч паҳлавон, уч пари  
Пайкарга қул эдилар.  
Отамнинг бундай дўстин  
Танимаймиз, дедилар...

Қиз-ку, эрта эгаси  
Олиб кетар кўчдай гап.  
Аммо бу кун даврага  
Отилди у қон йиғлаб.

Айтинг, деди бас қилсин,  
Ақаларим арзини.  
Бўй етган кун тўлайман  
Мен отамнинг қарзини.

Раво топса у кимни  
Бош қўяман кўксига.

Қарз үрнига қалиним  
Тегсин отам дўстига!..

Халойиқ лол. Бу не ҳол,  
Бу не савдо, ёронлар.  
Отасидан олдинроқ  
Үлар бўлди ўғлонлар!..

Ривоятмас айтганим,  
Ҳикмат бўлмас ёлғонда,  
Бу воқеа рўй берди  
Шу кунда, шу замонда.

Қарздан кечиб кетса ҳам  
Ота дўсти ҳайратда,  
Уч ўғилни қишлоқдан  
Ҳайдади халқ, албатта.

Қиз-чи, дерсиз, қиз ҳаёт,  
Яшар ота маконда.  
Чунки унга муносиб  
Йигит йўқ бу жаҳонда!..

## ҲАЙВОНОТ БОҒИ

Ҳайвонот боғида жайронни кўрдим,  
Тутқунликда дили вайронни кўрдим.  
Кўрдим, қуруқ шоҳда сайрап тўтилар,  
Йиғламсираб товуш қайрап тўтилар.

Қанотдан айрилиб, қилас пардозлар,  
Осмонида энди учолмас ғозлар.  
Бургутларнинг боши эгилган ерга,

Булбуларнинг ёши тўкилган ерга.

Какликнинг тўши қон, тумшуқлари қон,  
Қумриларнинг маъюс кўзлари — достон  
Бу дунё аслида ҳайвонот боғи,  
Муштоқ — зорликка кон бошдин-оёғи.

Бир-бир барин санаб нетарман, бас-да,  
Неки гўзал бўлса бари қафасда!..

\* \* \*

Менинг юрагимни тагида шундай  
Ғалати ҳақиқат ҳукм суради —  
Нафрат ва Мұҳаббат эру хотиндай  
Доим қўлтиқлашиб юради...

Рўзғорда не бўлмас?  
Тирик жон, ногоҳ  
Уришиб қолишса яраштираман,  
Тўғри йўлга солиб ўзим уларни гоҳ,  
Гоҳи тўғри йўлдан адаштираман.

Начора, ўргада норасида бор,  
Битта кўзи қора  
Битта мурғак жон.  
Фоятда беғубор,  
Фоятда дилдор  
Ўша қизнинг оти — Ҳаётхон!..

\* \* \*

Қиёси йўқ асло, меҳри бир дарё,  
Ўхшаса ўзига ўхшайди ўзбек.  
Болаларига-ку билдиrmас, аммо,  
Дунёда болам деб яшайди ўзбек.

Ўнта бўлса, ўрни бошқа унинг-чун:  
Ўғлим оташимдан яралган учқун,  
Қизим парилардан чеҳраси гулгун,  
Юзлари лолам деб яшайди ўзбек.

Бир қўлда беланчак, бир қўлда Куръон,  
Бир елкада кетмон, бирида иймон,  
Барчага баробар бир офтобсимон,  
Яшнасин олам деб яшайди ўзбек.

Момолари тетик юзга кирса ҳам,  
Боболари қайси йигитлардан кам?  
Набираси бўлса битта уйга жам,  
Тўшак етмай тўнин тўшайди ўзбек.

Киндик қони томган тупроқ унга — шон,  
Керак бўлса, бесўз бахш этар у жон,  
Кўкракка урмайди: Ватан деб, Ватан!  
Алпомиш ўғлонга ўхшайди ўзбек.

Эҳтиром этганга эхромлари бор,  
Кеккайганга бўйин эгмайди зинҳор,  
Бешик тўла жажжи Исломлари бор —  
Тошўтмас кўрғонга ўхшайди ўзбек.

\* \* \*

Бу қиз қўлим етмас қизғалдоқ энди,

Ясанган янги йил куни арчадек.  
Кеча жамалаксоч қизалоқ әди,  
Пинжимда юради мушукваччадек.  
Акасин унутар қизлар айниңса —  
Ха, отингдан айланайин, Ойниса!

Қизларда қирқта жон бор, қирқ битта фириб,  
Күлдай сарғайтириб жонингни олар.  
Тунда тўйдан топиб кўз уруштириб,  
Кундуз торкўчада танимай қолар.  
Давлати камайиб қолар таниса —  
Ха, отингдан айланайин, Ойниса!

Кўйингда қақшаган мендек адо йўқ,  
Кун йўқ менинг ўтли муҳаббатимга.  
Тошдан садо бор-у, сендан садо йўқ,  
Жавоб ёзмадинг-е, битта хатимга.  
Боғда изинг бор-у, ўзинг қанисан,  
Ха, отингдан айланайин, Ойниса!...

## ЭСКИ АЙВОН

Тошкўчангга сочдим, эй ёруғ олам,  
Мана, чегарасиз муҳаббатимни.  
Тун бўйи ўзимга йиғлади онам,  
Не қилиб қўйдинг деб — Муҳаммадимни.

У юзимдан ўпди,  
Кўзимга боқди.  
О, бу қарашларга чидамоқ азоб...  
Она мен жаннатда олмалар қоқдим,  
Она, мен дўзахда симиридим шароб.

Ёлғиз қүшдек гоҳо күкка учдим шан,  
Оттилар, тегмади камон ҳам, тош ҳам,  
Она, ойнинг юзи тирналган экан,  
Она, йиғлар экан ҳатто, қуёш ҳам...

Үйламанг, ўғлингиз ўша-ўша шўх,  
Юзим тўла сўқмоқ ўттиз ёшимда.  
Отамнинг сочида битта оқи йўқ,  
Ўриклар гуллади менинг бошимда.

Кўришмадик, холос, бизлар минг аср,  
Келдим, пойингизда чўқдим мана тиз,  
Уй орзу қилсангиз — қурамиз қаср,  
Тўй орзу қилсангиз — изим тўла қиз.

Фақат майдан сархуш бу ўрик бошим,  
Тувакдан тупроққа тушган гулдайман!..  
Манов, булбулчаси очиқ бола ким,  
Укамнинг ўғлими?  
Исмин билмайман...

Тошқўчангга сочдим, эй ёруғ олам,  
Мана, ниҳоясиз муҳаббатимни.  
Тун бўйи ўзимга йиғлади онам,  
Не қилиб қўйдинг деб... Муҳаммадимни.

## ТЕРМА

Ёмон кўз тош ёрат дер,  
Ёмон дўст бош ёрат дер.  
Ёмон эркак тўй бузар,  
Ёмон кўз уй бузар дер,  
Ёмон бўлса йўлдошинг

Бор баҳтинг ҳам түзар дер.

Ёмон боққа гул бўлма,  
Саҳрода бўл юлғунча.  
Ёмон билан юргунча —  
Ёлғиз яша ўлгунча!..

Билдингки, бевафодир,  
Кўнгил қўймоқ хатодир,  
Қўл ўпид, қўйнингни  
Нимта-нимта этодир,  
Бир иш тушса бошингга  
Боқмай ташлаб кетодир.

Қайғургунча қайғургин,  
Қайрилмасга қайрилма.  
Вафосизга берилиб,  
Вафолидан айрилма!..

Бир кўнгил иморати,  
Минг Макка зиёрати.  
Бор бўлсин ҳар кўнгилнинг  
Кўнгилга ибодати.

Қаср қурма, Мұхаммад,  
Ортингда бир из қолдир.  
Олтин сочиб орттирган  
Обрўйинг бир мисқолдир,  
Дунё йифиб нетарсан,  
Бир кун ташлаб кетарсан!..

## ОТАБЕК ҚЎШИФИ

Сен Ширину мен ҳам Фарҳод әмасман,  
Сен аччиғу мен ҳам наввот әмасман.  
Зайнаб, Зайнаб, менга айтма зорингни,  
Сен дилхуну мен ҳам дилшод әмасман...

Бошга неки тушса кўқдан атомиш,  
Биз бир қафас аро гирён бир жуфт қуш.  
Бир гўшада сен хомушсан, мен хомуш —  
Сен вайрону мен ҳам обод әмасман.

Биз бир динда муридлар икки пирга,  
Йўлатмасман сени мен билган сирга,  
Биз на дўстмиз, биз на ғаним бир-бирга,  
Сен жайрону мен ҳам сайёд әмасман.

Сенга қўйсин суймаганни суйиши,  
Шундай яшаш айтгил, кўнглингга хушми?  
Сени қучиб, соғинаман Кумушни;  
Жон омону ўзим ҳаёт әмасман.

Эй гул, суйиб не топдинг мен ёмондан,  
Бекман, сенга ёр тилайман султондан,  
Кўз узмасман мен Марғилон томондан,  
Сенга кет ҳам, сенга қол ҳам демасман...

Сен Ширину мен ҳам Фарҳод әмасман,  
Сен аччиғу мен ҳам наввот әмасман,  
Зайнаб, Зайнаб, менга айтма зорингни,  
Сен вайрону мен ҳам обод әмасман!

## ТИЛЛАҚЎНФИЗ

Тўхта, тиллақўнғиз,

У ёққа борма.  
Ариқдан ўтдингми — у ёғи ғўза.  
Тонг олди бошлаган ишингдан қолма,  
Ялпизнинг лабидан сўрабер бўса.

Тўхта тиллақўнғиз,  
У ёққа борма,  
Этик пошнасида эзилар жонинг,  
Инсон банд, у сизнинг саломга зорми?  
Ўртоқ қумурсқалар, менга ишонинг...

Кетди. У гапимга қулоқ солмади,  
Рўзгор ташвиши ми ё бошқа ўйда.  
Жониворларда ҳам тоқат қолмади,  
Бир кунгина тинчиб ўтирумас уйда.

Тиллақўнғиз балки... сирин айтгали,  
Келгандир қошимга қанча йўл босиб.  
Ўтмишни унутмоқ кимга муносиб?..  
Қасос қилич қайрар саҳардир-шомдир,  
Тўхта туғишганим, у ёққа борма!

## МЕҲМОН

Сувлар энди тиник тортган пайт,  
Куз. Одамлар пахта теряпти.  
Ногоҳ хабар тарқалди: диққат,  
Марҳаматта мәҳмон келяпти!..

Келди. Кўрдик. Ана салобат.  
(Билишган-да, «диққат» деганлар).  
Деҳқон юртга ёғилди шеър, байт —  
Мәҳмонимиз шоир эканлар.

Далаларни айландик бир кун,  
Бир кун чиқдик от миниб қирга.  
Бизлар унинг кўнглини овладик,  
У мавзулар қидирди шеърга.

Кетар чоғда аммо хафадек,  
Мени имлаб бармоғи билан,  
Шивирлади қулоққа секин:  
Марҳаматда ҳайкал йўқ экан...

Меҳмон кетди. Айтольмай қолдим,  
Мен бир жавоб тополмай қолдим.  
Куз. Одамлар пахта теряпти,  
На уйимга қайтолмай қолдим.

Қайтсам: тилинг йўқми, деб сўрар,  
Қайтсам: қўзинг йўқми, деб сўрар.  
Айтар сўзинг йўқми, деб сўрар.  
Жазира маҳалла пайкали...

Марҳаматликларнинг ҳайкали.

*Марҳаматлик дехҳон йигит — Қодирни ғўза энди ҳосилга кирган  
маҳал машина уриб кетди. У ҳушига келганида иккитағина  
қовурғаси соғ қолган эди...*

\* \* \*

Қодир,  
Қандай экан яшамоқ баҳти?  
Гоҳ уриб, гоҳ тиниб турганда юрак  
Ўзи билдиримаса меҳрибон доктор,

Күзи айтиб турса: ўлсангиз керак...

Үзіча сиғинар юртига ҳар ким,  
Бирор уруғ сочар, бирор уй тиклар.  
Юмуш билан бўлиб, сен ўлсанг балки  
Билмай ҳам қоларди марҳаматликлар.

Эшитдим. Жонимни авайлаб мен ҳам,  
Қайдадир юрадим лолалар териб,  
Кўздан дув ёш келди гулга энгашсам,  
Оғрийверди саншиб манови ерим...

Үзіча сиғинар юртига ҳар ким,  
Сочлари жингалақ, юзлари силлиқ.  
Учар оғайнилар мансаб илинжида  
Креслоларга қилишар қуллуқ.

Севги изҳор қилар таннозларига,  
Суратга тушади бўйдор, баҳодир.  
Лекин мен биламан, агар кўрсатмасин,  
Бир мушкулот тушса юртим бошига,  
Кўкракни тутмоққа афёр тошига  
Майиб дўст, мажруҳ дўст — ўзингсан, Қодир!  
Ҳаммасини билиб яшамоқ оғир,  
Субҳи содиқ кўриб дўст юзида ранж,  
Кўлингдан ҳеч нарса келмай шеър ёзмоқ —  
Онангни алдашдек осон ва жирканч.

\* \* \*

Кўл ушлашиб турган шаддод қизлардек  
Қошда ўсма, қулогида зираклар,  
Туюлади менга қишлоққа борсам,

Таниш йўллар бўйидаги тераклар.

Бу йигит ким?.. Ниқташади бир-бирин,  
Сергакланиб, соchlарини турмаклаб,  
Таниб секин уҳ тортади биттаси,  
Қиқир-қиқир кулар бири эрмаклаб...

## ИНСОН

Юлдузларни ютиб юборди бу тун,  
Ютдию унутиб юборди бу тун.  
Шундай тунда агар йиғлагинг келса,  
Сен одам экансан, одам экансан.

Чақалоқ туғилди — сочи қоп-қора,  
Кўзини очмасдан жилмайди, қара.  
Шундай кунда агар куйлагинг келса,  
Сен одам экансан, одам экансан.

Мен таскин изладим куйган жонимга,  
Сўйдим, балоларга қолдим, ёнимга  
Келиб секин ҳолим сўрагинг келса,  
Сен одам экансан, одам экансан.

Танҳо билмаса ҳам, билса ҳам Ватан,  
Йиғласа ҳам Ватан, кулса ҳам Ватан,  
Унга жонни тикмоқ тилагинг бўлса,  
Сен одам экансан, одам экансан.

Қаҳр бу — адоват, араз ўткинчи,  
Қуёш кўтарилиб, қуёш ботгунча,  
Керакмасларга ҳам керагинг бўлса,  
Сен одам экансан, одам экансан.

## МАШХУР ЎҒИЛ

Насиҳатга күнмади ўғил,  
Ота хуноб. Кампири ҳайрон.  
Пишқиради, олис йўлга шай  
Бостирманинг остида жийрон.

Жилов тутган қўллар қалтирас,  
Кўзларида энди чол сўзи:  
— Ўқишингга бу йил бормасанг,  
Келаси йил борардинг, қўзим...

Қайсар ўғил от устида шод:  
— Одам ўқиб танийди эсин.  
Сурув билан нима ишим бор,  
Менга деса қашқирлар есин...

Кетди. Ортда қолди дала, қир,  
Қора қўргон қир устидаги.  
Йигитчанинг шаҳарда машхур  
Шоир бўлмоқ эди тилаги...

Йиллар ўтди. Мункиллаб ҳамон  
Кўй боқади қирда чол тушгур.  
Ҳа, дарвоқе, ўғли бор эди —  
Ўғли бугун шаҳарда машхур.

## ЧЎЛОҚ ТУРНА

*Низом акага*

Бир оёқда чопиб келдинг  
Чўлоқ турна.  
Уйим қайдан топиб келдинг,  
Чўлоқ турна?

Ўзи қон бу дилни энди  
Сен ҳам тирна,  
Қай ёвузга нишон бўлдинг  
Чўлоқ турна?..

Келдингми, кир, оstonада  
Чўчиб турма.  
Бор экан-да, пешонада,  
Чўлоқ турна.

Бегонамас бу кўргилик,  
Бошга тушган.  
Менинг ҳам қоқ юрагимга  
Тош отишган.

Биз тилмочсиз бир-биrimiz  
Тушунгаймиз,  
Шароб ичмай ака-ука  
Тутингаймиз!

## ТИЛЛА БАЛДОҚ

Суюкли ёр, қулоғингда  
Тилла балдоқ.  
Мен яшарман юрагингда,  
Тилла балдоқ.

Унутолмай ўртанасан,

Тилла балдоқ,  
Юрган йўлу йўлагингда,  
Тилла балдоқ.

Йиғлайди зор  
Сен йиғлайсан  
Тилла балдоқ.  
Қўлим изи билагингда,  
Тилла балдоқ...

Ёринг бошқа, ёринг бўлақ,  
Тилла балдоқ.  
Мен бошқанг, мен бўлагинг-да,  
Тилла балдоқ!

## БИРИНЧИ БЎСА

Бошқага уйланди йигити тушгур..  
Тақдир экан, деб қўяди қўрса.  
Қиз йиғлайди,  
Қиз излайди,  
Қиз дилгир,  
Ундан кўнгил узолмайди қиз эса,  
Биринчи бўса, биринчи бўса...

Кўниласан, дейди унга одамлар,  
Унугасан, дейди унга одамлар.  
Кошки, кўнишиб бўлса,  
Кошки, унутиб бўлса,  
Биринчи бўса, биринчи бўса!

## ШИРИН АЗОБИМ — СЕВГИ

(Түркүмдан)

Эй гул,  
Сени унудим,  
Узіб кетди бошқалар.  
Мана, энди илк севгим  
Юрагимга тош қалар...

О, бу тошлар бир оғир,  
Хар қирраси қизил чүф,  
Оғрийди, жоним оғрир,  
Бу оғриққа даво йўқ...

Фунча әдинг,  
Гул әдинг,  
Очилмасдан сўлдинг-ку,  
Бахтим әдинг бор умрим  
Етмас азоб бўлдинг-ку!

Унутмоқ ҳам шунчами,  
Дунё тўлди бўғзимга.  
Ёниб турган кунчалик  
Ботиб қолдинг кўзимга...

Эй гул, сендан кечдиму  
Унотолмай бағрим қон.  
Хаёлингдан ўчдиму  
Хаёлимда сен ҳамон.

Узіб кетди бошқалар,  
Юлиб кетди бошқалар.  
Мана энди бир армон  
Юрагимга тош қалар.

О, бу армон кўп оғир,  
Ҳар қирраси қизил чўғ.  
Оғрийди, жоним оғрир,  
Бу оғриққа даво йўқ...

2

Бир кун кўриб танидим,  
Тош йўлдаги изингни.  
Пешвоз чиққан мен эдим,  
Кетдинг буриб юзингни.

Салом севгим — азобим!  
Боқ, бевафо ёрингга.  
Шукур қилдим орtingдан  
Бу дунёда борингга.

Кетдинг хаёл сингари,  
Қадамингдан чақнаб чўғ.  
Бахтли аёл сингари  
Бебаҳт билан ишинг йўқ.

Яна тўсди йўлимни,  
Яна тўсди илк севгим.  
Музлаб қолган қўлимни  
Юрагимга босди жим.

Бўлди юрак, йиғлама,  
Йиғлагандан не фойда?  
Ҳижрон йўли музлама,  
Тоймоқ осон бу жойда.

Тойдинг — кетдинг,

Кетганни  
Софинмоқ йўқ севгида.  
Биз бой бердик имконни,  
Қоқинмоқ йўқ севгида.

Қара, қизил гулхандай  
Офтоб боқар уфқда.  
Яна бир кун қийналмай  
Айланмоқда қўшиққа.

Ўтмишга айланмоқда,  
Айланмоқда ўтмишга...  
Дил қушга айланмоқда —  
Дил яна соқов қушга!

## ЮРАК

Юрак, ёмон экансан,  
Қип-қизил қон экансан.  
Кун йўқ экан менга ҳеч,  
Сенки омон экансан...

Қиз суйдинг — бўлди армон,  
Этакка тўлди армон.  
Бўлди, сени кўксимдан  
Юлиб ўтга отарман.

Дўст тутиндинг — ёв чиқди,  
Елкамга найза суқди.  
Сенинг билан сифиниб  
Юрган йўлда ғов чиқди.

Ана, севгим — учган ўқ,

Муздек тошни қучган ўқ.  
Қиз сүйдинг — бўлди армон,  
Кўриш бору айтиш йўқ.

Бўлди, сени кўксимдан  
Юлиб сувга отарман.  
Соҳилларда қум билан  
Кучоқлашиб ётарман...

Юрак, ёмон экансан,  
Қип-қизил қон экансан.  
Кун йўқ экан менга ҳеч  
Сенки омон экансан...

## ТАВАЛЛО

Оқ йўргакка ўрагансан ўзинг бизни,  
Ҳам оқ ювиб-тарагансан ўзинг бизни.  
Бешигимиз узра бедор она бўлиб,  
Кунимизга ярагансан ўзинг бизни.  
Фидойинг бўлгаймиз сени, Ўзбекистон,  
Ҳеч кимга бермаймиз сени, Ўзбекистон!..

Қалқонинг бор, ким қасд қилса гар жонингга,  
Алпомишлар руҳи ёр ҳар ўғлонингга.  
Асрагаймиз гиёҳинг ҳам гулдай ўпиб,  
Ёвлар яқин йўлолмагай қўрғонингга.  
Адойинг бўлгаймиз сени, Узбекистон,  
Ҳеч кимга бермаймиз сени, Ўзбекистон.

Тузинг тотиб, унуганлар хор бўлади,  
Кўзларига икки дунё тор бўлади.  
Шодон даминг кўролмаган юртфурушлар,

Бир кун бир кафт қумлоғингга зор бўлади.  
Ёнингда тургаймиз сени, Ўзбекистон,  
Ҳеч кимга бермаймиз сени, Ўзбекистон!..

Гул кўринган даштингдаги гиёҳ-хасдир,  
Соддадилу улуғворлик сенга хосдир.  
Севамизки, чўлларинг ҳам бизга жаннат,  
Тупроғинг ҳам Макка мисол муқаддасдир.  
Онадек кўргаймиз сени, Ўзбекистон,  
Ҳеч кимга бермаймиз сени, Ўзбекистон!

## БИР КУНИ

Бир куни,  
Бир алвон  
Замон келади,  
Замин узра  
Омон-омон бўлади.

Ўн йилми,  
Юз йилми ўтиб орадан,  
Урушлар,  
Низолар кетиб орадан,  
Тўплар  
Адиrlарда буғдой ўради,  
Танклар  
Далаларда пахта теради.

Миллатлар,  
Элатлар  
Оқ тан, қора тан  
Ҳаммаси  
Ҳазрати инсон бўлади...

Олам гулистон бўлади...

Бир куни...

Шоирлар-чи, бобо,  
Шоирлар нима бўлади?  
Шоирларнинг шодлиқдан  
Юраклари ёрилиб ўлади!

## ТИЛАК

Ҳар кимнинг ҳам соchlарига оқ тушсин,  
Ажин тушсин юзларига, доғ тушсин.  
Ҳар кимнинг ҳам қувват кетиб белидан,  
Қўлларига асо — бир таёқ тушсин.

Имони соф, юзга кириб ёруғ юз,  
Тўйлар қўриб елкасидан тоғ тушсин.  
Жисмига сўнгги сафар олдиdan  
Ўз боласин қўлидан тупроқ тушсин...

## БОР БЎЛСИН

Қиз бор уйнинг файзи бўлак дейдилар.  
Жаннат йўли — қиз бор йўлак дейдилар.  
Ўнгиrimда ўғлим йўқ деб ўксиманг,  
Тоғ бўлмаса қир ҳам тиргак дейдилар.

Элнинг баҳти ботирларга ёр бўлсин.  
Оминалар, Холидалар бор бўлсин!..  
Қиз йўқ юртга кўкламлар сеп тўшарми?  
Келини йўқ тўйлар тўйга ўхшарми?

Қиз борки, ўлка омон, қүрғон бут,  
Қиз кутмаса йигит олов кечарми?  
Жонлар илҳақ, илинжлар тумор бўлсин.  
Маъсудалар, Маҳзуналар бор бўлсин.

Қизи йўқнинг ойсиз хомуш осмони,  
Қизи борнинг қасрдир хонадони.  
Шу мунглиғу шу муштипар парвонанг,  
Йигит йўлнинг, қиз —кўнгилнинг султони.

Ота уйда ҳар куни баҳор бўлсин,  
Мавлудалар, Маъсумалар бор бўлсин!  
Эй Мұхаммад, олти оға-ининг бор,  
Бирда яхши, бирда ёмон қунинг бор.

Бир кун бошинг ботар бўлса болишга,  
Қизларингдан яқин яна киминг бор?!  
Совчилари эшигида зор бўлсин —  
Нозималар, Мадиналар бор бўлсин.

\* \* \*

Юзга ажин тушди,  
Сочга қирров инди.  
Болаликда қолиб кетди шўх,  
Қолиб кетди қанча яхши қунларим,  
Орқага қараш йўқ...

Қилган хатоларим ўзимга аён.  
Хотира — изимдан тушган дайди ўқ.  
Мен кимни унудим,  
Кимлар мендан тонди...  
Орқага қараш йўқ.

Сүнди қанча яхши тилаклар.  
Сүнди ҳайрат — юракдаги чўғ.  
Кетдик қалбим,  
Кетдик қадрим... кетдик,  
Орқага қараш йўқ.  
Анов ким деб сўраш йўқ.

## ЯЛПИЗ

Ўзим жаннатда-ю, дўзахда кўнглим,  
Ялпизжон, сен ўсган ўтлоқда кўнглим.  
Сен жилға бўйида сарғайган синглим,  
Мен уммонда сенга муштоқ оғангман.

Кўзимдан ёш оқар юзингдан ўпсам,  
Қанийди бир умр пойингда чўксам,  
Дилингга дилимни дардини тўксам —  
Водийсидан ажраб қолган воҳангман.

Мен шоир эмас, мен назмбоз косиб,  
Шеърим шуҳратимга эмас муносиб.  
Бир лутф туфайли минг ғафлат босиб,  
Ариғига сиғмай қолган наҳангман.

Осмонин туси йўқ бу тахтни нетгум,  
Райхонин иси йўқ бу баҳтни нетгум,  
Бош олиб ёнингга келади кетгум,  
Далангдан оламга бир садақангман!..

Эй оқ кўнглим менинг, эй кўк кўйлагим  
Бўйингга бўйимни келар тенглагим,  
Куйласам фақат сен сабаб куйладим,

Япрогингдан ерга томган оҳангман.

## ЭРТАК

Эртагим чўзилди, менинг эртагим...  
Эртага энди бу дунёдан ўтсам,  
Ҳаёт, азизим, сен хафа қилмагин,  
Менинг ширингина қизларимни ҳам.

Кўнглимдан тўкилган қуйлар нимадир,  
Алвон қўшиқларим учар изимдан.  
Ёзган китобларим — қоғоз кемадир,  
Мен кетсам, улар ҳам кўчар изимдан.

Кулга кўмдим олтин фурсатларимни,  
Энди бир кун фақат дадил ва ўктаам  
Шоирчалар қилса ғийбатларимни,  
Балки, бирон кимса эслар мени ҳам.

Эсламаса нима, мен бир тўпори,  
Қишлоқи сўзбозни, осмон йиқилмас.  
Уриб турган қалбнинг тириқдир зори,  
Тўхтаганидан сўнг юрак сиқилмас...

Мен сенинг борингга бўлдим парвона,  
Саҳроларинг кезиб толди товоним.  
Кипригим олдида турибди, мана,  
Товусдай товланиб охир довоним.

Эртагим чўзилди, менинг эртагим,  
Тонгни кўролмасдан дунёдан ўтсам,  
Ҳаёт, ёлғизим сен хафа қилмагин,  
Менинг ширингина қизларимни ҳам!

## УЗР

Биз баҳорга ошиқ бүлдик, куздан узр,  
Хазонларда қолиб кетган қиздан узр,  
Ҳар не ўтса биздан ўтди, бизда гуноҳ,  
Туғилмаган қўшиқларим, сиздан узр...

Соғинчларга сингил бўлди суюкли ёр,  
Мен меровда на меҳр бор, на кўнгил бор,  
Озроқ илҳом, кўпроқ шароб қилди хумор...  
Туғилмаган қўшиқларим, сиздан узр.

Тилимдан бол томди боқиб оламга гоҳ,  
Бир ширин сўз айтолмадим боламга гоҳ,  
Йиллаб бармоқ босолмадим қаламга гоҳ,  
Туғилмаган қўшиқларим, сиздан узр.

Йўлим қараб жайрон кўзи толиб кетган,  
Гоҳ далада дайди шамол олиб кетган,  
Гоҳ андиша айвонида қолиб кетган,  
Туғилмаган қўшиқларим, сиздан узр.

Дили борга дилдан дардим тўкканим рост,  
Сўз бошида бош эгиб тиз чўкканим рост.  
Гоҳи жонни авайлаган — қўрққаним рост,  
Туғилмаган қўшиқларим, сиздан узр...

Ўксимасин зардоб тўла қўнгилчангиз,  
Дарё-дарё кўз ёшим бор чўмилсангиз,  
Мен ҳам машхур бўлармидим, туғилсангиз,  
Туғилмаган қўшиқларим, сиздан узр...

Юрагимнинг тагидасиз ялпиздан пас,  
Гоҳ ўйлайман — шундоқ қўлим узатсан бас!  
Юзингиз бир кўрмай сира ўлгим келмас...  
Туғилмаган қўшиқларим, сиздан узр.

## МАШРАБ ХИРГОЙИСИ

Донишни қийнаб тўймаган,  
Холи-жонига қўймаган,  
Нодон билан қулиб ўйнаган,  
Пихини ёрган дунёсан.

Ўғрини сийлаб овлоқда,  
Ошини мақтаб товоқда,  
Тўғрини қийнаб сиртмоқда  
Лойларга қорган дунёсан.

Ўтга бостириб далани,  
Сувга чўктириб қалъани,  
Отадан олдин болани  
Жонини олган дунёсан.

Улуғин хўрлар сенмасми —  
Тўрга ўтқазиб нокасни,  
От ўрнига йўлбарсни  
Қўшига солган дунёсан.

Ким ҳам ишонар нозингга,  
Баҳоринг ўхшар ёзингга.  
Куйларинг тушмас созингга —  
Қўшиғи ёлғон дунёсан!..

Оқ рўмол ўраб отиндай,

Товланма менга олтиндай.  
Бола күрмаган хотиндай —  
Алласи ёлғон дунёсан!

## МАДИНА

Мадина, Мадина, нега йиғлайсан,  
Менинг асал қизим, қачон ухлайсан?  
Иситманг тушмади, тополмадим дори,  
Тинмади чақалоқ жонингнинг зори,  
Ярашмас яшамоқ нокасга ёлвориб,  
Чида, ёруғ тонгни кутамиз, қизим,  
Биз ҳали ҳаммадан ўтамиз, қизим...

Сен йиғлоқ туғилдинг, мен ёзолмадим,  
Ёзган шеъримни ҳам ўтказолмадим,  
Аммо ишон ахир, булбул юрагим,  
Мен уни бекорга ўтга солмадим,  
Бу ёруғ дунёда менинг қолар изим,  
Биз ҳали ҳаммадан ўтамиз, қизим...

Иккала қўлимда сенинг бешигинг,  
Кўнглимда кўзингдек шаффоф қўшифинг.  
Тунларимга наво қайтар куним бор,  
Сенга ардоқ сўзим айтар куним бор,  
Қалбимни шудгордек ҳайдар куним бор.  
Йиғлаб ёздирмасанг айланай ўзим,  
Биз ҳали ҳаммадан ўтамиз, қизим.

Шоир шундай кўпки, уларга ер тор,  
Ҳаммаси машҳур ва ҳаммаси номдор,  
Улуғвор, уларга етмоқ кўп душвор,  
Аммо улар ойга босиб юзини

Турганда осмонин бағрига илк бор  
Биз олиб боргаймиз тупроқ исини,  
Гулдай димоғига тутамиз, қизим,  
Биз ҳали ҳаммадан ўтамиз, қизим!..

Биз ҳали ҳаммадан ўтамиз, қизим,  
Йиғлаб ёздирмасанг айланай ўзим.

## ИЙМОН ҚҰШИФИ

Умрнинг ҳар куни байраммас, тўймас,  
Ўчар оқшоми бор олдинда чироқ.  
Кўйлагингга қараб жаннатга қўймас,  
Ажрим бўлар бир кун савобу гуноҳ,  
Чўян дошқозонга шайтон ўт қалар,  
Қутқарса бир куни иймон қутқарар...

Номинг тутган тузинг тотмай кетмасин,  
Уйингда ҳар куни ёстиқ етмасин.  
Тўртта майизингни куш ҳам еб кетар,  
Уйинг четлаб одам зоти ўтмасин.  
Берк сароймас — очиқ айвон қутқарар,  
Мезбонни бир куни меҳмон қутқарар...

Хор қилиб ўйнама ҳар кимса бошин;  
Йигит ғарибию қизнинг ювошин.  
Кўшкингни кўз-кўзлаб, зарингдан сўзлаб,  
Мустарин кўзидан оқизма ёшин.  
Кимда — кетар ҳусн, ким хуш бўй тарар,  
Лолани хокисоррайхон қутқарар.

Ботинда бошқаю зоҳир бўлаксан,  
Аввал бошқа эдинг, охир бўлаксан.

Күнгил күчасида, күнгил күйида,  
Келган изга қайтиб борар йүлаксан.  
Бунда ҳар ким ўзи қул — жон кутқарап,  
На шоҳ, на ҳакими Луқмон қутқарап.

## МЕНИНГ ЭРТАГИМСАН

Менинг шодлигимсан, болалигимсан,  
Менинг ғуссам ўзинг, менинг армоним.  
Сени осмонимга олиб кетаман,  
Ерда бизга кун йўқ, кун йўқдир, жоним!..

Хато қилдиммикан мен эрта келиб,  
Ё сен адашдингми келиб кейинми?  
Гоҳо кимлигинг ҳам бўлмайди билиб,  
Иним дейми сени, севгилим дейми?

Кет, деб ҳайдолмасам нетаман,  
Кел, деб айтольмасам нетаман.  
Сени осмонимга олиб кетаман,  
Сени осмонимга олиб кетаман...

Ўйламай дейману ўйламай бўлмас,  
Ўтсанг сен томон бир бўйламай бўлмас.  
Сен менинг ҳаммадан яширган сирим,  
Менинг эртагимсан, сўйламай бўлмас.

Кет, деб ҳайдолмасам нетаман,  
Кел, деб айтольмасам нетаман.  
Сени осмонимга олиб кетаман,  
Сени осмонимга олиб кетаман!..

\* \* \*

Севгим менинг, мен билмадим, менинг севгим,  
Кўзинг шаҳломиди сенинг, хумормиди?  
Эртакдаги Лайли сендай дилдормиди,  
Ай, юзингни бир кўрмадим, менинг севгим.

Гоҳ гул бўлиб яшнади дил, гоҳ сўлди гул,  
Гоҳ иғлатиб, гоҳ ўзи қон бўлди дил.  
Томоғимда чирқираган жон бўлди дил,  
Ай, юзингни бир кўрмадим, менинг севгим.

Сени фақат олислардан аллаладим,  
Эркаласам хаёлимда эркаладим.  
Сочларингни тушларимда сийпаладим,  
Ай, юзингни бир кўрмадим, менинг севгим.

Сен қуш бўлиб учдинг-кетдинг, тутолмадим,  
Оҳу бўлиб қочдинг, кувиб етолмадим.  
Бир бор кўриб бир ширин сўз айтольмадим,  
Ай, юзингни бир кўрмадим, менинг севгим.

Соч оқарди юракдаги шу бир чўғ деб,  
Армондаги, тилакдаги шу бир чўғ деб,  
Йигит умрим зорланади севги йўқ деб,  
Ай, юзингни бир кўрмадим, менинг севгим.

Ана, ажал остонамда тураг бўйлаб,  
Фаришталар чорлар мени ўлан сўйлаб,  
Жаннатларда зерикарман сени ўйлаб,  
Ай, юзингни бир кўрмадим, менинг севгим.

## ЎЗБЕК

Сен пахта терардинг етти букилиб,  
Пайкалингда эдинг, эй онажоним.  
Ўзбекмисиз, дея ғалати кулиб,  
Мендан сўраб қолди бир танноз хоним.

Таннозлар билан не ишим бор.  
Ёраб,  
Аммо тушундим бу ишорасига.  
Қаршимда туарди у эрмакталаб,  
Малика боққандек фуқаросига...

Мана, газеталар чиқди қўйнидан,  
Ҳаммаси ўзича қилади талқин.  
Тиллолар топилган эмиш уйингдан,  
Олтинга кўимилиб қолибсан, халқим.

Сен нега Қримга бормайсан ёзда,  
Ёки сен отангнинг ўгай ўғлисан?!  
Сўкса индамайсан, кўими-тўқлисан,  
Урса йиғламайсан, демак — ўғрисан!

Саҳардан шомгача мўлтираб, кўзинг  
Кўрмай қолгунича чопдинг далангни.  
Ўғирлик қилмасанг, айт ахир ўзинг,  
Қандай боқаяпсан шунча болангни.

Хоним нигоҳидан уққанларим бу,  
Кўнглимдан кечганин билиб туради.  
Ясама юзида ясама қайғу,  
Ўзбекмисан, дея кулиб туради...

Бир боплай дедиму тилимни тийдим,  
Майли, одам қуриб шунга сўз дейми.

Ўзбекни ер танир,  
Осмон танийди.  
Таннозлар қаёқдан билсин ўзбекни!

## МАРСИЯ

Фарзанд доғи куйдиради куйган сари,  
Дийдалари кўз ўнгидан кетмас нари.  
Оназорин тилаб олган болалари,  
Афғон қирларида қолган баҳодирлар.

Алвон-алвон гуллар ёғар адирларга,  
Қўл етмайди сизлар ётган қабрларга.  
Олис юртда йўлдош бўлиб Бобурларга,  
Афғон қирларида қолган баҳодирлар.

Жалолиддин қони жўшди қонингизда  
Умид қилиб узилмаган жонингиздан.  
Навоийдек зотлар ётар ёнингизда,  
Афғон қирларида қолган баҳодирлар.

Йигит бўлиб яйрабгина юрмай кетган,  
Бир қиз кокилларин кўзга сурмай кетган.  
Туғилган боласин бўйин кўрмай кетган  
Афғон қирларида қолган баҳодирлар.

Кимга керак бўлди, кимга керак бўлди;  
Сиз ўлдингиз кимнинг бўйи терак бўлди.  
Бу дунёда ўлим ҳам бир эрмак бўлди,  
Афғон қирларида қолган баҳодирлар!..

Мен бағримдан шаънингизга шеър тиладим,  
Дунё мендан, мен дунёдан ўпкаладим.

Туғишигандан азиз менинг укаларим,  
Ағфон қирларида қолган баҳодирлар.

Фарзанд доғи күйдиради қуйған сари,  
Дийдалари күз ўнгидан кетмай нари.  
Оназорин тилаб олған болалари,  
Ағфон қирларида қолган баҳодирлар.

## ОНАИЗОР

Күнглим қолса булбулдан ҳам гулдан ҳам,  
Қолар бўлсам бир кун ахир тилдан ҳам...  
Агар бир зот йиғласа чин дилдан ҳам —  
Онам йиғлар, онам йиғлар, онам у...

Сиғмай қолсам шундай кенг бу жаҳона,  
Осмонларга руҳим бўлса равона,  
Жонсиз таним устида ҳам парвона —  
Онам йиғлар, онам йиғлар, онам у...

Тонар бўлса қўлимдаги тор, дунё,  
Уч кун ўтмай унугтай дўст-ёр, дунё.  
Еру кўкни титратиб зор-зор, дунё —  
Онам йиғлар, онам йиғлар, онам у...

Гулдай кулиб юрмасмиди ўғлим деб,  
Кўриб кўнглим тўлмасмиди, ўғлим деб,  
Онанг ўлса бўлмасмиди ўғлим, деб  
Онам йиғлар, онам йиғлар, онам у...

Кўнглим қолса булбулдан ҳам гулдан ҳам,  
Қолар бўлсам бир кун ахир тилдан ҳам.  
Агар бир зот йиғласа чин дилдан ҳам —

Онам йиғлар, онам йиғлар, онам у...

\* \* \*

Тойчоқ бўлиб қолсам эдим, тойчоқ бўлиб  
Қорасоч бир қиз қулунга ўртоқ бўлиб.  
Қувалашиб юрмасмидим дала-даштда,  
Бу дунёда нима кўрдим сени севиб.

У ҳам мени севар эди менга ўхшаб,  
Кутар эди гўшангада ўтлар тўшаб.  
От бўлса ҳам тушунарди мени ўша,  
Бу дунёда нима кўрдим сени севиб.

Майли эди арғамчида бойлансак ҳам,  
Тупроқларга ағанашиб қийналсак ҳам.  
Биз бир умр бир қозиқда айлансак ҳам,  
Бу дунёда нима кўрдим сени севиб.

Отдай ҳамдам бўлар эди жонимга у,  
Қиздай малҳам бўлар эди жонимга у.  
Бир кишинасам келар эди ёнимга у,  
Бу дунёда нима кўрдим сени севиб.

Хаёлимнинг даштларида уюр-уюр,  
Қулунчалар чопиб юрар, мени суюр...  
Яна қандай азобинг бор, жоним, буюр,  
Бу дунёда нима кўрдим сени севиб.

Тойчоқ бўлиб қолсам эди, тойчоқ бўлиб,  
Қорасоч бир қиз қулунга ўртоқ бўлиб,  
Қувалашиб юрмасмидим дала-даштда,  
Бу дунёда нима кўрдим сени севиб.

## КҮНГЛИМДАГИ ЁР

Мұхаббат боғига кирмадим бир бор,  
Сүйіб бир гулга құл урмадим бир бор.  
Энди тунлар йиғлар менга қүшилиб,  
Күнглимда бир ёру қўйнимда бир ёр.

Бири бирисига ўхшамас, ёраб,  
Кўзимнинг ёшлари тўхтамас, ёраб.  
Куярман бир унга бир мунга қараб...  
Кўнглимда бир ёру қўйнимда бир ёр.

Бирин эркалайман дудоғим билан,  
Бирисин эркалаб нигоҳим билан  
Яшарман савобу гуноҳим билан —  
Кўнглимда бир ёру қўйнимда бир ёр.

Бирин хур дейинми, бири гулойим,  
Суймаганим суйганимдан мулойим.  
Бу қандай кўргилик экан, Худойим,  
Кўнглимда бир ёру қўйнимда бир ёр.

Дарёман иккита қирғоқда қўзим,  
Товонимда бўзим, томоқда бўзим.  
Икки ўт ичида қийнокда ўзим,  
Кўнглимда бир ёру қўйнимда бир ёр.

\*\*\*

Биз барҳаёт сиймо деган ўша ўлмас  
Алишернинг авлодлари — алла билмас.

Учди Чамбил қўлларидан сўнгги ўрдак,  
Алпомишлар ётган бешик энди эртак.

Ўз боласи Улуғбекка қилич солди,  
Шоҳ боласи бўлиб бир кўк юлдуз қолди.  
Чақмоқ бўлиб келди Бобур, кетди Бобур,  
Ўзбек энди ўз уйида ҳам мусофир.

Бир боши ҳеч қовушмагач, ҳатто Машраб  
Девона ҳам ўз юртини кетди ташлаб.  
Топинг қани Кўқонида суратини,  
Ўзбек қувди, уйғур кўмди Фурқатини.

Фурқат уйғур деганим йўқ, берайнин шарҳ —  
Ўз боласин ўзи кўмсин дейман ҳар халқ.  
Ўтганларни ўйлаб дилда дарди пинҳон,  
Ойбек ўтди,Faфур Ғулом, Шукур Бурҳон.

Бу дунёда ҳар кимса ўз ризқин терсин,  
Элим, сенга инсоф берсин, инсоф берсин.  
Кўй, ийғлатма айтиб эски ашулангни,  
Ҳеч бўлмаса асра энди Абдуллангни!

## ЭСКИ АСРГА

Элак ушлаб турган Аср,  
Эй узун кўйлак.  
Олиминг кўп, аммо Ҳабиб  
Абдулланг бўлак.

Гарчи созинг битта, айтар  
Каломинг битта,  
Шоиринг кўп, аммо Ғофур

Ғуломинг битта.

Яна қанча айланару  
Еру осмонинг.  
Худо билсин қачон келар  
Шукур Бурҳонинг.

Дарвозангни ёпмай туриб,  
Сен бизга қараб,  
Айт: буюгин улуғлаган  
Миллатга шараф.

Сен айтмасанг биз уларнинг  
Қадрин билмаймиз,  
Бир амаллаб ўлдирволиб,  
Кейин йиғлаймиз.

## ҮЗИНГДАН ҚҰЙМАСИН, ХАЛҚИМ

### БОБОДЕХҚОНИМ

Ер айланар,  
Ер айланар,  
Ер югуриб тинмайди,  
Яктагингнинг енгларидан  
Тер югуриб тинмайди,  
Қўлинг тегмай бу дунёда  
Битта гиёҳ унмайди,  
Тин билмаган жоним менинг,  
Бободехқоним менинг.

Офтоб чиқар,  
Офтоб ботар,  
Чўғлар сочиб танангга,  
Бир қунгина бормай қўйсанг  
Нима қилар далангга?..  
Бир шонача парвоналар  
Бўлолмайсан болангга,  
Ташнаи нолоним менинг,  
Бободехқоним менинг.

Иш дегани фақат сенга  
Чиққанми ё эй мўмин,  
Қора меҳнат йўргагингдан  
Юққанми ё эй мўмин?  
Онанг сени пахтазорда  
Тукқанми ё эй мўмин?..  
Қадоққўл-товорим менинг,  
Бободехқоним менинг.

Ёруғ юзим,  
Күк ёришиб  
Кетгайдир бир жилмайсанг,  
Дунёларни оқقا ўраб  
Күйганингни билмайсан,  
Уйингда ҳам,  
Тўйингда ҳам  
Пайкалингни ўйлайсан,  
Содда дил — имоним менинг,  
Бободеҳқоним менинг...

Ким толиқди чўл бағрида  
Бўстонларни яратиб,  
Қора денгиз бўйларида  
Ким кезар жон яратиб,  
Минбар тўла гапга чечан  
Нотиқларни сайратиб,  
Ўзи безабоним менинг,  
Бободеҳқоним менинг.

Шийпонларда ўлтирадинг  
Кўтаролмай белингни,  
Семиз вакил мактабидан  
Ҳайдаб келди ўғлингни,  
Кеч куз эди, ечиб бердинг  
Эгнингдаги тўнингни:  
Ол, кийвол, полвоним менинг...  
Бободеҳқоним менинг.

Болажоним,  
Сен-ку келдинг,  
Жонинг ачиб отангга,  
Ҳатто сенинг меҳнатингни  
Билмадилар, аттанг-а...

Пўчоқни ҳам пахта қилиб  
Топширганлар Ватанга!..  
Топгани талоним менинг,  
Бободеҳқоним менинг.

Оlam яралғандан буён  
Деҳқон кимни алдабди,  
Деҳқон қўлин қабартирган  
Кетмон кимни алдабди,  
Ўзбегимнинг пешволари  
Ўзбегимни алдабди...  
Оҳ, лолу ҳайроним менинг,  
Бободеҳқоним менинг.

Соддадилим,  
Сен-да суйиб  
Ишонгандинг уларга,  
Тонгин тонгга улаб меҳнат  
Қилдингми тулкиларга,  
Бир қўлингнинг фурсати йўқ  
Бир қўлингни силарга,  
Меҳнати армоним менинг,  
Бободеҳқоним меннинг.

Жоним бобом,  
Гапир сен ҳам  
Бундоқ ҳолу аҳволинг,  
Балиқ бўлиб уватларда  
Сузиб юрар хаёлинг,  
Сени сотган олчоқларга  
Йўқмиди бир саволинг?..  
Эҳ, оғир карвоним менинг,  
Бободеҳқоним менинг.

Нега хомуш ерга боқдинг,  
Бўйингдан айланайин,  
Шу топда кўнглингдан кечган  
Ўйингдан айланайин:  
Арпа эккан — арпа ўраг,  
Буғдой эккан — буғдойин!..  
Ҳалол тузу ноним менинг,  
Бободеҳқоним менинг.

Замин аро тирикликни  
Бор қилгувчи ўзингсан.  
Ё гулизор  
Ё ташнаи  
Зор қилгувчи ўзингсан,  
Оби ҳаёт таратгувчи  
Буюк сувчи ўзингсан,  
Тинчликка посбоним менинг,  
Бободеҳқоним менинг.

Сен ҳамиша ҳақ томонсан,  
Сен ҳақиқат томонсан  
Инсон зотин ёруғлика  
Етакловчи сорбонсан,  
Ўзинг бемор,  
Ўзинг табиб,  
Ўзинг малҳам, дармонсан,  
Бағри кенг осмоним менинг,  
Бободеҳқоним менинг.

Ер айланар,  
Ер айланар,  
Ер югуриб тинмайди,  
Сенинг ойдек юзларингдан  
Тер югуриб тинмайди,

Қўлинг тегмай бу дунёда  
Битта гиёҳ унмайди,  
Тин билмаган жоним менинг,  
Бободеҳқоним менинг.

Элим ризқи мудом сенинг  
Пешонангнинг терида,  
Элим ризқи етилгайдир  
Юрагингнинг қўрида,  
Савлат тўкиб ўтирганим  
Курултойлар тўрида —  
Беқасам чопоним менинг,  
Бободеҳқоним менинг.

Мен ҳам сенинг тузу нонинг  
Ичиб юрган болангман,  
Шоирман деб қушдай қўниб,  
Учиб юрган болангман,  
Ўзинг билан пайкалда сув  
Кечиб юрган болангман —  
Сенга бу достоним менинг,  
Бободеҳқоним менинг...

## МУНЧОҚ

Мунчоғим, отингни ким қўйди мунчоқ?..  
Майсадек манглайнинг майинки бирам.  
Бегона эмасман, бизлар хамқишлоқ —  
Шу жойда чопқиллаб ўсгандим мен ҳам.

Олифта эгнимдан ўгирма юзни,  
Сенга дардим айтай ҳаммадан олдин.  
Қули бўлмоқчийдим бир гўзал қизнинг,

Шеър деган балога бойланиб қолдим!..

Сиз — итлар бирорни севсангиз агар,  
Итдек содиқдирсиз балки, бир умр.  
Бизлар-чи... Эх, қара, қўлларим титран,  
Бўйнингни қисвордим шекилли, узр.

Дунёнинг ишлари шунака, ошна,  
Одамнинг тафтини ҳайвон олади.  
Сен ўзинг яшайсан кимгадир ташна,  
Сенга ташналаринг қарсак чалади.

Биз битта уруғмиз мен сенга айтсам —  
Шоир ҳам оламда ит каби санқир!..  
Мунчоғим, бўйнингдан менга жуда ҳам  
Қадрдон бир қўлнинг ислари анқир.

Эҳтимол... Эх, яна бошланди титроқ,  
Мен ундан бир умр бўлолмам халос.  
Жон деб ичардиму сен билан озроқ,  
Афсус, ҳамён қуруқ — савлат бор, холос...

Илк севги, илк севги, аччиқ тоғолча,  
Кўнгилдан-кўнгилга томган нурли байт.  
Мен кетдим. Бор, сен ҳам йўлингдан қолма,  
Ҳар ҳолда, бекангга мендан салом айт...

## ҚОРА ҚУЁШ

(Достон)

«Жондан азиз синглим Қумри!  
Мактубингга жавоб ёзаман. Шунинг учун ёзаманки, кечаси соат

түртда эслаб хат ёзганинг учун ёзаман, яна шунинг учунки, ёш қалбингни баҳтсиз маҳбус учун эзиб, ширин уйқунгни бемаъни саргузаштим билан бузганим учун ёзаман. Кўнглингни паришон қилиб, уйқусиз тонг оттирганинг учун ёзаман...

Хат ёзмаганимга сабаб умидсизлик эмас, аксинча умидим порлоқ ва юксак. Очигини айтсам, аччиқ турмушнинг аламли азобидан куйловчи мактубим садоси билан сен каби меҳрибонларим кўнглини йиғлатишдан сақланиш мақсадида хат ёзишдан кечдим...

Юракни тош қилиб бўлса-да унутишларизни сўрайман. Разил ҳаётга кўнигиб қолганимда ширин турмушни эслатмасангиз эди. Мен учун тўккан кўз ёшларингизни эслар эканман, қалбим сиқилади, баҳтсизлигим гавдаланиб кўз олдим қоронғулашадида, туғилганимга қасам ичиб, бор дунёдан кечгим келади...

Кумри, раҳминг келса яна қайта сўрайманки, мени эсдан чиқар, ортиқ мени қийнаб юрагимни эзма...

Эҳтимол, тез кунда кўришармиз. 51-йилга ҳам кўп қолмади. Ўзини менга яқин тутган қариндош ва ёр-дўстларга олдинги хатимда охирги саломимни кўндирган эдим. Яна қайтаришга ўрин йўқ. Опангга айтгинки, мени илтимосимни унутмасин!

Чор-ночор хайрлашиб қолувчи:

Акмал»

Боенгол. 22.XII.46.

**МУАЛЛИФДАН:** Бу хатни мен тасодифан топиб олдим. Шу ҳолида, имлоларини тузатмай, сизга ҳавола этдим.

Эҳтимол, бу мактуб Қумри исмли муштипар аёлга акасидан ёлғиз ёдгордир. Агар шундай бўлса, мен уни эгасига қайтараётганимдан ҳурсандман.

- Умр нима, эй одам?
- Умр йўлдир бир қулоч.
- Армон нима, эй одам?
- Армон ҳам бир эҳтиёж.

— Омад нима, эй одам?  
— Айвондаги қалдирғоч.  
— Орзу нима, эй одам?  
— Бўлди, менинг қорним оч...

— Ёлғон нима, эй одам?  
— Ёлғон — ўт ўсмас дала.  
— Ҳақ нимадир, эй одам?  
— Ҳақиқат — етим бола...

— Севги нима, эй одам?  
— Севгиға йўқ ҳафсала.  
— Бахт нимадир, эй одам?  
— Бахт — бир коса атала...  
Толкосада атала...

— Толкоса нима, эй одам?  
— Толкоса ҳаёт, жўра.  
— Атала нима, эй одам?  
— Сталин бобонгдан сўра!..

\* \* \*

Соқовни қамашди,  
Соқов «душман»ни,  
Сиёсий саводсиз,  
Анқов душманни...

Қамашди,  
Бир кунда,  
Пайсалга солмай.  
Айби аниқ эди,  
Айби маълум эди,

У доҳий отини  
Тұғри айтолмай,  
Ҳамманинг олдида  
«Ишталин» деди!

Соқчига мүлтирап  
Соқов,  
Қалтирап,  
Үлдиришар энди,  
Уни үлдирап.  
Қолди уй,  
Қолди — ғурбатхонаси.  
Гурбатхонасида —  
Қари онаси.

Яна бир зот кетди,  
Шундай қилиб —  
Соқовнинг бошига  
Етди ўз тили...  
Үрмонда отищди,  
Қор эди қалин.  
Йиқилди.  
Хайқириб,  
Яшаш-шин Ишта-лин!

Соқовни отищди,  
Анқовлиги учун.  
Тұғрироғи —  
Тұғма  
Соқовлиги учун.  
Қирқ йил бўлди бунга.  
Эллик йил бўлди-ёв.  
Мана энди,  
Соқовнинг онаси —

## Хақиқий соқов!..

Соқов дудук әди  
Мундай олганда.  
Тиллашса бўларди  
Ўлмай қолганда.

\* \* \*

«Сибирдаги саргардонлик йилларим бир ҳамюртим билан учрашиб қолдим. Йиғлаб кўришдик. Ҳол-аҳвол сўрашдик. Мен уни ҳам ўзимга ўхшаб беайб бадарға бўлганлардан бири эканлигини сезиб турсам ҳам сўрадим:

- Сизни нега камадилар, биродар?
  - Сулаймон Азимовнинг «думи»сан, деб!
  - Кимнинг-кимнинг?
  - Айтдим-ку, Азимовнинг...
- Анчадан кейин бироз ўзимга келиб, секин бориб елкасидан кучдим:
- Уни танийсизми?
  - Йўқ, кўрмаганман...
  - Унда келинг, танишволайлик, — дедим. — Менман ўша сиз айтган одам!..»
- Марказқўмнинг собиқ котиби Сулаймон Азимовнинг хотираларидан.

\* \* \*

Ўттиз еттинчи йил кашфи сизга мана —  
Эркакларга алоҳида қамоқхона,  
Аёлларга алоҳида қамоқхона,  
Болаларга алоҳида қамоқхона...

Ўттиз еттинчи йил кашфи булар бари —

Күрінмасу даҳшат солиб шарпалари,  
Келса — яқын келмай, кетса — кетмай нари,  
Изғиб юрар Лаврентийнинг лайчалари.

Бу ўлкада энди норғул йигитлар йўқ,  
Бойқушлар бор, қалхатлар бор — бургутлар йўқ,  
Не-не Сулаймонлар, Абдулҳамиллар йўқ,  
Қайтармикин? Қайтмоғига умидлар йўқ...

Бедарак йўқолди қанча одам, эсиз,  
Сўроқларда ўлди қанча одам, эсиз,  
Қийноқларда ўлди қанча одам, эсиз,  
Сиртмоқларда қолди қанча одам, эсиз...

\* \* \*

...Унинг учун қамоқхонада энг тансиқ нарса қоғоз эди. У ҳамма жойдан фақат қоғоз қидиради. Бир дақиқа сайрга олиб чиқишиса, деворлар тагида сарғайиб, ғижим бўлиб ётган бир парча қоғоз топиб олиб, боши осмонда, яна зах хонага қайтарди. Тергов пайтида ҳам илинжи шу. Овқат пайти ҳам.

Ана шундай минг машаққатлар билан йиққан қоғозлари бир куни қўлёzmага айланди. Энди уни нима қилиб бўлса ҳам ташқарига, одамларга етказиш зарур эди. Лекин қандай қилиб?

У турма бошлиғига мурожаат қилди. Мени қабул қилишингизни сўрайман, деб қайта-қайта сўрайверди. Ниҳоят бошлиқ зериқди. Қаҳратон қиши кунларининг бирида бошлиқ иссиқ печка олдида, оёқларини чалиштириб ўтириб, унинг арзини тинглади.

— Сиздан ўтиниб сўрайман. Шу қўлёzmани одамлар ўқисин.

Майли, кейинроқ, оқланиб кетсам ёки...

— Бу ёққа бер, — деди бошлиқ ўрнидан турмай.

Соддадил адид, унга қўлёzmани узатди. Бошлиқ қўлёzmани олдию гуриллаб ёниб турган печканинг ичига отди... У яна ўша зах ва қоронғи хонада ўзига келди. «Бу аblaҳнинг олдига мени ким

бошлаб борди? Оёқларимми? Мен уларни ҳозироқ кесиб ташлайман. Наҳот шунча хўрликларни қўриб ҳам қўзим очилмади! Наҳот, бу бошда зарра ақл бўймаса! Наҳотки, у мени жаллоддан ёрдам сўраб боришга ундали! Ҳозир... Ҳозир!...» У даст ўрнидан туриб, югуриб бориб, зарб билан бошини деворга урди. Урди ва яна ураверди. Жони чикиб кетгунча ураверди!.. Ким эди бу адид? Қодирийми?.. Чўлионми? Ёки Усмон Носирми?!

\* \* \*

*Қисқагина умр қўриб, узоқ яшаб келаётган зотларга қаранг...*  
Аҳмад Юғнакий

Тушимга киради Қодирий бобом,  
Бемадор, bemажол, беҳол, беором.  
Эгнига эски бир тўн кийиб олган,  
(Шинелдир балки у, кимдандир қолган).

Ўша тўн эгнида похол ҳам бордай,  
Бобомнинг юzlари оқарган қордай.  
Йўқ, юзи сомонга ўхшайди унинг,  
Чарақлаб тургувчи кўзи тўла мунг...

Тушимга киради Қодирий бобом:  
Тур дейди, мунча кўп ухладинг, болам.  
Бок, бу дам айланиб жўхоризоринг,  
Ўроғин қайрайди онаизоринг.

У ўриб бўлгунча ризқу зарингни,  
Ўйнатиб тур чиқиб, укаларингни.  
Ва менинг саломим айт, дер уларга —  
Бобосин соғинган мусичаларга...

Тушимга киради Абдулло бобом.

Оҳ олтин бобом-а, воҳ тилло бобом.  
Қаро ер қаърида қон йиғлаб қолган  
Акмал Икром бобом, Файзулло бобом!

## II

Ўлган ўлди-кетди.  
Ҳеч ким қайтмайди.  
Нега?  
Нима учун?  
Бу ҳам муаммо.  
Тарих соқов кампир,  
Дардин айтмайди,  
Айтолмас,  
Унугиб ҳам бўлмас аммо.

Мана,  
Қодирийни қилишар сўроқ:  
«Ўтган кунлар» деган шеър сизникими?  
— Ҳа.  
Аммо у шеър эмас...  
— Жим бўлинг, ахир.  
Шеърми ё бошқами, автори сиз-да.  
Тамом.  
Бошқа гапга қолмайди хожат.

Терговчи — пайғамбар,  
Терговчи — худо.  
Темир зотдан келган буйруқ — ижозат,  
Ўзбек яна битта ўғлидан жудо.

Айби шуки...  
Айби...  
Ким билсин буни,

Балки, жуда ноёб истеъдодидир.  
Отишдимикин ё осишли уни?  
Балки, хукм ижрочиси жодидир.

Жоди деганларин билишмас ёшлар,  
Билмагани маңқул бундан кейин ҳам.  
Жоди орасига тушганда бошлар  
Одам...

Кўзимга ёш тўлар мана шу ерда.  
Кўйнимга тош тўлар мана шу ерда.  
Кўзимга тор бўлиб қолади олам,  
Оҳ, олтин бобом-а, воҳ тилло бобом...  
Ўтган кунинг курсин, Абдулло бобом!

\* \* \*

Ўй ёмон.  
Ўй ёмон қийнар одамни.  
Илондек юракни кемирар малъун.  
Урушдан чалажон қайтган отамнинг  
Қирқ йилки, тилидан тушмас Сталин...

Ота,  
Кўйинг, дейман.  
Отажон, қўйинг.  
Умрингиз ўтмоқда кимга ишониб?  
Темир косов билан кўзимни ўйинг,  
Фақат бир илтимос,  
Гапирманг ўшани!..

Ер эса айланар,  
Юмуши мўл Ер.  
Оқар юзларидан

Маржон-маржон тер...  
Үйлайман,  
Заминда энг бахтиёр зот —  
Ёки академик,  
Ёки бесавод.

Бири ўқиганин таҳлилиң сўрмас,  
Бири ўқишига ҳам уриниб кўрмас...  
Ўй ёмон, ўй бу — жар,  
Бу жар қоронғу.  
«Қайт болам!..»  
Отамнинг сўзларимикин?  
Бу зулмат қаърида ёнган не ёғду,  
Файзулло бобомнинг кўзларимикин?

«Сен нима биласан,  
Фарзанди нодон,  
Урушда юртингни асраб қолди ким?..»  
Ишонч қандай унвон,  
Ишонч қандай шон,  
Ул бузрукворимга нима ҳам дердим.

Ўлган ўлди-кетди.  
Энди қайтмайди.  
Нега?  
Нима учун?  
Бу ҳам бир жумбоқ.  
Ота хатосини ўғил айтмайди,  
Айттолмас,  
Унутиб ҳам бўлмас бироқ...

\* \* \*

Йиллар ҳам кўчманчи қалдирғочлардек,

Келар,  
Кетаверар,  
Миң этмай, беун.  
Дунёда мен ёлғиз сиғинган одам  
Элимдир маҳзун.

Үйлайман.  
Уфқлар ортидан бир кун,  
У аста бўйлару  
Кўз тушар кўзга:  
Бегуноҳ узлатга кетганлар учун  
Ким жавоб беради, ўртоқлар бизга?..

Мен нима дегандим,  
Нима дегандим,  
Неларни қилгандим у кун васият?  
Хурматли юртдошлар,  
Азиз бошингизга,  
Сталин — ўзингиз топган мусибат!..

Ўлган ўлди-кетди.  
Ҳеч ким қайтмайди.  
Нега,  
Нима учун,  
Бу энди жумбоқ.  
Тарих — соқов кампир,  
Дардин айтмайди,  
Айттолмас,  
Унутиб ҳам бўлмас аммо.

\* \* \*

— Отанг қани, болам-ов?  
— Отам Сибирга кетган.

- Онанг қани, болам-ов?
- Онам ҳам бирга кетган...
  
- Аканг қани, болам-ов?
- У дунёда ухлайдир.
- Уканг қани, болам-ов?
- Күкрак сўраб йиғлайдир...
  
- Синглинг қани, болам-ов?
- Синглим ётар чалажон.
- Ўғлим бўлгин, болам-ов,
- Нониз борми, онажон?!
  
- Укамни не қиласиз?
- Эчки сути берамиз.
- Синглимни не қиласиз?
- Тутмайиз териб берамиз...
  
- Чолингиз қайда, энажон?
- Чолим Сибирга кетган.
- Ўғлингиз қайда, энажон?
- Ўғлим ҳам бирга кетган.
  
- Энажоним, энам-ов,  
Энди нима қиласиз?
- Энанг ўлсин болам-ов,  
Бир қунимиз кўрамиз!..

\* \* \*

«Синглим Роҳатхон! Уйғунникига бориб, нарсаларимни ол.  
Мадамин Давроннинг уйида пальтом бор. Иброҳим Назирникида  
этигим ҳам. Шуларни олиб келиб, менга киргизиб юбор.  
Кетадиганга ўхшайман...»

Тошкент қамоқхонаси.  
1937 йил. Усмон Носир.

Ватан гар дилга жо бўлса,  
Не истар у бажо бўлса,  
Ким билсин,  
Ким билсин агар,  
Менинг жоним фидо бўлса,  
Тирик юргаймиди ҳозир,  
Усмон Носир, Усмон Носир..

Бахил бўйин эгмиш қачон,  
Оқилга кун тегмиш қачон?  
Ким билсин,  
Ким билсин агар.  
Ёмонга ҳам жазо бўлса,  
Тирик юргаймиди ҳозир,  
Усмон Носир, Усмон Носир.

Ғаним ҳар кимда бор, ғаним,  
Ғанимда йўқ гапим маним.  
Ким билсин,  
Ким билсин агар,  
Дўсту ёрда вафо бўлса,  
Тирик юргаймиди ҳозир,  
Усмон Носир, Усмон Носир.

Жонингдан айланай, юртим,  
Шоиринг кўп экан, кўрдим,  
Ким билсин,  
Ким билсин агар,  
Улардан бир садо бўлса,  
Тирик юргаймиди ҳозир,  
Усмон Носир, Усмон Носир.

## ФАЙЗУЛЛА ХҮЖАЕВ МАРСИЯСИ

Қадим Бухорога лайлаклар келди,  
Ўзингиз қайдасиз, Файзулло бобо?  
Ривоятлар келди, эртаклар келди,  
Ўзингиз қайдасиз, Файзулло бобо?..

Биз-ку эртакни ҳам сургаймиз кўзга,  
Муштоқмиз хабарга, муштоқмиз сўзга,  
Ҳаммадан ҳам кўпроқ муштоқмиз сизга  
Ўзингиз қайдасиз, Файзулло бобо?

Бобоюрт боғлари сиздан хотира,  
Чақнар чироқлари сиздан хотира,  
Кўзёш булоқлари сиздан хотира,  
Ўзингиз қайдасиз, Файзулло бобо?

Қўймадик жойига эъзозингизни,  
Айтмай кетдингиз-ку дил розингизни,  
Тинглаб юрармизу овозингизни,  
Ўзингиз қайдасиз, Файзулло бобо?

Йиғлар Самарқандга сирдош Бухоро,  
Минорида ухлар қуёш Бухоро,  
Ибн Синолари талош Бухоро,  
Ўзингиз қайдасиз, Файзулло бобо?

Тупроқнинг инсонга тортиқлари кўп,  
Тортиғидан жонга оғриқлари кўп,  
Гуллаган воҳанинг нотиқлари кўп,  
Ўзингиз қайдасиз, Файзулло бобо?..

Қадим Бухорога лайлаклар келди,

Ўзингиз қайдасиз, Файзулло бобо?  
Ривоятлар келди, эртаклар келди,  
Ўзингиз қайдасиз, Файзулло бобо?!

\* \* \*

*«Одамлар тақдиди оддий тушлик ёки кечки овқат пайтидаёт ҳал бўларди. Суҳбат орасида кимларнингdir номлари тилга олинарди. Бирдан Сталин: «Лаврентий, чора кўр», деб қоларди. Берия эса бошқа хонага ўтиб, қайгадир қўнғироқ қиласарди. У номларини айтган одамлар шу кечасиёқ қамоққа тушарди...»*

Маршал Жуков хотираларидан.

Эй ғамдан буқчайган уйлари ёғоч,  
Ярми қамоқхона,  
Ярми яланғоч  
Мамлакат, қизларинг яшир олтинсоч —  
Лаврентий Павлович сайр қилмоқда!..

Байрамга қўйилган балиқдек тузлаб,  
Қотиб тур жойингда, вужудинг музлаб,  
Курбонлар устига қурбонлар излаб,  
Лаврентий Павлович сайр қилмоқда.

Бир-бирларин суюб,  
Тик туриб ухлаб,  
Вагон тўла боланг кетмоқда йиғлаб,  
Паравозлар қайга элтмоқда йиғлаб?..  
Лаврентий Павлович сайр қилмоқда.

Уларни кутади майдон тўла дор,  
Бу дорлар остида барча миллат бор,  
Жаллод — қўзойнакли илондек маккор,  
Лаврентий Павлович сайр қилмоқда.

Күтмоқда ишқорлар қуйилган жомлар,  
Бу дўзах жомида ҳар қора шомлар,  
Эриб кетди не-не Акмал Икромлар...  
Лаврентий Павлович сайр қилмоқда.

Юзин бир қўрмоққа тополмай илож,  
Ким отага муҳтож,  
Ким ёрга муҳтож.  
Ким ёлғиз ўғли-ла дийдорга муҳтож,  
Лаврентий Павлович сайр қилмоқда...

Эй, ғамдан букчайган уйлари ёғоч,  
Ярми қамоқхона,  
Ярми яланғоч  
Мамлакат, қизларинг яшир олтинсоч —  
Лаврентий Павлович сайр қилмоқда.

\* \* \*

«...Қизим Зоряни НКВД ходимлари автомобилда Малая Лубянкага олиб кетган экан. Буни биз кейин билдик. Москванинг бу бурчагида 2 ёшдан 16 ёшгача бўлган болалар қамоқхонаси жойлашганди. Ундаги режим катталарницидан фарқ қилмас, болалар саҳарда уйғотилар, иигирма минутлик сайдан сўнг эса сўроққа — терговчи ҳузурига олиб кетиларди...»  
Галина Серебрякова, ёзувчи.  
(«Семья» газетаси, 1988 йил март сони).

Қушлар ҳам уйқудан уйғонмай ҳали,  
Жовдираб бир сафга тизилар бари.  
Мудраб йўлга тушар терговчи сари —  
Икки яшар «халқ душманлари».

Уларнинг гапи йўқ бўрсилдоқларда,  
Уларнинг хаёли — ўйинчоқларда...  
Ўхшайди қоракўл қўзичноқларга —  
Икки яшар «халқ душманлари».

Қўлчаларини қўйиб оёқчасига,  
Ўлтирадар келишгандек боқчасига,  
Мўлтирадар терговчи таёқчасига —  
Икки яшар «халқ душманлари».

Терговчи ҳам асли кимгадир ота,  
Терговчидаги жуда тажриба катта.  
Йўқ айбига иқрор бўлар, албаттаги  
Икки яшар «халқ душманлари».

Йўқ айбига иқрор бўлар ҳаммаси,  
Элнинг суюқ болаларин боласи,  
Элнинг буюқ болаларин боласи,  
Икки яшар «халқ душманлари»...

Кушлар уйқусидан уйғонмай ҳали,  
Жовдираб бир сафга тизилар бари,  
Мудраб йўлга тушар терговчи сари —  
Икки яшар «халқ душманлари».

\* \* \*

*Тухачевскийни Ворошилов ёмон қўради. Унга ҳасад қиласад эди.  
Жуда кўп буюқ саркардаларнинг ўлимидаги унинг қўли бор... Бир куни  
ўша қишлоқларимиз ғоят ғариб аҳволда эканлигини айтиб,  
Хрушчёвга билдиришини сўраганимда у қўнмади. Айтотмайман,  
мени Қизил майдонга дағн этишларини истайман, деди.  
Маршал Жуков хотираларидан.*

Россиянинг ярми хилват ўтлоқлар,  
Майли, бизга бўлсин узлат ўтлоқлар,  
Бизга бўлаверар  
Фақат, ўртоқлар,  
Климентни кўминглар Қизил Майдонга!..

Кўрган куни озор бўлган Россия,  
Ўрмонлари мозор бўлган Россия,  
Мозорлардан безор бўлган Россия,  
Климентни кўминглар Қизил Майдонга.

Ҳаммамиздан кўпроқ «жанг» қилган ўша,  
Душманлар ҳолини танг қилган ўша,  
Бундай иззат учун туғилган ўша —  
Климентни кўминглар Қизил Майдонга...

Хитойда ўлмаган Блюхер қани,  
Қийма-қийма бўлиб чопилди тани.  
Фақат удир асраб қолган Москвани —  
Климентни кўминглар Қизил Майдонга.

Қайси айби учун отилди Якир  
Нонушта устида сотилди Якир,  
Буни ёлғиз ўша билади, ахир —  
Климентни кўминглар Қизил Майдонга.

Климентни кўминглар Қизил Майдонга  
Тупроқда ўзига қолди жой етмай.  
Устига тош қалаб, йифламай-нетмай,  
Климентни кўминглар Қизил Майдонга!

## 37-ЙИЛ ЙИГИСИ

Олов эди, шўх эди ўғлим,

Шамол эди, ўқ эди ўғлим,  
Уйимда нон йўқ эди, ўғлим,  
Энди менинг ҳолим не кечар?

Майли изинг қолсайди, ўғлим,  
Ўғил-қизинг бўлсайди, ўғлим,  
Кўриб кўнглим тўлсайди, ўғлим.  
Энди менинг холим не кечар?

Тўлишган ой, тўлин ой, ўғлим,  
Кетган еринг қайси жой, ўғлим?  
Тилаб олган Турсунбой ўғлим,  
Энди менинг ҳолим не кечар?

Ёниб кетсанг майлийди, ўғлим,  
Чўкиб кетсанг қанийди, ўғлим.  
Айбли бўлсанг қанийди, ўғлим  
Энди менинг ҳолим не кечар?..

Дехқон бўлсанг ўлмасдинг, ўғлим  
Чўпон бўлсанг ўлмасдинг, ўғлим,  
Ёмон бўлсанг ўлмасдинг, ўғлим...  
Энди менинг ҳолим не кечар?

Ўқимай ўл, унмай ўл, ўғлим,  
Ўқиб олим бўлмай ўл, ўғлим,  
Олти тилни билмай ўл, ўғлим!..  
Энди менинг ҳолим не кечар?

\* \* \*

Менга қадрдондир унинг сиймоси  
Тилим тебранмас ҳеч ёмон дейишга.  
У шундай буюкки,

Йүқдир қиёси,  
Қанча буюк бўлса,  
Тубандир шунча...

У — ёруғ дунёда  
Тенги йўқ инсон,  
Қадрдон бегона.  
Ёвуз меҳрибон.  
Унинг бир қўли гул юрагигача,  
Унинг бир қўли қон билагигача!..

Ким ёлғиз боласин тополмай гўрин,  
Қонлар йиғлаб ўтган бўлса доғида,  
Ўша муштипардан сўраш лозим бу —  
Буюк инсон,  
Буюк жаллод ҳақида.

Сўранг,  
Омоч сурган болакайлардан,  
Чиллак оёқларин судрашиб аранг.  
Қирқ биринчи йилда,  
Милтиқ етишмай,  
Асиrlарга тушган  
Аскардан сўранг.

Шунда  
Аён бўлар унинг сиймоси,  
У ярмин қамаган,  
Ярмини қирган.  
Ярмини қўйгану дорларга осиб,  
Қолган ярми билан  
Жангларга кирган!..

Унинг бутун умри

Жұмбоқдан иборат,  
У айни адолат,  
У айни ғорат.  
У оқил бузғунчи,  
У моҳир меъмор —  
Инсон суюгидан солған иморат...

У халқлар қотили,  
Халқлар отаси,  
Тилим тебранмайды  
Ёмон дейишига.  
У шундай улуғки,  
Йүқдир қиёси,  
Қанча улуғ бўлса,  
Тубандир шунча.

Йўқса, айтинг,  
Ким у?  
Йўқса айтинг, ким?  
Ярим халқ қарғару  
Ярим халқ йиғлар.  
Менинг саволимга  
Энг тўғри жавоб —  
Бера олгувчининг ҳаммаси ухлар!..

Менга жуда азиз  
Унинг сиймоси,  
Бир қарасам,  
Йўқдек сира қиёси.  
У бир бағри дарё,  
Бир бағритошдир,  
У бир қуёш  
Аммо —  
Қора қуёшдир!

\* \* \*

- Умр нима, эй одам,
- Умр учиб кетган қуш.
- Армон нима, эй одам?
- Армон эсдан чиққан туш...
  
- Омад нима, эй одам?
- Иккала соғ қўлингдир.
- Орзу нима, эй одам?
- Орзу юрган йўлингдир.
  
- Ёлғон нима, эй одам?
- Ёлғон узун эртакдир.
- Ҳақ нимадир, эй одам?
- Ҳақиқат қон юракдир.
  
- Қайғу нима, эй одам?
- Қайғу ҳам ширин армон.
- Бахт нимадир, эй одам?
- Бахт бир бурда қора нон.
  
- Қора нон нима, эй одам?
- Қора нон — имон, жўра,
- Имон нима, эй одам?
- «Халқ душмани»дан сўра!..

\* \* \*

Тушимга киради Қодирий бобом:  
Болам, оқибатинг йўқ экан, болам...

Бўлса агар менинг гўримни топ, дер,

Келиб очиқ қолган күзимни ёп, дер.

Хаммамизга қабр бир жойдан тегди —  
Бари боболаринг ёнимда, дейди.

Қабрлар қабрга бирлашиб кетган,  
Қўллар бўйинларга чирмашиб кетган,  
Бамисли шоҳдан дув тўкилган бодом —  
Ётар бепоён майдон тўла одам...

Рутубатли Шимол ўрмонларида  
Қайинлар хўнграб қуёшни уйғотар.  
Қаранг, Чўлпонингиз сўнгги маконида  
Бекасам чопонин ёпиниб ётар.

Ётар алпқоматли баҳодирлар қатор,  
Акмаллар,  
Қодирлар,  
Шокирлар ётар,  
Ётар Файзуллолар,  
Ётар Аҳмадлар,  
Худо раҳмат қилгур, худо раҳматлар...

Уларнинг саноғи юлдуздан ҳам кўп,  
Юртим, дилбандингдир ҳар гиёҳ, ҳар чўп,  
Фидоларинг бўлган фарзандларингдир,  
Номдору номсизин хоки пойин ўп!..

1988 йил.

## ХУДБИНГА

Ким-кимга соҳиби санжарман дейди,

Сим-симга мақтаниб — ханжарман дейди,  
Қумурсқа ҳам ўзин аждарман дейди,  
Мен нима ҳам дердим.

Бол берган қўлингга найзасин санча,  
Қилган яхшилигинг билмаган қанча,  
Оқилларин талар қанча тирранча,  
Мен нима ҳам дердим.

Имон йўқ гўшада эҳром қайдадир,  
Қалбга таскин қайда, ором қайдадир,  
Магар жондан кечгин, нима фойдадир?..  
Мен нима ҳам дердим.

Менинг ёзганларим шунчаки ҳавас,  
Менга дилим пошшо — шеърларим эмас,  
Шоир — сен, десам ҳам, қўймасанг, нокас,  
Мен нима ҳам дердим.

Отамдан қолмаган бу назми сўлгин,  
Мен боғда гул эмас — тоғдаги юлғун!  
Кўлингдан келса бор, Навоий бўлгин!..  
Мен нима ҳам дердим.

## ЎРГАНИШ

Юпқагина тўним бор эди.  
Осилишиб қўймади, ечдим,  
Таъна дебон тўнимдан кечдим.  
Тўним-ку кенг, замон тор эди.

Дўппим отамдан ёдгор эди —  
Сандиқларга отдим уни мен,

Икки пулга сотдим уни мен,  
Дўппим янги, замон тор эди.

Беқалбу бенаволар неча  
Оёқ товушидан тош қотдим.  
Сумалагим қайнаган кеча  
Итдек қозон қўриқлаб ётдим...

Бемажолу bemадор эди —  
Қўшнимдан ҳол сўролганим йўқ.  
Мозорига боролганим йўқ...  
Замон ёмон, замон тор эди.

Хўш энди-чи дерсиз, нима ғов?  
Дўппи бошга ўрнашмагандек,  
Тўним энди ярашмагандек,  
Кийсам кулаётгандек бирорв!..

## КОКИЛИНГ

Момом ўриб ўтган соч,  
Ўсиб товоң ўпган соч,  
Ўсиб товоң ўпганда,  
Йиғлаб-йиғлаб кетган соч...  
Кокилинг ким кесди ёр?

Она урфдан ким тонар,  
Бағри дилим ўртанаар,  
Тошга айтсам тўлғонаар,  
Сувга айтсам сув ёнар,  
Кокилинг ким кесди ёр?

Турмасмиди солланиб,

Елкангда турнақатор,  
Кокилингни кесган ул  
Құлларингда қасдим бор,  
Кокилинг ким кесди ёр?..

Кокилинг ким кесди ёр,  
Севгим йўлин тўсди, ёр,  
Менинг кўнглим чўктириб,  
Кимнинг кўнгли ўсди ёр?!  
Кокилинг ким кесди ёр!

## ЎН САККИЗГА КИРГАН ҚИЗ

Бахтинг болиш бошингда,  
Ой ухлайди қошингда.  
Осмонларда юрган қиз —  
Ўн саккизга кирган қиз.

Киприкми бу найзами,  
Янги чиққан майсами,  
Анбари уфурган қиз —  
Ўн саккизга кирган қиз.

Боққа чиқса оқшомлар,  
Изларини шабнамлар  
Қўзларига сурган қиз,  
Ўн саккизга кирган қиз.

Сабо силаб сочини  
Қирқ жуфт қалдирғочини  
Қирқ ёнга учирган қиз,  
Ўн саккизга кирган қиз...  
Ўн саккизга кирган қиз —

Баҳор билан топишиб,  
Ёмғир билан ўпишиб,  
Хаёл билан юрган қиз,  
Ўн саккизга кирган қиз!

## ШОИРЛАР

Шоирлар — куйган қўнгиллар ноласи,  
Ғариб оналарнинг ғариб боласи.

Жами буюкларнинг буюги улар,  
Жами бечоралар ҳам бечораси...

Шоирлар — оҳулар ўтлар даласи,  
Дардли кўнгилларнинг дардли қалъаси.

Улар гоҳ бир оғиз шириң сўз кули,  
Гоҳ дунёни олар бир ибораси.

Улар қулбасидан дўзах бир қадам,  
Жаннат улар икки қошин ораси...

\* \* \*

Баҳорим ўрнини кузлар,  
Олар бир кун, олар бир кун,  
Бу шўх кўзлар, бу чўғ юзлар,  
Сўлғин тортиб қолар бир кун...

Қиров босгач бу бошимни,  
Ким англар кўзда ёшимни,

Булут түсгай қуёшимни,  
Шомим ботиб қолар бир кун.

Жавоб айлаб сўроғига,  
Кирсам мен жаннат боғшга,  
Хурлар юр деб, ётоғига,  
Қўлдан тортиб қолар бир кун.

Парилардан ўзинг кўркам,  
Кўнглим-қу сен билан, эркам,  
Аммо ортга қарай десам,  
Бўйним қотиб қолар бир кун!

## ТАРАҚҚИЁТ

Ерда юрганим йўқ,  
Кўкда учяпман.  
Тунлар севгилим деб,  
Тутун қучяпман.

Мен гул узганим йўқ —  
Йиққаним оғу,  
Мен сув ичганим йўқ —  
Захар ичяпман...

Ўзимники эмас,  
Ўз уйим томи.  
Қизил керосингул,  
Кўчамнинг номи.

Бир том,  
Бир дарвоза  
Битта деворман,

Күшним ичган кеча  
Мен ҳам бедорман.

Күчага чопаман,  
И chim ёнади,  
Кечә қаймоқ ялаб,  
Тишим қонади.

Портловчи моддага  
Үхшар олмалар,  
Үрик еб, үрикка  
Ким ишонади?..

Қани, нокингиздан  
Тортинг отахон,  
Күзим хиралашган,  
Юрагим ёмон.

Қорагилосми бу  
Растангиздаги,  
Ёки жигаримдан  
Оқаётган қон?!

Күкда уchoқ учса,  
Товоним титрап.  
Тушимга қизлармас —  
Кирар гибриidlар.

Шундай узун қўлим  
Қошимга етмас,  
Шундай катта бурним  
Билмайди ҳидлар.

Барча хислатимни

Санаб ўтирмай,  
Бир кун яшолмайман  
Ёлғон гапирмай.

Йигирманчи аср,  
Гапир-чи, иним,  
Наҳот хушомадсиз  
Ўтмаса куним?..

Боқиб сувдан заҳил  
Далаларимга,  
Кўмиламан унсиз  
Нолаларимга.

Мен-ку ўттиздаёқ  
Не бўлсам бўлдим,  
Аммо ачинаман  
Болаларимга...

Тараққиёт!  
Тошдан ясаб бўлсайди,  
Юракни темирдан ясаб бўлсайди.  
Қанийди, ўкинч не, билмаса кўнгил,  
Қанийди, шеър ёзмай яшаб бўлсайди.

## ШАБНАМ

Ўриклар гулини тўкканда баҳор,  
Мени ҳам гоҳида эслайсизми, ёр,  
Илинганим борми сизга илиқлик,  
Ё топган-тутганим эдими озор?  
Мен эса сизни ҳеч унугомадим,  
О, юзи ҳилолим, сарвиқоматим...

Сизни асрар әдим саболардан ҳам,  
Булут етаклаган ҳаволардан ҳам.  
Изсиз қай бағирга кетдингиз сингиб,  
Йигит йилларимга томган эй шабнам?..  
Омадим йўқ менинг, ўзи омадим,  
О, юзи ҳилолим, сарвиқоматим.

Мен гулзор айланган парвона әдим,  
Бир чечак ишқида мастана әдим,  
Ўзим айвон, ўзим остона әдим,  
Ҳозирча дўстона, дўстона дедим...  
Нега юрагимга қулоқ солмадим,  
О, юзи ҳилолим, сарвиқоматим.

Энди қўнгил менга айтмасу сирин,  
Кечалар хўрсиниб яшар яширин.  
Йигит йилларимга томган эй шабнам,  
Ҳаёт қандай аччиқ, хаёл эса ширин!..  
Бўлди. Бундан бошқа ёза олмадим,  
О, юзи ҳилолим, сарвиқоматим...

## БЕШИНЧИ ЎФИЛ

Етмиш юлдуз ёғилиб,  
Ярим ойча тўлолмас,  
Етти янга йиғилиб,  
Битта она бўлолмас,  
Она тирик эшикка  
Ғурбат яқин йўлолмас,  
Менинг эса, бағрим қон,  
Вайронаман, Онажон...

Гарчи биз ёш, ғүр әдик,  
Сиз бор — биз ҳам зёр әдик,  
Бир майизни беш ўғил  
Тенг бўлишиб ер әдик,  
Гоҳ талашсак, ҳақ сўзни  
Онам айтсин дер әдик,  
Тушми энди у замон,  
Ҳайронаман, Онажон...

Тирик юрса волиданг  
Тоққа кучинг етаркан,  
Онанг ўлса, бошингдан  
Офтоб ўтиб кетаркан,  
Жиндеккина алам ҳам  
Тоғдек ботиб кетаркан,  
Кўксим тўла минг армон,  
Тўлғонаман, Онажон.

Онасиз уй — ойсиз тун  
Экан энди ўйласам,  
Қалбни ўртар дардларим,  
Қай бирини сўйласам?  
Сизсиз кўчам бефайз,  
Ҳаловат йўқ уйда ҳам,  
Фариштаси тарк этган  
Остонаман, Онажон.

Ўзинг учун ўл етим!..  
Ўрда ҳам мен, қирда ҳам.  
Кўйлагимда тугма йўқ,  
Тугма бўлса, кир — ёқам.  
Тўрт янгамга қўшилиб  
Турткилайди тўрт оғам,  
Ўз уйимда жонажон,

Бегонаман, Онажон.

Күнгил ўзин тутинган  
Бир меҳрибон қўмсайди,  
Дунёда бир одамга  
Сиринг айтиб бўлсайди,  
Онасизни дўсти ҳам,  
Душмани ҳам алдайди,  
Айтинг ахир, мен кимга  
Ишонаман, Онажон?..

Йўқлигиниз қадамда  
Турад шундай билиниб,  
Нон ёпмайсиз тонглари  
Менга кулча илиниб,  
Сарғаярман сарғайган  
Расмингизга термулиб,  
Зиё истаб зор қақшар  
Парвонаман, Онажон...

Уй тўрида толбешик —  
Акам ётган, мен ётган,  
Шердек-шердек келбатли  
Беш ўғилга асқотган,  
Қайтиб кириб бўлсайди  
Бўлардим жон деб қайтган!..  
Мен бу жойни ҳаммадан  
Қизғонаман, Онажон.

...Яшаяпман шарпадек  
Сезилмай гоҳ, сезилиб.  
Гоҳи кўкка интилиб,  
Гоҳи ерга эгилиб,  
Софинганда шеър ёзиб

Юракларим эзилиб —  
Эл ичра бир шоири  
Девонаман, Онажон.

### ҮФИЛ БҮЛСАНГ...

Үғил бўлсанг ўжар бўл,  
Шамолдек ел, сувдек тош,  
Ҳеч кимсага букма бош  
Чўрткесар бўл, қайсар бўл,  
Олов бизга қариндош —  
Үғил бўлсанг ўжар бўл!..

Үғил бўлсанг ўжар бўл:  
Туғилдингми демак ён,  
Шоҳ қўлида занглаган  
Қилич бўлма ҳеч қачон.  
Ундан кўра битта мард  
Қул қўлида ханжар бўл!..

Үғил бўлсанг ўжар бўл,  
Қолган бари сафсата.  
Эркинг учун, эл учун  
Номусингга навкар бўл.

Етар, бир бор юртингни  
Биз бой бердик гап сота...  
Агар айтсанг қўлимдан  
Келмас бу иш, йўқ, ота,  
Ўзим сени ўлдирай  
Туғилганинг лаҳзада!..

## НЕЧУН...

*Бегижон акамга*

Нечун қуллуқ қилмай Андижонга мен —  
Шу юртда туғилдим, шу юртда ўсдим,  
Агар дўстим бўлса, битта у дўстим —  
Нечун қуллуқ қилмай Андижонга мен!..

Шу азиз тупроқдир, шу қадим қўрғон,  
Дунёга Бобурдек шоҳларни берган,  
Моҳларойимларнинг соchlарин ўрган...  
Нечун қуллуқ қилмай Андижонга мен.

Ёдимга ўт тушсин, этмасам ёдлар —  
Дукчи эшонлари қилгай фарёдлар,  
Уни тавоғ этган Машрабдек зотлар,  
Нечун қуллуқ қилмай Андижонга мен.

Сайлаб юрт ажратмоқ феълимга йироқ,  
Бухор минорлари кўнглим этар тоғ,  
Менга Самарқанд ҳам азиздир, бироқ,  
Нечун қуллуқ қилмай Андижонга мен.

Гарчи менга зулмат унингсиз олам,  
Мен борманми-йўқми унга нима ғам,  
Майли, яхши кунда эсламаса ҳам,  
Нечун қуллуқ қилмай Андижонга мен!..

Тупроғи жаннатдек қилгувчи ғамза  
Мен ўша ям-яшил водийдан майса.  
Минг жоним садаға битта жилмайса —  
Нечун қуллуқ қилмай Андижонга мен.

Мени оқибатсиз билма, эй ғаним,  
Орсиз ортимда түй қилма, эй ғаним.  
Айбим — йўқлаганда боролмаганим,  
Нечун қуллуқ қилмай Андижонга мен.

Ўлмасам ёруғ юз, юзларга кириб,  
Эмаклаб борарман мажолим қуриб,  
Ўлсам ҳам ҳар кун бир гўримдан туриб,  
Нечун қуллуқ қилмай Андижонга мен!..

## БОЙ ҚИЗИ

Бой бувамнинг оши бор,  
Оши тўла тоши бор.  
Бой қизининг биз ғариб  
Қул билан на иши бор...

Қиёматда қулга юз  
Ўгирмайди бой қизи.  
Ўсма ўпган қошидан  
Ўптирмайди бой қизи.

Ўптирса ҳам ўпмасман,  
Ўпсам қадрим йиғлайди.  
Бойга сиринг бой берма,  
Бойда вафо бўлмайди!..

Бой қизини узатдим,  
Бойваччасин кузатдим.  
Кетаман деб у айтди,  
Кетавер деб мен айтдим.

Зорим бору зўрим йўқ

Кетса майли, ёр кетсин,  
Камбағални қамбағал  
Сүйганига не етсин!

## ҚИЗЛАРХОН

Қизлархоним қизларнинг сарасидан,  
Муччи олсам қошларин орасидан.  
Аразласа айланай аразидан —  
Қизлархоним қизларнинг сарасидан.

Қизлархоннинг доғида куйганим рост,  
Үндами ё ўн бирда суйганим рост.  
Кулоғига айтишга бўйим етмай,  
Қўлчасига қўл ташлаб қўйганим рост.

Қизлархон қизлигидан таниш эди,  
Қайда кўрмай қилгани нолиш эди.  
Эринмайин эшитсан нолишини,  
Билагимга тўпиғи болиш эди...

Қизлархоннинг қилиғи ҳам ёқарди,  
Лабларин шаккари тил ёрарди.  
Қўлим тегса қўлига қўзим тиниб,  
Кокил ёйса, кокили гул таарди.

Қизлархон деб не қиздан кечган эдим,  
Ўлсам айрилмай деб онт ичган эдим.  
Қизлархонни қизғаниб ўзимдан ҳам,  
Ўпсан бир бор ўпиб ё қучган эдим...

Сабил севгим энди мен қайга кўмай?..  
Кетиб қолди Қизлархон хайр демай.

Ёшликда күнгил берган ёмон экан —  
Үндами ё ён бирда севмай ўлай!..

\* \* \*

Дарёдек чайқалиб, дарёдек тошиб,  
Түфондек түхтамай умр ўтказдик.  
Иzzат илинжида мансаб талашиб,  
Одамдек яшамай умр ўтказдик.

Топганимиз — гўзал қизлар нигоҳи,  
Қилган ҳадямизнинг бўлмай адоғи,  
Онаизоримиз қабрига гоҳи  
Битта гул тўшамай умр ўтказдик.

Суйганни сийламоқ қўлдан келмади,  
Суймасга суйканиб кўнгил тўлмади.  
Дўст ҳолин сўрмоққа фурсат бўлмади,  
Йўқладик-йўқламай умр ўтказдик.

Кимгадир илиниб олтин деворни,  
Кимдантир қизғандик қишида ҳам қорни  
Қанотига кириб худобезорни,  
Ночорни қўлламай умр ўтказдик.

Иблисни иним деб қучдик гоҳида,  
Аршда арғимчоқлар учдик гоҳида.  
Шайтон билан шароб ичдик гоҳида,  
Faflatдан бўшамай умр ўтказдик...

Ўздан ўтганидан ўзимиз огоҳ,  
Икки елка тўла бир дунё гуноҳ.  
Насиб этгайми энди одамдек ўлмоқ?..

Одамдек яшамай умр ўтказдик.

## ДАРЁ

*Баҳодирга*

Дарё қўйган эдим болам исмини,  
У дарёга чўкиб кетди бир куни...  
Аждар бўлиб сувлар ютди жисмини,  
Энди менга ўғил бўлинг, балиқлар.

Билганимда қўймасдим ҳеч елкамдан,  
Товончаси энди ерга текканда —  
Сойнинг тоши болиш бўлди эркамга,  
Энди менга ўғил бўлинг, балиқлар.

Қўлчаларин силкитиб у bemажол,  
Йиғлаб-йиғлаб оқиб кетди эҳтимол,  
Қирғоққа зор боқиб кетди эҳтимол,  
Энди менга ўғил бўлинг, балиқлар.

Қонхўр дарё қаро қилди кундузим,  
Кўзим нури ўша эди, ёлғизим,  
Бу дунёда қолмади энди изим,  
Энди менга ўғил бўлинг, балиқлар.

От қўйганда нечун кўнглим сезмади:  
Исми билан экан инсон қисмати!..  
Ўз болам-ку ўз бағримда ўсмади,  
Энди менга ўғил бўлинг, балиқлар.

Ўғлим десам ўртанади вужудим,  
Сувни кўрсам сесканади вужудим!..

Құм устида қолди менинг умидим,  
Энди менга ўғил бўлинг, балиқлар.  
Дарё қўйган эдим болам исмини.

## ҲИНДУ ҚЎШИГИ

Чўчқа босиб кетди менинг боғимни,  
Бири-биридан оқ, семиз чўчқалар.  
Нон сўраб ялади ҳаммаёғимни,  
Ҳеч тўйдим демайди бу гўрсўхталар.

Ерларга юмалаб чинқирап хуррам,  
Пайҳон қилиб чаман гулзорларимни.  
Бузади, тер тўкиб мен неки қўрсам,  
Кезади муқаддас мозорларимни.

Қандай олишайин чўчқалар билан,  
Уларнинг аждарлар билан эти бир.  
Уларнинг тузи бир бочкалар билан,  
Уларнинг калласи билан кети бир!..

Чўчқа босиб кетди менинг боғимни,  
Бири-биридан оқ семиз чўчқалар.  
Кўпраклардай талаб ҳаммаёғимни,  
Ҳеч тўйдим демайди бу гўрсўхталар.

Бечора маҳлук деб раҳмим келганди,  
Ёмонлик йўқ эди асло дилимда.  
Боғимни-ку вайрон қилганди, аммо  
Хўриллаб гапир дер менинг тилимда.

Эвоҳ, чўчқалардан безорман бу кун,  
Аlam гулханида ёнмоқда ичим.

Оллоҳ, оллоҳ, ўзинг бир чора қилгин,  
Менинг чўчқаларга етмайди кучим.

## МАЛИКА

О, маликам, Сизга мўмин бир ёр бўлса,  
Ҳар замонда бир қилсангиз иноятлар.  
Изингизга сифинмоққа тайёр бўлса,  
Маъбудадек Сизга қилса ибодатлар!..

Қулдек Сизга содиқ бўлса абад-азал,  
Эртакдаги Юсуфдан ҳам бўлса гўзал.  
Айтса, фақат Сизга атаб айтса ғазал,  
Сўйласа ҳам Сизга сўйлаб ривоятлар.

Қул бўлсаю билдиримаса, либоси зар,  
Номуси йўқ, беномусдан қилса ҳазар.  
Жим тингласа арзи нола қилсангиз гар,  
Ўзи эса қилмаса ҳеч шикоятлар.

Бўйи баланд бўлса, унинг — қадри эмас,  
Елкаси кенг бўлса фақат, сабри эмас.  
Сиз бир дарё, у бўлса шу дарёда хас —  
Измингизда сузса қилиб мақоматлар.

Бундан кўра Тоҳир оққан қути яхши,  
Баъзиларнинг эргаштирган ити яхши.  
Ошингиздан бияларнинг сути яхши,  
Майли, бизга насиб этмаса шу қоматлар.

Севар эдим Сизни, энди суйиб нетдим,  
Ёлғон севги етаклаган ерга етдим.  
Хуш қолсинлар, шунчаки бир келдим-кетдим,

Маликага бўйсунмаган Мұхаммадлар!..

## ШОИР

Фариб деманг шоирни, ғариб,  
Етти қўкка учиши мумкин.  
Етти қават ерни ағдариб,  
Сўзни — қиздек қучиши мумкин!..

Бутун эмас шоирнинг нони,  
Шоирларнинг юраги бутун.  
Қарзин узмай узилмас жони,  
Ҳаққини унутиши мумкин.

Дардин тилга кўчирмас шоир,  
Шоир дардин ютиши мумкин.  
Ҳеч кимни зор куттирмас шоир,  
Шоир юз йил кутиши мумкин.

Шоир агар суйса бировни,  
Севилмаса — суръ севгисин.  
Ёрга ўзи топиб күёвни,  
Тўйда ўйин тушиши мумкин...

Ҳеч кимсага ўхшатмас шоир,  
Бир севганин юрақдан лекин.  
Кўзёшини кўрсатмас шоир —  
Шоир фақат... «ичиши» мумкин!

## МИНГТЕПА ҚЎШИГИ

Ҳар кимса ҳам от қўйсин ўз узлатига,

Ҳар кимга ўз уйи азиз томи билан.  
Зор құлмасин бирорнинг «марҳамат»ига —  
Мингтепани атайлик ўз номи билан.

Эркли элда әрқадир ҳар жони муслим,  
Хар юртнинг ўз эли муслим, жони муслим.  
Ҳар келгінді келса ўзгармасин исмим,  
Мингтепани атайлик ўз номи билан.

Қандай алам отимизни қўйса ёвлар,  
Марғилонлар қаердао Горчаковлар?..  
Бизни азал буколмаган бу синовлар,  
Мингтепани атайлик ўз номи билан.

Унутми ё бу гўшада оққан қонлар,  
Бешигида чирқиллаган болажонлар,  
Қўзғолонлар нега бўлди, қўзғолонлар?..  
Мингтепани атайлик ўз номи билан.

Соғинчлар-ку, санчиқ бўлиб ботар жонга,  
Муштоқман-у, боргим келмас Андижонга.  
Борсам кўзим тушгай тағин бир майдонга —  
Мингтепани атайлик ўз номи билан.

Ҳар ким ўзи қўйсин от ўз неъматига,  
Мард ястанмас номардларнинг наматига,  
Ҳеч бўлмаса Дукчи эшон ҳурматига  
Мингтепани атайлик ўз номи билан.

## НАСИБА

Кун тегмаган бўйнингизда тилла маржон,  
Қақшатдингиз қошингизни суза-суза.

Ай, бировнинг насибаси — Насибажон,  
Ажралишдик, энди қандоқ қиласуза...

Нима бўлса бўлди энди, эй жонажон,  
Пешонадан кўрамиз-да, пешонадан.  
Хаёл билан йўлга чиқиб Фарғонадан,  
Кўчангизга ҳар куни бир келавуза...

Гуноҳ бизда, нолиш йўқ Сиз Гулойимдан,  
Фиштлар қўчган кумдан қурган бинойимдан.  
Энгак қучиб, энди фақат Худойимдан  
Бизга тўзим, Сизга умр тиласуза...

Ёр дегани ёнингда юрса куйманиб,  
Суймасанг ҳам қолар экансан ўрганиб.  
Фақат ҳануз Тошкан деса жон ўртаниб,  
Билдирмасдан тунлар йиғлаб олавуза...

Йиллар йўнар, йиллар қўмар дилда дардни,  
Ранги кетар ҳар қандайин муҳаббатни.  
Унутгансиз сиз албатта Мұхаммадни —  
Бунисини ўзуувузам билавуза!

Кун тегмаган бўйнингизда тилла маржон,  
Қақшатдингиз қошларингиз суза-сузा.  
Ай, бировнинг насибаси, Насибажон,  
Ажралишдик, энди қандоқ қиласуза...

\* \* \*

Менсиз ҳам кунларинг ўтмоқда, эркам,  
Қайга қўл узатсанг етмоқда, эркам,  
Юришларинг қайси маликадан кам,

Фақат қийин бўлди шўрлик юракка...

Менинг ҳам ҳажрингда ёнганим ёлғон,  
Яшарман ўзимча, саройда султон.  
Гўёки йўқ мендан баҳтли бир инсон,  
Зўрлик бўлса бўлди зўрлик юракка.

Энди кўришиб ҳам кўришмасмиз биз,  
Гўё мен ёт йигит, сен бегона қиз,  
На қўллар титрамас, на қизармас юз,  
Эвоҳ, бу қандайин хўрлик юракка!..

Қошинг ўсма ўпсин, кўзингни сурма,  
Буни тақдир дерлар, ёр, лабни бурма,  
Эслама, эслатиб тушимга кирма,  
Жонимни ришталаб минг бир бўлакка.

Гарчи бўлмасам ҳам у кун тўйингда,  
Ёнингда ёру мен бўлдим ўйингда,  
Алпомиш ўғиллар ўстир уйингда,  
Муҳаммадинг қурбон шу бир тилакка!

## ҲАЙРАТ

Тасма-тасма тарихинг  
Тугамас ёзган билан.  
Кўшкингу кўркингни кўз  
Илғамас ёзган билан,  
Ҳар миноринг ости минг  
Игнада қазган билан...  
Сен ўзинг айт, Онажон,  
Сен ўзинг айтгил, Ватан,  
Иншооллоҳ, иншооллоҳ,

Аслингга қайтгил, Ватан.

Мени билганим бекор,  
Мени ёзганим хато,  
Мукка тушган мўйсафи —  
Тангритоғ берсин садо:  
Сенда барча бир мўмин,  
Тенг эди шоҳу гадо,  
Ҳар санам — Момо Ҳаво.  
Ҳар одам — Одам Ато...  
Сен ўзинг айт, Онажон,  
Сен ўзинг айтгил, Ватан,  
Иншооллоҳ, иншооллоҳ,  
Аслингга қайтгил, Ватан.

Қани ул, ҳар пок лафзи бир:  
Ҳикмат улашганларинг,  
Этагин бир ўпгали  
Осмон энгашганларинг,  
Тошга жон этиб ато,  
Сув-ла борса Каъбага,  
Ортидан эргашганларинг?  
Сен ўзинг айт, Онажон,  
Сен ўзинг айтгил, Ватан,  
Иншооллоҳ, иншооллоҳ,  
Аслингга қайтгил, Ватан.

Турфа бу дунёни қўй,  
Кўхна у дунёни айт,  
Жонни жон айлар руҳу  
Руҳдаги зиёдан айт.  
Дуру гавҳарин териб,  
Шомдан айт, Румодан айт,  
Яссавий бободан айт,

Нажмиддин Кубродан айт.  
Сен ўзинг айт, Онажон,  
Сен ўзинг айтгил, Ватан,  
Иншооллоҳ, иншооллоҳ,  
Аслингга қайтгил, Ватан.

Кўрсин у сўқир тарих  
Титган ҳар маҳмадона,  
Бўйрангнинг этагидан  
Тўкилмиш бор анъана.  
Темурнинг жилмайгани —  
Ўттиз элда тантана,  
Алишерга бўйи тенг  
Алишер қайдা яна?..  
Сен ўзинг айт, Онажон,  
Сен ўзинг, айтгил, Ватан,  
Иншооллоҳ, иншооллоҳ,  
Аслингга қайтгил, Ватан.

Етти иқлимини кезиб,  
Ризқ тўкиб абад-азал,  
Зоҳиринг сувдай тиниқ,  
Ботининг — зарбулмасал.  
Топганинг орият-у  
Сочганинг — Тожимаҳал...  
Сен ўзинг айт, Онажон,  
Сен ўзинг айтгил, Ватан,  
Ишооллоҳ, иншооллоҳ,  
Аслингга қайтгил, Ватан.

Барига ўзинг паноҳ,  
Баридан ўзинг воқиф.  
Бири — шайх, бири — нақиб.  
Эл десанг, элдай соҳиб,

Кел десанг, келгай оқиб.  
Эгнига түнлар ёпиб,  
Белга белбоғин тақиб...  
Сен ўзинг айт, Онажон,  
Сен ўзинг айтгил, Ватан,  
Иншооллоҳ, иншооллоҳ,  
Аслингга қайтгил, Ватан.

Аслингга қайтгил фақат,  
Ортга қайтмоқ бўлмасин.  
Айтгин-айтгин бу шараф,  
Кўзингда нурлар сўнмасин,  
Кўнглингда гуллар сўлмасин.  
Сен ўзинг айт, Онажон,  
Сен ўзинг айтгил, Ватан,  
Иншооллоҳ, иншооллоҳ,  
Аслингга қайтгил, Ватан.

Бўлса ҳар кўксида ёл  
Бир боланг йўлбарсюрак,  
Қадди қошингда чўкиб,  
Тоғ бўлур икки бўлак.  
Бас, сенга жони фидо  
Марди майдонлар керак,  
Ботир ўғлонлар керак,  
Қодир ўғлонлар керак...  
Сен ўзинг айт, Онажон,  
Сен ўзинг айтгил, Ватан,  
Иншооллоҳ, иншооллоҳ,  
Аслингга қайтгил, Ватан.

Мен нетиб шоир ўлай,  
Бир қалам ўйнатмасам,  
Жон қадар бир сўз сўраб,

Бир калом шеър айтмасам.  
Дилни минг қўйга солиб,  
Жонни минг тебратмасам,  
Майлими, Муҳаммадинг  
Тонггача ухлатмасам?..  
Сен ўзинг айт, Онажон,  
Сен ўзинг айтгил, Ватан,  
Иншооллоҳ, Иншооллоҳ,  
Аслингга қайтгил, Ватан.

## АЛЛОҲ ГЎЗАЛ

Орази гул, ҳусни ҳилол,  
Аллоҳ гўзал, Аллоҳ гўзал.  
Мутлоқ камол, мутлоқ жамол,  
Аллоҳ гўзал, Аллоҳ гўзал...

Арш аркида султон ўзи,  
Беайбу бенуқсон ўзи.  
Пойига чўқ, ул Зулжалол,  
Аллоҳ гўзал, Аллоҳ гўзал...

Дийдори бир ширин умид,  
Азал вужуд, агад вужуд.  
Кимга аён, кимга хаёл,  
Аллоҳ гўзал, Аллоҳ гўзал...

Наҳри зилол, бағри баҳор,  
Гул чеҳра ёр, нур чеҳра ёр.  
Оромижон, ошуфтаҳол,  
Аллоҳ гўзал, Аллоҳ гўзал...

Тупроққа жон этмиш ато

Момо Ҳаво, одам Ато.  
Лойдан одам ясар қулол,  
Аллоҳ гўзал, Аллоҳ гўзал...

Шоир тилак-таъбим ўшал,  
Руҳим ўшал, Раббим ўшал,  
Аллоҳу акбар, эй Билол,  
Аллоҳ гўзал, Аллоҳ гўзал!..

## ЎЗБЕК ҚИЗЛАРИ

Бу Момо Ҳаводан уларга одат:  
Ушласа гул ушлар қўлини фақат,  
Күёвга чиқмаган ўзбек қизларин  
Ўпса фақат шамол ўпар юзларин.

Бу Момо Ҳаводан уларга одат:  
Нозик белда қирқта кокили қават,  
Силаса ёмғирлар силайди фақат,  
Кўрса фақат осмон кўрап кўзларин —  
Күёвга чиқмаган ўзбек қизларин.

Жилмайса нур ёғар гул ёноқлардан,  
Сир яширап ҳатто қизғалдоқлардан.  
Офтоб ботгандан сўнг хилват боғлардан,  
Беҳуда изламанг сира изларин —  
Күёвга чиқмаган ўзбек қизларин.

Кўнгли дарёдай кенг, меҳри улуғвор,  
Дугонаси Ҳаё, синфдоши Ор.  
Айтинг, фариштадан нима фарқи бор,  
Күёвга чиқмаган ўзбек қизларин?..

Бардоши олдида тоғ — оддий тупроқ,  
Улар этагидан жаннат бир қадам.  
Беайб Парвардигор, дегандек бироқ,  
Йүқ әмас кичкина камчилиги ҳам.  
Севади,  
Күяди,  
Қилади алам,  
Дорга осинг, аммо айтмас бировга.  
Айтмай севишини севганига ҳам,  
Тегиб кетаверар бошқа күёвга!

## ЕТИМ СЕВГИМ

Етим севгим, ким силайди бошингни,  
Ким тушунгай күздан оққан ёшингни.  
Қай чўлларда кезарсан сен сарғайиб,  
Мулзамларсан тополмай сирдошингни.

Хориб чўксанг, чўккан жойинг чўғларми,  
Ёнбошласанг ёқарму ёнбошингни.  
Юпунгина юраркансан мунғайиб,  
Кўриб тоғлар нуарму бардошингни...

Мен-ку, сени кўрмаганга оламан,  
Танимайман, тер дейман бор, тошингни,  
Чунки тушдай унутганман қачонлар  
Узингни ва ўша қаламқошингни...  
Етим севгим, ким силайди бошингни?

## ХУРСАНОЙ ОПА

Катта даргоҳларнинг дарди ҳам катта,

Буни англаганлар англар, албатта.  
Шоҳга суюмли ёр бўлиб ҳам ҳатто  
Хурсанд яшаш қийин, Хурсаной опа!..

Малика қанчалар қайрилмақошdir,  
Унга шунча куйган қўйинда тошdir,  
Шоҳга хушомадгўй — унга кундошdir,  
Хурсанд яшаш қийин, Хурсаной опа.

Бормаса юрт кутар, қандай қўз юмур,  
Келмаса қўнгил ғаш, эт жимир-жимир,  
Муҳтоjлик кўрмай ҳам яшаб бир умр,  
Хурсанд яшаш қийин, Хурсаной опа.

Подшонинг кўксida экан боshингиз,  
Сизнинг кимингиз кўп — қариндошингиз,  
Ким келди оққанда кўздан ёshингиз?..  
Хурсанд яшаш қийин, Хурсаной опа.

Кундуз кечган дўстни кўриб тutoқиб,  
Кечалар эгасиз эҳромга боқиб,  
Сочлари оқарган Илҳомга боқиб,  
Хурсанд яшаш қийин, Хурсаной опа.

Кеча нодончалар қилишиб ҳузур,  
Ҳайкалин тиклашиб, ҳайкалин бузиб,  
Бугун бари келса, сўрашиб узр,  
Хурсанд яшаш қийин, Хурсаной опа.

Ана, фариштангиз турди ҳам гўрдан,  
Жойи тўрда эди — беришди тўрдан,  
Сизда ҳам бор экан манглайды шўрдан,  
Хурсанд яшаш қийин, Хурсаной опа.

У кун қабристонга бордим. Турдим тек,  
Шоҳ ётар ёнида набира ҳам лек —  
Худди Амир Темур билан Улуғбек...  
Хурсанд яшаш қийин, Хурсаной опа.

Бу дард етар Сизга ўла-ўлгунча,  
Бардошингиз тоғдек бўлмаса бунча?  
Ноланг ҳаққа етиб қайтиб келгунча,  
Хурсанд яшаш қийин, Хурсаной опа.

Шеърим ўқиб дерсиз, сенга нима ғам?  
Умримда бир сизни кўрмаганман ҳам.  
Кимда ғам кўп бўлса — у менинг онам!..  
Хурсанд яшаш кийин, Хурсаной опа.

## ГДЛЯН

Алпомиш Чамбилда,  
Гўрўғли гўрда,  
Ҳақиқат бешикда ухларди қотиб.  
Бир жом олтин сўраб,  
Қилич ўйнатиб,  
Кириб келди қашшоқ ўзбек ерига -  
Тельман Хореонович... Берия!..

Уйинг куйди ўзбек,  
Шўринг қуриди.  
Пойгагинг қуриди,  
Тўринг қуриди.  
Деҳқонинг,  
Чўпонинг —  
Пахта чопонинг,  
Ортингдаги ҳамма зўринг қуриди.

Отангни сотишса, изламадинг ҳам,  
Болангни отишса, йиғламадинг ҳам.  
Йиғласанг ҳам пахта териб йиғладинг,  
Қотилга топганинг бериб йиғладинг...

Элим, деб ким куйса —  
Бари қамалди,  
Кимки ерин сүйса —  
Бари қамалди.  
Жаллоднинг ғазнаси тўлгунча зарга,  
Сенинг бўз қўйлагинг минг бор ямалди.

Эй, сен содда халқим,  
Ғамбода халқим,  
Сен бир кун тинган кун олам оч қолар  
Сен бир кетмон урган далангда дунё  
Юз ётиб еса етгай бож қолар.

Сенинг поклигингга шубҳа қилмасман,  
Мен сени билмасам гар — ўғилмасман.  
Фақат бошинг чиқмас мудом меҳнатдан  
Фақат тилинг қачон чиқар, билмасман!.

Алпомиш эртакда,  
Гўрўғли гўрда,  
Тўмарис бешикда ухларди қотиб.  
Бир қоп олтин сўраб қилич ўйнатиб  
Кириб келди мўмин ўзбек ерига —  
Тельман Хореонович... Берия.

## ТИЛЛО САНДИҚ

Баланд жардан ташланди,  
Тилло сандық дарёга.  
Ёрингман деб юзланди,  
Қоработир Зуҳрода.

Тоҳир эмас, бағри хун,  
Оқиб кетди мұхаббат.  
Бу дунёга этагин  
Қоқиб кетди мұхаббат...

Қайсни қувғин қилишди,  
Ул ошиғи шайдони.  
Эрмак килиб кулишди,  
Қон йиғлаган Лайлони.

Мажнун эмас, сахрода,  
Сарсон бўлди мұхаббат,  
Икки кўзи самода,  
Ҳайрон бўлди мұхаббат.

Афсона бўлди, ёҳу,  
Армон бўлди мұхаббат.  
Одамдан безган оҳу,  
Жайрон бўлди мұхаббат.

## КУМУШ

Марғилонда Кумушни кўрдим,  
Кўзига ёш тўлиб турибди.  
Сочларини майдалаб ўриб,  
Отабекни излаб юрибди.

Тонгда туриб қалам қошига

Үсма қўйган экан — қурибди.  
Кўздан оққан аччиқ ёшига,  
Ўсмасини ювиб турибди...

Мени бир ўй қийнайди ёмон,  
Яна юрак ўйнади ёмон.  
Қўйвор замин, қўйвор осмон,  
Мен уйимга етаман қачон?

Учиб келдим уйимга омон,  
Бешёфочда гуллабди ўрик...  
Тошкентга қиз берма, Марғилон —  
Қодирий йўқ. Зайнаблар тирик.

## ҚАДАҲСЎЗ

Офтобсан, сендан  
Бир сояман, Ота.  
Сочни оқ, бағримни  
эса босар ғам.  
Она, сенга нафим  
тегмади ҳатто,  
Остонанг қўриган  
кучугингча ҳам.  
Содик ўшал итни  
дўстдек қучарман,  
Мен бугун кучуклар  
учун ичарман!..

Оlamдан уйингга  
бўйладим, иним,  
Ушоқ жонингда ҳеч  
кўрмадим тиним.

Холинг не кечгани  
хаёлимда йўқ,  
Мен фақат ўзимни  
ўйладим, иним.  
Акалик тўнини энди  
ечарман,  
Мен бугун кичиклар  
учун ичарман!..

Сочига толпопук —  
тож илганларим,  
Ғунчадек ийманиб  
очилганларим.  
Бир уйда туғилиб,  
ўсганим ўшал,  
Дунёга бодроқдек  
сочилганларим —  
Сингиллар —  
суюклар учун ичарман.  
Беозор кийиклар учун ичарман!..

Майли, ёқмаганим, майли ёққаним,  
Майли, хоҳ дўст бўлсин, майли хоҳ ғаним.  
Дилида дард борки, бошида ғавғо,  
Таниганларим-у, танимаганим,  
Мен бугун барини бир-бир қучарман,  
Юраги куюклар учун ичарман!..

Гарчи содда байтим, гарчи тўпори,  
Кўнглимдан тўкилган кўнглимда бори.  
Майли, кутмаса ҳам куйимни ҳеч ким,  
Майли, тутмаса ҳам шеърим хумори.  
Мен-ку, ёздим ёzsам етганча дармон,  
Эртанги буюклар учун ичарман!..

## МИШ-МИШ

Майды мишилардан зирқирап товон,  
Унганмиз-ку, асли битта тупроқдан.  
У куни шеъримни тинглаб, бир нодон  
Мени мақтаб қўйди: фалон қишлоқдан.

Шу бир сўздан туйган ҳузурин кўрсангиз,  
Гўё ойни узиб олган бу одам.  
Бундайлар учраса, юртин сўрсангиз,  
Маҳалласин айтар Африкада ҳам.

Айтинг, хафа бўлай мен яна кимдан?  
Бирор давлат қурав, бирор уй тиклар.  
Асли бир халқлигин билар-у, зимдан  
Нечун, бир-бировин кўролмас улар.

Битта дайр ародан бир тушган кема,  
Бир қирғоқ ер, бир кун сузишдан толсанг.  
Биродар, бунчалар гердайдинг, наҳот,  
«Ўзгани шер билган», нақлин билмасанг?

Бўлинган бўйиснинг ўчгай чироги,  
Ортга бир қайрилинг, мингта қиёс-ку.  
Тўпга тутган куни Тошкентни ёғий,  
Амир Нодирани сўйгани рост-ку...

Унган жойимга-ку, қуллуғим бисёр,  
Софинч тўла дилим айлар минг фахр.  
Аммо бошим силар битта Ватан бор,  
Мен ҳам унинг битта ўғлимани, ахир.

Үйим узаймоқда улғайған сарим,  
Кенгроқ бўлсак, дейман бу кенг дунёда.  
Фарғонада бўлса ярим жигарим,  
Жигаримнинг ярми Сурхондарёда.

Бахмал бўлагига мунчоқ қадалган,  
Бир олтин бешикда ўсган ўзбекмиз.  
Бир пайтлар Жайхун ва Сайхун аталган  
Икки қош остида бир жуфт кўздекмиз...

Майды мишишлардан битта безган — мен,  
Занглаған ханжардек ўтди у жондан,  
Танишиб қўяйлик, Шеърни ёзган мен —  
Мұхаммад ЮСУФман,  
ЎЗБЕКИСТОНДАН!..

## ОҚ ҚЎЧҚОР

Беканг мендан сўрамай  
Пойимга қурбон қилди.  
Жовдираган кўзларинг  
Юрагимни қон қилди.

Оқ қўчқорим, оқ қўчқор,  
Олдингда гуноҳим бор...  
Олмос ханжар ялтираб,  
Тўсиб қўйди қуёшни.  
Кўрдим умримда илк бор  
Қонга томган кўзёшни.  
Қараб турдим сесканмай,  
Кечир, мен бағритошни...

Оқ қўчқорим, оқ қўчқор,

Олдингда гуноҳим бор.  
Наҳот кўзёш кўргали,  
Мен шунчалар йўл босдим?

Жонворим, мен бунчалар  
Иззатталаб эмасдим,  
Мен келсам, сен кетишинг  
Билганимда келмасдим...

Оқ қўчқорим, оқ қўчқор,  
Олдингда гуноҳим бор.  
Бекалар шу: гоҳ суйиб,  
Гоҳ куидириб ўтарлар,  
Қизлигида ўзларин  
Маликадек тутарлар.  
Сўнг оёғинг остига  
Қўчқор сўйиб кутарлар.

Оқ қўчқорим, оқ қўчқор,  
Олдингда гуноҳим бор...  
Бу ҳовлига энди мен  
Сира қайтиб келмайман,  
Қўчқорини қийнаган  
Бекаларни севмайман,  
Ўзим қўчқор шоирман,  
Қўчқор гўштин емайман!..  
Оқ қўчқорим, оқ қўчқор,  
Олдингда гуноҳим бор.

## РАФИҚАМГА

Гулим, сени гулдай асрай олмадим,  
Суйиб, сийолмаган сultonинг бўлдим.

Мехрингни меҳримла оқлай олмадим,  
Нетай сен яхши, мен ёмонинг бўлдим...  
Дорга осгил мени, дорингга шукур,  
Борингга шукурлар, борингга шукур.

Муҳаббат кўшқида сен киму мен ким,  
Сени гоҳ ўкситиб не топди дилим.  
Юзингдан ўпайми энди энтикиб,  
Кўзингдан ўпайми, азиз севгилим...  
Сенсиз қайда қалбга ҳаловат-хузур,  
Борингга шукурлар, борингга шукур.

Тегирмон юрганда тош бошларимда,  
Жоним жон сақлади бардошларингда.  
Довуллар бағримни қақшатган дамлар,  
Музларим эриди оташларингда...  
Қўлимга кўтариб кўргазай меҳр,  
Борингга шукурлар, борингга шукур.

Холбуки, тўрттала томоним ўзинг,  
Осмоним ёритган тобоним ўзинг.  
Дилимнинг тўрида авайлаганим,  
Энг ёруғ орзуим, армоним ўзинг...  
Сени йўлиқтириди ҳазрати Хизр,  
Борингга шукурлар, борингга шукур.

Юракдан раҳматлар айтмайин нечун,  
Ортимдаги нурли изларим учун.  
Шеърларимга берган ҳайрат ҳисларим —  
Ўғилга алишмас қизларим учун...  
Мехрибоним, сенга айтарим шудир —  
Борингга шукурлар, борингга шукур.

Ойдиним, кўнгилда бир кўшк безайлик,

Гулим, юр, дилим, юр, гулзор кезайлик.  
Биз энди түйсак ҳам висолдан түйиб,  
Биз энди безсак ҳам — баҳтдан безайлик...  
Мұхаммад қадрига етмаган эй хур —  
Борингга шукурлар, борингга шукур.

## ТОШКЕНТ

Офтоб туғилади сенинг қароғингда  
Тошкент, оқшоминг-да фусункор.  
Ҳар бир күчанг,  
Ҳар бир япроғингда  
Қодирийнинг ўйчан рухи бор.

Мәхмөндүст деб кимлар таъриф қилмаган,  
Ҳамма мақтоворларнинг ўзинг адоғисан.  
Тошкент, сен миннатни билмаган устоз,  
Ойбек нигоҳисан,  
Ойбек қучоғисан.

Анхор бўйларида қумрилар ўйнар,  
Шоир Ғафур Гулом билган қумрилар.  
Икки минг йил аввал Сағбонни излаб,  
Ҳиндистонни ташлаб келган қумрилар...

Тошкент,  
Она шаҳар,  
Беҳад, бепоён —  
Ўзбекистондаги энг баланд терак.  
Аниқ таърифингни қилмоққа баён  
Улкан юрак керак,  
Улкан-ан юрак керак!

Сенинг кўзларингга термулиб юриб  
Кўшиқлар сўрайман — мен ҳам бир ўғлинг  
Тошкент,  
Эй, миннатни билмаган устоз,  
Бир умр тушмасин елкамдан қўлинг...

## САИД АҲМАД

Йил бўшатар йилга навбатни,  
Чархпалаги айланади арш.  
Сайдасиз Саид Аҳмадни  
Фаришталар айлар парвариш.

Чорбоғ кезар чол, маъюс аммо,  
Ниманидир қўмсаб, ахтариб.  
Қайлардасиз Саида момо,  
Сизсиз бу кун боғлар ҳам,  
ғариб!..

Йўлчаларда йўлга эгилар,  
Сувлар тиниб қолар сукутда.  
Сайдани сўраб беҳилар  
Йифлаб ётар ер билан битта.

Кетар кейин дарди бир тугун,  
Йифлай деса тушунмас даҳа.  
Кулай деса, ўзидан олдин  
Ажинлари отар қаҳ-қаҳа.

Бошига тош ёғилса агар,  
Билдирмайди бу метин одам.  
Ҳамма хурсанд, ўзи зерикар,  
Латифалар айтганида ҳам.

Йил бўшатар йилга навбатни,  
Чархпалаги айланади арш.  
Сайдасиз Саид Аҳмадни  
Фаришталар айлар парвариш.

У жилмаяр, кўзда ёш қалқиб,  
Шивирлайди лаблари бесас:  
Саидалар фаришта, балки  
Фаришталар Саида эмас!...

## МЎМИНЖОН

Мўмин сувчи  
Ғўзага сув тараб юрар,  
Иш пайти юракдан ишлаб,  
Яйраб юрар.  
Бўш пайти ғишишт қуийишга ҳам  
Яраб турар.  
Қишиш пайтида шийпонга ҳам  
Қараб турар...

Мўмин деҳқон —  
Далададир куни билан.  
Гўзасига  
Парвонадир куни билан.  
Офтоб таниш,  
Танададир куни билан...  
Шериклари  
Панададир куни билан.  
Шериклари —  
Пихин ёрган маст туялар.  
Шериклари —

Хачирдан ҳам паст түялар.

Мұминжондан кулишади:  
Содда одам!..  
Мұминжонни қилишади асқиялар.  
Мұмин сувчи  
Бир күн оғриб қолди, тавба,  
Қорнин ушлаб  
Уйига йўл олди зўрға.  
Тут суяди,  
Тол суяди,  
Хотинининг олдига етволди зўрға...

Мұмин дәхқон.  
Мұмин энди ногирон чол.  
Кўзига тик қаролмайди Йўламатол!  
Не бўлди, деб сўролмайди Йўламатол,  
Мұмин — бутун Марҳаматга тирик савол!  
Мұмин энди ғўзага сув тарамайди,  
Иш пайти юракдан ишлаб яйрамайди.  
Бўш пайти ғишт қуишишга ҳам ярамайди,  
Қиши пайтида шийпонга ҳам қарамайди...

## ЯНГИ ЙИЛ ҚЎШИФИ

Далангиз оппоқ қор остида қолди,  
Деҳқонбобо, сиз ҳам энди тин олинг.  
Қўлингиз қабарди, белингиз толди,  
Деҳқонбобо, сиз ҳам энди тин олинг.

Баҳордан буён бир рағбатингиз йўқ,  
Меҳнат қилдингизу миннатингиз йўқ.  
Белни силарга ҳам фурсатингиз йўқ,

Деҳқонбобо, сиз ҳам энди тин олинг.

Осмонга туташди хирмонларингиз,  
Офтобга илашди армонларингиз.  
Қайтиб келгунича карвонларингиз,  
Деҳқонбобо, сиз ҳам энди тин олинг!

Хоҳ Янги йилдир, хоҳ Наврӯз сайлидир,  
Барча байрам асли - Сиз туфайлидир,  
Ёруғ олам асли сиз туфайлидир,  
Деҳқонбобо, Сиз ҳам энди тин олинг...

Далангиз оппоқ қор остида қолди,  
Деҳқонбобо, сиз ҳам энди тин олинг.  
Қўлингиз қабарди, белингиз толди,  
Деҳқонбобо, сиз ҳам энди тин олинг.

## ЯХШИ БОЛА

*Ҳайрулла Саъдиевга*

Боғасига кеч қолмаса — яхши бола,  
Мактабда «икки» олмаса — яхши бола.  
Институтда курсда қолмаса — яхши бола,  
Ҳеч кимга гап қайтармаса — яхши бола...

Билиб турса ҳам билмаса — яхши бола,  
Кўриб турса ҳам кўрмаса — яхши бола,  
Ходимга иш буюрмаса — яхши бола.  
Бошлиқни танқид қилмаса — яхши бола.

Ўз бахтини ўйламаса — яхши бола,  
Қиз бор уйга бўйламаса — яхши бола.

Куймаса-аччиғламаса — яхши бола,  
Севганда қон йиғламаса — яхши бола.

Тұхматчига тик боқмаса — яхши бола,  
Ёлғон тинглаб тутақмаса — яхши бола.  
Қоғозбозга индамаса — яхши бола,  
Порахүрни қийнамаса — яхши бола.

Яхши дейсиз яна қандай ўртоқларни?  
Яхши дейсиз — гоҳида сиз құрқоқларни!  
Мен күряпман майсадаги титроқларни,  
Улар босиб келаверса ўтлоқларни..

Яхши бола. Яхши бола. Яхши бола.  
Мен эса бир ёмон қайсар бахши бола.  
Бундайларни күргани ҳеч күзим йўқдир,  
Бундайларга айтадиган сўзим йўқдир.

Фақат сенга бир сўзим бор, доно халқим,  
Фақат сенга бир тилак, эй, Она халқим.  
Ўғил кўрсанг у «шумболангдек» шўх бўлсин,  
Кўзларида чақнаб турган бир чўғ бўлсин!

## ЎЗБЕКНИНГ АЁЛЛАРИ

Ухламайди тунлари,  
Ой нурлари тарағлан.  
Ўзбекнинг хотинлари  
Фарзанд учун яралган.

Йилдан узун кунлари,  
Ким кўнглини сўролган.  
Ўзбекнинг хотинлари

Меҳнат учун яралган.

Қирқ йил қирғин бўлса ҳам,  
Ўз аҳдида туролган.  
Ўзбекнинг хотинлари  
Тоқат учун яралган.

Ёт олдидан сал нари  
Қачон кокил ўролган.  
Ўзбекнинг хотинлари,  
Иффат учун яралган...

Ўзбекнинг аёллари,  
Ўзбекнинг хотинлари,  
Сувдан ҳалол,  
Гулдан пок,  
Қўллари олтинлари,  
Қай томонга бурса юз,  
Йўллари олтинлари —  
Иzzat учун яралган!

## ОНАМДАН ХАТ

Ўғлим, жигаргўшам, айтгин-чи, наҳот,  
Ачинмайди жонинг онанг ҳолига.  
Мени тўшакларга михлаб қўйди бод,  
Келсанг бир кўрсаму... ўлсам, майлига.

Чакка ўтган эски томга ўхшайман,  
Кўзимдан ёмғирлар тўкилар тинмай.  
Бу ёруғ дунёда борми, билмайман,  
Ўз ўғли йўлига интизор мендай...

Хайҳотдек ҳовлида қолдим бир ўзим,  
Нима хаёлларга бормасман баъзан.  
Соғмисан ишқилиб, кўрқаман, қўзим,  
Подшолар ҳақида шеърлар ёзасан.

Ўйнашиб буларми шоҳлар билан, айт,  
Қишлоқи жонингга шеърдан не хузур?  
Зериксанг — бепоён яйловингга кайт,  
Сиқилсанг — даштларда от чоптириб юр!

Фақат хаёлингдан чиқаргин шеърни,  
(Кимгадир ёқмасмиш чинми-ёлғонми),  
Ахир, сен ёзмасанг ўша Бобурни,  
Шоирнинг уруғи қуриб қолганми?..

Ўғлим, жигаргўшам, айтгин-чи наҳот,  
Ачинмайди жонинг онанг ҳолига?  
Мени тўшакларга михлаб кўйди бод,  
Келиб бир кўтариб чиққин ҳовлига.  
Қўлингда жон бериб ўлсам, майлига...

## ЎҚУВЧИМГА

Боламдайин ширин эди кеча шеърим,  
Видолашдим ҳали ёзиб улгурмайин.  
Сизга етмай нобуд бўлди неча шеърим,  
Бирор йиртди, бирор ёқди билдирмайин.

Олчоқлардан асролмадим боламни мен,  
Кўзи юмуқ кетаверди билмай айбин.  
Қайдин топай кезиб етти оламни мен,  
Кимдин сўрай шеърларимнинг увол, ҳайфин?..

Ким билади, мен ҳам шоир әдим балки,  
Тупроқ бўлиб ётар ерда қўшиқларим.  
Юлдуз бўлиб турар балки кўқда балқиб,  
Кўлга чўкиб кетмиш балки қўнгли яrim.

Не бўлса ҳам асролмадим, менда гуноҳ,  
Боламдайин ширин эди кеча шеърим.  
Бирор йиртди, бирор ёқди билдирамай, оҳ,  
Сизни кўрмай нобуд бўлди неча шеърим!

\* \* \*

Мехрим қаттиқ бўлди  
Қаҳрим қаттиқ бўлди,  
Насиҳатни эса олмадим.  
Ҳарифим суюнди, дўстим куюнди,  
Мен ўз билганимдан қолмадим.

Осоиш ўтмади бирор бир куним,  
Талашиб-тортишиб толмадим.  
«Оғирроқ бўл иним, сипороқ бўл иним...»  
Мен ўз билганимдан қолмадим.

Тенгимни билмасдан бир қизни суйдим,  
Суйдим сира кулмай омадим.  
«Шоҳона яшардик сўзимга кирса...»  
Мен ўз билганимдан қолмадим.

Кувроқ бўл дейиши, ёлғон ҳам керак,  
Жиндек хушомад ҳам...  
Қулоқ солмадим.  
Оқни оппоқ кўрдим, қорани қора,  
Мен ўз билганимдан қолмадим.

Күнглим сезар, энди бу ёғи аён,  
Дўстларим... дўстларим, баҳтли боламан:  
Ё Тошкентда энг зўр шоир бўламан,  
Ё уйимга кетиб, ариқ бўйида  
Ялпизга суюниб ўлиб қоламан!

## ЭЙ ЖУФТИ ҲАЛОЛИМ

Бизни бирорлардан не камимиз бор,  
Эй жуфти ҳалолим, не ғамимиз бор.  
Гарчи боғлар кезиб юрмадик бирга,  
Эсласак арзирли хуш дамимиз бор...

Гарчи мен билан ҳеч йўқдай ишларинг,  
Мен ҳақдадир ҳатто кўрган тушларинг.  
Севдим демасанг ҳам севгинг изҳори —  
Кўзинг тўла меҳр жилмайишларинг.

Мехри садоқати сийму зар санам,  
Мунглиғим, мунисим, муштипаргинам.  
Парвонам сенсану бошимда мудом,  
Қадрингга етмайин келганим алам.

Бир бор қош уймаган қалам қошлигим,  
Сочингдаги оқлар — бағри тошлигим.  
Бир ширин сўз айтмай, битта гул тутмай,  
Сен гулни сўлдирди менинг ёшлигим.

Дардинг олай ёрим, айтгил дардингни,  
Тоғлар кўтаролмас сенинг дардингни.  
Севдим демасам ҳам севгим изҳори —  
Умр ўртасида билдим қадрингни!..

Бизни бошқалардан не қамимиз бор,  
Эй жуфти ҳалолим, не ғамимиз бор.  
Гарчи боғлар кезиб юрмадик бирга,  
Эсласак арзирли хуш дамимиз бор...

## КҮЗМУНЧОҚ

*Ойдинга*

Мүшфиқ қүшдай муштипар,  
Күнгил сири пинҳонсан.  
Шўринг қурсин сингилчам,  
Ўз уйида меҳмонсан...

Омонатдир ота уй,  
Бу хуш чоқлар омонат.  
Кўлингдаги арzon шу  
Кўзмунчоқлар омонат.

Ҳамма сенга қариндош —  
Харидор узилмайди.  
Кўнглингга ким ёқишин  
Ҳатто, онанг билмайди.

Ўзим билан ўзим банд,  
Ёнишларинг кўрмасман.  
Аканг бўлиб мундоқ бир  
Кўнглингни ҳам сўрмасман.

Сен кетарсан кўзга ёш,  
Балдоқ тақиб қўлингга.  
Ёдгор бўлиб қолади

Кўзмунчоғинг синглингга...

## ЎЗИНГДАН ҚЎЙМАСИН, ХАЛҚИМ

Қушдай учиб қучоғингдан дунё кездим,  
Кезиб-кезиб топғанларим соғинч бўлди.  
Қанча олис кетсам шунча қадринг сездим,  
Қайда юрсам ёди меҳринг овунч бўлди.  
Айланайин қаро қошу кўзингдан-а,  
Ўзингдан қўймасин, халқим, ўзингдан-а.

Бирор учун бирорлар туш кўриб бермас,  
Миннат қилмай бир боғ ўтиб ўриб бермас.  
Байрамингда ойлаб базм қилган каслар  
Бошингга иш тушса туриб бермас.  
Номус куйи тушмасин ҳеч бўғзингдан-а,  
Ўзингдан қўймасин, халқим, ўзингдан-а.

Эрк водийси — заҳматларга сийловдир бу,  
Той қоқилиб от бўлгувчи яйловдир бу,  
Ранж чекмасанг нурли, нурли тонглар қайда  
Синовдир бу, балки буюк синовдир бу.  
Бош кетса ҳам қайтма энди сўзингдан-а,  
Ўзингдан қўймасин, халқим, ўзингдан-а.

Болдан ширин татир қора буғдойинг ҳам,  
Ўзингдан бўлса гар шоҳу гадойинг ҳам.  
Бир тану жон, бир-бирингдан рози юрсанг,  
Худойим ҳам сендан рози, худойим ҳам.  
Гоҳи ипак, гоҳи яктақ, бўзингдан-а,  
Ўзингдан қўймасин, халқим, ўзингдан-а.

Эр бошига иш тушса ўт кечгувчиидир,

Чидаймиз-да, бу зақматлар ўткинчидир.  
Хурлигинг ҳақ — қолган бари ўтаверсин,  
Бу дунёда энг ёруғ баҳт — эл тинчидир.  
Айирмасин беминнат нон, тузингдан-а,  
Ўзингдан қўймасин, халқим, ўзингдан-а.

## ЛОЛАҚИЗҒАЛДОҚ

*Шавкат Раҳмон хотирасига*

Мендан нима қолар:  
Икки мисра шеър,  
Икки сандиқ китоб,  
Бир уюм тупроқ.  
Одамлар ортимдан  
Нима деса дер,  
Мен сени ўйлайман  
Ўзимдан кўпроқ —  
Лола, лолажоним,  
Лолақизғалдоқ!

Мен кетсам, ёмондан  
Йироқ бўл, оху,  
Чунки сен чиройли,  
Кўркли бир жувон.  
Ёмон кунлар бир кун  
Яхши бўлар-у,  
Ёмон одам яхши  
Бўлмас ҳеч қачон...  
Яша чегарада  
Турғандек огоҳ,  
Лола, лолажоним,  
Лолақизғалдоқ.

Үйда ётибман-у,  
Сезиб турибман,  
Күкда кетаётир  
Күшлар қайтишиб.  
Хайрлар ёғдириб  
Қанотларидан,  
Хаста шоирига  
Видо айтишиб.  
Бор, менинг учун ҳам  
Уларга құл қоқ —  
Лола, лолажоним,  
Лолақизғалдоқ.

Уларни мен яна  
Күрарманми-а,  
Айвондан одамдек  
Кузатолмадим.  
Куз. Түйлар бошланди.  
Юрагим пора —  
Битта қизимни ҳам  
Узатолмадим...  
Демақ, тақдир экан  
Түй күрмай ўлмоқ,  
Лола, лолагинам,  
Лолақизғалдоқ.

Бироқ, күнглим сезар,  
Мендан кейин ҳам,  
Бир күн бу ҳовлига  
Одам түлади.  
Ҳали түйлар қилиб  
Чарчайсан, эркам,  
Менинг қизларим

Энг баҳтли бўлади!  
Келинлар кўйлаги  
Руҳимдай оппоқ —  
Лола, лолажоним,  
Лолақизғалдоқ.

Гулим, яқинроқ кел,  
Қара, не савдо,  
Бу ажиб ишларни  
Дил лавҳига ёз:  
Кимга қаср етмас,  
Кимга мол-дунё,  
Менга эса ҲАВО  
Етмайди холос.  
Тириклар мудроқда,  
Ўликлар уйғоқ —  
Лола, лолажоним,  
Лолақизғалдоқ.

Кўксим куйиб борар,  
Кўкрак ёнмоқда,  
Айтинг дўхтирларга,  
Ёришса ёрсин!  
Жисм ўз улфати —  
Жондан тонмоқда.  
Бечора жон энди  
Қаерга борсин.  
Энди осмон йироқ,  
Энди ер юмшоқ —  
Лола, лолажоним,  
Лолақизғалдоқ.

Буни ҳаёт дерлар,  
Унутма асло,

Бир күн очиласан,  
Бир күн сўлласан.  
Қалбимда-ку фақат  
Сен эдинг танҳо,  
Қабрим устида ҳам  
Ўзинг бўласан.  
Сен бизнинг севгидан  
Хотира — байроқ,  
Лола, лолажоним,  
Лолақизғалдоқ.

Аёл қалбинг билан  
Сув кеч, олов кеч,  
Ғам келса бошингдан  
Хушинг учмасин.  
Худодан сўрадим:  
Мендан кейин ҳеч,  
Номард кимсаларга  
Ишинг тушмасин.  
Уларнинг қўлида  
Ҳамиша тузоқ,  
Лола, лолажоним,  
Лолақизғалдоқ.

Ишинг тушса, иним  
Мұхаммадга бор,  
Шоирлар ичида  
Ишонганим шу.  
Бироз ичишини  
Айтмаса агар,  
Кўкси тиниқ бола,  
Ҳалол бола у.  
Фақат сал соддароқ,  
Фақат сал ёшроқ,

Лола, лолажоним,  
Лолақизғалдоқ,

Жон сүнгги бошпана  
Топаркан онгда,  
У юрак остида  
Дердим мен бўлсам.  
Ажабланма агар  
Эртага тонгда  
Сени ўпиб, Ўшни  
Қучоқлаб ўлсам!..  
Ўтинчим — тепамда  
Йиғлама узок,  
Лола, лолажоним,  
Лолақизғалдоқ!

## ТАВАЛЛУД

Қирқ йил...  
Қанча қушлар кетиб, қушлар қайтди,  
Менга меҳнат йўргагимдан юққан экан.  
Аранг англаб олдим, соқов акам айтди —  
Онам мени пахтазорда туққан экан.

Соқов дедим. Акам асли дудуқ бир оз,  
Асли шоир ўша ўзи — мен тилмочман.  
Дили тўла дард-у сайролмайди холос,  
У бир булбул бўлса, мен бир қалдирғочман.

Яхшиямки соқов, —  
Аммо доно соқов,  
Сўзни сайлаб ёзгин, кўнгил тўлсин дейди.  
У соғ бўлса бизларга нон тегмасди-ёв,

У соғ бўлса бизларга йўл бўлсин эди...

Юртим, омон бўлсин бари болаларинг,  
Ва уларга доя, туғруқхоналар ҳам.  
Омон бўлсин уфқа туташ далаларинг,  
Далаларда бизни туққан оналар ҳам.

\* \* \*

Бахорда кўп оғир  
Қиқирлаб турса —  
Тиззангга суйкалиб лолақизғалдоқ,  
Беғубор ёшлигинг ўтган жойларда  
Кўлтиқтаёқ билан ҳаккалаб юрмоқ.

Ялонғоч новдалар пичирлаб турса  
Кузда, сукунатга чўкканда чорбоғ,  
Кўп оғир, индамай кетиб бораётган  
Мўмин турналарга боқиб ўй сурмоқ.

Кўп оғир, беғубор қорлар ёққандা,  
Қишида, дала-даштга қўнганда туман  
Сопқонга тегмаган ўқни сийпалаб,  
Урушни эсламоқ, сандалдан чиқмай,  
Хокисор, вафодор хотининг билан.

## ЎЗБЕКИСТОН

О, ота маконим,  
Онажон ўлкам,  
Ўзбекистон, жоним тўшай соянгга.  
Сендай меҳрибон йўқ,

Сенингдек кўркам,  
Римни алишмасман бедапоянгга.

Бир гўша сув бўлса, бир гўша қирлар,  
Қанча юртни кўрдим, қанча тақдирлар.  
Қайга борсам суяб, бошни тик тут деб,  
Тоғларинг изимдан эргашиб юрар.

Кўрдим сулувларнинг энг фарангларин,  
Ё худбинман ё бир содда касман мен:  
Парижнинг энг гўзал ресторанларин,  
Битта тандирингга алишмасман мен.

На гапга кўнайин,  
На тил билайин,  
Кўздан уйқу қочди, дилдан ҳаловат.  
Уч кунда соғинсам нима қилайин?..  
Чала қолар бўлди ҳамма саёҳат.

Билдимки, баридан улуғим ўзинг,  
Билдимки, яқини шу тупроқ менга.  
Баҳорда Бахмалда туғилган қўзинг  
Араб оҳусидан азизроқ менга.

Сен билан ўтган ҳар кун байрам-базм,  
Сенсиз бир он қолсам раҳмим келади.  
Сени билганларга қиласман таъзим,  
Сени билмасларга раҳмим келади.

## ФАРЁД

Кўрмай яшаб кетганлар бор баҳтиёр,  
Билмай яшаб кетганлар бор баҳтиёр.

Биз сен билан қўл ушлашиб юргандик,  
Айб мендами, айб сендами энди ёр?..

Кўришмасдик худойим тенг кўрмаса,  
Кўриштириб сўнг наҳот ҳол сўрмаса.  
Бахт берса-ю, аммо фарзанд бермаса,  
Айб мендами, айб сендами энди ёр?..

Нетай шундай кенг дунёга сиғмасам,  
Боламга деб ўйинчоқлар йиғмасам,  
Тушларимда алла айтиб йиғласам,  
Айб мендами, айб сендами энди ёр?..

Тун чўкса-ю, кўринмаса тонготар,  
Қай томонга ёнбошласам тош ботар,  
Онам олиб қўйган бешик бўш ётар,  
Айб мендами, айб сендами энди ёр?..

Синовми бу ё синоат, билмадим,  
Ё қўниқдим, ё қаноат қилмадим,  
Битта йўргак ювиб дорга илмадим,  
Айб мендами, айб сендами энди ёр?..

Кўнглим ўксир қўйнимга зар тўлса ҳам,  
Уйим агар Тожимаҳал бўлса ҳам,  
Вой болам-а, туғилмаган жон болам!  
Айб мендами, айб сендами энди ёр?..

## ОНА ТИЛИМ

Гарчи зуғум қилганларни ёқтирмадим,  
Шеър ёздиму бўлак ишни қотирмадим.  
Тилим туриб ўз тилимда гапирмадим,

Бир эсласам әзилади бағри-дилим,  
Она тилим, кечир мени, она тилим.

Онам «эркам» деб қучганда тунлар ярим,  
Эрким йўқ деб зирқиради бир жойларим,  
Паровозни ҳансиратган буғдойларим,  
Олтингларим, маъданларим, ипакларим,  
Она тилим, кечир мени, она тилим.

Кимлар учун биз эдик бир бадавийлар,  
Ўзбекни қон қақшатганни ўзбек сийлар,  
Холимизни қон кузатди Яссавийлар,  
Топганимиз ҳандалакдек тилим-тилим,  
Она тилим, кечир мени, она тилим.

Кимдир майда миллат бўлди, кимдир катта,  
Катта миллат — Афандиси йўқдир ҳатто,  
Биз пиёда, биз боққанлар юрди отда,  
Зулм ўтса фақат сендан ўтди зулм,  
Она тилим, кечир мени, она тилим.

Сен бўлмасанг нима бизга силлиқ шеърлар,  
Бу дунёда тилий йўқда дил йўқ дерлар,  
Баҳоинг-ку бериб кетган Алишерлар,  
Юрагимнинг тўридаги сўлмас гулим,  
Она тилим, кечир мени, она тилим.

Бир қарасам ҳар шевангда минг жилолар  
Ҳар новдангда, ҳар мевангда минг жилолар.  
Қодирийлар, Чўлпонлар-у, Абдуллолар,  
Сенинг қайтган кунинг мен туғилган йилим,  
Она тилим, эй муқаддас Она тилим.

\* \* \*

Мен на бойваччаман,  
Мен на султонман,  
Ғарип бир онага ғарип ўғлонман.  
Агар сен ер бўлсанг, мен ундан хоксор,  
Агар сен шер бўлсанг — мен ҳам арслонман.

Кундайин йилларим ўтар тизилиб,  
Бир бошга бир ўлим турар сузилиб,  
Бўйним эгилгунча кетсин узилиб,  
Орият йўлида кўкси қалқонман.

Борингда соянгга сажда этарлар,  
Нонингни еб, қўлинг тишлаб кетарлар.  
Йўғингда кўз қоқмай ташлаб кетарлар,  
Дўст дегандан озор топган инсонман.

Қумга тўлиб қолган гавҳари кўзим,  
Гоҳи тушунмасман ўзимга ўзим.  
Худо бор-ку дейман, ўксинма, Азим,  
Токай бу дунёда юраги қонман.

Дегайлар ёлғизга худойимdir ёр,  
Бу дунёда беклар, у дунёда хор.  
Ўзимдан ҳам содда болаларим бор,  
Бўта етаклаган оғир карвонман!..

## ЮРАК БИЛАН СУҲБАТ

— Соҳиб дилим, нега кунда йиғлайверасан,  
Нега йиғлаб ҳиқ-ҳиқ, юрагингни тиғлайверасан?  
— Кунда шу ҳол, дўсти ҳалол, ҳайронман мен ҳам,

Үпкам түлиб кетар бир қун йиғламай қўйсам.

— Хавотирдамисан, онаизорингданми,

Ё дўстингдан куйганимисан, ё ёрингданми?

— Онам ўлган... Бу иккиси жумбоқ мен учун,

Иккови ҳам менга кўрсатар кучин.

Шундай дамлар йиғламасдан ёзолмайман шеър,

Сенга нима, тўхтаб юриб, уриб туравер.

— Соҳиб дилим, майлига-ю, кўп йиғлайсан-да,

Қараб турсам ҳеч бир яйраб сен қулмайсан-да?!

— Мен шунаقا йиғлоқроқман, ҳамма билади,

Фақат... ўлсам йиғламайман, уят бўлади.

## ТИЛАК

Ҳар кимсанинг бўлсин ўзин бошпанаси,

Ҳар кимса ўз қулбасида даврин сурсин.

Одамни-ку айтмай турай, бу дунёда

Ҳатто, қушнинг ёт бутоқда ини қурсин.

Тирик инсон бир куни оч, бир қун тўқдир,

Бир қун тўқин, бир қун бурда нони йўқдир.

Бир ўғил-ку отасиз ҳам кунин кўргай,

Отаси йўқ ҳалқнинг кўрган куни қурсин!..

Гарчи бошин этгани йўқ эдик бизлар,

Экканидан теккани йўқ эдик бизлар.

Ватанида ватани йўқ эдик бизлар...

Ўша зулмат ўтмиш, сенинг уйинг куйсин.

Ўз элингда энди ҳушинг, ўзинг чоғла,

Ўз кўлингда энди қушинг, ўзинг овла.

Олтинларинг тирноқларинг билан кавла,

Ва йиғиб қўй! Болаларинг учун турсин.

Бешикларга тўлиб кетсин бир ўзбеклар,  
Тили чиқмай кўзи чақнар ҳур ўзбеклар —  
Давлатбеклар, Эътиқодбек, Иймонбеклар  
Бобоҷон, деб соқолларинг силаб турсин.

Мен бу шеърни ёзганим йўқ атай ўйлаб,  
Мен шеър ёздим гуркираган юртга бўйлаб.  
Шундай юртни худойимнинг ўзи қўллаб,  
Шундай юртни худо ўзи асраб юрсин!..

## БИЛОЛИМ

Кечаю кундузи сенда хаёлим,  
Умрим ўртасида топган зилолим,  
Отангга арзанда ўғил бўл, лекин,  
Билиб қўй, сен асли менинг Билолим.

Сенсиз қайга етмиш шоҳ отганларим,  
Топганимдан кўпроқ йўқотганларим,  
Хўп де, булбулчангдан бир ўпиб олай,  
Офтобдан гўзалим, ойдан ҳилолим.

Сенинг келишингни қанча кутдим мен,  
Бобо дейишингни қанча кутдим мен,  
Ҳозирча ўзингга айттолмасман-у,  
Тилинг чиққан кунинг бор бир саволим.

Маконинг тоғларнинг дашту даласи,  
Эй арзанда қизимнинг азиз боласи,  
Алпдай йигит бўлгин, мағрур ва масур,  
Сен давом этказгил менинг сулолим.

Ҳозирча кўзингдан ўпаман, холос,  
Кўлингдан, юзингдан ўпаман холос,  
Салом эй, бахтимга ёғилган ёғду,  
Билиб қўй, сен асли менинг Билолим.

Тезроқ улғай дейман, эй мурғак танча,  
Мендай хоксорни ҳам кўролмас қанча,  
Сенсиз ёлғизлигим тегди жонимга,  
Яшарлар жонимга нишларин санча.

Билиб қўй, ортимда қолар изим сен,  
Жонимга малҳамим, ширин сўзим сен,  
Қорамағиз болам — менинг ўзим сен,  
Мен бир чинор бўлсан, ўзинг — ниҳолим.

## ШОИР ЗАМОНДОШЛАРИ ХОТИРАСИДА

*...Юракларда юрмагини  
Оҳ, олдиндан билган қуш,  
Ҳар ўзбекнинг юрагини  
Ўзиники қилган қуш...*

\* \* \*

**САИД АҲМАД,**  
Ўзбекистон қаҳрамони,  
Ўзбекистон халқ ёзувчиси

Муҳаммад Юсуф покиза инсон эди. У одамларнинг эсини оғдирган, ўйлатган, кулдирган, йиғлатган, топган-тутганини одамлар устидан сочган сахийлик тимсоли эди.

Муҳаммад ҳаммани ўзига дўст деб биларди. Ҳеч кимни бегона қилмасди. Қўлида борини дўстларига тарқатмагунча, чўнтаги бўшаб қолмагунча кўнгли тўлмасди.

Муҳаммад Юсуф тез оғизга тушди. Бирорта шоир унингдек тез ном чиқармаган, номдор бўлмаган. Очифини айтсам, Муҳаммадга кўз тегди. Аслини олганда асл шоирлар узоқ яшамайдилар. Аммо ортидан абадий яшайдиган мерос қолдириб кетадилар. У мана шундай ўлмас мерос қолдириди.

Муҳаммад шеър муҳлислирининг юрагини ўртаб кетди. Энди шоирнинг ўзи йўқ. Аммо Муҳаммад Юсуф деб аталмиш Шеърият бор. Бу шеърият асло завол билмайди.

\* \* \*

**АБДУЛЛА ОРИПОВ,**  
Ўзбекистон қаҳрамони,  
Ўзбекистон халқ шоари:

Ажал якка ов қилади, дейишади. У ҳеч ким билан маслағатлашмас экан, бошқаларнинг иродасини назар-писанд қилмас экан. Бевақт ўлим адабиётимиз гулшанида барқ уриб очилиб, яшнаб турган бир чечакни уздию кетди.

Мұхаммаджонни мархум дейишга ҳеч тилимиз бормайди. Аммо начораки, бу бор гап.

Чинакам шоирнинг қалбida соҳир қуш доимо сайраб туради, деган гапни қўп бора эшитгандик. Ўша қуш айнан Мұхаммаджоннинг юрагида ошиён қурганига мен астойдил ишонганман. Унинг кўзлари ҳам, чехраси ҳам ҳамиша латиф бир куйни хониш қилгандай эди.

Мен Мұхаммаджон билан узоқ йиллар мобайнида ёнма-ён яшадим, ёнма-ён ишладим. Ҳали ёшлиқ йилларидаёқ бунчалик қўп муҳлис орттирган, дўст-оғайниси бисёр ижодкорни кам кўрганман. Санъаткорлар-ку, унинг ҳар бир мисрасини созга олишга тайёр эдилар. Буларнинг сабаби нимада? Биринчи навбатда Мұхаммаджон яхши инсон эди. Яхши инсонларга бошқалар ҳамиша талпинадилар. Одамдан одам узоқлашишини Худойим ҳеч кимга кўрсатмасин.

У обрў талашмас, иззатини сўроқлаб югуриб юришдан ор қиласади. Худди шундоқ яхши инсонгина яхши ижодкор бўлиши табиий ва қонунийдир. Шу каби юксак фазилатлари туфайли Мұхаммад Юсуфни халқимиз ардоқлади. Юртбошимиз оталарча меҳр кўргазди. Унинг хизматларини давлатимиз муносиб баҳолади.

Мұхаммад Юсуф қисқа умр кечирди. Ундан чинакам бетакрор ижодий мерос қолди. Ҳақиқий маънодаги барҳаётлик, завол билмаслик Мұхаммад Юсуф ижодига тааллуқли бўлган десам, иншооллоҳ, хато қилмагайдирман.

Жойинг жаннатда бўлсин, укажоним!

\* \* \*

**ЭРКИН ВОҲИДОВ,**  
**Ўзбекистон қаҳрамони**

Муҳаммад Юсуфни мен таниқли ёзувчи Назир Сафаров орқали таниган эдим. Муҳаммаджон Назир ака хонадонида турад, ёшгина ўсмир йигитчанинг пойтахтдаги илк қадамлари мана шу остонаядан бошланган, бу уйдаги адабий муҳит бўлажак шоирга катта мактаб бўлган эди. Дастлабки шеърларини менга бераётиб, Назир ака шундай деган эдилар: «Мен, Эркинжон, ёзувчиман. Шеъриятдан узоқроқман. Сизга бир илтимосим, Муҳаммаднинг шеърларини ўқиб кўриб, ўзингиз йўл-йўриқ кўрсатсангиз. Машқларида нимадир борга ўхшайди.

Бу озғингина, истараси иссиқ, қорачагина йигитча бир кўришдаёқ мени ўзига тортган эди. Шу ўринда бир нарсани таъкидламоқчиманки, инсон умрининг охиригача илм ўрганади, ҳаёт дарсини ўрганади. Аммо шеър ёзиш илми шундай илмки, уни ўрганиб бўлмайди. У туғма бўлиши керак. Муҳаммаджон туғма истеъдод соҳиби эди. У бу истеъдодни ривожлантириди, ўзига талабчан бўлди.

У пайтларда унинг шеъриятдаги тахаллуси йўқ, Муҳаммаджон Юсупов номи билан ижод қиласарди. Мен «Ёшлиқ» журналининг Бош муҳаррири эдим. У вақтлар ёш шоирларнинг битта, таниқли шоирларнинг уч-тўрт шеърига жой ажратардик. Муҳаммаджоннинг шеърлари бу қобиқни ёриб чиқсан, унга бир саҳифа жой ажратгандик.

У жуда тез оғизга тушди. «Тошкент оқшоми», «Ўзбекистон овози» газеталаридағи фаолияти эса уни яна бошқа оламга олиб кирди. Унинг танқидий йўналишдаги «лукма»лари, кичик-кичик қатралари, бир қатор мақолалари Мақсад Яхшиев номи билан газеталар саҳифаларида тез-тез кўзга ташланадиган бўлди. Сал кейинроқ у Муҳаммад Юсуф номи билан элга танилди.

Муҳаммад Юсуф омадли йигит эди. Гайбуллоҳ ас-Саломдай забардаст олим, улуғ бир инсон хонадонига куёв бўлишида мен катта бир хислат кўраман. Улар руҳан бир-бирларига жуда яқин

инсонлар эди. Парвона нурга интилади. Муҳаммаджон Ғайбулла акага куёв эмас, ўғил бўлди. Улар бир-бирларининг камини тўлдириб, бир-бирларидан куч олиб яшадилар.

Муҳаммаджон бугун орамизда йўқ. Аммо устозлари, яқинлари, фарзандлари хотирасида яхши ишлари, хокисорлиги, меҳрлилиги билан муҳрланиб қолган бўлса, шахсан танигантанимаган мухлислари тасаввурида йиглатадиган, ўйлатадиган, эзгуликка етаклайдиган шеъру қўшиқлари билан яшаб қолади.

\* \* \*

## ҲАЛИМА ХУДОЙБЕРДИЕВА, Ўзбекистон ҳалқ шоури

*Ўзбекистон, юксалтар ёдни,  
Ганж, ҳазина тупроқ қатлари.  
Қўтармоқча қодир, авлодни  
Ухлаб ётган Муҳаммадлари.*

Муҳаммад!

Бир вақтлар Бухоро ҳақида сиз қуйидаги жумлани ёзган эдингиз: «Бухоронинг батамом соғайиб кетиши учун — обидаларнинг, бетакрор қасрларнинг буюк меъмори — Синоси этишмай турибди».

Бугун ҳам мен баъзан баланд давраларда, улуғ ҳалқнинг сайлларида, тантаналарида, оддий кунларида Сизнинг этишмаётганингизни сезиб қоламан. Ахир ким Сиздай мустақилликнинг илк аёзли давларидаёқ «Ҳеч кимга бермаймиз сени, Ўзбекистон», деб кураш майдонларига туша олган эди. Ким элга, юрга меҳру муҳаббатини шу қадар содда, шу қадар суюкли айта олган эди:

*Кўринганни дуолар  
Қиласиз момолар.*

*Ганимга ҳам омонлик  
Тилар бизда момолар.  
Момолар ҳар жойда бор,  
Бизда бори қайдыа бор?*

*Бизнинг бўстон қайдыа бор,  
Шоҳимардан қайдыа бор,  
Сўлим Сурхон қайдыа бор,  
Самарқанд нон қайдыа бор-а,  
Ўзбекистдан қайдыа бор?*

Мен агар биз Сиздан Ватанни севишни, ёрни севишни, ардоқлашни, асрарни ўргандик десам, бу сўзимда қилча муболаға йўқ. Кўзингиз тушган бўлса, забардаст шоирамиз Кутлибека Раҳимбоевада «Айт, қандай севайин»деган сатр бор. Сиз шундай, атрофингиздаги борки мавжудотни жондан севдингиз, қарқарали, нашъу намоли севдингиз. Ўпай дессангиз «пешонаси йўқ қизғалдоқ» дан тортиб, «кўзи тўла ёш жайрон»гача...

Албатта, шеърият аталмиш бу қадимий гулхан атрофида ўтирганларнинг ҳар бири билганини айтади. Аммо биз Сизнинг айтганларингизнинг ҳар сатрига кўзмунчоқ тақиб яшадик. Ўтирганларнинг ҳар бири меъёрига етказиб, кўнгилларга малҳам сатрларни демоқдалар. Аммо ҳали ҳеч ким «Кимда ғам кўп бўлса — у менинг онам» демади. Назаримда, ғамдийдаларга ҳеч биримиз Сизчалик бағримизни очганимиз йўқ. Ғамдийдалик бизга бобомерос хислат, назаримда.

*Ўз қўз ёшим ёмғирида  
Тойиб бораман, —*

деган эдилар Огаҳий ҳазратлари. Ахир одамни одам қиласиган, одам сонига қўшадиган ҳам шу — ғамкашлик, дилшодлик эмасми.

Орият, ғуурур, тиклик ҳақида ҳар биримиз имконимиз қадар

нималардир деганмиз, лекин бирортамиз:

*Бүйнүм әгилгунча кетсін узилиб! —*

демаганмиз. Бундай баланд пардаларга шу қадар осонлик билан чиқыш ҳаммага ҳам насиб қиласвермайды.

Баъзан хиёл бўғиқ овозда шеър ўқншларингиз етишмайди. Телефонларингиз етишмайди. Баъзан кечалари бир-иккиларда телефон жиринглаб қоларди.

— Алло, Ҳалима опа, бугун «Овоз»даги шеърларингизни ўқидим. Зўр. Мен шеърларингизни яхши кўраман. Сизни яхши кўраман.

*Маъюс қуним қўзим тушса,  
Куяр осмон, тушунмайсан.  
Мени само тушунгайдир —  
Сен, эй инсон, тушунмайсан.*

*Куйиб қўксим ўтар бўлсам,  
Оҳар бўлсам, кетар бўлсам.  
Мени дарё тушунгайдир,  
Сен, эй уммон, тушунмайсан.*

*Менинг борим эрур қўнглим,  
Менинг ёрим эрур қўнглим.  
Маъюс, танҳо тушунгайдир,  
Сен, эй хандон, тушунмайсан.*

*Кўнглим гул, қўзларим гулдир,  
Юзим гул, цўлларим гулдир.  
Мени сабо тушунгайдир,  
Сен, эй тўзон, тушунмайсан.*

*Губоримдир бўйи рапхон,*

*Миноримдир, тилим биyrон —  
Мени дунё тушунгайдир,  
Сен, эй нодон, тушунмайсан.*

Хар гал шу шеърингизни ўқий бошлашим билан юрагимга титроқ киради. Назаримда, Жалолиддин Румий ҳазратлари Кўниёнинг сершовқин кўчаларида шу шеър оҳангига мослаб зикр тушаётгандай туюлаверадилар. Бу туйғу фикримга қайдан ўрнашиб қолгани сабабини ўзим ҳам билмайман.

*Маъюс қуним қўзим тушса...*

Ҳа, ҳақиқатдан ҳам Сизнинг қўзингиз маъюс, ўйчан эди. Ҳам ниҳоятда суюмли эди. Агар шундай бўлмаганда Сиз шу ёшда бу қадар юксалмаган, дейиш мумкинки, бутун Ўзбекистон халқининг юрагига кириб, публикани эгаллаб улгурмаган бўлардингиз. Сизни кексаю ёш бирдай яхши қўрарди. Мен учрашувларда кўп бор бу ҳолатнинг гувоҳи бўлганман.

...Ўтган йили баҳорда Сирдарёда, Гулистон театрида учрашув кетаётган эди. Севимли устозимиз Абдулла Орипов катта меҳру муҳаббат билан сизга навбат берганларида қарсак, қийқириқ анча вақтгача театрни ларзага келтириб турди. Сиз шеър кетидан шеър ўқидингиз. Одамлар ора-орада сахнага чиқишар, ёшроқлари қўлингизни олишга интилса, каттароқлари кучоқлаб, ўпид кетишарди.

...Ўшанда қайтишимизда Ўзбекистон халқ шоири Усмон Азимнинг ҳазиллашгани эсимда: «Вой, номард-ей, бутун театр Мұхаммадга хат ёзди-ей, бугун. Бунга юзта хат келганда, бизга иккита келса нима бўпти, а?»

... Қайтишда орқама-орқа машиналарда йўлга чиқдик. Йўл бўйи Сизнинг машинангиз бизнинг машинамизни қувиб, таъқиб қилиб келди. (Биз уч киши — Усмон Азим, Азим Суюн ва мен эдик). Машиналар яқинлашди дегунча Сиз: «Тўхтанглар, ўтирамиз, қаерга шошиласизлар бунча», дердингиз. Ўшанда мен

аәллигимга бордим өчі, «Тезроқ кетмасам бўлмайди. Уйда болаларим ёлғиз эди», деб йигитларни шоширдим. Шу воқеадан кўп ўтмай Сизнинг вафотингиз ҳақида... эшитдим. Ичимда бир томирим чирсиллаб узилиб кетгандай бўлди. Қанчалар ғофилмиз!!!

— Ҳофизларнинг бир кунда сочи оқарди, — деб ёзди ўша кунлари эъзозли шоиримиз Маҳмуд Тоир. Мен бунга ишондим. Шу кунлар эсимга тушди дегунча ўзимни айблайвераман.

Мұхаммад, азизим, биз ғофил бандаларнинг гуноҳимиздан ўтинг! Сафарингизнинг охирлаб келаётгани, неларни дир айтишга шошилаётганингизни қайдан билибмиз.

Тириклар шу, ҳар доим ёнидаги одамни ёнида мангук юради, деб ўйлайди шекилли. Ўзи ҳам мангук юрадигандай гүё... Фожиамиз ҳам шунда.

*Бир арслони ўтди Ўзбекнинг,  
Оҳи қўкка етди Ўзбекнинг,  
Куёш йигла, осмон, аза тут,  
Мұхаммади кетди Ўзбекнинг.*

*Баланд кетди, шонига кетди.  
Жаннатнинг айвонига кетди.  
Турк юкини елкалашай деб,  
Яссавийнинг ёнига кетди...*

\* \* \*

## **ЮЛДУЗ УСМОНОВА, Ўзбекистон халқ артисти**

Мұхаммад Юсуфнинг умри қисқа бўлди. У шу қисқа ҳаётида тутамай, ёниб ижод қилди. Ўзидан ўлмас, адабий мерос қолдирди.

Мұхаммад ака ҳеч кимга ўхшамаган инсон эди. Содда, самимий. Қалби гўзал ва уйғоқ эди. Мен нима учун у кишининг

шеъридан кўп фойдаланаардим? У кишининг шеърларида дард бор эди. Мұхаммад Юсуф халқ дардини тушунарди. Халқ учун, Ватан учун, Мустақиллик учун ёниб ёзарди. Шу билан бирга инсон қалбининг туб-тубидаги дардни топиб ёза оларди. У кишининг юраги халқ юраги билан ҳамоҳанг урадри.

Мұхаммад Юсуф шеърлари орқали нафақат ўзини, балки қанча-қанча ҳофизларни, хонандаларни элга танитди. Шоирнинг ҳар бир сўзи шеър эди. Унинг «Ўзбекистон» шеърини бир эсланг-а! Қандай гўзал, жозибали, кучли қўшиқ бўлди. Ҳатто ёшлар гимнига айланиб кетди. Шундай шеърни битган шоир ўлиши мумкинми?!

Йўқ, асло! У ҳамиша тирик! Бетакрор шеърларида яшайди, қўшиқларимизда яшайверади.

Катта йўқотиш бўлди. Мен учун ҳам, халқ учун ҳам.

\* \* \*

### **МУҲРИДДИН ХОЛИҚОВ (марҳум), Ўзбекистонда хизмат қўрсатган артист**

— Мұхаммад Юсуф ўз ишининг устаси эди. Менинг ижодимда хизматлари беқиёс. «Қизғалдоқ» шеърининг ёзилиш тарихи қизиқ бўлган. Ўшанда шоир билан тоққа дам олишга чиққандик. Ҳаммамиз ўзимиз билан бандмиз. Бир маҳал Мұхаммад aka бир ўзлари четда хаёлга берилиб ўтирибдилар. Ёнларига бориб: «Ҳа, aka, нималарни ўйлаяпсиз?» деб сўрадим.

У: «Муҳриддин, қара, анови қизғалдоқ менга тинчлик бермаяпти. Ўпай десам пешонаси йўқ, узай десам тўкилиб кетади. Бир шеър ёзсан, қўшиқ қиласанми?» дедилар. Кейинроқ ҳаммага машҳур «Қизғалдоқ» қўшиғи яратилди.

Мен бу билан нима демоқчиман, Худо раҳмати ана шундай ўта зийрак, топқир, кузатувчан инсон эди.

\* \* \*

**ФИЁС БОЙТОЕВ,**  
*Ўзбекистонда хизмат қўрсатган артист*

Саксон фоиз қўшиқларим муаллифи Мұхаммад Юсуф эди. «Мұҳабbat йўқ экан дунёда...» деган қўшиғимдан бошлаб у киши билан ҳамкорлик қилганмиз. Ака-уқадек қадрдон эдик. «Онам йиғлар...» қўшиғининг мусиқасини яратишда ҳам, қандай қилиб айтишимгача ўзи устида турган эди. Унинг ёзганлари кўпинча менинг овозимга мос келарди. Шеърлари халқона эди, оҳангини ўзи билан ёзарди.

Кўпинча, у ўзи менга шеърлар илинарди, гоҳида мен Мұхаммад акани тинч қўймасдим, шундай шеър ёзиб беринг, деб мавзуни айтардим.

Шундай одам ўтиб кетганига ишонмайман. Худди тушдай, уйғонсам, Мұхаммад акани кўрадигандай, карахтман. Илоҳим қабри нурга тўлсин шоирнинг!

## МУҲАММАД ЮСУФ

### САЙЛАНМА

*Шеърлар. Достонлар.  
Шоир ҳақида хотиралар*

«Шарқ» нашриёт-матбаа  
акциядорлик компанияси  
Бош таҳририяти  
Тошкент — 2007

Мухаррир Зебо Мирзаҳакимова  
Рассом Темур Саъдулла  
Бадиий мухаррир Анвар Мусахўжаев  
Техник мухаррир Лина Хижсова  
Компьютерда саҳифаловчи Татьяна Огай  
Мусаҳҳих Юлдуз Бизаатова

Диапозитивдан босишга рухсат этилди 01.02.07. Бичими 84x108 1/32. Петербург гарнитураси. Офсет босма. Шартли босма тобоғи 15,12+0,42 зарв. Нашриёт ҳисоб тобоғи 16,9+0,43 зарв. Адади 10000 нусха. Буюртма № 3366. Баҳоси келишилган нархда.

**«Шарқ» нашриёт-матбаа  
акциядорлик компанияси босмахонаси,  
100083, Тошкент шаҳри, «Буюқ Турон» кўчаси, 41-уй.**